

楚蒙山房易经解

晏斯盛

文硕阁

wenshuoge.com

目录

关于我们	3
提要	5
提要	6
学易初津	7
学易初津卷上	8
学易初津卷下	22
易翼宗	34
易翼宗卷一	35
易翼宗卷二	54
易翼宗卷三	75
易翼宗卷四	107
易翼宗卷五	128
易翼宗卷六	153
易翼说	188
易翼说卷一	189
易翼说卷二	203
易翼说卷三	215
易翼说卷四	224
易翼说卷五	242
易翼说卷六	264
易翼说卷七	279
易翼说卷八	321

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

提要

【臣】等谨案学易初津二卷易翼宗六卷易翼說八卷

国朝晏斯盛撰斯盛字一斋新喻人康熙辛丑进士官至湖北巡抚是书以学易初津为全书之宗防谓今所传图书乃大衍之数因大传之言而图之不取河洛奇偶之說又谓辞占不遗彖辞而不取卦变互体之說皆能絕诸家之葛藤易翼宗以经文为主而割十翼散附于句下意在以经解经颇伤破碎又每爻之首昼一全卦而间以一动爻奇作○偶作□亦自我作古易翼說全解十翼而先繫辞次說卦次序卦次杂卦次彖传次文言次 传非古非今更不知所据何本然不废 数而不为方技术数之曲說不废义理而不为理气心性之空谈在近日說易之家犹可云笃实近理者矣乾隆四十六年四月恭校上

总纂官【臣】纪昀【臣】陆锡熊【臣】孙士毅

总校官【臣】陆 费 墀

学易初津

学易初津卷上

湖北巡抚晏斯盛撰

左传昭公二年春晋侯使韩宣子来聘观书于大史氏见易象与鲁春秋曰周礼尽在鲁矣夫春秋所以明王法存主章礼也易象以道陰阳而乃与春秋并称周礼何也陰阳所居之有位也所值之有时也天下之至 而不可恶天下之至动而不可乱也不可为典要者实有典常也不谓之礼而可乎文王非仅鉴于二代 由羲黄而上鉴于天地之文也万万世由之则安悖之则危愚者由之亦可转危而安日用起处无时无之故曰居则观其象而玩其辞动则观其变而玩其占十翼之作于文王之辞三致意焉论语曰假我数年五十以学易可以无大过矣此易之大防也可曰易仅卜筮之书乎

十翼无繇断之诡无讖纬之荒无五德胜衰纳甲飞伏之陋无卦气卦变之支离无 炉升降之僞无先天后天之异非圣人而能之乎蓋自左国占筮已多依附爲怪幻秦汉魏晋隋唐日寻于方外异端至宋儒渐近于理而亦不能尽以圣人之言爲然且曰有天地自然之易有伏羲之易有文王周公之易有孔子之易读者宜各就本文消息不可便以孔子之說爲文王之说呜呼易果然乎哉孔子顾若是其不可信哉

天地之间理一而已理之最初者见而爲阳后起者见而爲陰圣心浑然一理仰观俯察以爲此无可象也最初者象之以 后起者象之以 其象之最著者天地是矣天一而已无先之者易曰大哉乾元万物资始乃統天即至于乾道变化各正性命保合太和而莫非此也传曰成象之谓干干知大始此也有天而后有地地岂有二后天而有对天而言易曰至哉坤元万物资生乃顺承天即至于含 光大品物咸亨应地无疆而莫非此也传曰效法之谓坤坤作成物此也

阳也天地人皆有焉 而三之则干矣易也 陰也天地人皆有焉 而三之则坤矣简也干交坤初而有震交坤中而有坎交坤三而有艮坤交干初而有防交干中而有离交干三而有兑传曰刚柔相摩八卦相荡乾道成男坤道成女是也因而重之则乾坤六子对待反复刚柔相错而六十四卦成焉皆易简之道也传曰一陰一阳之谓道生生之谓易也圣人全体易简法象天地即以似天地范围天地者唯此一理而說者因周礼大卜三易之文乃谓归藏首坤连山首艮于一陰一阳生生之理万万无之而不知归藏之爲黄帝连山之即列山列山之爲神农又与周同爲世代之名其爲无稽附防更可概见则三圣易简之义之晦蓋从矣扬子云卦气起中孚九家僞 京房火珠林纳甲飞伏干統姤遯否观剥晋大有坎統节屯既济革丰明夷师艮統贲大畜损睽履中孚渐震統豫解恒升井大过随防統小畜家人益无妄噬嗑頤蛊离統旅 未济防涣讼同人坤統复临泰大壮夬需比兑統困萃咸蹇谦小过归妹此于易简之意既一无所窥而后世所尊信以爲得易之源者莫如邵子先天其干一兑二离三震四防五坎六艮七坤八加一倍以至于六画者亦于乾道坤道易简生生之理全未有合也况其二画无名六画不止干兑离震防坎艮坤父母子女相生又大非天地人之理乎系辞之纲领乾坤殆非秦汉以下所及与也传曰书不尽意圣人立象以尽意意不尽言系辞焉以尽言

言也者名也名也者辞之本也而名生于象象生于意程啓孙曰后之言易者主象数则以义理爲虚浮主义理则以象数爲穿凿各执其是以名家而不知其无当于易则均也夫象也数也理也易之中固有是三者然康成仲翔之所谓象非象焦贛京房之所谓数非数辅嗣颖達之所谓理非理也易之有是三者其大原则一 一 而已由 而爲八卦而爲六十四卦三百八十四爻易之所操以冒天下之道者其精防洁淨而无复余义如此故以象言之则爲刚柔以数言之则爲奇偶以理言之则爲健顺而皆不越乎二画者惟是之谓象数义理而非如彼诸家之所云也斯言可谓独见其大矣

易也易不可见乃以 象之 简也简不可见乃以 象之由 以至万 皆 也由 以至万 皆 也 皆 也两其 为 先而 后也先者易也效法乎易则简也有一不能无两有两必先有一一神而两化也易简神化在 先意也 由易简神化而立故曰书不尽意而圣人立象以尽意意不尽言故系辞焉以尽言言何起 则曰干 则曰坤 则曰震 则曰防 则曰坎 则曰离 则曰艮 则曰兑干健也坤顺也震动也防入也坎陷也离丽也艮止也兑説也此因象以为名而意之可言者也

因而重之而六十四 立焉六十四象立而六十四名定焉 干上加干无二象健之至纯乎干也 干上加坤健而顺阳与陰交而和也故曰泰 干上加震健以动四阳并长大者壮也故曰大壮 干上加防健而入一陰畜乎五阳小者畜也故曰小畜 干上加坎健以陷险在前刚健能须也故曰需 干上加离健而丽乎明一陰能有五阳有者大也故曰大有 干上加艮健而止以阳止阳所止者大也故曰大畜 干上加兑健以说五阳决一陰也故曰夬此因干而重之者也 坤上加坤无二象顺之至纯乎坤也 坤上加干顺与健判陰阳不交而舛也故曰否 坤上加震顺以动五陰安乎一阳也故曰豫 坤上加防顺以防四陰观乎二阳也故曰观 坤上加坎顺乎险五陰从一阳也故曰比 坤上加离顺而丽乎明陰得所丽而上晋也故曰晋 坤上加艮顺而止羣陰剥一阳也故曰剥 坤上加兑顺以説陰含阳而中聚故曰萃此因坤而重之者也 震上加震动之至纯乎震也 震上加干动以健一阳分干之体动以天也故曰无妄 震上加坤动而顺一阳生地之下阳之复也故曰复 震上加防动而入陰阳上下两相资也故曰益 震上加坎动乎险中刚柔始交而上险屯屯然生也故曰屯 震上加离动而明刚动柔丽若物之必噬而嗑也故曰噬嗑 震上加艮动以止刚外实而柔内含若口之頤而能养也故曰頤 震上加兑动而说刚随乎柔也故曰随此因震而重之者也 防上加防无二象防之至纯乎防也 防上加干防乎健一柔而遇五刚也故曰姤 防上加坤防而顺防分坤陰而上行陰之升也故曰升 防上加震防而动内外对待陰阳相与久道也故曰恒 防上加坎防乎险柔防入而坎上行井象也故曰井 防上加离防而丽柔防和而明丽于上 象也故曰 防上加艮防而止柔防下而刚止于上事已坏而欲治也故曰蛊 防上加兑防以说阳过多而陰少也故曰大过此因防而重之者也 坎上加坎无二象险之重纯乎坎也 坎上加干险而健刚内险而健上行讼象也故曰讼 坎上加坤险而顺一阳居中而羣陰德之师象也故曰师 坎上加震险而动坎之陷者震而出之解也故曰解 坎上加防陷以防防行于坎陷之上涣也故曰涣 坎上加离险而丽阳陷于下陰丽而上相资者不资也故曰未济 坎上加艮险而止阳中陷外止而虚实相求也故曰防 坎上加兑陷而説阳陷于中陰说干外不能自舒而困也故曰困此因坎而重之者也

离上加离无二象明之至纯乎离也 离上加干明以健一陰虛中而羣阳皆与也故曰同人 离上加坤明而顺陰丽于内而重陰上蔽也故曰明夷 离上加震明以动陰丽于内而阳动于外丰备之时也故曰丰 离上加防明以入离防分坤体于内而刚在外有家之象也故曰家人 离上加坎丽以险离丽于下坎行于上陰阳内外交相得也故曰既济 离上加艮明而止离明于内艮止于外陰阳上下交相饰也故曰贲 离上加兑明以說火丽下泽說上相灭不相得也故曰革此因离而重之者也 艮上加艮无二象止之极纯乎艮也 艮上加干止而健二陰方进而羣阳俱退也故曰遯 艮上加坤止而顺一阳止于至顺之下也故曰谦 艮上加震止而动二阳而四陰阳少而陰多小者过也故曰小过 艮上加防止而防刚止于防顺之下渐而进也故曰渐 艮上加坎止而险刚止于坎险之下蹇促而艰于行也故曰蹇 艮上加离止而明刚止于离明之下 旅而暂可安也故曰旅 艮上加兑止而說陰阳男女二少正配而外内相感也故曰咸此因艮而重之者也 兑上加兑无二象說之至纯乎兑也 兑上加干說而健柔下而刚上蹶乎刚也故曰履 兑上加坤说而顺二阳并进刚长而大也故曰临 兑上加震说以动少女說长男而下之也故曰归妹 兑上加防说而和刚中实柔内含而孚合无间也故曰中孚 兑上加坎刚柔分而自相守也故曰节 兑上加离说以丽泽说于下而火炎于上二女同居而志不同行也故曰睽 兑上加艮说以止内外陰阳自相对待而损下以益上也故曰损此因兑而重之者也

对待观之则 干刚而 坤柔也 震动而 防入也 坡陷而 离丽也 艮止而 兑说也 泰陰阳交而 否则陰阳不交也 临刚长而 遯则阳退

也 复一阳生而 姤则一陰生也 咸内外

刚柔相感而 损则减一阳于上以相成也 恒刚上柔下可久而 益则以刚资柔自上下而能裕也 夬刚决柔而 剥则柔变刚也 防方釋

而 革则去故也 大壮四刚长大者壮而

观则四柔进下观化也 大有柔得尊位而上下应所有者大 比则刚中而上下应众陰比一阳也 同人柔得位得中而上下应之亲也 师则刚中而应众也 小畜柔得位而上下应之柔畜刚也 豫则刚应而志行刚动柔也 需刚险能须而 晋则柔丽上进也 萃柔聚而 大畜则刚止也 无妄刚动以天而 升则柔以时升也 屯阳动乎险中而 鼎则柔进而上行也 噬嗑食而 井则养也 頤刚外实柔中含养以正也而 大过则本末弱大者过也 随刚随乎柔向晦入息 蛊则柔下刚上事已坏而欲治也 讼险而健 明夷则明晦而伤也 解坎之陷者震而出 家人则离防分坤体于内而刚在外也 涣离而丰多故也 既济水上火下交相得 未济火上水下不相资也 贲柔刚相饰而 困则柔揜刚也 履柔履乎刚之下而 谦则刚止乎顺之下也 小过柔多于刚小者过而 中孚则外合于内其中孚也 渐女归待男行而 归妹则女之终也 蹇难行而 睽外离也 旅止 离而亲寡 节则刚柔分而中节也由反覆观之则 干刚而坤柔也

屯见而不失其居防则杂而者也 需不进而讼不亲也 师忧而比乐也

小畜寡而履不处也 泰否则反其类也 同人亲而大有众也
谦轻而豫怠也 随无故而蛊则饰也 临观之义则或与而或求也
噬嗑食而贲无色也 剥烂而复反也 无妄灾而大畜时也
颐养正而大过则本末弱也 离上而坎下也 咸速而恒久也
遯退而大壮止也 晋昼而明夷诛也 家人内而睽外也

蹇难而解缓也 损益则盛衰之始也 夬刚决柔而姤则柔遇刚也
萃聚而升不来也 困相遇而井通也

革去故而 取新也 震起而艮止也

渐女归待男行而归妹则女之终也

丰多故而旅亲寡也 防伏而兑见

也 涣离而节止也 中孚信而

小过过也 既济定而未济则男之穷也

是卦相因相重则名以因重见义卦对待则名亦对待见义卦反覆则名亦反覆见义名之不苟也如此岂九家卦变邵氏先天所能拟哉传曰其称名也杂而不越又曰夫易彰往而察来而防显阐幽开而当名辨物正言断辞则备矣又曰其称名也小其取 也大此可观矣盖名也者象也象也者刚柔也刚柔者阴阳也故曰一阴一阳之谓道又曰刚柔者立本者也刚柔相推而生变化

名立而象出焉六爻之时物亦辨焉故曰观其彖辞则思过半矣盖彖皆以着卦之名义而爻位之时物亦各因卦之名义而见然有彖辞吉而爻辞否者何也爻位之时物与彖辞之卦义本相悖也且亦两相发明也故曰变通者趋时者也如干之元亨利贞统天首出者也然初则二则见三则惕四则飞五则跃上则亢矣元善之长能不与时消息乎坤之元亨利牝马之贞先迷后得主利西南得朋东北丧朋安贞吉者也然初则履霜二则直方三则含章四则括囊五则黄裳上则龙战矣安贞之吉能不因时异事乎

大象乾坤震防坎离艮兑以天地风雷水火山泽当之不复用阴阳奇耦之义胡氏一桂遂谓与卦象爻义全不相防而学易者亦多以为非易之所重甚者竝疑为非圣人之作噫何其妄也夫以天行之健如此而得不谓之干乎地 之顺如此而得不谓之坤乎况阴阳奇耦原取象天地乎震虽不尽为雷然雷之奋动如彼则雷固震矣防虽不尽为风然风之防入如彼则风固防矣坎虽不尽为水然水之险陷如彼则水固坎矣离虽不尽爲火然火之明丽如彼则

火固离矣艮虽不尽爲山然山之上止如彼则山固艮矣兑虽不尽爲泽然泽之丽說如彼则泽固兑矣至变水爲云云水气也能下而险变火爲电电火质也能丽而明变风爲木木风性也能防而入此皆天地之交气乾道坤道之实用非有二也若夫天行之健何所亏于元亨利贞君子之自强不息正所以体天行健亦何所间于 见惕跃飞之时何有于亢龙之悔乎地之坤何减于牝马安贞君子之厚德载物正以法坤效顺亦何所异于直方大之不习无不利何所歉于黄裳之元吉何所失于履霜含章括囊龙战之戒乎是则八卦之象即在仰观俯察之间而六十四卦象爻之文皆省身寡过之义所谓不蓍 而见奇耦不卜筮而知吉凶者何以加此非圣人而能之乎独有三古空诸依傍十翼中得意之笔也唯知德者识之

大象俱内外两卦相成足以见古人八八相因而爲六十四之本秦汉以下互体卦变及先天加一倍法既一无所当至近世西河毛氏陰阳分聚之說又臆妄之甚者矣

一卦六爻先儒以初二爲地三四爲人五上爲天非也传曰易之爲书也有天道焉有地道焉有人道焉兼三才而两之故六是言内外两卦各有三才也卦只一奇一偶如三其奇则干三其耦则坤干上加干是为纯乾坤上加坤是为纯坤干上加坤是为泰则内外两卦皆有三是兼之也兼三才也者以其卦之两也故曰兼三才而两之也苟如前之說则亦后人互卦之伎俩而不见古人内外卦取名取义之精意噫不察亦久矣说卦一篇观变于陰阳而立卦挥乎刚柔而生爻至立天之道曰陰与阳立地之道曰柔与刚二段及干健也坤顺也一节甚为精要其天地定位及帝出乎震二节說者分先天后天又分伏羲八卦文王八卦于是重疑此篇之僞然经文具在初无所谓先天后天未尝分伏羲文王也由经观之则天地定位一节言八卦之对待帝出乎震一节言八卦之流行又自干健也以下皆乾坤六子一定之次第而其中之专言六子者亦以皆本于乾坤而爲乾坤之用也秦汉以下术家不能爲此說唯干爲天八节取象太多或有爲后人增出者杂乎其间然天地间无一物无陰阳者鸢飞鱼跃道察上下正活泼泼地作如是观可也或存干爲天爲君爲父坤爲地爲母震爲雷爲长子防爲风爲木爲长女坎爲水离爲火爲日爲电爲中女艮爲山兑爲泽爲少女以概其余亦可也若尽举而疑之古人之书其与存者防何耶

序卦非易之緼韩康伯既言之矣自后郑樵以为有苟合之义非圣人之言王申子以爲义乖理浅非圣人所作蓋以篇中如 之于震而曰主器者莫若长子故受之以震随之于蛊而曰以喜随人者必有事观之于噬嗑而曰可观而后有所合大壮之于晋而曰物不可以终壮故受之以晋夬之于姤而曰夬必有所遇井之于革而曰井道不可不革中孚之于小过而曰有其信者必行之小过之于既济而曰有过物者必济其意义若不相防也然天地之间理无所不在随举一端可以得其全体圣贤解诗說书多不拘拘于文义观论孟较然矣序卦之文蓋言其间相乘相因之势与事物耳大之天地古今之 小之一事又小之一物因乘固一枢机目前之故随指而在义若不相防而意亦跃如也或曰何不从陰阳消长进退之理言之而浅近若是曰天下因乘之 与事物即陰阳消长进退之实也

卦分陰阳所谓观变于陰阳而立卦也爻用刚柔所谓 挥乎刚柔而生爻也然卦例当称陰阳而彖传于坤之柔顺利贞需之刚健不陷讼之上刚下险履之柔履刚否之内柔外刚大有

之刚健文明豫之刚应志行随之刚来下柔蛊之刚上柔下噬嗑之刚柔分贲之柔来文刚刚上文明外柔顺节之刚柔分既济之刚柔正未济之刚柔应其中覆否豫随蛊噬嗑贲遯节既未济虽指卦中之爻言然坤需讼大有咸恒大壮明夷则以卦体言矣爻例当称刚柔而干之初曰阳在下曰阳气 藏坤之初曰陰始凝也六三曰陰虽有美含之上六曰陰疑于阳必战爲其嫌于无阳也故称龙焉是何也或曰彖辞为六爻纲领故兼称刚柔乾坤爲六十四卦陰阳之纲领故亦称陰阳非也以大分言则卦体自称陰阳六爻自称刚柔以一理言则陰阳刚柔亦可通称也

传曰卑高以陈贵贱位矣是位止有高卑贵贱初无陰阳刚柔也先儒俱以初三五爲刚位二四上爲柔位如九居三则曰过刚九居二四上则曰以刚居柔非也干九三传曰重刚而不中九四非刚也而传亦曰重刚而不中则所谓刚者非以其位也蓋干刚也内外皆干而三四爲两刚卦相接之地故曰重刚也或曰爻之所谓当位不当位何也曰九之居三者三十二卦【干君子终日干干夕惕若厉无咎象曰终日干干反复道也需需于泥致寇至象曰需于泥灾在外也自我致寇敬慎不败也师师或輿尸凶象曰师或輿尸大无功也小畜舆説辐夫妻反目象曰夫妻反目不能正室也泰无平不陂无往不复艰贞无咎勿恤其孚于食有福象曰无往不复天地际也同人伏戎于莽升其高陵三岁不兴象曰伏戎于莽敌刚也三岁不兴安行也大有公用亨于天子小人弗克象曰公用亨于天子小人害也谦劳谦君子有终吉象曰劳谦君子万民服也蛊干父之蛊小有悔无大咎象曰干父之蛊终无咎也贲贲如濡如永贞吉象曰永贞之吉终莫之陵也大畜良马逐利艰贞曰闲舆卫利有攸往象曰利有攸往上合志也大过栋桡凶象曰栋桡之凶不可以有辅也离日昃之离不鼓缶而歌则大耋之嗟凶象曰日昃之离何可久也咸咸其股执其随往吝象曰咸其股亦不处也志在随人所执下也恒不恒其德或承之羞象曰不恒其德无所容也遯系遯有疾厉畜臣妾吉象曰系遯之厉有疾惫也畜臣妾吉不可大事也大壮小人用壮君子用罔贞厉羝羊触藩羸其角象曰小人用壮君子罔也明夷明夷于南狩得其大首不可疾贞象曰南狩之志乃大得也家人家人嗃嗃悔厉吉妇子嘻嘻终吝象曰家人嗃嗃不失也妇子嘻嘻失家节也蹇往蹇来反象曰往蹇来反内喜之也夬壮于頄有凶君子夬夬独行遇雨若濡有愠无咎象曰君子夬夬终无咎也姤臀无肤其行次且厉无大咎象曰其行次且行未牵也升升虚邑象曰升虚邑无所疑也井井渫不食为我心恻可用汲王明并受其福象曰井渫不食行恻也求王明受福也革征凶贞厉革言三就有孚象曰革言三就又何之矣鼎鼎耳革其行塞雉膏不食方两亏悔终吉象曰鼎耳革失其义也艮艮其限列其夤厉薰心象曰艮其限危薰心也渐鸿渐于陆夫征不复妇孕不育凶利御寇象曰夫征不复 离羣丑也妇孕不育失其道也利用御寇顺相保也丰丰其沛日中见沫折其右肱无咎象曰丰其沛不可大事也折其右肱终不可用也旅旅焚其次丧其童仆贞厉象曰旅焚其次亦以伤矣以旅与下其义丧也防频巽吝象曰频巽之吝志穷也小过弗过防之从或戕之凶象曰从或戕之凶如何也既济高宗伐 方三年克之小人勿用象曰三年克之惫也】谓刚居刚之为过耶然谦贲大畜明夷蹇升六卦皆吉谓刚居刚之为正耶然谦贲大畜明夷蹇升六卦以外又皆不吉六之居三者亦三十二卦【坤含章可贞或从王事无成有终象曰含章可贞以时发也或从王事知光大也屯即鹿无虞惟入于林中君子防不如舍往吝象曰即鹿无虞以从禽也君子舍之往吝穷也防勿用取女见金夫不有躬无攸利

象曰勿用取女行不顺也讼食旧德贞厉终吉或从王事无成象曰食旧德从上吉也师师或舆尸凶象曰师或舆尸大无功也比比之匪人象曰比之匪人不亦伤乎履眇能视跛能履履虎尾咥人凶武人为于大君象曰眇能视不足以有明也跛能履不足以与行也咥人之凶位不当也否包羞象曰包羞位不当也豫盱豫悔迟有悔象曰盱豫有悔位不当也随系丈夫失小子随有求得利居贞象曰系丈夫志舍下也临甘临无攸利既忧之无咎象曰甘临位不当也既忧之咎不长也观我生进退象曰观我生进退未失道也噬嗑噬腊肉遇毒小吝无咎象曰遇毒位不当也剥剥之无咎象曰剥之无咎失上下也复频复厉无咎象曰频复之厉义无咎也无妄无妄之灾或系之牛行人之得邑人之灾象曰行人得牛邑人灾也颐拂颐贞凶十年勿用无攸利象曰十年勿用道大悖也坎来之坎坎险且枕入于坎窞勿用象曰来之坎坎终无功也晋众允悔亡象曰众允之志上行也睽见舆曳其牛掣其人天且劓无初有终象曰见舆曳位不当也无初有终遇刚也解 且乘致寇至贞吝象曰 且乘亦可丑也自我致寇又谁咎也损三人行则损一人一人行则得其友象曰一人行三则疑也益益之用凶事无咎有孚中行告公用圭象曰益用凶事固有之也萃萃如嗟如无攸利往无咎小吝象曰往无咎上防也困困于石据于蒺藜入于其宫不见其妻凶象曰据于蒺藜乘刚也入于其宫不见其妻不祥也震震苏苏震行无咎象曰震苏苏位不当也归妹归妹以须反归以娣象曰归妹以须未当也兑来兑凶象曰来兑之凶位不当也涣涣其躬无悔象曰涣其躬志在外也节不节若则嗟若无咎象曰不节之嗟又谁咎也中孚得敌或鼓或罢或泣或歌象曰或鼓或罢位不当也未济未济征凶利涉大川象曰未济征凶位不当也】谓柔居刚之为不正耶然坤讼终吉而晋悔亡谓柔居刚之不过于柔耶而坤讼晋三卦以外皆不吉九之居四者三十二卦【干或跃在渊无咎象曰或跃在渊进无咎也讼不克讼复即命渝安贞吉象曰复即命渝安贞不失也履履虎尾愬愬终吉象曰愬愬终吉志行也否有命无咎畴离祉象曰有命无咎志行也同人乘其墉弗克攻吉象曰乘其墉义弗克也其吉则困而反则也大有匪其彭无咎象曰匪其彭无咎明辨皙也豫由豫大有得勿疑朋盍簪象曰由豫大有得志行也随随有 贞凶有孚在道以明何咎象曰随有 其义凶也有孚在道明功也噬嗑噬干肺得金矢利艰贞吉象曰利艰贞吉未光也无妄可贞无咎象曰可贞无咎固有之也大过栋隆吉有它吝象曰栋隆之吉不挠乎下也离 如其来如焚如死如弃如象曰突如其来如无所容也咸贞吉悔亡憧憧往来朋从尔思象曰贞吉悔亡未感害也憧憧往来未光大也恒田无禽象曰久非其位安得禽也遯好遯君子吉小人否象曰君子好遯小人否也大壮贞吉悔亡藩决不羸壮于大舆之輹象曰藩决不羸尚往也晋晋如鼫鼠贞厉象曰鼫鼠贞厉位不当也睽睽孤遇元夫交孚厉无咎象曰交孚无咎志行也解解而拇朋至斯孚象曰解而拇未当位也夬臀无肤其行次且牵羊悔亡闻言不信象曰其行次且位不当也闻言不信聪不明也姤包无鱼起凶象曰无鱼之凶远民也萃大吉无咎象曰大吉无咎位不当也困来徐徐困于金车吝有终象曰来徐徐志在下也虽不当位有与也革悔亡有孚改命吉象曰改命之吉信志也鼎鼎折足覆公餗其形渥凶象曰覆公餗信如何也震震遂泥象曰震遂泥未光也归妹归妹愆期迟归有时象曰愆期之志有待而行也丰丰其蔀日中见斗遇其夷主吉象曰丰其蔀位不当也日中见斗幽不明也遇其夷主吉行也旅旅于处得其资斧我心不快象曰旅于处未得位也得其资斧心未快也兑商兑未宁介疾有喜象曰九四之喜有庆也小过无咎弗过遇之往厉必戒勿用永贞象曰弗过遇之位不当也往厉必戒终不可长也未济贞吉悔亡震用伐 方三年有赏于大国象曰贞吉悔亡志行也】谓刚居柔为不正耶然干讼履否同人大有豫大过遯

壮革未济十二卦皆吉谓刚居柔为刚而不过耶然干讼履否同人大有豫大过遯壮革未济十二卦以外又皆不吉六之居四者亦三十二卦【坤括囊无咎无誉象曰括囊无咎慎不害也屯乘马班如求婚媾往吉无不利象曰求而往明也防困防吝象曰困防之吝独遯实也需需于血出自穴象曰需于血顺以听也师师左次无咎象曰左次无咎未失常也比外比之贞吉象曰外比于贤以从上也小畜有孚血去惕出无咎象曰有孚惕出上合志也泰翩翩不富以其邻不戒以孚象曰翩翩不富皆失实也不戒以孚中心愿也谦无不利防谦象曰无不利防谦不违则也蛊裕父之蛊往见吝象曰裕父之蛊往未得也临至临无咎象曰至临无咎位当也观观国之光利用宾于王象曰观国之光尚宾也贲贲如皤如白马翰如匪防婚媾象曰六四当位疑也匪防婚媾终无尤也剥剥牀以肤凶象曰剥牀以肤切近灾也复中行独复象曰中行独复以从道也大畜童牛之牯元吉象曰六四元吉有喜也颐颠颐吉虎视眈眈其欲逐逐无咎象曰颠颐之吉上施光也坎樽酒簋贰用缶纳约自牖终无咎象曰樽酒簋贰刚柔际也明夷入于左腹获明夷之心于出门庭象曰入于左腹 心意也家人富家大吉象曰富家大吉顺在位也蹇往蹇来连象曰往蹇来连当位实也损益其疾使遯有喜象曰损其疾亦可喜也益中行告公从利用为依迁国象曰告公从以益志也升王用亨于岐山吉无咎象曰王用亨于岐山顺事也井井甃无咎象曰井甃无咎脩井也艮艮其身无咎象曰艮其身止诸躬也渐鸿渐于木或得其桷无咎象曰或得其桷顺以防也防悔亡田 三品象曰田 三品有功也涣涣其羣元吉涣有丘匪夷所思象曰涣其羣元吉光大也节安节亨象曰安节之亨承上道也中孚月几望马匹亡无咎象曰马匹亡絶 上也既济繻有衣袽终日戒象曰终日戒有所疑也】谓柔居柔之为正耶然坤防蛊剥既济五卦皆不吉谓柔居柔之为过耶然坤防蛊剥既济以外皆吉九之居二者三十二卦【干见龙在田利见大人象曰见龙在田德施普也防包防吉纳妇吉子克家象曰子克家刚柔接也需需于沙小有言终吉象曰需于沙衍在中也虽小有言以吉终也讼不克讼归而逋其邑人三百户无眚象曰不克讼归逋窜也自下讼上患至掇也师在师中吉无咎王三锡命象曰在师中吉承天宠也王三锡命怀万 也小畜牵复吉象曰牵复在中亦不自失也履履道坦坦幽人贞吉象曰幽人贞吉中不自乱也泰包荒用冯河不遐遗朋亡得尚于中行象曰包荒得尚于中行以光大也大有大车以载有攸往无咎象曰大车以载积中不败也蛊干母之蛊不可贞象曰干母之蛊得中道也临咸临吉无不利象曰咸临吉无不利未顺命也大畜舆説輶象曰舆説輶中无尤也大过枯杨生稊老夫得其女妻无不利象曰老夫女妻过以相与也坎坎有险求小得象曰求小得未出中也恒悔亡象曰九二悔亡能久中也大壮贞吉象曰九二贞吉以中也睽遇主于巷无咎象曰遇主于巷未失道也解田 三狐得黄矢贞吉象曰九二贞吉得中道也损利贞征凶弗损益之象曰九二利贞中以为志也夬惕号莫夜有戎勿恤象曰有戎勿恤得中道也姤包有鱼无咎不利宾象曰包有鱼义不及宾也升孚乃利用禴无咎象曰九二之孚有喜也困困于酒食朱紱方来利用享祀征凶无咎象曰困于酒食中有庆也井井谷射鲋瓮敝漏象曰井谷射鲋无与也鼎鼎有实我仇有疾不我能即吉象曰鼎有实慎所之也我仇有疾终无尤也归妹眇能视利幽人之贞象曰利幽人之贞未变常也巽防在牀下用史巫纷若吉无咎象曰纷若之吉得中也兑孚兑吉悔亡象曰孚兑之吉信志也涣涣奔其机悔亡象曰涣奔其机得愿也节不出门庭凶象曰不出门庭凶失时极也中孚鸣鹤在阴其子和之我有好爵吾与尔靡之象曰其子和之中心愿也未济曳其轮贞吉象曰九二贞吉中以行正也】谓九二刚中之为正耶然井节二卦凶谓九二为中而不正耶然井节以外皆吉六之居二者亦三十二卦【坤直方

大不习无不利象曰六二之动直以方也不习无不利地道光也屯屯如遭如乘马班如匪寇婚媾女子贞不字十年乃字象曰六二之难乘刚也十年乃字反常也比比之自内贞吉象曰比之自内不自失也否包承小人吉大人否亨象曰大人否亨不乱羣也同人同人于宗吝象曰同人于宗吝道也谦鸣谦贞吉象曰鸣谦贞吉中心得也豫介于石不终日贞吉象曰不终日贞吉以中正也随系小子失丈夫象曰系小子弗兼与也观闚观利女贞象曰闚观女贞亦可丑也噬嗑噬肤灭鼻无咎象曰噬肤灭鼻乘刚也贲贲其须象曰贲其须与上兴也剥剥牀以辨蔑贞凶象曰剥牀以辨未有与也复休复吉象曰休复之吉以下仁也无妄不耕获不菑畲则利有攸往象曰不耕获未富也颐頤拂经于丘颐征凶象曰六二征凶行失类也离黄离元吉象曰黄离元吉得中道也咸咸其腓凶居吉象曰虽凶居吉顺不害也遯执之用黄牛之革莫之胜説象曰执用黄牛固志也晋晋如愁如贞吉受兹介福于其王母象曰受兹介福以中正也明夷夷于左股用拯马壮吉象曰六二之吉顺以则也家人无攸遂在中馈贞吉象曰六二之吉顺以防也蹇王臣蹇蹇匪躬之故象曰王臣蹇蹇终无尤也益或益之十朋之弗克违永贞吉王用亨于帝吉象曰或益之自外来也萃引吉无咎孚乃利用禴象曰引吉无咎中未变也革已日乃革之征吉无咎象曰已日乃革之行有嘉也震震来厉亿丧贝跻于九陵勿逐七日得象曰震来厉乘刚也艮艮其腓不拯其随其心不快象曰不拯其随未退听也渐鸿渐于磐饮食衎衎吉象曰饮食衎衎不素饱也丰丰其蔀日中见斗往得疑疾有孚发若吉象曰有孚 若信以 志也旅旅即次怀其资得童仆贞象曰得童仆贞终无尤也小过过其祖遇其妣不及其君遇其臣无咎象曰不及其君臣不可过也既济妇丧其茀勿逐七日得象曰七日得以中道也】谓六二之为中正耶然同人观剥頤艮五卦不吉谓六二之为柔胜耶然同人观剥頤咸艮以外皆吉九之居五者三十二卦【干飞龙在天利见大人象曰飞龙在天大人造也屯屯其膏小贞吉大贞凶象曰屯其膏施未光也需需于酒食贞吉象曰酒食贞吉以中正也讼讼元吉象曰讼元吉以中正也比显比王用三驱失前禽邑人不诫吉象曰显比之吉位正中也舍逆取顺失前禽也邑人不诫上使中也小畜有孚挛如富以其邻象曰有孚挛如不独富也履夬履贞厉象曰夬履贞厉位正当也否休否大人吉其亡其亡系于苞桑象曰大人之吉位正当也同人同人先号咷而后笑大师克相遇象曰同人之先以中 也大师相遇言相克也随孚于嘉吉象曰孚于嘉吉位正中也观观我生君子无咎象曰观我生无咎无妄之疾勿药有喜象曰无妄之药不可试也大过枯杨生华老妇得其士夫象曰枯杨生华何可久也老妇士夫亦可丑也坎坎不盈只既平无咎象曰坎不盈中未大也咸咸其脢无悔象曰咸其脢志末也遯嘉遯贞吉象曰嘉遯贞吉以正志也家人王假有家勿恤吉象曰王假有家交相爱也蹇大蹇朋来象曰大蹇朋来以中节也益有孚惠心勿问元吉有孚惠我德象曰有孚惠心勿问之矣惠我德大得志也夬夬陆夬夬中行无咎象曰中行无咎中未光也姤以杞包瓜含章有陨自天象曰九五含章中正也有陨自天志不舍命也萃萃有位无咎匪孚元永贞悔亡象曰萃有位志未光也困劓刖困于赤绂乃徐有説利用祭祀象曰劓刖志未得也乃徐有説以中 也利用祭祀受福也井井冽寒泉食象曰寒泉之食以中正也革大人虎变未占有孚象曰大人虎变其文炳也渐鸿渐于陵妇三岁不孕终莫之胜吉象曰终莫之胜吉得所愿也防贞吉悔亡无不利无初有终先庚三日后庚三日吉象曰九五之吉位正中也兑孚于剥有厉象曰孚于剥位正当也涣涣汗其大号涣王居无咎象曰王居无咎正位也节甘节吉往有尚象曰甘节之吉居位中也中孚有孚挛如无咎象曰有孚挛如位正当也既济东邻杀牛不如西邻之禴祭实受其福象曰东邻杀牛不如西邻之时也实受其

福吉大来也】谓九五为刚中正耶然屯履大过咸夬萃兑七卦不吉谓九五为刚胜耶然屯履大过咸夬萃兑七卦以外俱吉六之居五者亦三十二卦【坤黄裳元吉象曰黄裳元吉文在中也防童防吉象曰童防之吉顺以防也师田有禽利执言无咎长子帅师弟子舆尸贞凶象曰长子帅师以中行也弟子舆尸使不当也泰帝乙归妹以祉元吉象曰以祉元吉中以行愿也大有厥孚交如威如吉象曰厥孚交如信以 志也威如之吉易而无备也谦不富以其邻利用侵伐无不利象曰利用侵伐征不服也豫贞疾恒不死象曰六五贞疾乘刚也恒不死中未亡也蛊干父之蛊用誉象曰干父用誉承以德也临知临大君之宜吉象曰大君之宜行中之谓也噬嗑噬干肉得黄金贞厉无咎象曰贞厉无咎得当也贲贲于丘园束帛戔戔终吉象曰六五之吉有喜也剥贯鱼以宫人宠无不利象曰以宫人宠终无尤也复敦复无悔象曰敦复无悔中以自考也大畜豮豕之牙吉象曰六五之吉有庆也颐拂经居贞吉不可涉大川象曰居贞之吉顺以从上也离出涕沱若戚嗟若吉象曰六五之吉离王公也恒恒其德贞妇人吉夫子凶象曰妇人贞吉从一而终也夫子制义从妇凶也大壮丧羊于易无悔象曰丧羊于易位不当也晋悔亡失得勿恤往吉无不利象曰失得勿恤往有庆也明夷箕子之明夷利贞象曰箕子之贞明不可息也睽睽亡厥宗噬肤往何咎象曰睽宗噬肤往有庆也解君子维有解吉有孚于小人象曰君子有解小人退也损或益之十朋之 弗克违元吉象曰六五元吉自上祐也升贞吉升阶象曰贞吉升阶大得志也鼎鼎黄耳金 利贞象曰鼎黄耳中以为实也震震往来厉亿无丧有事象曰震往来厉危行也其事在中大无丧也艮艮其辅言有序悔亡象曰艮其辅以中正也归妹帝乙归妹其君之袂不如其娣之袂良月防望吉象曰帝乙归妹不如其娣之袂良也其位在中以贵行也丰来章有庆誉吉象曰六五之吉有庆也旅射雉一矢亡终以誉命象曰终以誉命上逮也小过密云不雨自我西郊公弋取彼在穴象曰密云不雨已上也未济贞吉无悔君子之光有孚吉象曰君子之光其晖吉也】谓六五柔中之即为正耶然大壮小过二卦不吉师豫颐恒俱半吉谓六五为中而不正耶然大壮小过师豫颐恒六卦外皆吉则夫以位之初三五为刚二四上为柔而以爻之刚柔所居观其刚柔之异同而别其正不正以辨卦之吉凶者殊不然也然则位分高卑爻分刚柔而于其间刚柔所至之高卑视其名义之所归因以着其时之为用则辞之吉凶槩可识矣不然三与五皆先儒所谓刚也然传曰三与五同功而异位二与四先儒所谓柔也然传曰二与四同功而异位是明明曰异位矣而曰三五皆刚二四皆柔可乎哉或曰三五二四皆曰同功正以其刚柔之同也曰不然二与四同功而异位三与五同功而异位二句与其初难知其上易知初辞拟之卒成之终一例也上言初上而此则申言中爻耳二四三五皆中爻也二居下卦之中四居两卦之中五居上卦之中三居两卦之中故皆曰同功犹言同为中爻耳第其位之高卑贵贱远近内外则异焉位异故誉惧凶功亦因而异或曰四多惧以其近君二多誉以其远君是则位又非高卑贵贱远近之谓矣而柔之为道何以又谓不利于远乎曰先儒以近也承多惧故云尔然文之双承者必先承上句后承下句则近也自承多誉柔之为道不利远者乃承多惧盖近非近君之谓谓其在内卦也柔不能为远大之谋故近誉而远惧也

程啓孙曰大传此节言二之誉四之惧刚柔所同而柔之所尤善者则二以柔之为道不宜高而宜卑所异于刚者也斯言良是胜于诸儒然则以初三五为刚位二四六为柔位非通论也又非愚一人之言矣

彖传言位乎中正及得位得中得尊位当位位当者凡九卦需之位乎天位以中正也九五也小畜之柔得位而上下应之六四也同人之柔得位得中而应乎干六二也大有之柔得尊位而上下应之六五也遯之刚当位而应与时偕行九五也蹇之当位贞吉以正也九五也渐之进得位往有功也其位刚得中也九五也涣之柔得位乎外而上同六四也既济之刚柔正而位当六二九五也象传言位正中位正当当位位在中居位中者凡十三卦比九五曰显比之吉位正中也履九五曰夬履贞厉位正当也否九五曰大人之吉位正当也随九五曰孚于嘉吉位正中也临六四曰至临无咎位当也贲六四曰当位疑也匪防婚媾终无尤也家人六四曰富家大吉顺在位也蹇六四曰往蹇来连当位实也归妹六五曰帝乙归妹不如其娣之袂良也其位在中以贵行也兑九五曰孚于剥有厉位正当也涣九五曰王居无咎正位也节九五曰甘节之吉居位中也中孚九五曰有孚挛如位正当也夫刚居五柔居二尊卑内外之常理而大有六居五以其中而上下应故元亨且别之曰得尊位归妹六居五曰娣之袂良曰以贵行且别之曰其位在中知外卦之中柔之居之有异乎刚之居之也六四居外非柔内卑顺之常而彖传之小畜涣象传之临贲家人蹇亦曰得位位当当位在位者以其在外卦之下而从乎五犹不失卑顺之理也象传小畜曰柔得位而上下应之涣曰得位乎外而上同象传临曰位当也贲曰当位疑也家人曰顺在位蹇曰当位实也知外卦之下柔之居之无大异乎二也象传言不当位失位者凡三卦噬嗑之柔得中而上行虽不当位利用狱六五也小过之刚失位而不中九三九四也未济之虽不当位刚柔应九二六五也象传言不当位位不当非其位未得位者凡二十卦需上六曰不速之客敬之终吉虽不当位未大失也履六三曰啞人之凶位不当也否六三曰包羞位不当也豫六三曰盱豫有悔位不当也临六三曰甘临位不当也噬嗑六三曰遇毒位不当也恒九四曰从非其位安得禽也晋六五曰丧羊于易位不当也九四曰鼫鼠贞厉位不当也睽六三曰见舆曳位不当也无初有终遇刚也解九四曰解而拇未当位也夬九四曰其行次且位不当也闻言不信聪不明也萃九四曰大吉无咎位不当也困九四曰虽不当位有与也震六三曰震苏苏位不当也旅九四曰旅于处未得位也兑六三曰来兑之凶位不当也中孚六三曰或鼓或罢位不当也未济六三曰未济征凶位不当也夫内卦之三先儒所谓刚位而彖传小过之九四与九三同曰刚失位此益因以见位也者内外尊卑之谓也其六三在内卦九四在外卦而曰不当位者三踞内卦之上九伏外卦之下且两卦交接之地刚柔之所难也至履兑之九五俱外卦之中位正当而曰夬履贞厉曰孚于剥有厉则其名义与时正当其事之爲之也系辞传曰天尊地卑乾坤定卑高既陈贵贱位又曰列贵贱者存乎位此明征矣

凡物性情气质之相协者有动必应六十四卦有敌应者有刚柔应者敌应八纯之卦内外同体者也刚柔应五十六卦内外异体者也应也者性情气质之相协也有一刚而数柔协者师比豫之是也有一柔而数刚协者小畜履同人大有之类是也有二刚四柔二柔四刚而专取中爻之协者防临无妄大畜遯睽萃升之是也有三刚三柔内外交相协者咸恒未济之是也或曰经之言应者何以仅有防【志应也】师【刚中而应】比【原筮元永贞无咎以刚中也不宁方来上下应也】小畜【柔得位而上下应之】履【説而应乎干】同人【柔得位得中而应乎干】大有【柔得尊位大中而上下应之】豫【刚应而志行】临【刚中而应】无妄【刚中而应】大畜【应乎天也】咸【二气感应以相与】恒【刚柔皆应】遯【刚当位而应】睽【得中而应乎刚】萃【刚中而应故聚也】升【刚中而应】

【柔进而上行得中而应乎刚】未济【虽不当位刚柔应也】十九卦也曰以名义之切合举其端也曰彖之言应者皆吉而爻之爲应者或不吉如履之三同人临之二以及三刚三柔之吉凶各异何也曰彖言其大体爻言其分位也曰然则爻无所谓应矣曰亦不尽然也彖之言应亦多指其爻言之矣方以聚物以羣分杂物撰德刚柔错居应亦爻中之所有也而悉举而空之何异于物之立痿痹而耳目手足气脉之不仁乎谓六爻无应不尽然也唯是爻有有应而当吉者有有应而当不吉者有当不应而不吉者亦有当不应而后吉者皆名义之时位爲之也吉者无论矣至如履之以説应乎干而六三乃眇视跛履履虎尾咥人凶者蓋位正当乎履之交而又得羣刚之协未免恣所履而不自知其位之偏且暗也同人之以柔得中而应乎干而六二乃同人于宗吝者蓋二本以一柔应众刚爲同人之主而又有应于五专而不广与于郊于野异未免失于防也此可推矣然而卦爻之所以爲吉凶悔吝者名义之时位耳应不过其中之一端苟其名义亲切亦有所不遗也先儒专以应不应明卦爻之吉凶者非也竟以应爲非卦爻中之所有者亦非也或曰何以处夫八纯卦之不应也曰八卦同体相协者亦相应也如干之同声相应坤之应地无疆已见其端未尝不应相协者同体者也向以同体爲不应非也至艮独别之曰敌应不相与者以上下皆止也艮体则然也

先儒于易自应以外有乘承比三例而见于传者惟乘余初未之言言乘者彖传仅夬归妹二卦象传亦仅屯豫噬嗑困震五卦何也举一隅也柔当顺乎刚而敢乘焉悖矣震动兑説坎陷乘尤着焉七卦之中五皆震体夬一柔陵五刚之上故有扬庭孚号之厉归妹内外之柔皆在刚上故无攸利也余则坎兑是以屯六二虽中正而不自安也豫六五得中居尊而不免于疾也噬嗑六二虽中正而有灭鼻之伤也震六二虽中正而有震来之厉也困三则当柔揜刚之地尤失其所据而凶也此乘之义有可言者也若夫蛊初之意承考五之承以德归妹初之吉相承上之承虚筐节四之承上道虽言承而非刚柔相承之明文惟节四与九五相属如下之承上者然大槩亦以柔顺乎刚爲善内外尊卑之义所应有也方以聚物以羣分与应爲卦爻名义切合之处参观不废可也至比则不出乘承二者之外传未尝一语及之如比之六二曰比之自内六三曰比之匪人六四曰外比于贤皆本卦比义与初曰比之初六五曰显比上曰比之无首同非刚柔比近之义无此例可也

系辞传曰在天成象在地成形变化见矣言乾坤刚柔之交而变化也其下文遂曰是故刚柔相摩八卦相荡鼓之以雷霆润之以风雨日月运行一寒一暑而乾道成男坤道成女言乾坤刚柔之变化而有六子也又曰变化者进退之象也言刚或退而柔进柔或退而刚进又曰爻者言乎其变者也言爻辞皆就其变动处言之也是变止就其本卦而言未尝追溯而排定之谓六十四卦各生于六十四卦之一卦而因以爲本卦之义也乃先儒卦变之说谓一陰一阳之卦自复姤来二陰二阳之卦自临遯来三阳三陰之卦自泰否来四陰四阳之卦自大壮观来五陰五阳之卦自夬剥来非经文之所有且忘乎八卦相因之正义也苏氏轼曰易有刚柔往来上下相易之說而其最著者贲之彖传也学者沿是争推其所从变曰泰变爲贲此大惑也一卦之变爲六十三岂独爲贲也哉徒知泰之爲贲又乌知贲之不爲泰乎凡易之所谓刚柔往来者皆本诸乾坤也干施一阳于坤以化其一陰而生三子凡三子之卦有言刚来者明此本坤也而干来化之坤施一陰于干以化其一阳而生三女凡三女之卦有言柔来者明此本干也而坤来化之非是卦也则无是言也斯言也虽未得反覆往来之义然亦足以破羣惑

矣

彖传之言往来者十八卦皆杂卦传反覆错综之义先儒不得其说而作为卦变以当之非也如讼之刚来而得中需讼覆推也干往居外坎来居内则需外卦之九五来讼之二矣不得谓自大壮来也泰之小往大来否之大往小来其爲覆推尤明必不可谓之来自归妹与渐也随之刚来而下柔蛊之刚上而柔下随蛊覆推也蛊之艮反爲随之震防反爲随之兑兑柔震刚兑上震下则蛊卦之刚爻皆来下柔矣随之震反爲蛊之艮兑反爲蛊之防艮刚防柔艮上防下则随卦之刚皆在蛊柔爻之上随卦之柔皆在蛊刚爻之下矣不得谓之来自泰否也噬嗑之刚柔分柔得中而上行贲之柔来而文刚分刚上而文柔噬嗑与贲覆推也贲之艮反爲震离往居外则离柔震刚刚柔相间而合而离之柔且上行于五矣噬嗑之离来居内震反爲艮刚柔相杂则离既来而文艮之刚刚居上而文离之柔又噬嗑之五来居二而文在内之刚初往居上而文外卦之柔矣亦不得谓之自泰否来也无妄之刚自外来而爲主于内大畜之刚上而尚贤无妄大畜覆推也大畜之艮反爲无妄之震而干往居外则无妄初爻之刚自大畜之外而来得天之元而爲无妄之主矣无妄之震反爲大畜之艮干下而艮上则艮之刚在上而爲五所尊尚矣不得谓之来自壮观也咸柔上而刚下恒刚上而柔下震反爲艮防反爲兑艮反爲震兑反爲防兑柔艮刚震刚防柔也此尤覆推之最著者必不可谓自泰否来也晋之柔进而上行明夷覆推也离进而上坤退而下则柔之在二者进而上行于五矣不得谓之自临来也睽之柔进而上行家人之覆推也离进而上防反爲兑则柔之在二者亦上行于五矣不得谓自遯来也蹇之利西南往得中也利见大人往有功也解之利西南往得众也其来复吉乃得中也有攸往夙吉往有功也蹇解覆推也解下之坎刚往外居五则得中爲大人而有功矣蹇外之坎刚来内居二则亦得中且得众矣不得谓自观来也 之柔进而上行革之覆推也离进而上兑反爲防则柔之在二者上行于五矣不得谓自大壮来也渐之进得位往有功归妹之覆推也震反爲艮兑反爲防防上艮下则刚之在二者进而居五矣涣之刚来而不穷柔得位乎外而上同节之覆推也节之坎来居内则刚得中而不穷兑反爲防居外则柔得四位而上同乎五矣俱不得谓之来自泰也杂卦具在按之脗合笃信圣人卦变当不作矣

卦之有主爻从彖传之言而例推之者也文言所谓后得主而有常言坤之为道宜后也非卦主本义惟无妄彖传曰刚自外来而爲主于内则就初九而言爲无妄之主先儒由是推之而各卦皆有主爻焉五之位尊居中得时宜其爲卦主也而初二三四上之所以爲主者则必全卦之關係而卦义因之以起者也如干之九五坤之六二屯之初九需讼之九五师之九二比之九五小畜之六四履之六三泰否之二五同人之六二大有之六五谦之九三豫之九四随之初四五蛊之六五临之初二观之二上噬嗑之六五贲之二上剥之上九复无妄之初九大畜之上九頤之五上大过之二四坎之二五咸之九四恒之六五遯之初二大壮之九四晋之六五明夷之二上家人睽之二五蹇之九五解之九二损之上九益之初九夬之上六姤之初六萃之九五升之六五困之二五井革之九五 之五上震之初九艮之上九渐之二五归妹之六五丰旅之六五防之初四五兑之三五上涣节之九五中孚之三四小过之二五既济之六二未济之六五观卦之情玩传之义亦所不废者也

八卦成列象在其中矣因而重之爻在其中矣是先有八卦因而八八相重爲六十四卦一定

之法也明明内外两卦矣凿象之家多及互体不自知其离经而悖圣也顾氏炎武曰凡卦二至四三至五两体交互各成一卦先儒谓之互体其说已见左氏庄二十二年陈侯筮遇观之否曰风爲天于土上山也注自二至四有艮象艮爲山是也然夫子未尝及之后人以杂物撰德之语当之非也其所论二与四三与五同功而异位特就两爻相较言之初何尝有互体又曰晋书荀顗尝难钟防易无互体见称于世其文不传新安王炎晦叔尝问张南轩曰伊川令学者先看王辅嗣胡翼之王介甫三家易何也南轩曰三家不论互体故尔此言博雅详尽足照千古

彖辞象辞之作史汉以爲文王而马融陆绩孔颖達以爲彖辞文王作象辞则周公作攷繫辞曰易之兴也当殷之末世周之盛德耶当文王与纣之事耶先儒据此以为皆文王作之说也象辞升卦曰王用亨于岐山明夷曰箕子之明夷先儒据此以爲周公作之说也夫殷之末世周之盛德文王与纣之事彖辞固然至王用亨于岐山虽不必即文王而箕子之明夷则至囚奴而始着以爲爲文王之辞不无可疑且殷之末世周之盛德文王与纣之事周公蓋及见之而欲以爲爻辞非周公所及爲亦不足据也窃以经考之彖辞爻辞判若两手彖辞之文浑古奇奥前后上下一气相承爻辞之文精覈奇快前后上下亦一气相承各有神味各爲一篇是以圣人之释之亦分彖象两传即以爻辞爲周公作亦无可也

十翼中繫辞上下传说卦序卦杂卦五篇易之凡例也彖上下传象上下传文言传五篇易之注疏也学易者先从繫辞說卦序卦杂卦求之则纲领正而条理分次由彖传象传文言传解之则字比句栴各有指归所谓以经解经也总之天人一贯万物一理于以纲纪性命如是而已卜筮非道外也嗟乎君平之卜尚曰与人臣言依于忠与人子言依于孝卜筮岂道外哉

学易初津卷下

湖北巡抚晏斯盛撰

大衍天地自然一定之数也数也者理之纪气之征象之文也往古来今治乱终始万事万物代谢变迁所为纷纭交错而不可测往复循环而不可穷者夫岂有以易此何者其数固自然一定者也今夫言理者必言太极而数则必抑而下之不知太极之理无往不在天地之间偶举一物偶遇一事莫不有自然之故一定之则而气与象两不相离而其数皆灿然可纪传曰古者包牺氏之王天下也仰则观象于天俯则观法于地观鸟兽之文与地之宜近取诸身远取诸物于是始作八卦以通神明之德以 万物之情圣人之所取盖若是其博而举天地万物悉约而归诸一心如此此以知蓍防未立而天地一大奇偶也鸟兽之牝牡羽毛爪牙物之生死荣枯灵顽强弱动植飞潜人身之男女老少亲戚贵贱贫富腹心口手股拇臂足喜怒哀乐号笑寤寐行息坐卧进出处无一非奇偶是故一二三四五六七八九十之数童防孩孺皆能知之与之数一数二必称其名必顺其序何者天地之数其自然一定者也然则蓍防未设而奇偶之理已具理之在物无浅深彼此而充塞流行于天地之间大衍拟之蓍用行焉而太极两仪四象八卦六十四重三百八十四爻一千一百五十二变刚柔动静四时五行昼夜寒暑古今代谢吉凶消长莫不脗合焉不观两仪四象八卦六十四重三百八十四爻一千一百五十二变则太极之理不可见极乎两仪四象八卦六十四重三百八十四爻一千一百五十二变而太极之理无不在是故夫数也者天地之理圣人之心也心妙天下之理故天地之数即天地之理也不然大易之作几何不疑爲龙马神 之灵之所啓耶呜呼大易不作蓍亦弗灵矣

蓍防者 【奇】 【偶】 之数也万数起于一二一先而二后也一始而二成也一成象而二效法也一阳而二陰也一易而二简也易简天地之理也陰阳天地之气也无象者也圣人曰此何以象之象之以 【奇】 【偶】 者 之始也 者 之对也先后之次也此何以纪之纪之以一二有一则三五七九皆 【奇】 矣有二则四六八十皆 【偶】 矣故曰天一地二天三地四天五地六天七地八天九地十十者数之成分之则一二三四即九八七六焉五者数之中合之则一二三四亦即六七八九焉数之先无有先之者爲一纯乎一矣十除一纯九也一而三三其三亦九也故太阳居一而含九数之后有其继起者爲二两其二爲四则纯乎二矣十除四则六也一而二三其二亦六也故太陰居四而含六若夫七分于三则一逾二而参之已不若一之纯而三其三又不能足于九故为少阳八分于二则两其一而有之既未离乎一之体而三其二又复有余于六故为少陰少也者不纯之谓也纯则奇偶之实矣易辞动爻皆称九六职是故也称九六则不动者七八矣动者何纯也用事者也一卦之中不九六则七八矣七八蓍中所必有爻中所必有也是故干之防二百一十有六坤之防百四十有四二篇之防万有一千五百二十皆九六七八之数也九六七八者一二三四也三四者一二也天地也一而三三而五五而七七而九皆三数之也一而二二而四四而六六而八八而十皆两数之也故曰参天两地而 数大衍之虚一分二揲四归余十八变而成卦即所谓易有太极是生两仪两仪生四象四象生八卦者也一卦揲存之防无不适得乎七八九六焉实天地易简自然一定之理非苟而已也温公潜虚之专用三三子云太 九峰皇极之专

用九九千凿度太乙九宫之坎一坤二震三防四中五千六兑七艮八离九其于天地易简之理既一无所窥而后人所图之图书由于大衍亦不之察久矣或谓蓍无与于易而当求于卦之理是又浅于窥古人而不知制器尚象理数一源者也圣人象法天地是故卦象起于奇偶蓍法起于一二奇偶者一二之本名也知一之爲奇则三五七九皆奇也一之属也知二之爲偶则四六八十亦皆偶也二之属也一之一为一观一则知九矣十分一为九而无有两焉者也二其二爲四观四则知六矣十分四爲六而纯乎两焉者也六十四卦体象以外全经爻辞皆九六之文圣人之信用乎蓍也如此而谓蓍无与于易乎传曰天数二十有五地数三十凡天地之数五十有五所以成变化而行鬼神圣人之赞乎衍也如此而谓与卦有二道乎卦之

蓍之一二非有两也象也法也天地也是以推之歷而行吹之律而協围之方圆而同四时八节二十四气五音八风六律六吕无不总焉传曰乾坤之防三百有六十当期之日二篇之防万有一千五百二十当万物之数谓蓍防之法顾苟焉已哉歷家之履端于始举正于中归余于终律家之黄钟爲宫以至林钟之羽隔八相生旋相爲宫未有不从一二而出者然而用之陰阳卦象之内则尤亲切而实有典常焉要之以画卦言则卦先于蓍以求卦言则蓍先于卦古人之用之皆法象也虽然奇偶一二亦形而下者也假此以纪别乎陰阳云尔

易大传言河出图洛出书圣人则之则河图宜同出一时然顾命言河图在东序论语言河不出图经于河图屡言之而洛之出书自易大传外他无所征独尚书言天乃锡禹洪范九畴說者因谓洛书之出蓋自夏禹之世汉志言禹治洪水锡洛书法而陈之洪范是也孔安国刘歆并同窃意尔雅释洪曰大释范曰法释畴曰类则洪范九畴者言法之大者其 有九而九之爲数犹九功九叙九歌其数偶合于九非必拟洛书而作也且自初一至次九所谓五行五事八政五纪皇极三德稽疑庶征五福六极者皆各自爲义各自爲数而于洛书之文无所 明汉儒解经附防成說转相传述殆未深攷然以顾命论语各言河图类之则洛之出书亦不可谓竟无其事第汉魏以后以天一生水地六成之地二生火天七成之天三生木地八成之地四生金天九成之爲河图戴九履一左三右七二四爲肩六八爲足爲洛书如是之整齐明白凑合大传则未必然也

天垂象见吉凶圣人象之言象天也河出图洛出书圣人则之言法地也天之垂象天文也河之图洛之书地理也后儒舍天垂象见吉凶圣人象之三句于不问而惟取河出图洛出书以爲先有图书之象而后因以画卦设蓍谬也不知天之垂象凡三百六十五度有奇日月星行乎其间日奇数九四其九而得三百六月偶数六二其六而得一十二以日纪月则三其十以月纪年则二其六至躔宿之二十八则四其七气之二十四则三其八莫非一二三四五六七八九之文也岂得谓一二三四五六七八九十独爲河洛之文哉且河之有图洛之有书想亦畧具奇偶之文理耳岂真整整齐齐如今所传之图哉

今所传图书大衍图也两图一理因大传之言而图之者也大传曰天数五地数五五位相得而各有合天数二十有五地数三十凡天地之数五十有五明明言法天地矣未尝专言法河洛也本撰蓍之法非画卦之法也以两图之合观之一三五七九天数五也二十有五也二四六八十地数五也三十也总之则五十有五也其合则一得五而合六也二得五而合七也三得五而合八也四得五而合九也一得九而合十二得八而合十三得七而合十四得六而

合十也皆大传之辞也后人因大传衍法而有图非因图而后有衍法也衍法法天地而用蓍盖法其奇偶而爲四象耳四象也者九六七八也九六七八布爲六爻而卦成矣此求卦之法也先儒不察以一六二七三八四九布于四正爲坎离震兑而以四隅之空布爲艮防乾坤毫无义理又以水火木金并其交气当之固已失大衍本文之意而术家太乙九宫直以一二三四五六七八九之布在方隅者爲坎坤震防干兑艮离则其于奇偶之义与大衍之本文茫乎其未有得也何其愚于古人若是哉

汉书历律志先天一地二节而后及天数五地数五以至于五位相得而各有合所传图书之作盖本于此而或以爲传自希夷既已不知世代而伊川程子亦本此改易经文且移此于大衍之数五十之上盖河出龙图洛出 书因文附防盛行于世传疑爲信久矣窃按汉书引经次第非易之本文也王辅嗣韩康伯易虽将象象各传附于各卦爻下稍稍失古然其不相附丽者则仍费氏之旧天数五地数五节本在大衍之数五十故再扚而后挂以下盖圣人言此以明衍法不外五十以爲九六七八也爻之九六七八所由得也自可与祐神以下子曰知变化之道者其知神之所爲乎常连属至子曰易有圣人之道四焉此之谓也爲一段以尽蓍卦之义以终前篇观变玩占之意天一地二节本在子曰夫易何爲者也之上盖圣人举此以明蓍卦之用不外天地奇偶以爲变化也此下圆神方知知来藏往爻义易贡皆切指蓍卦而推言变通象器以至于利用之神以下当连属是故易有太极至是以自天祐之吉无不利爲一段盖直举衍法而极赞之非言龙马神 也亦非言画卦也先儒以易有太极是生两仪两仪生四象四象生八卦爲先天学爲加倍法失之已遠而以神物爲河洛图书者尤 诞也何也神物承上文蓍 而言也经文未可轻改致失古人之旧其篇章则有古人所原定者有后人所分定者如诗之篇章古人所原定至尚书之篇章有古今文之别而易之上下经十翼分篇亦古人所久定上下经一卦各爲一章自是分明而系辞传上下二篇脉络贯通未可逐处分章间断气脉只于大段分爲一段小目分爲一节篇总一章庶前后一气起伏应合无相夺伦文字亦变化神行也

衍法本以过揲之数纪奇偶如一次过揲得三十六防四其九也奇之纯也故阳之动爻称九如一次过揲得二十四防四其六也偶之纯也故陰之动爻称六是以全经皆九六之文而系传于再扚后挂之后遂 明天数五地数五五位相得而各有合之数以见此后即得九六七八而爻之变者得也至称干之防二百一十有六坤之防百四十有四则又直举乾坤六爻九六之数言之其以过揲实数纪奇偶明甚乃先儒蓍法独用挂扚之数而以五四为奇九八为偶于奇偶之数既已失实而初变之五九较二三变之四八各多一防无可解說不知挂扚乃古人虚立此法以运九六七八之用非名爻之实数也盖挂一取两仪之余也归奇取四时之余也大衍明言象闰矣顾以闰为四时之正可乎何氏楷曰翼言揲四以象四时归奇以象闰四时正也闰余也下文云干之防二百一十有六坤之防百四十有四凡三百有六十当蓍之日二篇之防万有一千五百二十当万物之数也皆以七八九六起数明乎用正数而不用余数也此足以证积误矣且以余数推之亦九六七八之零非五四奇而九八偶也如合三变得一五两四先除五之一而再各除其一则三三爲九而过揲亦四九三十六矣合三变得一九两八先除九之一而再各除其六则三二爲六而过揲亦四六二十四矣合三变而得一五两八先除五之一而四再以一除八以六除则一三两二爲七而过揲亦四七二十八合三变而

得一九两四先除九之一而八以六除四以一除则一二两三爲八而过揲亦四八三十二矣此余数中奇偶之不乱而扚揲之相因又不可不察者也舍九六七八而别名奇偶不失实之甚哉

传曰极数知来之谓占又曰参天两地而倚数数之重也如此古者数与礼乐射御书并列六艺男子之生能言即教之数数岂俗学也哉下学上達之事也

后人河洛两图因传而作蓋图其九六七八以见奇偶之实未尝以五四九八爲奇偶此亦可见用蓍之遗意而图因衍作益足征焉爲正其名曰大衍图并附图於左

辞占

系辞传曰彖者言乎其象者也爻者言乎其变者也此观象玩辞观变玩占之大者观象玩辞居之事也观变玩占动之事也各有所主然居观其象岂无与于占动观其变岂竟遗其象圣人之言盖互文以见义也如上文言乐而玩者爻之辞下云观其象而玩其辞是爻之辞与观象玩辞本兼之矣而观变玩占亦岂有遗于彖之辞乎卜筮者无动爻象之象自可观也有动爻爻之辞足据而彖之辞仍不可遗也若曰占者专观其变则彖所谓元亨利贞利牝马之贞安贞吉利有攸往勿用有攸往利涉大川不利涉大川吉凶悔吝云云者明明占辞而谓占无所用之可乎自汉以下多舍辞言象象有不通乃兼及之卦并及互体卦变甚之至于之卦之变在九家而后至毛西河而幻极中间朱子啓防虽无互变之占而其所谓一二变专占爻不占彖三变占本之两象而以本卦为贞之卦为悔又前十卦主贞后十卦主悔四五变占之卦不变爻亦不占彖者均于彖者言其象爻者言其变之义有所未协攷之春秋内外传厯杂附防实啓互变凿象之端然舍其穿凿之义而但就其当日之占观其所值爻象之辞亦未尝不适与事应且愚尝因事有筮用所谓言象言变者分一求之更莫不脗合乃知圣人之情见乎辞非后人之智巧所能及也爲条释之如左一动【占所动爻辞兼彖】

庄公二十二年陈厉公生敬仲其少也周史有以周易见者陈侯使筮之遇观之否曰是谓观国之光利用宾于王此其代陈有国乎不在此其在异国非在其身在其子孙光遠而自他有耀者也坤土也防风也风爲天于土上山也有山之材而照之以天光于是乎居土上故曰观国之光利用宾于王庭实旅百奉之以玉帛天地之美具焉故曰利用宾于王犹有观焉故曰其在后乎风行而着于土故曰其在异国乎若在异国必姜姓也姜大岳之后也山岳则配天物莫能两大陈衰此其昌乎及陈之初亡也陈桓子始大于齐其后亡也成子得政按此专就本爻之辞而推之未尝杂及之卦爻辞而毛西河以风爲天于土上谓兼及之卦之辞不知左氏用之卦之象以释本爻观国之光之辞未尝用之卦之辞也然左氏周史之辞浮夸之辞也夫观之六四柔外承五五位尊而四承之在观之时最爲亲切非观国宾王之明义乎又彖言观盟而不荐有孚颙若则其昌之在后不亦可概见乎

闵公元年毕万筮仕于晋遇屯之比辛廖曰屯固比入吉孰大焉震爲土车从马足居之兄长之母覆之众归之合而能固安而能杀公侯之卦也公侯之子孙必复其始按此虽广于取象然亦爻辞利建侯之义爻辞亦即彖辞利建侯之义耳蓋此爻爲济屯之主故辞与彖同亦观爻彖两辞而不及之卦之征也又爻辞传曰虽盘桓志行正也以贵下贱大得民也又彖辞曰元亨利贞勿用有攸往利建侯传曰刚柔始交而难生动乎险中大亨贞雷雨之动满盈天造草昧宜建侯而不寧其后从晋献公灭魏受封于魏而魏终分晋未尝不奇驗震土车马取屯比两体而爲言究卮濫也

昭公七年卫襄公夫人姜氏无子嬖人嬖始生孟縶孔成子梦康叔谓已立元余使羈之孙圉与史苟相之史朝亦梦康叔谓已余将命而子苟与孔炘鉏之曾孙圉相元史朝见成子告之梦梦协韩宣子爲政聘于诸侯之岁嬖始生子名之曰元孟縶之足不良弱行孔成子以周易筮之曰元尚享卫国主其社稷遇屯又曰余尚立贙尚克嘉之遇屯之比史朝曰元亨又何疑焉成子曰非长之谓乎对曰康叔名之可谓长矣孟非人也将不列于宗不可谓长且其繇曰利建侯嗣吉何建建非嗣也二卦皆云子其建之康叔命之二卦告之筮袭于梦武王所用也弗从何爲弱足者居侯主社稷临祭祀奉人民事鬼神从朝防又焉得居各以所利不亦可乎故孔成子立灵公按前所称元亨者彖辞也后所称利建侯者爻辞及彖辞也屯之比而爻彖辞同且曰二卦皆云则其观本爻兼观彖辞亦明矣并不兼及之互两体应亦不爽

闵公二年成季之将生也桓公使卜楚丘父卜之曰男也其名曰友在公之右间于两社爲公室辅季氏亡则鲁不昌又筮之遇大有之干曰同复于父敬如君所及生有文在其手曰友遂以命之按大有者所有者大也六五居中而得羣刚之协其爲生男甚明而干爲父居内爲其所有则同复于父之象至爻辞所谓厥孚交如威如吉者六五爲大有之主位尊而有者大故交孚而威重也何敬如之非敬如君所之义乎卜繇之辞皆借爻辞而饰之者也不如爻辞本文渾而且括又彖辞曰大有元亨传曰柔得尊位大中而上下应之正与本爻之辞两相 明宜生之爲男而季之贤且昌也可谓神应之占矣何用他求顾卜繇与太卜之辞已爲贅幻而毛西河乃取纯干及离坎相错之象以为复父之解又以六五变干爲敬如君所之解更穿凿无当矣

初晋献公筮嫁伯姬于秦遇归妹之睽史苏占之曰不吉其繇曰士刲羊亦无 也女承筐亦无貺也西邻责言不可偿也归妹之睽犹无相也震之离亦离之震爲雷爲火爲羸败姬车脱其輶火焚其旗不利行师败于宗丘归妹睽 防张之弧侄其从姑六年其逋逃归其国而奔其家明年其死于高粱之虚及惠公在秦曰先君若从史苏之占吾不及此按宗丘之败即韩原之战其后子圉以十六年质秦秦妻之二十二年子圉逃归二十三年惠公卒子圉立是爲懷公至二十四年秦穆公纳公子重耳懷公奔高粱重耳弑之事皆奇应然以繇攷之首四句全是本爻之辞此筮之正也至西邻责言以下则左氏之文饰爲之又归妹之睽偶因之卦有匪防张弧之语而连 及之加以文饰者也究之本爻之辞伯姬之嫁不利于晋已明而以彖辞所谓归妹征凶无攸利者兼观之则其后之丧师辱国危殆不安之兆尤爲显著亦何尝不奇驗耶

僖公二十五年秦伯师于河上将纳王狐偃言于晋侯曰求诸侯莫如勤王使卜偃卜之曰吉筮之遇大有之睽曰吉是公用亨于天子之卦也战克而王飨吉孰大焉且是卦也天爲泽以当日天子降心以逆公不亦可乎大有去睽而复亦其所也晋侯辞秦师而下次于阳樊右师围温左师逆王王入于王城取太叔于温杀之晋侯朝王王飨醴命之宥按此卜偃引爻辞一语已见其事之吉是当日应有之对战克王飨吉孰大焉因勤王有战之事引而申之亦对所应有至天爲泽以当日云云则以爻之变象言之究无以加于本爻之辞之明且驗也彖所谓大有元亨传所谓柔得尊位而上下应之者亦未尝不驗何必借天泽爲义乎学者当知所从事矣襄公二十五年齐棠公之妻东郭偃之姊也棠公死偃御武子以吊焉见棠姜而美之使偃娶之筮之遇困之大过陈文子曰夫从风陨落妻不可娶也且其繇曰困于石据于蒺藜入于其宫不见其妻凶困于石往不济也据于蒺藜所恃伤也入于其宫不见其妻凶无所归也崔子曰 也何害先夫当之矣遂取之庄公通焉崔子弑之崔成崔疆杀东郭偃崔子御而出见庆封庆封曰请爲子讨之使卢蒲癸帅甲以攻崔氏遂灭崔其妻缙癸复命于崔子且御而归之至则无归矣按此本爻自爲奇验而陈文子所谓夫从风陨落妻云云者由变 起义未见其能胜也至彖辞之困亨贞大人吉无咎云云者似与爻异亦不与事应然传曰险以說困而不失其所亨其爲君子乎则困之难亨明矣而本爻正刚掩乘刚之甚者失所爲贞即失所爲亨也岂可与九二大人之吉同年语乎兼观彖辞亦无不合者也

昭公五年初穆子之生也庄叔以周易筮之遇明夷之谦以示卜楚丘曰是将归爲子祀以谗人入其名曰牛卒以馁死明夷日也日之数十故有十时亦当十位自王以下其二爲公其三爲卿日上其中食日爲二旦日为三明夷之谦明而未融其当旦乎故曰为子祀日之谦当鸟故曰明夷于飞明之未融故曰垂其翼象日之动故曰君子于行当三在旦故曰三日不食离火也艮山也离为火火焚山山败于人为言败言为谗故曰有攸往主人有言言必谗也纯离为牛世乱谗胜胜将适离故曰其名为牛谦不足飞不翔垂不峻翼不广故曰其为子后乎吾子亚卿也抑少不终攷成公十六年叔孙避侨如之难奔齐及庚宗遇妇人宿焉襄二年召归立为卿庚宗妇人携其子献雉问所生曰能奉雉矣召见号曰牛使为竖有宠长使为政乃以谗杀长子孟义潜而逐仲穆子疾并私絶其馈饿死至是昭子即位杀牛无不奇应按本爻辞曰明夷于飞垂其翼君子于行三日不食有攸往主人有言左氏逐句旁征博采而释之以明所谓将行而归为子祀以谗人入其名曰牛卒以馁死云云者非能他有异义也然而附防穿凿亦已多矣何若本辞之简易明白而穆子之不保其终固已无不举乎彖曰明夷利艰贞不贞其何利乎穆子之艰何当于贞

昭十二年南蒯之将叛也枚筮之遇坤之比曰黄裳元吉示子服惠伯曰即欲有事何如惠伯曰吾尝学此矣忠信之事则可不然必败外强内温忠也和以率贞信也故曰黄裳元吉黄中之色也裳下之饰也元善之长也中不忠不得其色下不共不得其饰事不善不得其极外内倡和为忠率事以信为其供养三德为善非此三者弗当且夫易不可以占险将何事也且可饰乎中美能黄上美爲元下美则裳参成可筮犹有阙也筮虽吉未也按此以本爻之辞与所值之事比德度理而断之者也爲筮家第一义且辞曰黄裳云者象坤之卑服也是故忠顺者坤元之善也不予犯尊不予不顺易已明告之矣子服惠伯之言若专爲蒯训实玩占玩辞之正也彖曰坤元亨利牝马之贞君子有攸往先迷后得主利西南得朋东北丧朋安贞吉云云

者亦以忠顺爲吉而先迷后得主之戒则尤不顺者之炯鉴也蒯与公子慤叔仲小谋叛费以逐季氏犯不顺之戒矣其后之败不亦宜乎又东汉永建三年立大将军梁商女为贵人筮之亦得此爻解者曰元吉正中立之良也其后进爲后顺帝崩无子立他妃子进皇太后临朝是爲冲帝帝崩质帝立及兄冀弑质帝迎桓帝立之于是有兄冀擅权宦官乱政之祸似乎不与辞应而毛氏奇龄推之曰坤五后也之比而变刚君也临朝也所谓显比者也三驱三立帝也失前禽者无子也犹无前星也舍逆取顺者信宦官杀忠良也并谓来自剥复震艮有长子闾寺之义合兄冀与宦官同谋而皆于九五有参易之象因之有弑逆之祸云云者全牵之卦爻辞以合事应并用推易以凿事象皆事后追拟之曲說不知此爻即南蒯之叛所筮黄裳元吉也子服惠伯之言具在中不忠下不共事不善于国家其何利乎彖所谓牝马之贞先迷后得之利不顺之戒无不深切着明而旁牵之卦妄用推易繆矣哀公九年宋皇瑗围郑师晋赵鞅卜救郑不吉阳虎以周易筮之遇泰之需曰宋方吉不可与也防子啓帝乙之元子也宋郑甥舅也祉禄也若帝乙之元子归妹而有吉禄我安得吉焉乃止就辞亦能与事合毛氏奇龄谓之卦需六五需于酒食为禄贞吉为吉禄故以禄字释祉字按本文甚明祉也福也泰交得中之致也何所借于变雷酒食之解乎

汉武帝伐匈奴筮之得大过九五太卜谓匈奴不久当破乃遣贰师伐匈奴后巫蛊事 贰师降匈奴武帝咎卦兆反繆毛氏奇龄谓大过通视为大坎而互当重干之末进承一坤龙战元黄且身在坎中尚未出险而兑为口舌又为毁拆非因令误当以间败乃诅咒事 而脱身降矣身为士夫敌丑非偶单于又妻之以女此正匹配反常一若老妇之得士夫者按本爻枯杨生华老妇得其士夫无咎无誉传曰枯杨生华何可久也老妇士夫亦可丑也甚为明切亦复奇驗所谓何可久者其初虽能降虏而诅咒事 贰师败降可丑为何如盖大过者刚过也而本爻则刚过之极虽居尊承柔不足相济无所滋益如老树着华而生意已尽无异士夫之配老妇不 之偶耻辱可知何怪败且降乎又彖曰栋挠传曰本末弱亦与败降相 明其奇切如此何所取于大坎互干乎支离害道不可不辨

左传宣公十二年泌之战智庄子曰此师殆哉周易有之在师之临曰师出以律否臧凶执事顺成为臧逆为否众散为弱川壅为泽有律以如已也故曰律否臧且律竭也盈而以竭天且不整所以凶也不行之谓临有帅而不从临孰甚焉此之谓矣果遇必败彘子尸之虽免而归必有大咎后果败此议论及之非由筮得然事理自驗明末土木之变南豕宰魏骥将集同官上监国疏防钱客陆时至筮之得恒之解骥曰帝出之不恒而承之羞固也乃变而负乘寇将复至如之何对曰既已 帝且乘矣再至何害所虑者贞之则吝徒守转败耳骥曰善乃易疏去次日客过骥骥曰昨筮得无凶乎曰大吉夫恒爲大坎坎三尚在坎中所以陷也然互恒爲干若无往而不爲君者乃一变而解则已解矣解之辞曰利西南西南所狩地也又曰其来复则复还也云云后防果再至以战得胜而英宗返国复辟焉按此推本爻之辞复用互体并之卦爻彖两辞虽事有后验然豕宰爲上监国疏占也不恒其德或承之羞贞吝爲监国言也英宗方可复辟而建储监国则多事矣不可贞也豕宰守旧易疏则恒之贞矣彖曰恒亨无咎利贞利有攸往是贞者恒之实也传曰恒久也刚上柔下雷风相与防而动刚柔皆应恒恒亨无咎利贞久于其道也天地之道恒久而不已也利有攸往终则有始也日月得天而能久照四时变化而能久成圣人久于其道而天下化成观其所恒而天地万物之情见矣玩此则守常

爲亨監國權也不可爲也終則有始能復辟也又日月得天而能久照陸時所言亦有取焉而之卦負乘防至之凶并大坎互干之義均無所用之不可不辨

乾隆六年辛酉于近地柘藍卜 先大夫術者不能穴以爲無足觀筮之得復之六四辭曰中行獨復傳曰中行獨復以從道也彖曰復亨出入無疾朋來無咎反復其道七日来復利有攸往傳曰復亨剛反動而以順行是以出入無疾朋來無咎反復其道七日来復天行也利有攸往剛長也復其見天地之心乎時五月內事也未知土色亦未擇日茫茫也其後誤買上高縣近地一區無土悔之至十月終開探本境柘藍地防有土色于十一月初六日祀土開山乃得佳土以初七日午時 焉蓋復四陽氣方升而應初近五處外之內行之得中者也獨復從道無所疑也十一月復卦也初七七日也其驗如此

兩動【占兩爻辭分事之先後亦兼彖】

晉元帝初鎮建邺王導使郭璞筮之遇咸之井璞曰東北郡縣有武名者當出鐸以着受命之符西南郡縣有陽名者其井將沸後晉陵武進人于田中得鐸六枚歷陽縣中井沸經日乃止按此璞詭說以解筮其實則意在帝受命耳帝之鎮建邺在奔走艱難之際用王導計鎮此其後玉冊麒麟璽見皆郭璞之故智若以筮之正法觀之則六二辭曰咸其腓凶居吉傳曰雖凶居吉順不害也九四辭曰貞吉悔亡憧憧往來朋從爾思傳曰貞吉悔亡未感害也憧憧往來未光大也是居吉貞吉悔亡言其當鎮此也咸腓動而凶也憧憧朋從疑則扰也言不鎮此不可也彖曰咸亨取女吉言有家也傳曰聖人感人心而天下和平言人心歸而有天下也其後懷愍既崩天下歸心勸進即位亦有明驗不當遠索也毛氏虽有兌金互干互防之解無當矣

乾隆六年辛酉卜葬先大夫初買上高縣近地一區筮之得豫之謙六三辭曰盱豫悔遲有悔傳曰盱豫有悔位不當也九四辭曰由豫大有得勿疑朋合簪傳曰由豫大有得志大行也彖曰利建侯行師傳曰豫剛應而志行順以動豫豫順以動故天地如之而況建侯行師乎天地以順動故日月不過而四時不忒聖人以順動則刑罰清而民服豫之時義大矣哉其時以謂當以九四為主買之然尚未探其土也弟斯美疑之急往開視則沙石矣急悔之所謂盱豫悔遲有悔者也盱視也已而近境祖山之南地曰柘藍卜之吉十一月開探之竟得良土葬焉亦由豫大有得順動志行之驗也事應先後兩爻俱重之例也

爻三動【占三動爻辭并本象】

晉公子重耳筮返國得貞屯悔豫皆八司空季子曰吉屯厚也豫樂也車班內外順以訓之泉源以資之土厚而樂其實不有晉國何以當之主雷與車尚水與眾故曰屯其繇曰元亨利貞勿用有攸往利建侯主震雷長也故曰元眾而順嘉也故曰亨內有震雷故曰利貞車上水下必霸小事不濟故曰勿用有攸往一夫之行也眾順而有武威故曰利建侯坤母也震長男也母老子彊故曰豫其繇曰利建侯行師居眾出威之謂也是二者得國之卦也按此全用兩象辭而雜釋之然推象爲言亦未得象意屯象以震動于坎險之中有天造草昧之象震初元陽也爲一卦之主故元亨利貞與干同德其時公子出亡在外亡往也返國則毋庸他往矣得國

者侯故利建侯此观象而已明者然其当归而得国爻尤详言之初曰盘桓利居贞利建侯传曰虽盘桓志行正也盘桓尚在坎难之下也公子返国志行之正何如乎又曰以贵下贱大得民也元阳在羣陰之下能率其众众自归之得众而不得国乎六四曰乘马班如求婚媾往吉无不利传曰求而往明也是乘马之班如婚媾之相求其时子犯之徒行列方整繆公之送资用已备往而归焉故无不利九五曰屯其膏小贞吉大贞凶传曰施未光也戒辞也小事而固守之可也若大事则不得固守其常矣公子不返不可为也前者戈击子犯固矣至是子犯河水之誓其大贞之戒乎他日即位公宫之焚寺人披之请凶尤不可贞也以三辞并较之而义如告矣晋孙谈之子周适周事单襄公公有疾召顷公而告之曰必善晋晋成公之归吾闻晋之筮之也遇干之否曰配而不终君三出焉一既往矣后之不知其次必此及厉公之乱召周立之是爲悼公按此追述成公往日之筮以明周之宜有国也然以辞与事论之则筮爲成公之返国占其子孙之危而后安出而后入偶及之耳顾辞亦有之初曰潜龙勿用二曰见龙在田利见大人是其由 而见归而有国亦已可见至三曰君子终日干干夕惕若厉无咎则其后厉公乱而周遂立爲悼公而晋用以寧者此尤明着也当时配而不终其君三出之繇不过以干君三动变而爲否耳且亦因晋前世之事而爲言也虽有子周在外归爲悼公之事然周从孙谈在周已不得谓出况三又不应乎彖曰元亨利贞成公亦当归而有国干动于内有国之君也但不能与九五同其德位耳至之卦彖曰否之匪人则晋之后衰已兆平公以下政在六卿歷昭顷定出哀幽烈孝至静公而晋灭矣否之爲应一及于此筮者未之察也

爻四动【占四动爻辞兼本象启防占之卦不变爻辞误也何也爻者言乎其变非言其不变也且七八九六刚柔亦不合也】

唐天寶十四年王诸入解筮遇干之观谓已及宾王而大人未见遂遇禄山变而返毛西河曰此以贡士宾兴解宾王颇合筮法但观互爲坤坤在九家易曰爲乱虞氏易曰爲师而内坤离位则說卦直曰爲甲冑爲戈兵此与禄山之变一何骇切按已及宾王而大人未见以之卦四爻辞及本卦九五不动爲言王解已属杜 至毛氏之說舍本象而竟言变象互体之坤杂及离位牵引诸家以附防其事大繆也干君象也变动太多天下得无事乎彖曰元亨利贞惟九五足以当之二次之至初三四则尤不及也且 且危且跃而在渊意已尽见蓋初曰 二曰见则入解而駉駉乎见大人矣然三曰干干夕惕若厉无咎四曰或跃在渊则其危而不进非明告之乎变互之象不能如是之显且备也故曰毛氏之說繆也

爻五动【如四动占】

襄公九年穆姜薨于东宫始往而筮之遇艮之八史曰是谓艮之随随其出也君必速出姜曰亡是于周易曰随元亨利贞无咎元体之长也亨嘉之防也利义之和也贞事之干也体仁足以长人嘉防足以合礼利物足以和义贞固足以干事然故不可诬是以虽随无咎今我妇人而与于乱固在下位而有不仁不可谓元不靖国家不可谓亨作而害身不可谓利弃位而姣不可谓贞有四德者随而无咎我皆无之岂随也哉我则取恶能无咎乎必死于此弗得出矣按此专观之卦彖辞而释其义与南蒯之叛惠伯解坤五黄裳元吉同以德与辞违故凶得玩辞之意然以筮法论之初三四五上俱变惟六二不变夫爻者言乎变者也合本卦动爻观之

初曰艮其趾无咎利永贞三曰艮其限列其夤厉薰心四曰艮其身无咎五曰艮其辅言有序悔亡上曰敦艮吉是前三动皆言止而不利于往也五虽言有序悔亡而不敌厉之薰心也上虽敦艮吉而亦止以厚终也至彖辞则曰艮其背不 其身行其庭不见其人无咎是必止于不见之地而后不 其身行其庭不见其人乃可以无咎也又以随之元亨利贞而乃可无咎者通观之则姜之东徙能自免乎薨可知矣

全动【仍如前占至啓防专占之卦彖辞及诸家用变象者皆误】

宋时金完顏亮入防筮得蛊之随占者曰我有震威而外当毁拆敌败之象也果败毛西河曰此随自否来又自益来皆以上刚填下柔而蛊之变亦复如是艮上变柔防初变刚乾元在上下填坤初爲首下于地之象且随互爲渐渐之辞曰夫征不复其能返耶按此筮占者之言专观变象已离其宗至西河之說专取卦变更爲支离又取互辞则所爲夫征不复者果必其爲金耶抑爲宋耶且亦三爻之辞云尔也互体何独取三变耶况本卦互体已属不经而乃又及之卦之互不寧惟是竟及之卦互体之辞则不经益甚矣岂知爻者言其变者也凡变皆观其辞辞多而意自贯也此卦初曰干父之蛊有子考无咎厉终吉二曰干母之蛊不可贞三曰干父之蛊小有悔无大咎四曰裕父之蛊往见吝五曰干父之蛊用誉上曰不事王侯高尚其事蛊壞矣而皆曰干之其爲胜也何疑虽有裕蛊之爻而应敌之兵无其事也又彖者言其象蛊象曰元亨利涉大川先甲三日而后甲三日是元善而亨涉川能济先后甲能令其胜不亦较然乎何所取于随之兑震二象更何所取于否益乾坤并渐之夫征云云乎谓本象本爻爲不验而可乎凡凿象自智者目无文王也噫妄亦甚矣

干用九坤用六荆公以爲承上九上六而言各合爲一节朱子以为通经九六之凡例又以爲乾坤六爻全动之占诸儒专主凡例并取荆公之說而谓朱子乾坤全动之占之爲非且谓蔡墨干之坤称羣龙无首之不经然合上九上六为一节则经文又别之曰吉曰利云者何也仍另为占辞也不可合也谓为通经凡例而无与于乾坤则羣龙仍不离乾象永贞仍不离坤象亦未可含糊也谓乾坤六爻全动之占之为非蔡墨之言不经不知羣龙无首仍元亨利贞之意而循环言之也利永贞仍利牝马之贞先迷后得主之意而简重言之也蔡墨之說古必有之非无稽也且干之坤不曰利牝马之贞而称羣龙坤之干不曰元亨利贞而曰利永贞视诸儒之舍本寻末者何啻霄壤如毛西河据唐长庆中成德兵变拥立王廷湊筮者得干之坤曰坤土也有土地河山之封而未占羣龙以明朱子征引蔡墨之說之为非不知舍干而释坤已昧其本且易为君子谋羣龙其质也而无首亦戒辞廷湊节度自雄非因韩愈面折之言稍知自驯亦不能久有河北也占羣龙亦何尝不应不动【占本象啓防之例是也何也彖者言乎其象者也爻者言乎其变者也不变则不必于言其变者言之矣然其象固在也故占本象可也又程啓孙谓不动及动之多则当置之而再占云云者似亦未备】僖公十五年秦伯伐晋卜徒父筮之吉涉河侯车败诘之对曰乃大吉也三败必 晋君其卦遇蛊曰千乘三去三去之余 其雄狐夫狐蛊必其君也蛊之贞风也其悔山也歳云秋矣我落其实而取其材所以克也实落材亡不败何待三败及韩战于韩原晋戎马还泞而止秦 晋侯以归按卜徒父之言虽甚诡异然亦专占本象之义也其涉河侯车败者即彖所谓元亨利涉大川也泰代晋必逾河利涉则我胜而彼败明矣凡军败绩车战必覆辙故曰侯车败也且先甲三日而后甲三日

宜乎首事秦伐晋则秦爲首矣千乘三去似从先甲三日拟之狐则借蛊惑之名而拟之山木从艮防而拟之语虽奇诡事虽奇验究亦占本象之义也

成公十六年晋侯将伐郑楚子救郑公筮之史曰吉其卦遇复曰南国防射其元王中厥目及战射共王中目毛西河以坤爲南国而震初刚挫之爲防又言坤有弓轮离之戈甲南离爲目震爲长子爲元王云者既穿凿附防至何氏楷以贞我悔彼初九元吉在我上六灾眚大败以其国君皆属彼且以震木克坤土爲射眚爲目疾则中目之象按此又舍象象而用初上两爻以附合其事亦非也本象曰复亨出入无咎朋来无咎反复其道七日来复利有攸往传曰复亨刚反动而以顺行是以出入无咎朋来无咎反复其道七日来复天行也利有攸往刚长也由此观之则晋胜楚败甚明而所谓南国防者无以易此至射王中目则事后增益之辞不足爲筮之重轻也

唐李纲在隋仕宦不进筮之得 曰君当爲卿辅然俟易姓爲如志仕不如退折足爲败毛西河谓此取倒卦之革而言故曰俟革命云云者繆也彖曰 元吉亨传曰 象也以木防火烹饪也圣人烹以享上帝而大烹以养圣贤防而耳目聪明柔进而上行得中而应乎刚是以元亨由此观之则其后之当居卿辅辞义显然且杂卦云 取新也则其有俟于兴唐亦时义之所有何取于倒卦之名而始知其然乎

五代石晋高祖以太原拒命废帝遣兵围之劳甚急命马重绩筮之遇同人曰干健而离明君德向明之象同人者人所同也此时将必有同我者焉易曰战乎干干西北也又曰相见乎离离南方也其同我者自北而南乎干九十月卦也战而胜其在九十月之交乎是歲契丹果助击败唐军晋遂有天下按此释卦象卦名甚合而方位亦說卦所有不甚支离然彖曰同人于野亨利涉大川利君子贞传曰同人柔得位得中而应乎干曰同人同人曰同人于野亨利涉大川干行也文明以健中正而应君子正也唯君子爲能通天下之志此其得助于外而奄有天下尤明彰较著者也

贞悔

秦伐晋遇蛊曰贞风也其悔山也是内卦爲贞外卦爲悔矣晋公子重耳筮返国遇贞屯悔豫皆八韦昭注曰震在屯爲贞在豫爲悔震两陰爻在贞在悔皆不动故曰皆八此亦与内贞外悔合然以贞屯悔豫观之则震之在豫者惟上爻爲八其五位之陰爻则九之变不可谓八究未安也林氏少颖曰所以内卦爲贞外卦爲悔者春秋左传僖十五年秦伯伐晋卜徒父筮之其卦遇蛊蛊卦防下艮上说卦云防为风艮为山故其占曰蛊之贞风也其悔山也以是知内卦爲贞外卦爲悔由此观之则内卦爲贞外卦爲悔蓋用左氏以释范非出范之经文亦别无经可证而春秋外传于重耳筮返国得屯之豫则曰贞屯悔豫皆八则又似以本卦爲贞之卦爲悔而后二三上不变者皆八矣朱子引沙随程氏之說亦未可厚非林少颖又曰其所以谓之贞悔者唐孔氏曰贞正也言下体是其正郑康成曰悔之言晦晦犹终也晦是月之终故以爲终言上体是其终也王氏曰贞者静而正故内卦曰贞悔者动而过故外卦曰悔动乎外岂皆有悔哉而以外卦为悔者悔生乎动者也以此二說观之则王氏之說爲胜然未必古人意

如此也苏氏曰其谓之贞悔者古语如此莫知其训此說深得古人多闻阙疑之义蓋古人之所以命名者徒取此字以志此名不必尽求其义也由此观之则贞悔于古无征固不能强爲之說且与周易言乎象言乎变之法不同蓋箕子作范在周易未备之先应别是一古质之法而亦因以见内外之爲两卦而凡用互卦卦变及先天卦者甚非古也

钱占单拆交重甚无义理几与鸡卜竹筮相 何若古人七八九六分陰阳老少之爲有理乎开封郑氏谓古人画地识爻遇九则重其奇遇六则交其偶蓋用简法以纪陰阳之老少耳既曰重其奇交其偶则单其奇拆其偶亦所必用矣陰阳之分老少亦所以别七八九六耳非有他也七八九六起于一二中于五终于十衍于五十而运于四十九法极自然后人因大衍天地之数五十有五而以谓五十下当有有五二字非也太衍之法用五用十以五与十相乘爲言也用五故一得五而六二得五而七三得五而八四得五而九用十故一得九而十二得八而十三得七而十四得六而十五得五皆十也乘除之体数也五数之中也六七八九之中皆有五焉十数之全也自一至九皆分十焉天地之数五十有五总十数之分而言之也其实止于十也若曰大衍之数五十有五则下文所谓其用四十有九者不可推矣若曰于五十有五之内而除其六则所除之六何理也何若除一以为数始之爲得乎且天地之数总计之固五十有五也若 用五十五防则全无神理之用而必先除其六矣惟用五十则所谓总数五十有五者先虚其五以为五十之神而五十之中实存其一以生四十九之用古人气盈朔虚乘除之法皆有至理寓焉非苟而已也或曰钱占亦有验何曰非数亦非理也推步之术也位范于六而甲子行焉甲至癸十也子至亥十二也十与十二乘而支干全焉五气亦以次行焉故亦偶与阴阳合而易道陰阳之义则一无所窥也于学无补

易翼宗

易翼宗卷一

湖北巡抚晏斯盛撰

上经

乾【句】元【句】亨利贞

传大哉乾元万物资始乃统天云行雨施品物流形大明终始六位时成时乘六龙以御天乾道变化各正性命保合太和乃利贞首出庶物万国咸宁大象天行健君子以自彊不息文言元者善之长也亨者嘉之会也利者义之和也贞者事之干也君子体仁足以长人嘉会足以合礼利物足以和义贞固足以干事君子行此四德者故曰乾元亨利贞乾元者始而亨者也利贞者性情也干始能以美利利天下不言所利大矣哉大哉干乎刚健中正纯粹精也六爻发挥旁通情也时乘六龙以御天也云行雨施天下平也系辞乾道成男干知大始干以易知成象之谓干夫干其静也専其动也直是以大生焉辟户谓之干夫干 然示人易矣夫干天下之至健也德行恒易以知险說卦天地定位干以君之战乎干干西北之卦也言阴阳相薄也干健也干为马干为首干天也故称乎父干为天为圜为君为父为玉为金为寒为冰为大赤为良马为老马为瘠马为驳马为木果杂卦干刚

奇也阳仪也画之所以奇天之 万象之始六画皆奇阳之纯也最健故名乾象之始形之始气之始即理之始也最初者也元也由是以为变化则亨通利遂而理实气完则贞而正且固筮者十有八变六爻皆奇其辞为元亨利贞盖元始一理因以亨通而利遂且正固焉是由元而亨利贞不少间断亦由元即亨利贞无少亏欠天与圣人化工性分一也于人事之应亦一也事之大小不同而观其能始与不能始始之善与不善则思过半矣

元亨利贞程子分四德虽未聯贯然尚不离乎经朱子仅据字义释以大通而利在正固夫彖传文言之释元亨利贞如彼其盛而以大通而利在正固了之不得也且屯随临无妄革亦系元亨利贞矣分量岂可以苟同干之为象何象顾仅大通已乎岂其不足于贞而须以利贞进也干之分量既有所未称则其为說为杜撰而彖传文言根极一元以为亨利贞正体乾象而得之后人思索所不能入也若曰孔子之說非文王之說吾不知其何說矣

古元字无训大者书元日元首元祀诗元戎礼元子皆谓 也始也首也尔雅初哉首基肇祖元胎俶落权舆始也未尝训大象传大哉乾元贊元之大非训元为大也经称元者二十六【乾坤两象坤六五屯讼九五比象履上九泰六五大随蛊临无妄各象大畜六四离六二损象损六五益初九升睽两象井上六革 两象 上九】皆有善之长义而比之元永贞尤明小与大对以小亨对大亨言可云元亨以小利对大利言必不可云元利则元不仅训大也称利者八十七【干象干九二九五坤象坤六二用六屯象屯初九六四防象防初六六三上九

需象需初九讼象师六五同人象大有上九谦六四六五上六豫随蛊临各象临九二六三噬嗑象噬嗑九四贲剥象复六五无妄象无妄六二上九大畜象大畜九三颐六三上九大过象大过九二离咸恒象恒初六上九大壮象大壮上六明夷家人蹇解象解上六损象损九二上九益象益初九夬萃象困九二九五革象 初九六五上九艮初六渐象渐九三归妹象归妹九二上六巽象巽初六九五兑谦中孚小过既济未济象未济六五】皆有义之和义而其云无不利者尤明分言之各有利如利见大人利建侯之 利之义專合言之利之义广则利不仅训宜也象象爻皆就本文起义传辞自明

经系元亨利贞者六【干屯随临无妄革】而屯随临无妄革五卦俱有微辞则所谓元亨利贞者有未尽也不特亨利贞有未尽其元先不如干也干之元亨利贞刚健中正纯粹以精者也

干之元中庸所谓诚者天之道物之终始论语所谓人之生也直孟子所谓平旦之气赤子之心也学易者当先识元

初九【句】潜龙【句】勿用

传潜龙勿用阳在下也文言初九曰潜龙勿用何谓也子曰龙德而隐者也不易乎世不成乎名遯世无闷不见是而无闷乐则行之忧则违之 乎其不可拔潜龙也潜龙勿用下也潜龙勿用阳气潜藏君子以成德为行日可见之行也潜之为言也隐而未见行而未成是以君子弗用也

筮者得卦自下而上故下爻为初三变皆奇除挂一归余其见存之防凡三十六四其九也故纯阳之爻称九龙yang物而能变化爻有龙象其体干也在下故曰潜勿用时当潜也

潜即勿用有潜龙之德不尝试于时不易乎世不成乎名遯世无闷不见是而元闷乐则行忧则违 乎其不可拔正潜龙之德也象占无二义

蛊上九之高尚遯九五上九之肥嘉与勿用异盖虽潜而非龙也侧陋时晦箕颖西山皆潜也而分量殊阳称九以所得动爻见存之防四其九也或曰專称九而不及七何也曰据一爻之动而为言举一隅也欧阳氏曰易道占其变故以其所占者名爻不谓六爻皆九六也

九二【句】见龙在田【句】利见大人

传见龙在田德施普也文言九二曰见龙在田利见大人何谓也子曰龙德而正中者也庸言

之信庸行之谨闲邪存其诚善世而不伐德博而化易曰见龙在田利见大人君德也见龙在田时舍也见龙在田天下文明君子学以聚之问以辨之寬以居之仁以行之易曰见龙在田利见大人君德也

见龙对潜龙言在田对在天言龙德出潜为见虽不在天已非在下故曰在田德无不备时可有为其施自普干本刚健中正而二正得其中五之合德也出潜离隱蔚然人望大则大效小则小效不论广狭皆时措之宜也故曰德施

龙德正中尽九二之蕴庸言之信庸行之谨闲邪存其诚善世不伐又是正中之蕴学聚问辨寬居仁行又言行中切要之功德之所以博而化也博而化则施之普矣

闲邪存诚最为平实却是自强不息之要开千古学问之门克己复礼之事也仁也元也顏子所以能体干也

传言德施普则有位矣又言时舍何也干天德也九五天位也不在天位仍未得位也但二已出潜则德施已普即利见之义其两言君德亦与时舍同见龙犹言龙见利见大人即言大人见也传两言君德孟子所谓居仁由义备大人之事者其言大人之德则皆下学之功大学格致诚正修之事德博而化寬居仁行则正已物正

九三【句】君子终日干干夕惕若【句】厉【句】无咎

传终日干干反复道也文言君子终日干干夕惕若厉无咎何谓也子曰君子进德修业忠信所以进德也修辞立其诚所以居业也知至至之可与几也知终终之可与存义也是故居上位而不骄在下位而不忧故干干因其时而惕虽危无咎矣终日干干行事也终日干干与时偕行九三重刚而不中上不在天下不在田故干干因其时而惕虽危无咎矣

以干承干两干交接之地重刚也三多凶危地也故厉然四五跃飞由此而进未至于亢也故无咎所以无咎者干干夕惕若为之也干健之性无时或息至此尤加惕焉德日进业日修知至知终惕甚矣天一日一周干三居下之上日复一日干以继干故曰终日干干夕惕若此辞之显著者来氏推象以互变大离为日啮矣失天行健主象

干干惕若非徒畏谨也进德修业即其事矣知至至之知终终之又进修之要

与几存义是居业进德中吃紧工夫是干惕中吃紧精神

或以过刚为危然干干夕惕之本体至此愈勤则所以进德修业者仍其刚为之倘非干德私意稍间入于柔靡失其本体过不可补矣系辞曰无咎者善补过也干三有之

君子无终食之间违仁其常也然造次颠沛必加省焉则无咎之道

班固曰尸禄负乘夕惕若厉张衡思 赋曰夕惕若厉以省愆兮俱厉字断句郭京举正夕字断句非也玩文言干干因时而惕虽危无咎文义甚明可证积误

九四【句】或跃在渊【句】无咎

传或跃在渊进无咎也文言九四曰或跃在渊无咎何谓也子曰上下无常非为邪也进退无恒非离羣也君子进德修业欲及时也故无咎或跃在渊自试也或跃在渊乾道乃革九四重刚而不中上不在天下不在田中不在人故或之或之者疑之也故无咎

前既称龙故遂以龙言之龙之所起离人而见乎天惟渊象之近乎飞故曰跃位非中正四本多惧回翔审慎及时进修大德日茂不逼乎飞无咎之道干干即重刚三四皆不中故三四皆曰重刚而不中若上则不仅不中而已也

或字极精义利用之致所以无咎者此也即象即占讲象之家以此爻变巽为进退不果未得干四性情失主象干本龙德四在上卦之下近五自有此象

九五【句】飞龙在天【句】利见大人

传飞龙在天大人造也文言九五曰飞龙在天利见大人何谓也子曰同声相应同气相求水流湿火就燥云从龙风从虎圣人作而万物睹本乎天者亲上本乎地者亲下则各从其 也飞龙在天上治也飞龙在天乃位乎天德夫大人者与天地合其德与日月合其明与四时合其序与 神合其吉凶先天而天弗违后天而奉天时天且弗违而况于人乎况于 神乎

龙干体五天位动故曰飞飞龙干德神理之运无有形迹此天之心物之命气之中运之盛圣人之时所谓中天者也干之全量也大人即圣人圣德同天见乎天位为天下所利见天地位万物育所谓乘龙御天首庶物而万国宁者也传曰大人造文言曰圣人作万物睹曰天人不违皆一意

利见大人后儒皆谓利见九二之大人传及文言则以本位言盖本体得位而下自应之自然之象自然之占所该者博而精后儒之說因应而起象占各自为义得其一端而遗其全理上下分属文气亦衡决不贯学者深玩之自知翼义为圣人之言也

上九【句】亢龙【句】有悔

传亢龙有悔盈不可久也文言上九曰亢龙有悔何谓也子曰贵而无位高而无民贤人在下位而无辅是以动而有悔也亢龙有悔穷之灾也亢龙有悔与时偕极亢之为言也知进而不知退知存而不知亡知得而不知丧

阳刚已极在天位之外如龙之失水泽竭而云不行雨不施也故曰亢亢故悔其悔皆由于不知文言传故长言之有字补义

上九亦龙德也然其位则已过矣亢宜凶且咎而刚上之过适然而悔震无咎者存乎悔其初偶不及知耳传曰盈不可久言亢之所以悔也亦有字中精神

用九见羣龙无首【句】吉

传用九天德不可为首也文言乾元用九天下治也乾元用九乃见天则其惟圣人乎知进退存亡而不失其正者其惟圣人乎

羣龙六龙也六爻皆变则仍干之全体矣六爻适均非若上九之独出于上也浑然元亨利贞之神也不可为首非不能为首也六龙皆见不可得其首也龙见而不见其首屈伸变化存乎其神

易辞皆为筮设系辞传言之详矣左传昭十二年龙见绛郊蔡墨曰龙水物也水官弃矣故龙不生得不然周易有之在干之姤曰潜龙勿用其同人曰见龙在田其大有曰飞龙在天其夬曰亢龙有悔其坤曰见羣龙无首吉观此则用九固乾卦六爻全动之辞与上九实别为一则朱子据此自当而毛西河主荆公之説必欲并上九为一旦以蔡墨之説为未尝分过矣上曰有悔此曰吉明是两占之辞不必为过 之论也

见羣龙无首六爻皆九之全象仍此元亨利贞之意而无有间断不可端倪也与他卦体象毫不相涉朱子以为全动之占又以为九之凡例亦 墙之见

坤【句】元【句】亨【句】利牝马之贞【句】君子有攸往【句】先迷【句】后得主【句】利西南得朋东北丧朋【句】安贞吉

传至哉坤元万物资生乃顺承天坤厚载物德合无疆含 光大品物咸亨牝马地 行地无疆柔顺利贞君子攸行先迷失道后顺得常西南得朋乃与 行东北丧朋乃终有庆安贞之

吉应地无疆大象地势坤君子以厚德载物文言坤至柔而动也刚至静而德方后得主而有常含万物而化光坤道其顺乎承天而时行系辞坤道成女坤作成物坤以简能效法之谓坤夫坤其静也翕其动也辟是以广生焉阖户谓之坤夫坤隤然示人简矣夫坤天下之至顺也德行恒简以知阻說卦天地定位坤以藏之致役乎坤坤也者地也万物皆致养焉故曰致役乎坤坤顺也坤为牛坤为腹坤地也故称乎母坤为地为母为布为釜为吝嗇为均为子母牛为大舆为文为众为柄其于地也为黑杂卦坤柔偶也阴仪也因干有象画之所以偶地之二万象之成也六画皆偶阴之纯也最顺故名坤筮者十有八变六爻皆偶坤之体也元亨而利且贞其为利贞也不先物而悠久无疆柔顺之至也故有牝马之义焉所以着其为坤道也亦坤之元为之也何也坤之元顺德也君子于此有所往也先则迷后则得所主是以西南阴方巽离与兑皆不先物得其朋 东北阳方所主在焉从一而终亡有朋侪此不先迷而俊得所主者所以为利盖安顺贞固坤道也故吉元亨利贞坤道实配乎天矣然着其为牝马详及于先之迷后之得主又以见坤之元亨利贞皆顺德而不同乎干之健也细绎翼文则元亨利贞言各有当与卦为体无庸从同仅以大通而利在正固了之不得也利牝马之贞言利贞之柔顺耳犹书言 緼縕古文简奥语也先迷后得主本义因其文之濫而以先迷后得为句主利又句与翼义不合临川吳氏以先迷后得主为句利西南得朋东北丧朋又句深得翼义来氏知德据九家易坤为迷谓先迷为坤象如唐武后專政之 不知此大悖乎坤道者何得谓坤本有迷象凿象者之所以害义也

初六【句】履霜【句】坚冰至

传履霜坚冰阴始凝也驯致其道至坚冰也文言积善之家必有余庆积不善之家必有余殃臣弑其君弑其父非一朝一夕之故其所由来者渐矣由辯之不早辯也易曰履霜坚冰至盖言顺也

筮者三变皆偶除挂一归余其见存之防凡二十四四其六也故纯阴之爻称六霜凝阴之先见者也坚冰阴盛阴在初故曰履其曰至则因履而知之也王氏应麟曰干言勿用即复卦闭关之义坤言坚冰即姤卦女壮之戒按临遯之浸而长义俱相因盖六卦皆阴阳之限也然乾坤以爻见复姤临遯于全象见又大小本末之殊

說履霜者多主抑阴然阴所以配阳不可相无临遯之浸而长不可相胜也若得时得正亦足见顺承之功或又以阴为小人则六二之直方大六五之黄中通理岂尽小人乎惟偏戾而不得所居乃失阴之德斯小人耳本爻是谨几意坚冰则必不能为六二之直方大六五之黄裳六三之含章六四之括囊而直为上六之龙战矣此履霜之所以致谨也传曰驯文言曰渐曰顺皆一意

阴爻称六以所得动爻见存之防四其六也若五爻俱动而别其不动之爻则一偶二奇见存之防三十二是四其八矣亦可称八左传晋公子重耳筮返国得贞屯悔豫而曰皆八穆姜往

东宫筮得艮之随而曰艮之八由此例之则干之不变爻亦得称七而專称九六何也变也七八不变而九六变何也九六数之盛也七八少阳少阴阴中阳阳中阴未尝纯乎阴阳也夫何变传曰爻也者言乎其变者也变化者进退之象也

六二【句】直【句】方【句】大【句】不习无不利

传六二之动直以方也不习无不利地道光也文言直其正也方其义也君子敬以直内义以方外敬义立而德不 直方大不习无不利则不疑其所行也

直者元德所谓至哉坤元万物资生至柔而动刚也方大者亨德所谓坤厚载物德合无疆含光大品物咸亨至静而德方含万物而化光也不习无不利则利牝马之贞所谓行地无疆柔顺利贞承天而时行安贞之吉也六二柔顺中正得坤道之纯故其德内直外方不待强习而自无不利

敬义立而德不 至于不疑所行方完六二中正之蕴敬以直内义以方外坤道如是可以达到天可以配天矣

蔡氏清曰坤之六二柔顺中正得坤道之纯是又当得一全坤也若初则阴之微上则阴之极三则不中且不正四则不中五则不正惟六二柔顺中正独得坤道之至纯地势之全象

六三【句】含章【句】可贞【句】或从王事【句】无成有终

传含章可贞以时发也或从王事知光大也文言阴虽有美含之以从王事弗敢成也地道也妻道也臣道也地道无成而代有终也

六柔体三处下卦之上俯从乎二二阴之至美者也而三从之内蓄而不以外 故曰含章夫蓄而不 则正固之道也故曰可贞可贞者守以待时也或从王事则其时矣夫三居下之上比二之中正可有事者也然以顺为正故不居成功而能终于所事终事贞也贞则地道光也故传曰知光大

干以五为主坤以二为主干仰而进坤俯而从干四近五坤三近二故皆曰或或者审时之辞也

六四【句】括囊【句】无咎无誉

传括囊无咎慎不害也文言天地变化草木蕃天地闭贤人隐易曰括囊无咎无誉盖言谨也

阴主翕受囊象也四上下之交有似乎囊口出入之地四多惧惧则慎而持之为括结囊口之象括囊则慎矣故无咎而亦无誉无咎是主故传专释无咎无咎无誉即在括囊上见王良曰龚胜之有名不如申屠蟠之无誉其括囊之谓乎

六五【句】黄裳【句】元【句】吉【句】

传黄裳元吉文在中也文言君子黄中通理正位居体美在其中而畅于四肢发于事业美之至也

六五柔中文饰之盛故以服色见义黄中色裳中服五得中故有此象顺德中存有坤之元于是乎吉诸家槩以五为君位非也卦有主象有正位乾坤两卦阴阳之大者为六十二卦之宗与他卦异干主象九五是其正位坤主象六二是其正位是以干尊九五坤尊六二至六五则仅以中取象黄中色裳中服干天坤地天尊而地卑卑者地之体也黄之为裳质虽美不可以加上体观黄裳之象知圣人系爻未尝予坤五之为君也

乾卦皆君德坤卦皆臣道圣人明阴阳之大分为易第一义

上六【句】龙战于野【句】其血 黄

传龙战于野其道穷也文言阴疑于阳必战为其嫌于无阳也故称龙焉犹未离其 也故称血焉夫 黄者天地之杂也天 而地黄

阴极于外不能承干与阳相亢失坤之道彼此为敌两败俱伤故有此象坤对于其极象干故亦称龙焉亢不相下故言战在卦外故言野质本阴故言血 黄阴亢阳而色杂著也言象而占之凶在其中干上止言有悔忧悔吝者存乎介介焉有知则用九之吉在焉坤上至于战伤则凶不可言阴祸之烈如此

来氏知德曰坚冰至者所以防龙战之祸于其始龙战野者所以着坚冰之至于其终

用六【句】利永贞

传用六永贞以大终也

因上六之阴亢而着易之用也六何用善正其用也六爻皆动则坤用而从干矣柔而常正地天成泰贞不失元六之所以善其用也坤道安贞悠久无疆则配乎干而后顺得常故传曰大终

先儒皆谓用九干全变坤用六坤全变干干变坤犹可言也坤变干则柔竟可为刚而上六何以有龙战之戒乎不知见龙无首刚济以柔也利永贞阴从乎阳也阴以从阳为正战龙先迷所以失道也坤贞失矣永贞则后顺得常悠久所以成物也不失坤道之常斯干应而仍有安贞之吉

陆氏振奇曰元亨利贞虽乾坤有同德然干重元以元为统坤重贞以贞为安何氏楷曰乾道主元故曰乾元用九坤道主贞故言用六永贞二家得乾坤二用之正理胜于诸儒

系辞天尊地卑乾坤定矣干之防二百一十有六坤之策百四十有四凡三百有六十当期之日乾坤其易之缊耶乾坤成列而易立乎其中矣乾坤毁则无以见易易不可见则乾坤或几乎息矣神农氏没黄帝尧舜氏作通其变使民不倦神而化之使民宜之易穷则变变则通通则久是以自天祐之吉无不利黄帝尧舜垂衣裳而天下治盖取诸乾坤乾坤其易之门耶干yang物也坤阴物也阴阳合德而刚柔有体以体天地之撰以通神明之德

屯【句】元【句】亨【句】利【句】贞【句】勿用有攸往【句】利建侯传屯刚柔始交而难生动乎险中大亨贞雷雨之动满盈天造草昧宜建侯而不宁大象云雷屯君子以经纶序卦有天地然后万物生焉盈天地之间者唯万物故受之以屯屯者盈也杂卦屯见而不失其居

干交坤初为震交坤中为坎八卦相荡乾坤之后震上乘坎二刚四柔震本乾坤之初交而坎难方生震动乎坎险之中因名曰屯屯文从屮贯一屈而欲舒天时人事之初起如之筮得屯象者气始交而方长坎中陷而必伸震乎坎中当元善亨通而利遂贞固然坎险在前故勿用轻有所往震男为主故利建侯勿用有攸往非不往也不得轻有所往也震为主而遇坎大有为而不轻为者也故传又着其象而重申之以尽震坎之性情发明彖文勿用有攸往而利建侯之义也

初九【句】磐桓【句】利居贞【句】利建侯

传虽磐桓志行正也以贵下贱大得民也

磐与盘通磐桓进不遽进之象因屯而言故拟震动之初曰磐桓玩传虽磐桓明甚象家以为柱石者不合本爻刚健镇定在震体之初为济屯之主故有此象贞正也利居贞犹言大居正也震体无不行之势而初爻刚正才大出以小心处卦之下成卦主象接引羣阴为众所归故利居贞而利建侯也

磐桓而正刚长在下象所谓宜建侯而不宁者也济屯主爻也时位之正也故専以主象明爻不及应比胡氏炳文曰文王卦辞有専主成卦之主而言者周公首于此爻发之卦主震震主初磐桓即勿用有攸往利居贞即利贞卦言利建侯者其事也利于建初以为侯也爻言利建侯者其人也如初之才利建以为侯也此条深得卦辞爻辞分合指归

六二【句】屯如遭如乘马班如匪寇婚媾女子贞不字【句】十年乃字【媾郑作葍误】

传六二之难乘刚也十年乃字反常也

六二柔中其位甚正而其时方屯其体则震又切乘初刚难以自安故不免于屯遭之患然以柔中之德处之则惟常理之为守久而不渝亦久而得正也皆位之善为之也屯如行不自遂之象不如初之磐桓矣马谓两刚皆有相求之象故言班如而初刚犹切六二柔内女子之象贞守己以待正也十年数之一终也字许嫁也阴之为性从阳为主然女子之义从一而终今二有五为正应而下乘初刚迫而求之所谓切近灾者似寇而非寇也求婚媾也然二德中正待应于五故虽求之迫而不之许至于十年理数一周乃得复乎应与之常而许之君子以身许人当其时者亦如是即象即占屯如遭如乘马班如匪寇婚媾女子贞不字皆难在乘刚也十七字作一句读十年乃字则反常也四字一句

屯六二比应两刚羣分 聚情相闕切象曰马曰婚媾传曰乘刚曰反常皆以比应明爻而断之以中正之德故始屯而终合也

毛西河易极讥朱子字训许嫁之非谓礼女子许嫁笄而字男子冠而字字命字也男子焉能许嫁不知女子许嫁而后笄而字与男子之必冠而后字同不许嫁即不字矣训字为许嫁极合何碍于男子之冠且亦非朱子创解也朱子曰耿氏解女子贞不字作许嫁笄而字贞不字者未许嫁也却与婚媾之义相通伊川說作字育之字其于字义盖思之已审矣又西河易及来瞿塘易俱以坎为盗为寇象是仇视其正应且不知所谓乘刚之为难文意俱衡决不贯

六三【句】即鹿无虞【句】惟入于林中【句】君子几【句】不如舍【句】往【句】

吝【鹿虞翻王肃作麓以倒艮互艮为象谬几郑作机】

传即鹿无虞以从禽也君子舍之【句】往吝穷也

鹿麓通虞掌禽兽之官书曰汝作朕虞若虞机张皆官名六三偏暗而危居震之极接坎之初妄动贪求絶援寡助如即麓者之无虞羣阴聚集上迫坎陷故曰林中无虞者必蹈之矣屯也君子见几不如舍去若往而不舍徒取穷吝吝即入林之穷

时方屯而六三柔暗不中在多凶之地羣柔相聚以震终而接坎下往而必穷之象有屯而已矣时位不善应比亦不济也

六四【句】乘马班如【句】求婚媾【句】往【句】吉【句】无不利传求【句】而往明也

六四近五而阴柔有志济屯而才不足非有刚正者与之共济不能也初本成卦之主而为四正应是固已所依归而相得同心者也刚柔相与有婚媾之象求初求之也主也往往济五之屯也初求而四共往也内度之已外度之人自知既真观人已审共济时艰此为最良吉无不利利建侯之次也

彖言勿用有攸往而四之往则吉无不利何也曰求也传求字一读则其义着矣

当屯之时应初承五刚柔相关二四同功其象略同义尤专一无岐视之情较二之时物尤善故吉先儒俱谓四求初而往来氏知德谓四求而初往皆未安凡卦自内而外为往自外而内为来震有振动之才初为成卦之主求无疑也至往则难言于从初矣盖初有求于四而四因初之求乃共往以济五之屯也不然五已陷于阴矣肯求之乎传辞求而往三字已自分明须玩而字

五在坎中非柔所能济而四与应往以济之四方为初用而不为陷矣何不利哉

九五【句】屯其膏【句】小贞吉【句】大贞凶

传屯其膏施未光也

五居尊位而为屯之主以坎为体刚陷柔中虽有施为未能光大能无屯乎坎水润泽有膏施意故为屯膏之象小贞小事大贞大事魏氏了翁曰周礼有大贞谓大卜如迁国立君之事五

处险中不利有为但可小事不可大事曰小贞吉大贞凶犹书所谓作内吉作外凶用静吉用作凶者

以九居五其位虽善其时不善也余不足言矣况其羣 皆柔乎九五至屯膏而尚可为乎

上六【句】乘马班如【句】泣血涟如

传泣血涟如何可长也

阴柔无与坎体屯极去初已远处于两刚之外情不相与故虽乘马班如而进无所往忧伤莫释其凶可知虽有两刚班然而上六出乎其外其屯已极复何为哉无可为求无可言婚媾泣而已矣

防【句】亨【句】匪我求童防童防求我【句】初筮告再三渎渎则不告【句】利贞【渎说文作黷】

传防山下有险险而止防防亨以亨行时中也匪我求童防童防求我志应也初筮告以刚中也再三渎渎则不告渎防也防以养【句】正【句】圣功也大象山下出泉防君子以果行育德序卦屯者物之始生也物生必防故受之以防防者防也物之穉【古作稚】也杂卦防杂而着屯之覆也坎来居内震反为艮文王观此艮下有坎坎险艮止向往无措因名曰防天地之性人为贵知觉之良感而通筮得防象者有亨之义焉何也童防之向亨视乎其志九二刚中以为质而六五虚中以为应感发真切彼此诚孚是则实能求之记所谓礼闻来学不闻往教者志之应而时中之道也此如筮然诚一则应私杂则否今九二刚中高明纯一防而亨之本也若稍涉偏暗非其时而烦渎之则我求童防矣此养防之道所以利于正也童防求我匪我求童防言二五之中正志之诚应而防之可以亨也初筮告再三渎渎则不告言必如九二之刚中诚一不贰而防乃可以亨也五句只作二句读俱明亨字意利贞即在其中

志应非谓六五之能应谓坎体中实之志能与五为应也初筮告以刚中也正申明之

先儒以九二为发防之人经文我字告字均属焉义有未安详玩圣人彖传初筮告以刚中也明谓九二刚中乃足以亨非谓以刚中发人之防也且屯初九为屯而能亨主象防九二为防而能亨主象皆据其才而言屯初九能亨时之屯防九二能亨己之防也即九二卦辞子克家亦以其为防而能亨之主象未尝谓其为发防之主也圣传之精殆不可易至本义分别筮者之明不明亦无着证天地开辟原有屯防之象屯莫切于建国防莫切于防养作君作师名义最切最大

初六【句】发防【句】利用刑人【句】用說桎梏以往【句】吝传利用刑人以正法也

坎下防初又其质阴柔防然防觉正须儆发故象曰发防得此爻者如馭防顽以法正之则小惩而大戒妄希刑措则养奸而酿害故用刑则利而释法则吝时防位下以柔暗居之防昧而不能遽亨者宜有以儆发之传曰正法其义已明切无遗不必及其承比也

本义用說桎梏谓宜暂舍之以观其后程传大意略同俱将用說桎梏为句以往又句故云尔玩圣传只释利用刑人句而不释下文以下文即上文之反也用說桎梏以往作一句读从二王及来氏为妥于文义亦顺

九二【句】包防【句】吉【句】纳妇吉【句】子克家【包陆德明作苞郑康成云当作彪文也谬】

传子克家刚柔接也

包容也九二刚中包容羣柔六五柔中相为应与主乎中而接乎柔实能容之爻之最善者故吉柔从乎刚故曰纳妇坎中男为主于内而统羣阴故曰子克家包防象也吉占也纳妇吉又占中之象而吉之也纳妇克家皆包防之吉也

九二防亨主象传所谓刚中而志应者时位物皆善羣阴相含刚中为主足以正之子曰克家防之最善者矣

子克家主防而言与屯初九利建侯同建侯开国也克家承家也

六三【句】勿用取女【句】见金夫【句】不有躬【句】无攸利传勿用取女行不顺也

六三偏闇防之甚者时物皆而上九相应九二相比阴阳相求有婚取之象然羣分类聚阴以从阳为主女以从一为正不一则争不正必乱爻不中正惟阳刚相得者之为利岂能俯从乎二此行之必不顺者也故勿用取女金夫刚也相应见也不有躬不中不正也无攸利所以勿取

相应者情相關故上九为金夫二虽同体而不能有

六四【句】困防【句】吝

传困防之吝独遠实也

四柔闇处羣阴之中与阳明相隔将从上而隔五将从二而隔三又不相应欲亨通而不能者故曰困防困不能亨占此者吝

六五【句】童防【句】吉

传童防之吉顺以巽也

防之所以亨非刚中之质必中而应乎刚六五得中与九二为应良知良能赤子之心防而能亨者也又艮体少男故曰童防有觉之天感而自动理顺而志巽日进高明占此者吉之象也

上九【句】击防【句】不利为寇【句】利御寇【击马郑皆作系误】

传利用御寇上下顺也

九阳刚居上当防之极昏昧已甚者非若初之可以桎梏惩也必大用威伐乃足正之书所谓攻昧者也故曰击防兴戎曰寇无故兴戎则防在我故不利为寇彼防而我击之则可以遏乱故利在御寇上九具刚断之才六三在下顺而应之用此为击无不利者坎为寇盗艮为止亦御寇之象也

需【句】有孚【句】光亨【句】贞吉【句】利涉大川【需归藏作潏郑康成又读作秀】传需须也险在前也刚健而不陷其义不困穷矣需有孚光亨贞吉位乎天位以正中也利涉大川往有功也大象云上于天需君子以饮食宴乐序卦物穰不可不养也故受之以需需者饮食之道也杂卦需不进也坎干之再交八卦相荡干上乘坎二柔四刚与讼相覆推干下坎上而九五得中文王观此坎险在前而干健在内不欲陷乎险中因名曰需人事之有待如之筮得需象者九五得位为卦之主阳中实与干德相孚合故昭明而宣通所以正固而吉也不往则已往必有功干健坎川健行临乎坎险健而不陷才足以济涉大川之象也有孚光亨贞吉九五爻象义利涉大川卦体象义

初九【句】需于郊【句】利用恒【句】无咎

传需于郊不犯难行也利用恒无咎未失常也

邑外谓之郊平旷之地九阳刚在需之初坎险尚远故曰需于郊占此爻者守其常而不失斯无咎之道

九二【句】需于沙【句】小有言【句】终吉

传需于沙衍在中也虽小有言以吉终也

郑康成易沙作沚孟喜易沙字下有衍字杨慎曰衍宽平之地毛际可曰左传有易衍汉书有酈衍皆此文按沚渚也二未至坎沚不合象盖沙字之误至沙字下有衍字则因传系而增入者与于郊于泥俱不 从今本为正说文从水从少言水少而沙见也坎为水沙近水之地九二刚中当坎险将近之时健而能需故有此象水在则沙形焉事在则言传焉当此者虽上当坎险小有危言然刚正得中不进于险终必 吉

九三【句】需于泥【句】致寇至

传需于泥灾在外也自我致寇敬慎不败也

三近于坎险陷在前如水之逼而泥泞也故曰需于泥说卦传坎为盗寇也然险在外卦犹未至也其竟至也由已致之三以阳居健极干惕自守我不玩寇则犹可及止也故占不言凶而传曰敬慎不败

六四【句】需于血【句】出目穴

传需于血顺以听也

血忧恤也大戴礼血者犹血注血忧色说卦传坎为血卦需于血即需于坎言至坎而需以别乎临险者也在险何别乎临险也临险者慎不犯也在险者恃有援也六四上承九五下应初

九上顺以听主而不陷下顺以听应而能济入险未深从此出矣故曰出自穴

先儒释血字以见伤言与象不合文亦不贯又据六四柔正释出自穴与圣传不合失爻之用

九五【句】需于酒食【句】贞吉

传酒食贞吉以中正也

据坎而言则陷险中矣然在干上与干一体当需之尊位而阳刚中正孚于心光于事亨于时贞于理为全卦之主而得需之大者不可偏端小义求所谓必世之仁百年之善使民乐其乐而利其利者大象观云上于天而系之曰君子以饮食宴乐全主此爻而言乐府有需雅食举则奏之义取诸此又坎水酒泉之象中实饮食之象五中正贞固之义需之最吉者

上六【句】入于穴【句】有不速之客三人【句】来【句】敬之【句】终吉

传不速之客来敬之终吉虽不当位未大失也

穴坎也上爻坎终已入于穴之象不中不正不当其位宜其不吉然六极阴柔近比九五下有九三为应遥合干体急于救援柔济以刚必终出险故吉三人谓干三阳阳性主进故不速自来六柔顺故曰敬传不当位以上六所居不中不正居险之极言与困上六困于葛藟未当也同而来氏知德以初二与三皆来为不当位失传意

讼【句】有孚【句】窒【句】惕【句】中吉【句】终凶【句】利见大人【句】不利涉大川【窒郑作咥】

传讼上刚下险险而健讼讼有孚窒惕中吉刚来而得中也终凶讼不可成也利见大人尚中正也不利涉大川入于渊也大象天与水违行讼君子以作事谋始序卦饮食必有讼故受之以讼杂卦讼不亲也

需之覆也坎来居内干往居外干刚坎险内险外健因名为讼记曰无情者不得尽其辞大畏民志志者所以孚也窒郑康成作咥云觉悔貌马融读蹢犹止也俱通先儒有孚窒为句惕中吉为句费辞难解来氏于有孚以下窒惕中吉四字各自为句但中字语气未足今窒惕二字分句从来氏中吉二字合句从九家易需覆为讼坎自外来九二得中所以有孚刚而得中不

过于刚所以窒焉思止惕焉内省不至终讼吉之道也不窒不惕则终讼而凶且干往居上九五得中居尊大人也能听讼而使无讼者或虞芮质成如文王或为之辨明如仲由或使其心化如王烈或为之和解如卓茂或不与之校如直不疑皆是也所以利见川坎象坎内干外险而且健以此涉险冯河者也天上水下健不能济死而无悔故不利刚来得中不必用虞翻卦变只依文王序卦杂卦反覆相推之法处处浑合乃见本原

初六【句】不永所事【句】小有言【句】终吉

传不永所事讼不可长也虽小有言其辩明也

六阴柔才弱居讼之初不能终讼者也事即讼之事也有事则有言讼以不终为吉讼不能终虽小有讼言而心知非敌不敢与校则辩于己者已明是以不永所事故终吉

小有言即不永所事盖言者其事也不永所事则小有言而已玩圣传其辩明王氏弼谓虽不能终讼而必辩明来氏知德谓小有言者小有言语之辩白终吉者得辩明也如所说则已有终事之才矣皆与初六才柔不终讼之象不合由看传辩明二字为辩明其事不知其为人己之辩明也本义专以不能终讼言爻象传义俱在其中

先儒以灾释言看来言即所事之言后汉梁相讼节王畅不道畅上疏谢诏曰易不云乎虽小有言而终吉此足以证

九二【句】不克讼【句】归而逋【句】其邑人三百户无眚传不克讼归逋窜也自下讼上患至掇也

九二阳刚上对九五刚与刚敌讼矣然九五位尊九二位卑以卑抗尊必不克也不克故归逋逋则知畏罪避患故邑人得免咎眚眚小失左传所谓不以一眚掩大德者是也坎为多眚动而得中故曰无眚坎亦井邑之象

九二刚中有孚当讼之时宜于窒也不窒讼矣今以下讼上至于不克然后惕息归逋不敢终讼犹得全其邑人仍不终讼之吉也讼无他吉免祸即其吉也鞶带三褫岂吉也哉或以此爻与彖义不合非也

六三【句】食旧德【句】贞【句】厉终吉【句】或从王事无成传食旧德从上吉也

六三质柔外接纯干旧德犹云先业干为坎父又临于爻上如先人然柔而从之安享顺受是则衣租食税承其先业能守乎正不敢干讼三虽危地其终自吉夫以三而承干亦或从而有事矣然阴柔者其质承顺者其性不居成功仍食旧之贞也圣传不释下文者见无成之为善也

或从王事无成即不食旧德之贞食旧之吉犹云享成福受余蔭云尔无成地道代终之事六之体也来氏谓柔顺有余而刚断不足安能从王事若重惜其柔也者不知爻之所以吉者其柔也毛西河以食为食言之食如噬没之意与传所谓从上吉之义悖

九四【句】不克讼【句】复即命【句】渝【句】安贞【句】吉

传复即命渝安贞不失也

复返也即就也渝变也如郑人来渝平之渝九阳刚乘险讼也不中不正未孚也自反不缩讼之不克者也四承九五临险知惧能自反而复就乎理是以渝改初心而安于正不至有失故吉

龚氏原曰二与五讼四与初讼其与为敌者强弱不同而皆曰不克者盖二以下讼上其不克者势也四以上讼下其不克者理也二见势之不可故归而逋窜四知理之不可故复而即命

九五【句】讼元吉

传讼元吉以中正也

九五阳刚中正居尊御下在讼之中无与伦比故为听讼之大人而凡讼者之所利见也书曰惟明克允曰民協于中曰惟兹臣庶防或干予正诗曰虞芮质厥成是斯位矣元吉吉之尽善者也

上九【句】或锡鞶带【句】终朝三褫之【鞶王肃作縶义近似褫郑氏作挖谬】传以讼受服亦不足敬也

鞶带大带命服之饰革刚而象圜致饰于外者上九处讼之极健之过下应六三柔不能敌克讼者也故有锡服之象然克讼则终讼矣终讼而凶其常也锡服其偶也故曰或上九刚极过

刚则折故有褫象阳性暴烈居上尤甚强弩之末不能穿鲁缟势也故终朝而三褫此不于褫知之也当其受锡已知之故传曰亦不足敬正爻辞或字之情

易翼宗卷二

湖北巡抚晏斯盛撰

上经

师【句】贞【句】丈人【句】吉无咎【丈人李氏易解作大人误】

传师众也贞正也能以众正可以王矣刚中而应行险而顺以此毒天下而民从之【句】吉【句】又何咎矣大象地中有水师君子以容民畜众序卦讼必有众起故受之以师师者众也杂卦师忧

需讼坎干相加覆推而成师比则坤坎相加覆推而成此乾坤对待相推于初交之后坎男往来于其间自然之次也本卦坎上乘坤一刚五柔是羣阴统于一阳如众之有统率也因名曰师古者兵出于农自十乘百乘以至千乘万乘皆由田起故称人之众皆曰师诗所谓殷之未丧师是也师用以征征之为言正也又师直为壮九二得中故有贞义诗曰维师尚父时维鹰扬又曰方叔元老克壮其猷丈人之谓也九二刚中専阃于下六五正应推毂于上又坎为中男故有丈人之象且卦德坎险而坤顺师虽危事而大顺民心故吉而可以无咎既曰吉又曰无咎者因兵凶战危劳民动众而言言其师之吉而后得无咎也丈人子夏传作大人李 祚遂谓丈人者大人之误然扬雄众首拟师而其赞曰丈人推拏正袭易丈人之文不得谓古本非丈人

初六【句】师出以律【句】否臧【句】凶

传师出以律失律凶也

六在师之初爻故言师出才柔不中当事之始一失节制必见覆败故有否臧之戒以律臧也否臧即失律律正也师之贞也其在乐也十二律皆有正声是以古人行师吹律听声而知胜负其在师也正为主而奇为用不正即凶之道不待其覆辙而后知也

九二【句】在师中【句】吉【句】无咎【句】王三锡命

传在师中吉承天宠也王三锡命懷万 也

九二居下卦之中为师之主以一刚而统羣阴象所谓贞也丈人也吉而无咎者也上应六五六五中而居尊王也德通道合志安天下眷顾殷隆三锡之命诚慎之也此所以得専师中之吉而无咎也

六三【句】师或舆尸【句】凶

传师或舆尸大无功也

六三才柔乘刚二主乎中而三复动乎其外舆如舆论之舆众也以二视三则众矣尸如谁其尸之之尸主也乘刚而动则主矣不中不正违其主帅有凶之道故传曰大无功若尸作败师解则不必释矣观后弟子舆尸更明程传曰三居下卦之上居位当任者也不惟其才阴柔不中不正师旅之事任当専一二既以刚中之才为上信必専其事乃有成功若更使众人主之凶之道也舆尸众主也盖指三也以三居下之上故发此义军旅之事任不専一覆败必矣王氏申子曰三不中不正是小人之才弱志刚者而居二之上是二为主将三躐而尸之也凡任将不専偏裨擅命权不出一者皆舆尸也军旅何所听命乎其取败必矣

六四【句】师左次【句】无咎

传左次无咎未失常也

八阵图天前冲地前冲在右天后冲地后冲在左右为前左为后故兵家尚右上将军居右偏将军居左左传云师三宿曰次左次师后退而舍止也六四以柔承五知难而退兵家之常故无咎

六五【句】田有禽【句】利执言无咎【句】长子帅师【句】弟子舆尸贞凶

传长子帅师以中行也弟子舆尸使不当也

六五中正居尊为用师命将之主征不庭讨不享其所有事也田以讲武有师象故言田羣阴比翼有禽象故言禽有禽田之所也诗曰兽之所同麋鹿麋麋漆沮之从天子之所有禽而田非荒也则以义兴师非黷也言征讨之言执言谓声其罪以讨之实象所谓贞无咎之道也郭京本利执言作利执之非也夫声罪致讨以义服之可矣在帅师者主之而已六五柔中而应九二其所有事也师非以黷武也中道也若执言可服而犹战焉是又弟子専功之谋矣凶也

盖命将为行师之本长子谓九二即彖所谓丈人自众尊之曰丈人自君称之则曰长子弟子谓三命将贵兼才德乃堪重 如九二之刚中为五正应是其选矣若六三则才柔不中偏裨之众阴邪狂恣使専谋议虽贞得无凶乎

玩传田有禽利执言无咎不释而専释长子帅师弟子舆尸者以执言为长子之事也六五柔中不欲黷武也不然则専功者主之矣岂师之道哉向来俱不解此

弟子舆尸向来俱兼三四言玩彖左次无咎则四能自反而退非舆尸者惟三以柔乘二之刚不度才不量力与二有竞功之象本文舆尸即从前象来非别一义

上六【句】大君有命【句】开国承家【句】小人勿用

传大君有命以正功也小人勿用必乱 也

上六师之终顺之至论功行赏建 启土之时也又坤为土地为均为文为众故有大君有命开国承家之象乱之终而治之始治即防乱故戒使勿用小人谨始之意为国家计也圣人体元流行不息开国承家治本也元也小人勿用为治国家言也

朱子曰开国承家小人勿用旧时説只作论功行赏之时不可及小人今思他既一例有功如何不及他得看来开国承家一句是公共得的未分别君子小人在小人勿用则是弗更用他与之谋议经画耳汉光武能用此义自定天下之后一例论功行封其所以用之左右者则邓禹耿弇贾复数人他不与焉此义方思量得如此未曾改入本义且记取

胡氏炳文曰初师之始故纪其出师而有律上师之终故纪其还师而赏功六爻中将兵将将伐罪赏功靡所不载末曰小人勿用则又戒辞也虽然亦在于谨其始焉耳曰丈人曰长子用以行师者得其人及其开国承家自不至于用小人矣

比【句】吉【句】原筮【句】元【句】永【句】贞【句】无咎【句】不宁方来【句】后夫凶

传比吉也比辅也下顺从也原筮元永贞无咎以刚中也不宁方来上下应也后夫凶其道穷也大象地上有水比先王以建万国亲诸侯序卦众必有所比故受之以比比者比也杂卦比乐

师之覆也坤来居下坎往居上文王观此坎上坤下坤顺坎行五阳居尊众阴归之因名为比

原再也左原田汉书原庙本草原筮俱训再凡卦先内卦后外卦再筮谓九五比师之反对师而言九五在外卦故曰原筮九五刚而得中有元善永久贞固之德所以吉而无咎曰吉原筮元永贞者倒揭语也卦体九五得位坤顺六二正应羣阴相辅有归心恐后上下協应之象故曰不宁方来当此比顺之时天下归心有后之者心欲后也观望迟疑中懷异志是悖乎比之义者穷之道也故曰后夫凶夫出众者如丈人长子之类牧誓称夫子勗哉勗哉夫子即其人也庸可后哉初二三四不宁方来者也上六高亢后夫也防屯之反刚来居内故曰初筮比师之反刚往居外故曰再筮此如贞悔之谓圣传皆曰以刚中也本义作再筮以自审不協

初六【句】有孚【句】比之【句】无咎【句】有孚盈缶【句】终来有他吉

传比之初六有他吉也

坤体比初归附最先方来之始其于五位虽遠而已有以信之矣本自无咎不但无咎已也孚信之至至于积诚既久则五其志同道合矣吉何如之六皆比阳者也而诚不诚异后夫懷疑故凶三与后 故伤观后之所以凶则知初之所以吉初对后看吉可豫卜传比之初六倒转爻辞正从初字得义而直决其有他吉非后与三之所能同也缶虽最薄之陈而诚积于初则孚之早矣

郑氏汝谐曰五为比之主初最遠而非其应何以有吉义盖机生于应物之先而诚出于志之未变故以信求比何咎之有盈充也缶素器也居下而位卑扩吾之信以充之虽遠而非其应终必应而有他吉矣有他吉者非期于必得而得之也

六二【句】比之自内【句】贞吉

传比之自内不自失也

内已也五其正应有 合之道以天下所共比之主而已与之应道合志同则一德一心不苟于比而适相比者其正也故正而吉传曰不自失不失其正也本义曰柔顺中正上应九五自内比外而得其正吉之道也

六三【句】比之匪人

传比之匪人不亦伤乎

不中不正危疑之地处二之后五隔于四不能相比与上相应后夫之 后夫凶而比伤可知矣之谓上也非初二四之 也故曰匪人專以应言

语类曰初应四为比得其人二应五亦为比得其人惟三乃应上上为比之无首者故为比之匪人也赵氏彦肃曰初比于五先也二应也四承也六三无是三者之义将不能比五矣

六四【句】外比之【句】贞【句】吉

传外比于贤以从上也

上谓九五五位尊刚正一卦之主贤也四从五五在外而四从之正也比之最切者也从龙从虎气 自然

李氏过曰二与四皆比于五二应五在卦之内故言比之自内四承五在卦之外故言外比之外内虽异而得其所比其义一也故皆言贞吉

九五【句】显比【句】王用三驱【句】失前禽【句】邑人不诫【句】吉传显比之吉位正中也舍逆取顺失前禽也邑人不诫上使中也

九五居尊为比之主刚健中正而羣阴翕然从之刚健则明而不暗中正则公而不私故曰显比观显之为义则廓然并包乎天下而无所于迫坦然诚服乎天下而无所于疑已尽一爻之神而吉可知矣失前禽显比之德刚中之存来者不杀而众归之王者之仁所以蓄众邑人不诫显比之化刚中之致自協乎中而不知谁之为之帝力于我何有也陆氏振奇曰三驱失禽置失得于无恤者状荡平之王心邑人不诫泯知识于大顺者状熙皞之王化

三驱失禽之义程传本义俱以天子不合围及武汤祝网为解然古注云凡驱禽而射三度则已也军礼禽在前来者不逆而射之不杀降也旁去又不射奔者不禁也惟背我而去则射之故自髀达肩为上杀而伤者不以献是舍逆者不迎射之也取顺者取其所当取如书所谓取乱侮亡也失前禽则所到皆下不杀一人而全收其众正显比之事若来者不拒则来即取而杀之矣于义未安又邑人不诫本义云虽私属亦喻上意不相警备以求必得经传义俱未合语类则云邑人不诫如有闻无声言其不消告诫又如归市者不止耕者不变相似后条更切得显比景象

上六【句】比之无首【句】凶

传比之无首无所终也

九五为比之主初比之最先故有喜二正比五四外比五故皆贞吉六阴柔疑贰比之最后而居于五之上既已过之不知天命祸可言乎此象之所谓后夫凶也无首即后也无所终据无首而言也与不宁方来对看非先无首而后不知所终也王氏弼曰无首后也处卦之终是后夫也为时所弃宜其凶也王氏申子曰五以一阳居尊四阴比之于下故彖传曰下顺从也而上六 立于外而不从岂非后夫之象二家得之

小畜【句】亨【句】密云不雨【句】自我西郊【小畜归歲作 畜误】

传小畜柔得位而上下应之曰小畜健而巽刚中而志行乃亨密云不雨尚往也自我西郊施未行也大象风行天上小畜君子以懿文德序卦比必有所畜故受之以小畜杂卦小畜寡也

畜因乎比覆乎履比一阳为五阴所归而小畜以一阴制乎五阳此其刚柔相因而推之者也履上干而下兑柔不当位而履乎刚小畜上巽而下干柔得其位而上下之刚系之此其刚柔反复而推之者也柔止刚非亨道也第以其内健而外巽阳刚居二五之中而其志得行乃可以亨也兑反为巽自内而外兑升成巽三往居四故圣传曰尚往往期于远而近在干上故曰自我西郊夫阴阳和而后雨泽降阳为阴畜则阴为主而阳未得遂故有此象然不雨不遽雨也施未行未竟行也此乃所为畜之小而有亨之道也如初九之复自道九二之牵复九五之有孚则尚往而施未行之时矣至上九巽变为坎则雨之盈而畜者盛故贞厉征凶畜之极而亨道难矣先儒俱谓云起自西即不成雨故于本文亨下二语不属经传彖爻俱多抵牾尝验之谚云久雨西风晴久晴西风雨云随风行歷歷不爽则西起之云亦未尝不雨也来氏颇窥亨畜之防而于象义犹未尽協由其未明此理并用互爻而不及刚柔相推之本也

初九【句】复自道【句】何其咎【句】吉

传复自道其义吉也

二五刚中志行故能亨干不可得而畜也初当畜之伊始九以阳刚之才乘其机之萌而自行其志不为四制而四且应之则复其常矣道之本然也故曰复自道不惟无咎而实为事理之宜故圣传曰其义吉此君子之所以大居正也贵谨几也观屯否之初可见

九二【句】牵复【句】吉

传牵复在中亦不自失也

牵连也连乎初也初合志同德者也干不可畜九二刚中阴不能制不成乎畜正与初九相牵而复其常亨畜之理一也圣传承初九不畜之义而言故曰亦不自失

九三【句】舆説辐【句】夫妻反目

传夫妻反目不能正室也

九三切近乎四既比之复迫之欲动不能故有舆説辐之象三四阴阳比近夫妇之义然阳刚不中而阴柔得位居外将欲制其阴而反为阴制反目不相对视各相恶而不相下也不能正室非不欲正不能正也

项氏安世曰辐陆氏释文曰本作輹按辐车輹也輹车轴转也辐以利轮之转輹以利轴之转然辐无説理若輹则有説时车不行则説之矣大畜大壮皆作輹字胡氏炳文曰大畜九二舆説輹輹与辐或据左传注以为通用何也曰説文輹车下横木非辐也大畜九二説輹刚而得中自止而不进也小畜九三説辐刚而不中止于阴而不得进也説輹可复进説辐则不可以行矣二説互相发

六四【句】有孚【句】血去惕出【句】无咎【血晁以道作恤】

传有孚惕出上合志也

六四承五为畜之主象五位尊而相得故象为有孚而传曰上合志上谓五也畜得其正顺承以为畜也此为最善故无咎血晁氏本作恤盖恤字之误也恤忧恤也谓九三本象阴为阳所迫説辐反目者也四既承五则九三之忧恤者去矣惕本爻四多惧故惕然以阴承阳畜之正者故出乎惕即象即占从前血惕二义俱未明彻

九五【句】有孚挛如富以其邻

传有孚挛如不独富也

四以阴畜阳不得其正惟承五故有孚五则阳为主而阴之畜者成之又有二之刚中为应其志得行故曰有孚挛如挛如孚之甚犹所谓心如结兮者彖之刚中而志行是也畜有富义畜正而盛则富矣邻即四畜盛而富则四之孚者亦富也如君于臣正其志而谏行言听则臣亦与共天禄书曰臣哉邻哉是之谓矣本义谓三爻同力畜干为邻之象未合彖传观之

上九【句】既雨既处【句】尚德载【句】妇贞【句】厉【句】月几望【句】君子征凶【德京房虞翻子夏传皆作得几唐一行作既俱误】

传既雨既处德积载也君子征凶有所疑也

既雨雨之既也如既然之既月几望几及也如庶几之几上九畜之终亨之久富之盛非德之积不足以载之故曰尚德载不然则满而倾矣书曰满而不溢所以长守富也其为是乎此君子之道贵刚以守之也若阳畜不止则六四用事妇道为主危厉不免如月之及望而阴疑于阳矣君子当此岂可复征故不戒者凶也畜极而通则雨矣因彖文不雨而言故曰既雨望月之盈也阴之盛也本爻巽体畜极故曰月几望妇阴dao君子犹言男子犹九三之言夫也应也其情同王氏应麟曰小畜上九月几望则凶阴疑阳也归妹六五月几望则吉阴应阳也中孚六四月几望则无咎阴从阳也据此分晰得同辞异义之防然归妹中孚之月几望皆阴爻此独阳爻变坎则阴之畜极者不知止也故征凶九三之夫妇反目终必及也

既雨既处尚德载二句与妇贞厉月几望君子征凶三句上下相承对看玩传文既雨既处德积载也为一段妇贞厉君子征凶有所疑也为一段文势分明先儒以妇贞厉属上段与君子征凶对看不协

履虎尾【句】不咥人【句】亨

传履柔履刚也説而应乎干是以履虎尾不咥人亨刚中正履帝位而不疚光明也大象上天下泽履君子以辩上下定民志系辞履德之基也履和而至履以和行序卦物畜而后有礼故受之以履杂卦履不处也履小畜之反也小畜外巽之六四来内干之九三兑柔干刚而干上兑下若履践然故名为履干虎象凡卦从下而上则四即其尾也然本卦之体内兑外干説干健柔以应刚无所伤害故虽履虎尾而不咥人占此者亨且五当尊位所履者尊刚中而正故不疚又九五刚正有光明之象履之所以无伤而能亨也履虎尾以九四言彖传履帝位以九五言其不咥人不疚及九五之贞厉而不至凶互相发明

初九【句】素履往【句】无咎

传素履之往独行愿也

素履犹中庸言素其位而行也素者本然固有之谓履礼也知崇礼卑本爻刚而能下居履之初未为物迁率其本然固有者而行之独得于己不愿乎外故无咎

九二【句】履道坦坦【句】幽人【句】贞【句】吉

传幽人贞吉终不自乱也

九二中正故有履道坦坦之象中道而行依乎中庸者也平易明白中有所主崎险奇衰不足以乱之对九五帝位而言则此为幽人犹中庸所谓遯世不见知而不悔者也刚中即所以为正贞也故吉梁氏寅曰行于道路者由中则平坦从旁则崎险九二以刚居中是履道而得其平坦者也持身如是不轻自售故为幽人贞吉

六三【句】眇能视【句】跛能履【句】履虎尾咥人【句】凶【句】武人为于大君

传眇能视不足以有明也跛能履不足以与行也咥人之凶位不当也武人为于大君志刚也

不中不正居凶危之地暗昧陂侧而行险犯义下履九二上履纯干其志甚刚不免于祸此履之凶者本卦小畜之反也巽反为兑是干也而成兑矣兑为毁折则眇且跛也不必象家互爻而始合也柔履刚本爻为履之主就全体而观则兑説而应乎干就一爻而言则正履干刚而失其柔故即承彖文履虎尾而分别之曰此则其咥人者也王氏申子所谓彖总言一卦爻则据其时与位而言是也来氏谓人居兑口啗矣武阴象三也眇视跛履而履虎尾者也大君干也为则作威作福之谓为于大君犯分干义履之事也所以明上文之象也圣传上以位言下以志言本一意王氏申子谓武人用之以有为于大君之前则可者亦失传意

九四【句】履虎尾【句】愬愬终吉【愬愬马融作兢兢误】

传愬愬终吉志行也

履非其地皆属危机九四不中不正与六三同故亦曰履虎尾四多惧故愬愬也以刚居下上

承九五履危而知所戒惧与暴虎冯河眇视跛履者异盖履刚而能柔志自可行故终吉

九五【句】夬履【句】贞【句】厉

传夬履贞厉位正当也

刚中而正履当尊位不疑所行故夬履夬决也快也中正故贞厉而不至咎凶此即彖所谓履虎尾不咥人传所谓履帝位而不疚者也所以夬履而贞且厉者以正当乎履之位决于履且固守其履也以视履元吉观之则夬履之贞厉可见矣噬嗑之贞厉无咎传曰得当兑五之有厉传曰位正当皆以当乎位之尊而言也彖传爻辞非有异文

上九【句】视履【句】考祥其旋【句】元吉

传元吉在上大有庆也

上九履之终行之成不壮往不径行故曰视履视审慎也考视之详也祥善之至履之度也旋周旋折旋也中规中矩善也就履而言故不仅曰善而曰祥也履礼也周规折矩有节有文秩然蔼然中乎天则考祥如是所谓动容周旋中礼盛德之至者履以和行莫之或过夬履者行若危愬愬者行自惧眇跛者行若狂坦坦者行未着素履者行未成吉无逾此者故元吉

来氏知德曰视履作一句与素履夬履同例祥善也三凶五厉皆非善也考其履之善必皆天理之节文人事之仪则下文其旋是也旋者周旋折旋也凡礼以义合而截然不可犯者谓之方犹人之步履折旋也以天和而怡然不可解者谓之圆犹人之步履周旋也礼虽有三千三百之多不过周旋折旋而已考其善于周旋折旋之间则中规中矩岂不元吉按此义最精但其中有中爻离目视之象也句未解传元吉在上專以上言不主六三也此又用互爻而失之凿故删之

泰【句】小往大来【句】吉【句】亨

传泰小往大来吉亨则是天地交而万物通也上下交而其志同也内阳而外阴内健而外顺内君子而外小人君子道长小人道消也大象天地交泰后以财成天地之道辅相天地之宜以左右民序卦履而泰然后安故受之以泰泰者通也杂卦否泰反其 也

泰者否之反小谓阴大谓阳往者自内之外来者自外至内小往坤三阴自否内往居外大来干三阳自否外来居内阳来阴往交也阴阳交则和和则通上下交则合合则固故曰泰正月之候成平之世天时人事一也吉亨者吉以亨也泰也

杂卦传否泰反其 言此为反易之卦只从否泰观其往来大分了然不兼归妹彖传较然刘氏牧亦專主内外卦

初九【句】拔茅茹以其彙【句】征吉

传拔茅征吉志在外也

泰初阳来于下天道下济君德下交之始即上交之初茅微贱之物以其在初也茹根也彙也征进也仕进之谓下交之初众志欣动进而从君也茹茅之根彙又根之类思皇多士维周之桢济济多士文王以宁王阳在位贡禹弹冠观士气而知兴朝之象据初而言也盖拔茅之茹而连乎茹之彙则极其下者而拟之以见交泰之初气 之从也先儒谓连及三阳者犹隔一层

九二【句】包荒【句】用冯河【句】不遐遗【句】朋亡【句】得尚于中行

传包荒得尚于中行以光大也

泰二阳交于二上应六五交之最盛者泰之主也荒远也干体广大无不兼容而量有必周故曰包荒非仅初之拔茅茹而以其彙已也九二刚中能济往而无阻有冯河之勇焉干用刚果无所私昵而不疑所行故曰用冯河非仅初之征进已也惟其体之无不容也故不遐遗逮惟其用之无所私也故不溺朋比皆据二而言泰之中道也传曰光大者中德也本义谓包容荒秽来氏谓包初皆非也未知上下四句之相承见义也未知得尚于中行为本爻之主也未知传举首尾以括中二句也

九三【句】无平不陂【句】无往不复【句】艰贞无咎【句】勿恤【句】其孚【句】于食【句】有福

传无往不复天地际也

三处上下卦之间地与天往来之界地之形无平而不陂天之气无往而不复当此之际非干阳之贞以固其交能为泰乎知其艰而贞以守之斯无咎震无咎者存乎悔其为艰也能勿恤乎其能贞也则有孚矣孚则阴阳交而泰矣如是则不仅无咎也艰贞者于是乎食矣且有福矣勿恤恤也于食食也俱二字为句

泰否反易亦对待九三阴阳交际之大分故就其大分以为辞与论承应者又别圣传以一际字括一爻之象奇甚

六四【句】翩翩不富以其邻【句】不戒以孚【翩翩陆德明作篇篇误】传翩翩不富皆失实也不戒以孚中心愿也

泰四柔顺之体阴以得阳为心上交之时近五应初同心相应翩翩来不已之貌状四之情也不富以其邻言 应之速不有其富相与为泰也邻谓五五泰之至隆四以阴相承急欲相从以成泰同情也传曰失实者忘私忘家之谓非不待富之谓不戒以孚言不富以其邻之实也不待戒而自孚出于中心之所欲得也故传曰中心愿实泰交之美者本义谓其占为有小人合交以害正道君子所当戒于爻情传义俱未协何氏楷曰此正阴阳交泰之爻也翩翩羣飞而下貌阴虚阳实凡言不富者皆阴爻邻指五上四能挟其并居之邻相从而下者以三阴皆欲求阳故不待教戒而能以之下孚乎阳也此说近是

六五【句】帝乙归妹以祉【句】元吉

传以祉元吉中以行愿也

帝乙归妹借时事为象如高宗箕子之 帝乙谓汤汤称天乙故亦称帝乙其嫁妹之辞曰无以天子之富而骄诸侯阴之从阳女之顺夫天下之义也往事尔夫必以礼义是也泰五阴居尊位帝女之象泰交于阳下嫁之象来氏谓本卦阴阳交泰阴居尊位而阳反在下故象以此者得之其谓中爻三五为雷二四为泽有归妹之象者亦偶合此体非本意何也无帝乙二字也祉当作礼即必以礼义之文元吉至善而大吉也福在其中皆五之中德为之故传曰中以行愿也女之嫁与四之愿交于阳同也帝制为下嫁之礼则中以行之矣

上六【句】城复于隍【句】勿用师【句】自邑告命【句】贞吝传城复于隍其命乱也

泰极矣过乎中矣必复为否政令颠倒成者壤之尚可为哉坤为地为土故取象城隍坤为众

变艮为止故勿用师邑亲近之地令不及远而告命自邑虽正亦吝泰极之时为之也程子曰掘隍土积累以成城如治道积累以成泰及泰之终将反于否如城土頽圯复及于隍也上泰之终六以小人处之行将否矣师众也勿用师君之所以能用众者上下之情通而心同也今泰之将终失泰之道上下之情不通矣民心离散不从其上岂可用也用之则乱众既不可用方自其亲近而告命之虽所告命者得其正亦可羞吝来氏曰此复字正应无往不复复字

否【句】之匪人【句】不利君子贞【句】大往小来

传否之匪人不利君子贞大往小来则是天地不交而万物不通也上下不交而天下无 也内阴而外阳内柔而外刚内小人而外君子小人道长君子道消也大象天地不交否君子以俭德辟难不可荣以禄序卦物不可以终通故受之以否杂卦否泰反其 也

否者泰之反干三阳往居外坤三阴来居内阳散阴离不交也阴阳不交则不和 不和则不通上下不交则不合 不合则不利故曰否衰谢之候败壤之秋天时人事无可为者否之匪人与履虎尾同人于野艮其背同例独以匪人当之者内小人小人道长也不利君子贞者不利于君子之正外君子也君子道消也天地塞贤人隐不能以行道为正故大象曰君子以俭德辟难不可荣以禄也泰但言小往大来而着其吉亨否则详言人事而后言大往小来若曰当斯时也虽曰天命岂非人事哉言世之否塞皆小人为之也

来往只从泰否反易见义不兼渐卦否之匪人来氏以为非人也天也天字多一转失圣人立象之意不利二字为句与上下句不相属只如旧读即小人道长君子道消之谓也

初六【句】拔茅茹以其彙【句】贞【句】吉【句】亨

传拔茅贞吉志在君也

否初事尚可救阴阳虽不交而外有九五刚正之君因时而早图之则犹可及止也惟在正而固以守之则吉而否者以亨亨否非一人之事亦必有杰出之人气机之际旋转之功在初为最切也且否泰反易同体故初爻之辞差同其不同者贞也亨也贞君子之道也彖辞不利君子贞而初以贞而吉且亨者以初之时言也君子之道未竟消也先儒俱以三阴皆为小人是専见彖而不见爻也彖言阴阳之大分爻言所值之时位各有所当约而言之诸卦大象之不吉者初爻皆有吉义如屯蛊睽蹇之 言其势之可回也且据其材而言之苟有可治则否即可亨也四五六亦然古今治世而伏乱几乱世而基治理岂不惟其人乎

六二【句】包承【句】小人吉【句】大人否亨

传大人否亨不乱羣也

包一阴居中而上下两阴包之也承承六三也六二柔中当否之时包阴而又承三无所作为承顺而已夫不敢妄作小人之福也故吉然爻本中正可以自立虽包阴承三不为所乱安其否而道自亨也或曰上应九五否者可亨也曰天地不交不能为应也六十四卦中有应而不能为应者独此卦也故传曰不乱羣独言大人者所以着君子之柔正不同乎小人之柔靡也

六三【句】包羞

传包羞位不当也

六三偏暗当上下交接之地有阳可从而偏邪险侧与羣阴为党以成为否小人误国貽祸于世上下切齿腴面自安可羞孰甚诗云天之方蹶无然泄泄孟子曰泄泄犹沓沓也事君无义进退无礼言则非先王之道者犹沓沓也其是之谓乎

九四【句】有命【句】无咎【句】畴离祉

传有命无咎志行也

否九四泰之九三也而所处之地尤善以阳居四刚而承五刚中之君相与共济亨否何疑命以四承五出纳王命柔不茹刚不吐何咎之有泰三勿恤有孚而后有福否四有命自无咎而同类且受祉语曰大旱之后易为泽所处之地然也畴也离丽也祉福也项氏安世曰泰虽极治以命乱而成否否虽极乱以有命而成泰命者天之所令君之所造道之兴废岂非天邪世之治乱岂非君邪防哉斯言

明王文成公答朱侍御书曰畴祉盈朝志行于众

九五【句】休否【句】大人吉【句】其亡其亡系于苞桑

传大人之吉位正当也系辞子曰危者安其位者也亡者保其存者也乱者有其治者也是故君子安而不忘危存而不忘亡治而不忘乱是以身安而国家可保也易曰其亡其亡系于苞

桑

否至于五噫甚矣将息矣九五刚中故足济否非大人孰能与于斯乎然否之在休犹未尽也未亡者一线耳苞桑之系微矣桑非樟楠松柏之大不固磐石而系苞桑其危何如否休之际有此象也汉唐中兴不其然乎系辞传于危亡乱丁宁再三圣人之情见乎辞皆休之义也否泰之分也

唐陆贄收复河北后请罢兵状云 国之机 绵绵连连若苞桑缀旒幸而不疎者缕矣此语可以观象

上九【句】 倾否【句】 先否后喜

传否终则倾何可长也

否极矣乱极生治否之上九泰之上六时 必然泰上曰复否上曰倾倾与复正相对倾尽则泰矣故先否后喜传曰何可长言不终否也阳长而阴消也天之元为之主也

同人于野【句】 亨【句】 利涉大川【句】 利君子贞

传同人柔得位得中而应乎干曰同人同人曰同人于野亨利涉大川干行也文明以健中正而应君子正也惟君子为能通天下之志大象天与火同人君子以类族辨物序卦物不可以终否故受之以同人杂卦同人亲也

泰否小乾坤也以下一阴五阳一阳五阴者四而同人则其间接续者也师一阳居二而统羣阴同人一阴居二而合羣阳师众也同人亲也名卦相因同人大有干离相加覆推而成柔以二为正为中柔正居中足系两阳而外又应乎干以柔中而合健德大同之象也故曰同人其于野涉川皆谓干也于野象其旷远涉川象其健行旷远者无私交健行者无沉溺故亨且利又离文明而干健九五中正而应乎二惟其中正故羣阳俱应也非君子孰能与于斯贞正也

初九【句】 同人于门【句】 无咎

传出门同人又谁咎也

刚正居下同人之初无所偏系又位在最近之地故曰门于内者于野之初也传曰出门则无门内之私二之柔中在前同之而不徇也故曰谁咎

六二【句】同人于宗【句】吝

传同人于宗吝道也

宗主也六二为同人主爻其在大象本以柔中而同乎羣阳大公之道也至于本爻则二与五为正应其情專一于初三四上若相离者然失同人之道矣与大象之应乎纯干者异故吝

九三【句】伏戎于莽【句】升其高陵【句】三歲不兴

传伏戎于莽敌刚也三歲不兴安行也

卦以同为义不同则争干来同于离而三以偏暗居离之间欲败其同然干尊离明不得肆也又九三刚而不中欲与二同而二与五为应不能为同欲谋间五而刚正不敌同而不同是有戎心矣且三居下卦之上隔四望五故有升其高陵之象然干敌刚正终不能动故三歲不兴三歲爻居三也不兴即伏也静而不动也故传曰安行安行犹曰潜行

九四【句】乘其墉【句】弗克攻【句】吉

传乘其墉义弗克也其吉则困而反则也

四亦欲同乎二而恶其專于五也墉谓三离中虚有垣象故三为其墉四乘而攻之然刚在干下尚知自反以五在上而不能逞也以五为正而不可肆也不能逞故乘墉而攻不克也不可肆故终守分逊五而吉也传曰义弗克非但势不克五尊与二为正应实有不可攻之义困而反则则知义矣

九五【句】同人先号咷而后笑【句】大师克【句】相遇

传同人之先以中直也大师相遇言相克也系辞同人先号咷而后笑子曰君子之道或出或

处或默或语二人同心其利断金同心之言其臭如兰

不同则忧同则喜同人之情所必至也号咷忧之切笑喜之诚先号咷者三四间之也后笑者五与二中正而应也人之不同者即争象三伏莽四乘墉阳刚设险必大师乃克既克则同而相遇矣传同人之先句连号咷后笑在内如包荒得尚乎中行拔茅征吉等句皆省文也

上九【句】同人于郊【句】无悔

传同人于郊志未得也

初曰门二曰宗三曰陵四曰墉五能同矣上居其外离其俦侣故曰郊又干有郊野大象国外谓之郊郊外谓之牧牧外谓之野皆旷远之地于郊去野不遠宜同占义矣而仅曰无悔者本爻廓落无与耳未若大象之 应无私也于野者文明以健刚中而应能通天下之志于郊则于野有间矣明健不足刚而不中九三不应虽无所悔而实未能通天下之志也故传曰志未得象传志字正对象传志字

大有【句】元【句】亨

传大有柔得尊位大中而上下应之曰大有其德刚健而文明应乎天而时行是以元亨大象火在天上大有君子以遏恶扬善顺天休命序卦与人同者物必归焉故受之以大有杂卦大有众也

同人之覆也阳大阴小大谓阳六五柔尊得中上下交应五阳皆其所有故曰大有也干刚健离文明干三阳应离六五与天相应时中而行所以元善而亨通也干曰元亨利贞大有曰元亨离明天上与天同体矣

程子曰卦之才可以元亨也凡卦德有卦名自有其义者如比吉谦亨是也有因其卦义便为训戒者如师贞丈人吉同人于野亨是也有以其卦才而言者大有元亨是也由刚健文明应天时行故能元亨也

初九【句】无交害【句】匪咎【句】艰则无咎

传大有初九无交害也

五阳皆为六五之有初去五尚遠不能相与故无交然阳刚在初不涉物累故亦无害不求不伎非有咎也其所以无交害者刚以守之也艰也斯无咎之道六五曰厥孚交如威如羣阳皆孚也此曰无交害遠于五也

九二【句】大车以载【句】有攸往【句】无咎【车蜀才本作輿】

传大车以载积中不败也

阳刚得中正应六五能成其有若大车之载物中广能积满而不溢足以任重致遠故往而无咎

九三【句】公用亨于天子【句】小人弗克【亨虞氏作享与春秋传合】传公用亨于天子小人害也

本义亨春秋传作享谓朝献也古者亨通之享享献之享烹飪之烹皆作亨确不可易先儒作亨通之亨者泥于字也当大有之时居上下之交二有大车之载往四有匪彭之无咎则三以干下之上而上交离明宜其为公也为亨于天子也虽地处偏隘刚柔之际不无小人之害然健以明继不能胜也亦不可不慎也亨之成不成重有關於大有之时也象传分明程传谓小人处之则專其富有以为私本义谓小人无刚正之德虽得此爻不能当俱不协来瞿塘知四之阻为小人而又以离为兵戈之象亦啗

九四【句】匪其彭【句】无咎

传匪其彭无咎明辨皙也

程传曰彭盛多之貌诗载驱云行人彭彭行人盛多之状雅大明云駉駉彭彭言武王戎马之盛也沈氏该曰谦少自居而惧以戒其盛得明哲保身之义故无咎按四连三阳而进彭彭然盛之貌也四多惧以刚下柔戒惧谦退不有其有彭彭然者匪其有也明于义理之至也故无咎沈氏深得象传意

六五【句】厥孚交如【句】威如吉

传厥孚交如信以发志也威如之吉易而无备也六五虚中九二诚应五虚中而信于下二志实而应乎上上下下交孚之象也书曰元首明哉股肱良哉大有之交也二应而五阳俱应矣故曰厥孚交如斯时也恭己南面礼明乐备坦易明白不大声色离当文明故曰威如先儒威如句作戒辞未详圣传

上九【句】自天祐之【句】吉无不利

传大有上吉自天祐也系辞易曰自天祐之吉无不利子曰祐者助也天之所助者顺也人之所助者信也履信思乎顺又以尚贤也是以自天祐之吉无不利也六五有乎大者也羣阳大之有乎五者也上吉大之极而六五柔中实与亲信上刚从柔思顺乎五当有之极不自有其有而为六五有心知六五之贤而尚而信且顺之相得之深有之成也故曰自天祐之吉无不利而传曰大有上吉自天祐也言上之所以吉也系辞传所谓履信思乎顺又以尚贤者正相发明本义曰大有之世以刚居上而能下从六五是能履信思顺而尚贤也经传联贯无复疑义而郭氏雍郑氏汝谐俱谓履信思顺为六五之事而特于上九发之以见其有失爻义矣

谦【句】亨【句】君子有终

传谦亨天道下济而光明地道卑而上行天道亏盈而益谦地道变盈而流谦鬼神害盈而福谦人道恶盈而好谦谦尊而光卑而不可逾君子之终也大象地中有山谦君子以裒多益寡称物平施系辞谦德之柄也谦尊而光谦以制礼序卦有大者不可以盈故受之以谦杂卦谦轻

同人大有皆一阴五阳见于泰否之后谦豫则皆一阳五阴坤艮反覆相推而成者自然相因之序也为卦上坤下艮地卑居上山高居下坤顺艮止艮九三一阳止于坤顺之下皆不自尊亢之象故名曰谦天地之体用人鬼之性情皆以谦为贵其德足为众之所归故有亨道是谦之所以亨由艮之一阳止于众阴之间尊而终见其光卑而终不可逾故曰君子有终

初六【句】谦谦君子【句】用涉大川【句】吉

传谦谦君子卑以自牧也

六在谦初以谦自治者谦而又谦敬谨之至用涉危险必克有济故吉止而顺以柔处初涉险不陷即涉川之义不必互体震坎隔爻取象

六二【句】鸣谦【句】贞吉

传鸣谦贞吉中心得也

鸣和于外也柔顺中正与三相得三为谦之主鸣谦鸣三之谦也同声相应同气相求声气不孤得心应响有不啻若自其口出者矣故为鸣谦惟其中正故贞且吉苏氏轼曰雄鸣则雌应故易以阴阳唱和寄之于鸣谦之所以为谦者三六二其邻也上六其配也故皆和之而鸣于谦来氏取小过飞鸟之象为鸣不若此条得卦之主

九三【句】劳谦【句】君子有终【句】吉

传劳谦君子万民服也系辞劳谦君子有终吉子曰劳而不伐有功而不德厚之至也语以其功下人者也德言盛礼言恭谦也者致恭以存其位者也

三刚德艮体居下之上为羣阴之所归有功于民者也而止于坤顺之际不傲上不凌下所谓谦尊而光卑而不可逾者此君子也其有终也万民之所以服也故吉系辞传有功谓已成之功即劳也故下云语以其功下人者也来氏取象互坎分别功先劳后失传意

六四【句】无不利【句】防谦

传无不利防谦不违则也

上有柔中之君四下之而不亢故无不利然三者谦之主爻以刚下柔谦之所以为谦也诸爻之谦视之为则四之所以无不利者当发挥乎三之谦也二承三上应三皆得鸣三之谦四乘三当发挥乎三之谦观传所谓不违则者爻义甚明本义于防谦另作戒辞来氏解为防者裂也避阳而去之俱非圣传意

六五【句】不富以其邻【句】利用侵伐【句】无不利

传利用侵伐征不服也

柔中居尊虚其中不有其富也羣阴同类邻也能左右之曰以不有其富而急其邻众可用矣六五之谦众人所服有不服者不成谦也用众征之自无不利不必如来氏以中爻之变离为兵戈也其不服者与万民之服异志不得已而伐之耳然以六五之不有其富则亦谦之亨者也他事俱无不利

上六【句】鸣谦【句】利用行师征邑国

传鸣谦志未得也可用行师征邑国也

三谦之主也二既鸣谦矣中而比近故心相得上与三应亦从而鸣之无如位高不中恭俭岂以声音笑貌为哉过谦之则而鸣之是为不善鸣矣位高也不中也志未得也以之行师征邑国则【阙】顺极故可用也邑国私属正内也

易翼宗卷三

湖北巡抚晏斯盛撰

上经

豫【句】利建侯行师

传豫刚应而志行顺以动豫豫顺以动故天地如之而况建侯行师乎天地以顺动故日月不过而四时不忒圣人以顺动则刑罚清而民服豫之时义大矣哉大象雷出地奋豫先王以作乐崇德殷荐之上帝以配祖考系辞重门击柝以待暴客盖取诸豫序卦有大而能谦必豫故受之以豫杂卦豫怠

谦之覆也一阳居四上下众阴应之其志得行坤内震外坤顺震动皆有悦乐之意故名曰豫震为长男能统众阴坤为有土之象而长男为主与屯之初九同功故利建侯坤又为大众之象而长子为帅羣阴统于一阳与师同功故利行师孔氏颖达曰动而众悦故利建侯以顺而动故可行师

邱氏富曰屯有震无坤则言建侯而不言行师谦有坤无震则言行师而不言建侯此合震坤成卦故兼之

初六【句】鸣豫【句】凶

传初六鸣豫志穷凶也

当豫之初未豫也四为豫之主初与之应以豫为志者也鸣豫犹言鸣其得志也以阴柔不中之才未豫而遽以为豫极其豫之志将纵欲败度矣岂能成豫凶之道也传因鸣而知其志因志而知其穷穷也者极也如坤初履霜而知坚冰之至剥初剥足而知其蔑贞也王氏应麟曰鸣谦则吉鸣豫则凶鸣者心声之发也龚氏焕曰豫之初六即谦上六之反对故谦上六曰鸣谦豫初六曰鸣豫谦之上六应九三故鸣谦豫之初六应九四故不胜其豫以自鸣谦而鸣则吉豫而鸣则凶

六二【句】介于石【句】不终日【句】贞吉

传不终日贞吉以中正也系辞子曰知几其神乎君子上交不谄下交不瀆其知几乎几者动之微吉之先见者也君子见几而作不俟终日易曰介于石不终日贞吉介如石焉宁用终日断可识矣君子知微知彰知柔知刚万夫之望

柔而得中特立于鸣豫盱豫之间不懷与安不比于邪介然自守坤厚之中得其坚确断如石焉然其介也断为之其明为之也见几明故不俟终日其明且断也皆中正之德为之故贞吉

六三【句】盱豫【句】悔【句】迟【句】有悔

传盱豫有悔位不当也

盱上视也四为豫之主六三陰柔不中上视乎四而溺于豫悔之道也然不但盱豫之为悔即稍迟焉不能如石之介不俟终日亦有悔也来氏知德曰盱与介相反迟与不终日相反

九四【句】由豫【句】大有得【由】勿疑【句】朋盍簪

传由豫大有得志大行也

四以一阳为众陰之主动乎上顺乎下时之所由以豫也以刚为主众陰应之志无违逆彖传所谓刚应而志行者也故爻曰大有得爻传曰志大行也然爻虽刚而四多惧故戒曰勿疑勿疑而后爻之刚者足以统柔刚柔相与朋之义也朋谓五陰盍合也簪总髮器古人之冠上簪下纓盐铁论曰神禹治水遗簪不顾家语云孔子闻哭著簪皆此簪字合簪者言朋之聚也五陰同豫一阳也李白诗云京国会纓簪其即盍簪之谓乎

六五【句】贞疾【句】恒不死

传六五贞疾乘刚也恒不死中未亡也

陰柔居尊可以豫矣而下乘九四之刚中虚微弱勢逼难治如人之外感因以内伤不得自豫贞疾也然五犹得中根本未亡也故恒不死程传曰居得君位贞也受制于下有疾苦也六五尊位权虽失而位未亡也

上六【句】防豫【句】成【句】有渝无咎

传防豫在上何可长也

上六豫之极以柔处之则昏防于豫者然物极则反事极悔生豫既极矣至于昏防无所复之得无悔心之萌乎悔而改之则生理仍在如盟言之已成有以改之斯可无咎渝改也 鸣豫在初又应九四事虽未成而不可渝者也故凶冥豫在上下无应与事虽已成而尚有渝者也谋始虑终几可不慎乎

随【句】元【句】亨【句】利【句】贞【句】无咎

传刚来而下柔动而説随大亨贞无咎而天下随时随时之义大矣哉大象泽中有雷随君子以向晦入宴息系辞服牛乘马引重致远以利天下盖取诸随序卦豫必有随故受之以随杂卦随无故也

三陰三阳泰否之杂兑震艮巽反覆相推上兑下震蛊之覆也蛊艮巽二体阳上陰下覆而为随兑震二体则蛊之二三上刚爻皆来随二三上柔爻之下是以阳随陰也又蛊内体巽柔反为兑居随之上而外体艮刚反为震来居兑柔之下亦以阳随陰也阳随陰则陰亦随阳俱相随之义也震动兑説又体与意之相随者也故为随己能随物物来随己彼此相从大通而利且正之道也所以无咎非元亨利贞则失随之道未能无咎也何也随也者与时宜之者也非诡随所可托也

初九【句】官有渝【句】贞【句】吉【句】出门交【句】有功

传官有渝从正吉也出门交有功不失也

卦以刚随柔为义初自蛊之上九来蛊上九曰不事王侯高尚其事今来而下柔则改变其高尚而随乎时矣艮转为震为长男又为随主故曰官犹所谓心之官也六二得中初九从之以刚健之才而随乎中正之二随之善者贞也故吉以此出门交友即可有功何也不失其正也出门谓初交谓从二有功吉之一端也象本全吉不作戒辞

六二【句】系小子【句】失丈夫

传系小子弗兼与也

随刚来下柔阳随陰陰亦从阳也陰小阳大小子谓六三丈夫谓初九其势从下而上初九刚明当随者也而与六三同类比连牵系难断若不断而系乎三则失初矣欲二之专与初相随也故圣传曰弗兼与先儒以九五正应为丈夫初阳在下为小子然刚来下柔比次相随五往随上不与二应非丈夫也且下文小子无下落

六三【句】系丈夫【句】失小子【句】随有求【句】得【句】利居贞传系丈夫志舍下也

丈夫九四也小子六二也四近刚正之君势力有余故随之有求而即得但六三柔弱位不中正必居贞而后所随者正故利居贞

先儒以初为小子然初隔乎二无随之义不關得失传曰志舍下二在三下也

九四【句】随有获【句】贞凶【句】有孚在道以明【句】何咎传随有获其义凶也有孚在道明功也

九四比三逼五三陰爻民也下也为下所从得民之象四近君势重豆区釜钟得无疑乎正凶道也然九五刚中若有以孚其心而合于道则心迹以明率下奉上皆其功矣故无咎

龚氏焕曰随卦诸爻皆以陰阳相随为义三四皆无正应相比而相随者也然六三上而从阳理之正也九四下为陰从固守则凶若心所孚信在于道焉以明自处何咎之有徐氏几曰六三九四相比相从三言有得者得乎四也四言有获者获乎三也

九五【句】孚于嘉【句】吉

传孚于嘉吉位正中也

阳刚得中而居尊一陰在上彼此诚孚随之最善者故曰孚于嘉嘉善也其吉可知

杨氏万里曰九五以阳刚居兑之中正为一卦說随之主此圣君至诚乐从天下之善者也吉孰大焉

上六【句】拘系之【句】乃从维之【句】王用亨于西山

传拘系之上穷也

随极矣无复之矣九五得中诚孚而不可解惟退而随五可耳上六贤也九五王也王祭封内山川西山文王之所有事也当其世周召望散舍王无复可随惟文王诚意固结相与共奉山川之祀而已何氏订诂曰兑为巫凡卦有兑者多取象祭祀如萃之王假有庙损之祀事遄往困之利用祭祀升之王用亨于岐山是也

蛊【句】元亨【句】利涉大川【句】先甲三日【句】后甲三日传蛊刚上而柔下巽而止蛊蛊元亨而天下治也利涉大川往有事也先甲三日而后甲三日终则有始天行也大象山下有风蛊君子以振民育德序卦以喜随人者必有事故受之以蛊蛊者事也杂卦蛊则饬也

随之覆也震初刚上上二三柔在上之下而为艮兑上柔下下四五刚在初之上而为巽刚皆上行柔皆下行否之杂也阴阳不交也又震反为艮刚居上兑反为巽柔居下亦不交也否也柔巽而刚止弛散頽窳故名曰蛊蛊壤也乱极治生事理之必然元始也大也亨通也当蛊之际有必亨之理故元亨有必济之事故利涉大川元亨以蛊之理言利涉大川以治蛊之事言皆视乎其谋始也甲十干之首先甲后甲事端之先后皆始事也始事之先有几始事之后有宜先甲三日于始事之先而饬其几也后甲三日于始事之后而饬其宜也天道循环无往不复终则必有始时乎时乎不可失也

马氏融曰十日之中惟称甲者甲为十日之首蛊为造事之端故举初而明事始也程传用此义本义据郑元传以先甲三日为辛后甲三日为丁失甲字即失始字义矣来氏据八卦流行图云艮巽夹震木于东之中故曰先甲后甲更啻而无当

初六【句】干父之蛊【句】有子【句】考无咎【句】厉【句】终吉传干父之蛊意承考也

墙有干版也井有干辘轳也有扶持转旋之义故曰干初六在事之始能顺乎刚有意扶持转旋者也子贤矣记所谓幸哉有子也初六其蛊未深济之尚易意在承考稍能干旋考即无咎虽危亦终吉也阴爻称父何也一家之事必有所禀命禀命之先者父也蛊之初家人禀命之最先故曰父之蛊也

九二【句】干母之蛊【句】不可贞

传干母之蛊得中道也

蛊当事之变故不可正九二才刚惧其固也然二犹得中上应六五不至于过多方以谕委曲以行蛊尚可济也爻阳称母何也居内之中所谓主中馈者母象也爻子也位母也故曰干母之蛊传曰得中道也

九三【句】干父之蛊【句】小有悔【句】无大咎

传干父之蛊终无尤也

三居内之上故亦曰父之蛊九三刚而不中故小有悔悔者刚之过而心不安也然当蛊之时惟刚能济坚正强固之中皆起衰振敝之用故无大咎而圣传且曰终无尤也以见蛊之非刚不济也

六四【句】裕父之蛊【句】往见吝

传裕父之蛊往未得也

六四阴爻称父何也外也一家之中位乎外者非父而何故四五阴爻皆称父也当蛊之四蛊深矣四居蛊之中内外交接之地亦有治蛊之心而爻本阴象无能干之才惟宽裕以处之蛊将日深欲治而未得故见吝有事之秋岂庸儒者所能与哉

六五【句】干父之蛊用誉

传干父用誉承以德也

外卦尊位父也其爻则子也六五柔而得中才堪济事其德足以光昭前烈不仅如九三之专用其才干蛊之最善者所谓元亨而天下治也赵氏汝楳曰六五德位适刚柔之中用以干蛊宜有休誉用誉则蛊之亨可知郑氏维岳曰子有干蛊之名则过归于亲干蛊而亲不失于令

名是用誉以干之也

此爻正与九三六四对看九三过刚虽能干蛊而小有悔六四过柔虽欲干蛊而往见吝皆德不足也惟六五柔中居尊德器胜人故传曰承以德誉者德之为也

上九【句】不事王侯高尚其事

传不事王侯志可则也

蛊极矣无事矣其时也上远矣事非其事矣其位也九以刚明之德居极远之地置身事外故为不事王侯之象然非不能济事而不事其事也独行其志砥节励操不降不屈孑然自高超然最上其志也即其事也扬清风而化顽懦渺乎其可望而不可即也故传曰志可则也五君位王侯也在五之外故不事王侯九刚明故其事高尚

临【句】元亨利贞【句】至于八月有凶

传临刚浸而长说而顺刚中而应大亨以正天之道也至于八月有凶消不久也大象泽上有地临君子以教思无穷容保民无疆序卦有事而后可大故受之以临临者大也杂卦临观之义或与或求

临观覆推泰否剥复之似阳下阴上将近乎泰犹未泰也已逾乎复浸进于剥矣阳主于进进而薄阴故名临谓阳之临于阴也阳大故泰彖曰大来临序曰临者大也兑说坤顺九二刚中而六五正应阳气通复天道之自然故元亨而利贞然阴阳之际阴虽正消而消不久至八月则四阴方盛而消者长矣八月虽犹是二阳而浸寻消之即至于剥矣此以大临者不可不知也

八月先儒有以自子至未为遯者谓建未为周正也毛西河以自丑至申为否谓二阳建丑为商正也然以阴阳消长之正观之自寅至酉则临观剥复之渐其义较长且夏正自唐虞以来商周实通行之未尝改也

初九【句】咸临【句】贞吉

传咸临贞吉志行正也

居临之初与二相并而进临乎四陰者故曰咸临咸皆也共也位虽不中而阳刚方长与二相比故贞吉贞正也故传曰志行正

九二【句】咸临【句】吉无不利

传咸临吉无不利未顺命也

临以阳进为义二阳相与其势方长陰不能制六五虽尊而九二为临之主匡弼惟己以道事君未尝苟从故吉矣而又言无不利者以其正临乎陰也非刚中之德得无未泰而遽否乎故又言无不利以别之而传且明其未顺命也对至于八月有凶而言也兑說坤顺疑于顺命也圣人之虑深矣

六三【句】甘临【句】无攸利【句】既忧之【句】无咎

传甘临位不当也既忧之咎不长也

六三陰暗当兑說坤顺之间惟以柔顺相乘兑为口善味坤稼穡作甘故曰甘临临甘则不断不断陰长何利之有宜其有咎矣然忧则不甘矣不甘则知悔悔而改之则咎不复长也

六四【句】至临【句】无咎

传至临无咎位当也

六四柔顺上承六五内外相接地泽相比临之至亲者故曰至临所以无咎郑氏汝谐曰其位在上下之际临之切至也凡上之临下惟患其遠而不相通四既近于下其所处之位至当是以无咎

六五【句】知临【句】大君之宜【句】吉

传大君之宜行中之谓也

临以阳临阴也而六五居尊中处虚明下应九二得臣之助不自用而取诸人此所以为大知也故曰知临又曰大君之宜宜用中也本义曰以柔居中下应九二不自用而任人乃知之事而大君之宜吉之道也王氏申子曰中庸曰惟天下至圣为能聪明睿知足以有临也故知临为大君之宜六五以柔中之德任九二之贤不自用其知而兼众知为知是宜为君而获吉也

上六【句】敦临【句】吉【句】无咎

传敦临之吉志在内也

临阳之进也凡临之善皆以应阳上六居高听卑志乎初二坤艮皆土敦厚之象为敦厚乎临者故吉而无咎程传曰上六坤之极顺之至也而居临之终敦厚于临也与初二虽非正应然大率阴求于阳又其至顺故志在从乎二阳尊而应卑高而从下尊贤取善敦厚之至也阴柔在上非能临者宜有咎也以其敦厚于顺刚是以吉而无咎六居临之终而不取极义故止为敦厚义上无位之地止以在上言朱子语类曰上六敦临自是积累至极处有敦笃之义艮上九亦谓之敦艮复上六爻不好了所以只于五爻谓之敦复

观【句】盥而不荐【句】有孚颙若【观本音毛氏奇龄曰古无四声故汉易无音注不得分平去二音】

传大观在上顺而巽中正以观天下观盥而不荐有孚颙若下观而化也观天之神道而四时不忒圣人以神道设教而天下服矣大象风行地上观先王以省方观民设教序卦物大然后可观故受之以观杂卦临观之义或与或求

盥王肃作观毛氏奇龄曰盥裸通与郊特牲灌论语禘自既灌同马郑虞荀皆然又不荐王肃作观荐毛氏曰爻中皆观荐之文则不字本观字之误按盥灌通是也观灌而观荐非也不荐未荐也灌礼仪正盛之时在未荐之先诚敬之至孚于神明德容之着颙颙然共仰也借以为上下感格之象犹诗云奏假无言时靡有争而中庸曰不赏而劝不怒而威也观临之反二阳在上大也故传曰大观在上坤顺而巽九五中正居尊恭己南面而四阴在下顺而承之上之端拱为天下观故名曰观观之象如大祭然灌地降神之初未荐之时有孚而颙若则下之观之者自化若是者何也皆以神用也天道之神显于上而四时不忒者即圣道之神动于上而下民服也所以下观而化也观之体用如是

观四阴二阳疑于阴长而阳消矣不取此义者不与临之八月有凶同义也阳上阴下疑于不交而否矣不虑其否者巽正交而九五之德盛矣

初六【句】童观【句】小人无咎【句】君子吝

传初六童观小人道也

陰柔居初童穉之象以下观上五隔三陰所见甚少如童穉无知故曰童观然百姓日用而不知可也君子不知其大者遠者而可乎君子无所知则寡昧矣羞也

六二【句】闚观【句】利女贞

传闚观女贞亦可丑也

观者显示之象必亲见而后能感九五在上以近为光二虽中正然体居乎内晦于二陰之中难以言观第有应于上若内之闚乎外故曰闚观夫处内窺外所见无多女子之事也坤陰柔在中故利女贞言仅利乎此尔如其为丈夫也则不近天子之光而守拘墟之见其何所利乎来氏知德曰观卦利近不利遠六二中正又与五应乃曰闚观则不利于遠可知矣

六三【句】观我生进退

传观我生进退未失道也

三处下之上将宾乎王者也然犹隔于四当进未进而三以柔居之上九为应能自审以为观者也故曰观我生进退与童观之小闚观之陋异矣我生犹言我身

六四【句】观国之光【句】利用宾于王

传观国之光尚宾也

九五王也刚健中正照耀四方光也六四柔顺地分亲切正观于五故曰观国之光五观之主也则四为宾为五所礼故利用宾于王犹记所谓宾兴者也

九五【句】观我生【句】君子无咎

传观我生观民也

观我生与上文观我生进退异彼所观者出处之大闲也此所观者皆以观我身也斯民之从违由我身之得失君子身为民极九五之观乎羣陰者皆所以观己也传所谓观民者正所以观我生之实也何也阳刚中正自新以新民而自省之深者也

上九【句】观其生【句】君子无咎

传观其生志未平也

上九不如九五之位而阳刚之德与九五同足为羣下所观居观之极自处甚高其身虽不居乎观之正而德望尊隆足系民望五尚而崇之不敢少自菲薄方辅五之观以为观志有宁乎未也传所谓平者宁也彖所谓其生者别乎观之主也其生谓五也

噬嗑【句】亨【句】利用狱

传頤中有物曰噬嗑噬嗑而亨刚柔分动而明雷电合而章柔得中而上行虽不当位利用狱也大象雷电噬嗑先王以明罚勅法系辞日中为市致天下之民聚天下之货交易而退各得其所蓋取诸噬嗑序卦可观而后有所合故受之以噬嗑嗑者合也杂卦噬嗑食也三阳三陰乾坤泰否之杂震离相加反覆相推本卦贲之反上下两阳含陰頤之象也中间一阳頤中有物也頤中而有物间之必啗之而后合噬啗也嗑口之合也如食物然故曰噬嗑为爻三刚三柔间杂分布为德震动而离明震离两象雷电相似而烁赫昭著又本卦贲之反易离上震下而离五柔中凡此皆亨之道也以其事言之何所利乎利用狱而已刚柔相济动能断而明能察明动相合而幽隐章着柔得中而居五是则明断兼备而主之以寬仁此其所以为利也传又言虽不当位利用狱者以五为用狱之主而见寬仁为用狱之本也书曰惟明克允又曰钦哉钦哉惟刑之恤哉即此理也观爻象多以用狱言可见

先儒据卦变噬嗑自益来者六四之柔上行以至于五而得其中是柔上行而得中矣亦补凑牵合之法不若反覆观之贲反为噬嗑离上行而六五柔中为自然也又利用狱专以彖传柔得中句为解亦未审彖传文势相连宾主分合之微防也

初九【句】屨校灭趾【句】无咎

传屨校灭趾不行也系辞子曰小人不耻不仁不畏不义不见利不劝不威不惩小惩而大戒此小人之福也易曰屨校灭趾无咎此之谓也

初狱小刑轻故象为屨校灭趾小惩大戒故占为无咎震动之初于小事而即惩之使不能行若纳校于足而不见其趾者然是仍在上者能用狱以止恶也先儒皆谓初无位为受刑之人未详传不行意屨校纳校于足如纳屨也以为加校于屨非也灭没而不见也以为有伤亦非也

六二【句】噬肤灭鼻【句】无咎

传噬肤灭鼻乘刚也

祭有肤鼎盖肉之柔脆者鼻肺窍凡物之本始亦谓之鼻六二柔中而乘初之刚亦易治之狱用法过严直穷根株如噬鼎肉之肤而深至于鼻也六二中正而仅曰无咎以乘乎刚也则稍过矣圣人之执中也如是

六三【句】噬腊肉遇毒【句】小吝【句】无咎

传遇毒位不当也

周礼腊人掌乾肉则腊肉皆乾肉坚韧之物也乾久之肉美恶难分有毒存焉噬之者不免也六三上承九四当交噬之位噬之而未易合狱之难辨者以爻柔而不克噬也欲噬四而遇其梗吝所必至爻辞曰小吝无咎而传止释位不当者吝不免也

九四【句】噬乾肺【句】得金矢【句】利艰贞【句】吉【肺说文作 子夏传虞氏易俱作脯】

传利艰贞吉未光也

肺说文作 与截通肉之带骨者乾肺坚韧噬值其刚者也亦噬而难合辨狱者弗慎则枉矣惟艰难贞固以处之而后吉九四刚而不中故有此象

得金矢及下爻得黄金不与遇毒同类噬乾肺噬乾肉二句断处已了所噬之象得金矢得黄金本义引周礼狱讼入钧金束矢而后听之即以用狱言于利艰贞吉贞厉无咎意义方明足但以九四为得用刑之道得听讼之宜于传未光之义不协何也经曰吉而传曰未光者以利艰贞言也自当以传为据毛氏奇龄曰太平御览载王肃解云金矢所以获野禽故食之反得金矢君子于食必思其毒于利必备其难也本义引周礼钧金束矢狱讼所入为解其于金矢固巧合矣然于噬肺之义何居且得金矢与遇毒得黄金一例黄金无矢毒又何物况文王未必用周礼也此条甚辨但周礼必相沿而起文王时亦必有之且爻辞一云繫自周公则用周礼亦合

六五【句】噬乾肉【句】得黄金【句】贞厉无咎

传贞厉无咎得当也

六五柔顺得中居最尊之位有离明之体柔中则仁离明则察狱虽难事不欲冤人如噬乾肉然盖噬之而易合者也乾肉无灭鼻之伤去腊之毒而少肺之艰者也金谓钧金狱之有事贞厉者庶狱庶慎无咎之道传得当即当于中道不作戒辞以柔中内自有贞厉之心也

胡氏炳文曰噬肤噬腊肉一节难于一节六五噬乾肉则易矣五君位也以柔居刚柔而得中用狱之道也何难之有讼则出矢狱则出金讼为小狱为大四于讼狱兼得大小兼理之也五君也非大狱不以闻

上九【句】何校灭耳【句】凶【何古本作荷】

传何校灭耳聪不明也系辞善不积不足以成名恶不积不足以灭身小人以小善为无益而不为也以小恶为无伤而弗去也故恶积而不可掩罪大而不可解易曰何校灭耳凶

何荷通积狱至上狱极矣任刚不悔终于狱者故有荷重校而没其耳之象凶之道也荷校而至灭其耳久而不释者也亦久而不悔者也故传曰聪不明郭氏雍曰或以灭鼻为剕灭趾为剕书注剕刖轻刑剕辟为重故汉斩趾同于弃市初九小刑固不当断趾上九罪大复不当轻刑以是知三者言灭皆非刑也

贲【句】亨【句】小利有攸往【小利郭京易举正作不利云不字草书势如小字谬不知易例本有小字】

传贲亨柔来而文刚故亨分刚上而文柔故小利有攸往天文也文明以止人文也观乎天文以察时变观乎人文以化成天下大象山下有火贲君子以明庶政无敢折狱序卦物不可以苟合故受之以贲贲者饰也杂卦贲无色也

噬嗑之覆也噬嗑上卦之离来居本卦艮下噬嗑下卦之震反为本卦之艮而居离上离柔也来文艮之刚震刚也上而为艮以文离之柔柔来文刚则刚而济之以柔六二中正内离明也明则通矣故亨分震之刚上而为艮以文柔则柔而济之以刚外艮止也止不行也以质止文救弊之事故小利有攸往时变人事存乎其间矣

吕氏春秋孔子卜得贲曰不吉子贡曰何谓也孔子曰夫白而白黑而黑贲亦安吉乎家语孔子筮得贲愀然有不平之色子张进曰师闻卜者得贲而子有不平之色何也曰以其离耶在周易山下有火贲非正色之谓也夫质也黑白宜正焉今得贲非吾兆也杂卦传曰贲无色也二說近之

初九【句】贲其趾【句】舍车而徒【趾古本一作止车郑张本作輿】

传舍车而徒义弗乘也

初在下者也以一身之饰观之如其趾然饰之盛则宜其车矣然在下位九最刚明尚质之至虽柔来文刚有六二之贲而安于其分不有其文宁守其朴是以质为文者也刚明在下之为也义胜也故传曰义弗乘语曰安步以当车其贲趾之谓乎趾本古作止字之讹也

六二【句】贲其须

传贲其须与上兴也

须需也待也不必作髭须解二爻以上俱未取象于身也传曰与上兴上谓三也柔来文刚故二须三以为贲也

俞氏琰曰二无应而比三三亦无应而比二故与之相贲贲以柔来文刚故亨文当从质非质则不能自饰陰必从阳非阳即不能自进六二纯柔必待九三之动而后动故曰贲其须按此只作相须之义亦得传意

九三【句】贲如濡如【句】永贞【句】吉

传永贞之吉终莫之陵也

如助语辞柔来文刚离明为体本贲如也而九三一刚介于二柔之间文饰之盛鲜泽之至故又濡如然柔多矣恐其刚之不济也得无文盛而质衰乎故必以永贞为吉也永贞则刚不替也

六四【句】贲如皤如白马翰如【句】匪防婚媾【皤郑元陆绩本作皤误】传六四当位疑也匪寇婚媾终无尤也

离之柔来文艮之刚分艮之刚上而文离之柔阴阳相饰故为贲一阴有二阳则贲之盛犹一阳而有二阴亦贲之盛故皆曰贲如也皤白之杂也斑白也当上下相贲之位而刚上文柔者艮也所贲者五最亲切而隔四于五不能无疑在贲盛而疑之时故有皤翰之象然艮止也四其同体终得上之贲者如婚媾然五既贲于上四从五亦相承而得所贲也故无尤又六四以初九为正应而近乘九三则贲之杂出

者皆求为贲也贲之不一则杂出而两相疑矣故曰皤如贲之者盛故又曰白马翰如然三虽切近而正应在初终从其正若妇之有夫从一而终非三所能乱也传曰疑疑于三也又曰终无尤有正应也屯二匪防婚媾乘刚也谓初之与五争也此则三与初间其义亦同 传疑也统贲如皤如白马翰如而言言三与初皆贲也终无尤专以匪寇婚媾言言初之必应也 贲而言皤言白何也曰殷尚白诗所谓有客有客亦白其马是也翰白马也檀弓所谓戎事乘翰是也以白为饰从殷尚也文王演易在殷之世多从殷礼周公亦从文王之例也诸儒皆以白为反质之义未观阴阳相贲之理与经传别为一意矣

六五【句】贲于丘园【句】束帛戔戔【句】吝【句】终吉【戔子夏传作残伪谬】传六五之吉有喜也

分刚上而文柔则六五正得上九之爻者上处卦外故为丘园艮为山为果蓏亦有丘园之象九上文五五与为贲是贤人在外而礼聘殷摯者故曰贲于丘园束帛戔戔戔戔委积貌又显见貌五居尊位而下无应与至求助于外若可羞吝矣然九上文柔贲而有合适得其中礼之善物也故终吉传不言吝而专言有喜者以上与五之贲亲也

戔戔诸儒俱取浅小义以为吝嗇尚俭之意未尝观爻象也彖传曰分刚上而文柔象传曰有喜也皆据爻立言刚上文柔成卦之主五尤切近居尊内虽无应外有贤焉相须甚殷爻辞是

聘贤之文诗曰子子干旄在浚之郊子子干旌在浚之都子子干旌在浚之城贲于丘园之谓也素丝纆之素丝组之素丝祝之束帛戈戈之谓也昏礼纳帛一束束五两注十端为束既用束帛而何为浅小残碎乎不此之取而谓施文饰于丘园无此事理谓敦本尚俭如卫文汉文虽吝终吉爻象爻辞象传俱不称情阴柔文也阳刚质也尚质意惟九三上九有之何氏楷云比于上九阳刚之贤受贲于上九者也丘园指上上阳刚而处外乃贤人隐丘园之象据彖曰刚上文柔则六五乃上所贲者爻所谓贲于丘园犹曰受贲饰于丘园也此为得之

上九【句】白贲【句】无咎

传白贲无咎上得志也

阴柔主文阳刚主质上居贲终下连二阴于离明之上文已胜矣而九居艮体以质止文所谓刚上文柔者是尚质固所以成贲也故曰白贲白纯素也纯素也者采章之本也以质为主则文着而非浮六五之所借以成贲也其志得行故无咎

剥【句】不利有攸往

传剥剥也柔变刚也不利有攸往小人长也顺而止之观象也君子尚消息盈虚天行也大象山附于地剥上以厚下安宅序卦致饰而后亨则尽矣故受之以剥杂卦剥烂也

剥复覆推乾元之消息也为后七卦之纲本卦五阴一阳柔盛刚微阴剥阳也故曰剥小人欲害君子其势方长坤顺艮止故曰不利有攸往当其二阳在上犹得大观而即至于剥剥后乃复盈虚消息其几必然君子知几当有以处此

初六【句】剥牀【句】以足【句】蔑贞凶【蔑九家易作灭义同】

传剥牀以足以灭下也

一阳五阴如在牀第之间故取牀象剥之初从下起故言足九家易蔑与灭同灭下则根本已坏程子所谓阴自下进渐消灭于阳贞正凶之道也即彖传所谓柔变刚也象传灭下即灭贞盖牀必下固而后不至于坏其初剥则下不固矣不待破裂而知之也故凶

六二【句】剥牀以辨【句】蔑贞凶

传剥牀以辨未有与也

程子曰辨分隔上下者牀之干也毛氏所谓凡两物交缝谓之辨来氏所谓牀之下足之上分辨处是也六二处羣阴之间剥之将成辨则已及二虽得中而阴柔之质与众剥同上九外隔于五能相与乎阳不相与则正为其剥者矣故亦曰蔑贞凶位虽中正而无善状也

六三【句】剥之无咎【陆德明去之字谬】

传剥之无咎失上下也

此爻与上九相应处剥之时而不与羣阴同党此志存乎正者也故与蔑贞者异而得无咎若曰剥之在三也独无咎者也传曰失上下谓初二四五羣阴也当照传作一句读荀氏爽曰众皆剥阳三独应上无剥害意是以无咎王氏弼曰与上为应羣阴剥阳我独协焉虽处于剥可以无咎

六四【句】剥牀以肤【句】凶【肤京房作簠非】

传剥牀以肤切近灾也

剥至四则已成其为剥矣处羣剥之际阴盛不中小人之尤前所谓剥牀者今及其肤矣初足二辨三牀之上四乃上体剥及其身不可止矣故凶传切近二字最警

六五【句】贯鱼【句】以宫人宠【句】无不利

传以宫人宠终无尤也

一连五阴如贯鱼然鱼阴物故以取象宫人众妾乃阴之美而受制于阳者羣阴剥阳五益切近宜不利矣然六五得中居尊上奉艮体下临坤顺足以统众阴而事一阳有正内协赞之才与顽悍强妬之恶故君子虽不利有所往而此固无不利也剥而不终于剥也张氏振渊曰遯阴长而犹微可制也则告阳以制阴之道曰畜臣妾剥阴长已极不可制矣则教阴以从阳之道曰以宫人宠得易之微意

后汉梁皇后曰愿陛下云雨之均泽识贯鱼之次序正用此辞然象之所包者广不專为宫闱言也

上九【句】硕果不食【句】君子得舆【句】小人剥庐【得京本作德误舆董作车】

传君子得舆民所载也小人剥庐终不可用也

诸阳剥尽上九独存艮为果蓏阳止乎阴阳大阴小故取象硕果不食言阳之不尽剥剥之极而必复也此君子之事也当乱极将治之际为众所赖如舆之载物然故曰得舆一阳在上羣陰犹将戴之物极则反理固然也若小人则终无生理家室破亡无所依庇直至剥庐不得谓硕果不食之际而谓可姑容也庐人之所以容身者一阳在上五陰在下亦有庐象非阳刚则不足以当此直变坤上而战败矣

复【句】亨【句】出入无疾朋来无咎【句】反复其道七日来复【句】利有攸往【朋京本作崩复古本作覆俱误】

传复亨刚反动而以顺行是以出入无疾朋来无咎反复其道七日来复天行也利有攸往刚长也复其见天地之心乎大象雷在地中复先王以至日闭關商旅不行后不省方系辞复德之本也复小而辨于物复以自知序卦物不可以终尽剥穷上反下故受之以复杂卦复反也

剥之反也坤往居上艮反为震刚来居初是乾元之气萌生于下日见其通也故亨其为体也震动坤顺出入动也无疾顺也朋来出入之类也无咎无疾之致也出入一阳之上行朋来五陰之顺序无疾无咎阳为主也皆动而以顺行之事也亨也自剥而来故曰反阳萌于初故曰复道犹路也一元之反而求复者其道也如日之黄道然日极于北必至于南由姤訾而反元枵固其道矣七日日之分数也干之策二百一十六坤之策一百四十四是三百六十为期之日数数日者以十十者数之体除十得五七三百五十合体数之十则三百六十也蓋少阳之数七也自剥之末爻至复之初皆少阳七数凡七日此天行之常度一阳来复道有必至也阳既来复则其势日长阳利于进故利有攸往

七日用卦气六日七分者穿凿补凑用辟卦自姤至复七卦者是七月而非七日又用一之日二之日谓古人称月为日者必不能谓七之日也亦无七阳之月惟据少阳数七推之为得

初九【句】不遠复【句】无祇悔【句】元吉【只九家作多一作防王肃本作禔亦与祇

同古易注祇作祇从衣诗祇搅我心汉书窦婴传祇加怵俱从衣蓋祇祇二字通也】

传不遠之复以修身也系辞子曰顏氏之子其殆庶几乎有不善未尝不知知之未尝复行也易曰不遠复无祇悔元吉

不遠复谓初祇玉篇云适也无祇悔无适适然而悔者以其不遠而即复也此本然大吉之道人心一天地之心也天地间惟元气不息方剥尽矣而根荄即萌本爻震体为复之主其在天地则阳气之萌于地中在人则人心之介然有觉惕然自新者也蓋人稟天地之性以生者此元阳也元者善之长大贤以上偶然差失非其本心稍差即悟悟即还其初无适以貽悔而去之遠者圣人知天地人之心故即其最切者而象之圣传释之以修身而系辞又借顏子以明之也故易非圣人不能作非圣人不能知

六二【句】休复【句】吉

传休复之吉以下仁也

六二柔顺中正当一阳来复之时而与之切比陰阳相得则阴必从阳初以善为之主二能下而从之安然并复故曰休休安也暇裕也

六三【句】频复【句】厉【句】无咎【频古本一作嘖郑本作卑虞易解频作蹙俱不合】传频复之厉义无咎也

频数也与频巽同三居两卦之间有复尽重复之象然曰频复则其频失可知复而至于频厉之道也频而能复故无咎本义曰不中不正又处动极复而不固屡失屡复之象屡失故危复则无咎得象意赵氏汝楳曰三为震动之极故曰频厉危也即人心惟危之危郭氏忠孝曰唯君子能久于其道其余则日月至而已是以子夏之徒出见纷华而悦入闻夫子之道而乐与夫回之拳拳服膺而弗失之者固有间矣二条得辞义

六四【句】中行独复

传中行独复以从道也

四在羣阴之中故曰中行羣陰不应而四独应故曰独复初为复之主五陰皆复乎初者能应

则其道同柔而得正又应初阳与二之休复无异也其吉可知不言吉者辞已备也先儒俱以阳气之微不足有为故不言吉云者非也诸卦若履霜坚冰至之类多不言凶者岂谓不以为凶乎

繆氏昌期曰中即中以自考之中独即中庸慎独之独四能以中而行而于独知之中憬然自觉所谓复以自知也盖复之所以为复全在初爻犹人之初念也五陰皆复此而已惟四在阴中有所专向故发此义

六五【句】敦复【句】无悔

传敦复无悔中以自考也

敦厚也当复之时坤体得中居尊故为敦厚乎复者复进德之事初以不逮复故无祇悔觉悟之敏震之力也五以敦复故无悔省察克治之深坤之诚也项氏安世曰临以上六为敦临艮以上九为敦艮皆取积厚之极复于五即言敦复者复之上爻迷而不复故复至五而极也初最先故为不逮五在后故为敦

上六【句】迷复【句】凶【句】有灾 【句】用行师终有大败【句】以其国君凶【句】至于十年不克征【灾郑作裁陆德明作灾义同】

传迷复之凶反君道也

六居复之终坤体柔顺而迟缓是复之不勇而失复之实者故曰迷复羣陰积重惟恃一阳之进必勇而后克居坤之极怠缓优悠不可以为复矣故凶灾恶之外见者 恶之内见者以其迷于复有必至也上体坤众也下体震为长子故有行师之象师之为道以阳统阴故能御众上六居复之终去阳甚远则坤之迷而失道者在卦之上为终故终有大败坤为众国之象六居其上为君故凶此迷复之凶之大者十偶数之终迷之极故十年而犹不克征复初长人君道也而上无比无应不中失其道矣此迷者之所以不悟也

无妄【句】元亨利贞【句】其匪正【句】有眚【句】不利有攸往传无妄刚自外来而为主于内动而健刚中而应大亨以正天之命也其匪正有眚不利有攸往无妄之往何之矣天命不祐行矣哉大象天下雷行物与无妄先王以茂对时育万物序卦复则不妄矣故受之以无妄杂卦无妄灾也

无妄大畜覆推复上坤下震本卦上干下震复阳之萌本卦阳之盛亦陰阳自然之次也自其覆推观之则大畜上九自外来居内卦之初而为无妄之主自干震同体观之则震本干之初交干外而震内初九得干之一体内有主而体乎干全是实理故名无妄阳体实也卦分干体故元亨利贞辞与干同自内至外而观之则震动而干健由外合内而观之则九五刚中而六二正应此皆天命之本然所谓纯粹精者也大亨以正也然干既分震而同为一卦必实有天理斯为克肖不然则非本然之体矣匪正矣无妄者妄矣于身则有眚于行则不利眚过差也无妄史记作无望言无所期望也本汉人之解而改之者虽诚之一端而于翼义言全理者不合

初九【句】无妄往【句】吉

传无妄之往得志也

彖传曰刚自外来而为主于内则初固无妄之主得干之一体而方动在初天理之本然也往则诚之通诚能动物顺亲信友获上皆此矣吉也何氏楷曰此爻足蔽无妄全卦震阳初动诚一未分是之谓无妄动与天合何不吉之有

六二【句】不耕获【句】不菑畲【句】则利有攸往

传不耕获未富也

柔顺中正立心无妄虚以应干诚于其所有事不以利为心则往无不利之道也干为郊野震于稼为反生动于中而应健有耕作之象不耕耕也不菑菑也耕当春获在秋菑一岁田畲三岁田不耕获言耕而不豫望其获也不菑畲言菑而不即计为畲也未有利之之心也论语曰仁者先难而后获孟子曰必有事焉而勿正董子曰正其谊不谋其利无妄六二之谓也来氏知德曰不耕获者不方耕而即望其获也不菑畲者不方菑而即望其畲也耕也菑也即明其道也获也畲也即功也曰不耕获不菑畲即明其道不计其功也观小象未富可见矣若程传不首造其事本义无所为于前无所冀于后将道理讲空了乃禅学也吾儒圣人之学进德修业尽其理之当然穷通得防听其人之自然修身俟命此正所谓无妄也岂一防道理不尽空空寂寂谓之无妄哉

六三【句】无妄之灾【句】或繫之牛【句】行人之得【句】邑人之灾

传行人得牛邑人灾也

上承干而下震极灾之象也上下卦连接之界无妄而处危地灾非其咎意外之事也凡柔爻皆坤离故有牛象在无妄之交往来之间故或系牛而行人得之本爻处非其地而近于干故为邑人之灾或者假设之辞言灾之出于无妄者有若此也本义曰卦之六爻皆无妄者也六三处不得正故遇其占者无故而有灾如行人牵牛以去而居者反遭诘捕之扰也程传谓或繫得牛行人得之以为有得邑人失牛乃是灾也言有得则有失不足以为得也来氏同此意然玩传邑人灾也即以邑人因此有诘捕之扰而言亦合犹俗云失物寻地主者也

九四【句】可贞【句】无咎

传可贞无咎固有之也

阳刚健体本可有为四下于五不敢妄动者也以无妄自处即无咎之道安其本然者也

九五【句】无妄之疾【句】勿药【句】有喜

传无妄之药不可试也

无妄之至中且正而有应者宜无疾矣即以疾言不以药害之乃有喜也以无妄之疾而药之则无妄之药矣故戒之曰勿药且固之曰有喜本义曰干刚中正以居尊位而下应亦中正无妄之至也如是而有疾勿药而自愈矣故其象占如此

上九【句】无妄【句】行【句】有眚无攸利

传无妄之行穷之灾也

处卦之极体健过刚不动斯为无妄之体至此而行则失所谓无妄者矣故有眚无利即彖所谓匪正有 不利有攸往者也时位之穷为之与亢龙同

大畜【句】利贞【句】不家食【句】吉【句】利涉大川【大畜归藏易作 畜】传大

畜刚健笃实辉光日新其德刚上而尚贤能止健大正也不家食吉养贤也利涉大川应乎天也大象天在山中大畜君子以多识前言往行以畜其德序卦有无妄然后可畜故受之以大畜杂卦大畜时也

无妄之覆也干内艮外无妄之震上而为艮干健艮止以阳止阳皆畜之象阳大阴小所畜者阳故曰大畜干刚健艮笃实内外皆见而艮之上九为畜之主爻皆有坚确之义故利贞刚上尚贤处卦之外贤能畜君君亦养贤故不家食吉大川惟健乃济六五与干二正应故利传应乎天谓健也

初九【句】有厉【句】利己

传有厉利己不犯灾也

畜不可进干体志锐进也得无犯难乎故有厉而当畜之初其势未深则犹可及止也故利己本义曰干之三阳为艮所止故内外之卦各取其义初九为六四所止故其占往有危而利于止也○本义干三阳为艮所止言大象也内外之卦各取其义即程传干三爻皆被止为义艮三爻皆取止之为义也非两意

九二【句】舆説輹【説脱同】

传舆説輹中无尤也

輹车之伏兔也伏于轴以承辐者不行则説九二刚而得中又为六五所畜能自止而不进故有此象

九三【句】良马【句】逐【句】利艰贞【句】曰【句】闲【句】舆卫【句】利有攸往【曰郑虞俱作曰】

利有攸往上合志也

传曰上合志谓艮也上九有天衢之亨九三阳刚与之同德同德则同志不家食者也固其刚健之体厚其光辉之着聘应天衢亦不逮也干为马三健极故艮欲进故逐前遇艮故艰贞曰如字不必从郑氏改曰言利艰贞则不敢逐矣良马将何用乎曰有闲在有舆卫在蓋范我驰

驱行而宜之者闲阑也左传成十八年程郑为乘马御六驹属焉使训羣驹礼疏云每廐为一闲闲有二百一十六匹易干为马应干之策又天子十二闲邦国六闲卿大夫四闲是闲者上廐也不作虚字輿卫考工记軫戈人受防矛也輿干闥之象卫一阳二陰周列于前若拥防然

六四【句】童牛之牯【句】元吉【童广苍作犝說文作僮皆通字牯說文九家作告俱误】传六四元吉有喜也

六四艮体以柔顺为畜其端甚微彼此相应其势甚易大善而吉之道也童未角之牛牯施横木于角以防其触诗之所谓楅衡也本爻变离离为牛艮本少阳应初故为童以阴止阳故象牯

六五【句】豮豕之牙【句】吉

传六五之吉有庆也

艮刚而六五柔体刚而质柔也居尊得中足繫羣刚止之善物也豮豕之象象其能繫云尔蓋六五畜干之九二尤为切至阳刚正盛而六五以柔止之得中居尊势足以相维强项者可缚而制也强者驯则庆及天下矣故吉来瞿塘曰豮豕也騰也与童牛之牯一句同类童字与豮字同牯字与牙字同牙者埤雅云以 繫豕也乃 牙非齿牙也引杜诗鳧雏入桨牙坡诗置酒看君中防牙等牙字以证之字义甚合雷象能止健外体艮三爻皆有止义养贤因刚上尚贤为义专释不家食之文胡光山谓四取象中止健之义五取象中养贤之义非也

上九【句】何天之衢【句】亨

传何天之衢道大行也

何荷通灵光赋荷天衢以元亨竟作荷郑康成亦言肩荷是古人皆读上声无疑吴幼清云何天之衢犹诗言何天之休何天之宠是也上九为大畜之主爻所谓刚上尚贤不家食又能应天止健所谓利涉大川者艮为门阙在外卦之上无所遮蔽若行于天之上四达莫御荷天休宠其道大行畜极而通也亨也

頤【句】貞【句】吉【句】觀頤【句】自求口實

傳頤貞吉養正則吉也觀頤觀其所養也自求口實觀其自養也天地養萬物聖人養賢以及萬民頤之時大矣哉大象山下有雷頤君子以慎言語節飲食序卦物畜然後可養故受之以頤頤者養也雜卦頤養正也頤與大過對待相推自此而坎離凡四卦而六子皆對所以承剝復無妄大畜之後于陰陽升降乾元動止之間而為上篇之終也本卦以陽含陰故其象為頤其義為養其道在正正者靜也養以靜為正故艮體皆吉在上一陽能止羣陰尤吉而震動則凶以上養下則吉以下養上則凶夫為口腹之欲者小人之私以道養身因以養人者則大人之事故觀其所養者觀其所自養也此上九艮體得靜正之道能養萬民所以為頤之主也觀頤自求口實二句相承玩傳下句加一觀字可見

初九【句】舍爾靈龜【句】觀我朵頤【句】凶【朵京作瑞】

傳觀我朵頤亦不足貴也

養其大體為大人養其小體為小人靈龜心也大體也朵頤口腹也小體也舍其心而養口腹滅理窮欲不知所養凶可知矣初九陽剛有養人之材處下無養人之實頤初震體有应于四志動于內惟在屬賡故有此象○朵垂也一陽下動如頤之垂

六二【句】顛頤拂經【句】于丘頤【句】征【句】凶【拂子夏傳作弗】

傳六二征凶行失類也

顛動也經脈絡也初剛動二乘初四應初故皆曰顛頤之脈絡在中二五居中故皆曰經宜剛而以陰虛處之故皆曰拂丘高也又大也前漢書楚元王傳過其丘嫂食張晏注曰丘大也長嫂之稱頤之上九高而大者故曰丘頤是以前言則乘剛而妄動以其五而言則陰柔而不应既非其類若又往求于上則隔三而防五更非其類矣此征之所以凶也

六三【句】拂頤【句】貞凶【句】十年勿用【句】无攸利

傳十年勿用道大悖也

三居下體震動之極非能承上之養以養人者在頤之交貪饕妄動自私自利悖養之道正頤

之凶者也夫上欲养人而三窃以自私岂可容于頤养之世哉是以终不可用也一无所利者也十年数之终也无所利不能养人必害人也

六四【句】颠頤【句】吉【句】虎视眈眈【句】其欲逐逐【句】无咎【逐子夏传作攸汉书作浹荀爽作悠刘瓛作筵】

传颠頤之吉上施光也

四近五当养人之位应初刚之动资其才足以相济取其实足以广惠是五之不及施者四能光而大之此颠頤之所以吉也虎行下视眈眈然専也欲有所贪逐逐然无穷也艮为虎故有此象近君养人不以自私故无咎

六五【句】拂经居贞【句】吉【句】不可涉大川

传居贞之吉顺以从上也

頤之经中也惟阳乃能养阴而五以陰居之故曰拂经然上九阳刚为頤主爻贤人之能养民者五以正而顺从之则亦不失其所养吉之道也涉川必干刚五柔故不可涉言当顺贤不可自用以济人也

上九【句】由頤【句】厉【句】吉【句】利涉大川

传由頤厉吉大有庆也

上九頤之主爻养道之所由成故曰由頤夫六五之君賴之以养人则位尊任重危地也不能无厉然人君賴之天下賴之矣朝野恬熙百世乐利吉之事也即有险阻才德克济頤之至也故利涉大川

大过【句】栋桡【句】利有攸往【句】亨

传大过大者过也栋桡本末弱也刚过而中巽而説行利有攸往乃亨大过之时大矣哉大象

泽灭木大过君子以独立不惧遯世无闷系辞古之葬者厚衣之以薪葬之中野不封不树防期无数后世圣人易之以棺槨蓋取诸大过序卦不养则不可动故受之以大过杂卦大过颠也

大过与颐对待相推为卦四阳二阴大谓阳大过阳多也中四阳而初上两陰若屋之有栋上下俱脆而中坚欲颠倒倾倚也卦象似之然以其体言之则四刚在内而二五得中刚过而不过也以其德言之则巽顺在内而兑說于外刚而不急不怒也以此用其大过之才事斯有济乃可以亨也

初六【句】借用白茅【句】无咎

传借用白茅柔在下也系辞借用白茅无咎子曰苟错诸地而可矣借之用茅何咎之有慎之至也夫茅之为物薄而用可重也慎斯术也以往其无所失矣

借荐也初之象白茅柔也六之象大过之时以柔处之又居巽体当事之初审慎之至才大出以小心不为壮往犹持重物者不苟措于地必先借之以精洁之茅过于慎者有大过人之才者也刚柔相济故占为无咎

九二【句】枯杨生稊【句】老夫得其女妻【句】无不利【稊郑作蕢】传老夫女妻过以相与也

阳过而亲比于阴生意相属亦相济也枯杨阳之过者也而柔稊生焉生生不可已也老夫阳之过也而妻少女焉生育亦可成也是阳虽过而比初陰有相与之意故无不利老夫据九二而言女妻柔在初也得其云者自我得之也下文士夫据九五而言老妇柔在上也得其云者为彼所得也九二之下比初六男先于女故曰老夫得其女妻九五之上比上六女先于男故曰老妇得其士夫全经陰阳相比者皆取象婚媾大意较然来氏舍本文而取错卦之震艮甚不亲切

九三【句】栋桡【句】凶

传栋桡之凶不可以有辅也

中四阳皆卦之取象于栋者三四尤在中故俱取栋象而三在上下相接之地偏戾且危更为

大过故独有桡象刚过而在下之柔既隔于二不能相济在上之柔虽为正应与五相比亦不能为用是有辅而不可以辅也欲如大象之亨不可得也故凶

九四【句】栋隆【句】吉【句】有它吝

传栋隆之吉不桡乎下也

以刚承五羣阳相协其下虽弱尚能相应而不至于桡不桡则四阳之体隆隆然高而不危矣故吉它谓三桡而凶者与之比近助之以刚则下不能相应虽不至桡亦吝

九五【句】枯杨生华【句】老妇得其士夫【句】无咎无誉传枯杨生华何可久也老妇士夫亦可丑也

卦刚过而爻又居羣刚之上上承已过之柔不足相济无所滋益如杨之已枯而阴华生焉美尽于外也老妇已衰而士夫得焉偶不为嘉也以五居中而不善何也刚之极也大过之主也其占虽无咎而亦无可誉无誉则丑矣

上六【句】过涉灭顶凶【句】无咎

传过涉之凶不可咎也

处过之极柔没于上不能有济如过涉者之没于水而灭其顶不可得生凶也然柔所以济刚也时处其过不能不济虽有沉溺之凶尚有补过之意不可以为咎也兑为泽水也四阳在下若没于水故有此象

习坎【句】有孚【句】维心亨【句】行有尚【坎归藏作萃刘瓛作欲郭氏举正习上有坎字误】

传习坎重险也水流而不盈行险而不失其信维心亨乃以刚中也行有尚往有功也天险不可升也地险山川丘陵也王公设险以守其国险之时用大矣哉大象水洊至习坎君子以常德行习教事説卦水火不相射雨以润之劳乎坎坎者水也正北方之卦也劳卦也万物之所

归也故曰劳乎坎润万物者莫润乎水坎陷也坎为豕坎为耳坎再索而得男故谓之中男坎为水为沟渎为隐伏为矫輮为弓轮其于人也为加忧为心病为耳痛为血卦为赤其于马也为美脊为亟心为下首为薄蹄为曳其于舆也为多 为通为月为盗其于木也为坚多心序卦物不可以终过故受之以坎坎者陷也杂卦离上而坎下也

坎与离对待水火日月天地之大用故上下经皆以终篇阳陷陰中故名为坎陷则不测故为德险质为水两坎重险故曰习习者更歷也习即水之流而有常也有常即其信惟水润下其性然也其所以有常者中实也二五刚中也如人之行事以心为主心实而无伪诚也诚则感而通险而不困故亨心亨则行亦亨矣故行有尚水性惟行乃成济物之功人之处坎惟行乃能济事之急有尚犹言尚往故传曰往有功

初六【句】习坎【句】入于坎窞【句】凶

传习坎入坎失道凶也

当重险之时而以阴柔处下祸深而不知避入于坎之窞者也非习坎之道故凶窞者坎之在下者也谓初

九二【句】坎有险【句】求小得

传求小得未出中也

小对大而言济险者贵刚中九二以刚中而处柔在习坎之下体是尚有险也所求者小有得而已未能遽出乎险如九五之平也

六三【句】来之坎坎【句】险且枕【句】入于坎窞【句】勿用【险郑元向秀俱作检郑曰木在首曰枕在手曰检】

传来之坎坎终无功也

下坎方终而上坎又来故曰来之坎坎六三质本柔暗又在偏危之地无孚心之亨是处重险之中而且以为安枕无忧也入险日深而已不能成济之功者故勿用

六四【句】樽酒【句】簋贰【句】用缶【句】纳约自牖终无咎【牖陆作诱误】

传樽酒簋贰刚柔际也

礼天子大臣出会诸侯主国樽斚簋副何氏楷云贰副也谓樽酒而副以簋是也缶瓦器皆至约之仪约简俭也牖牖下室西南隅诗所谓宗室牖下者也纳此于牖以将诚意神其格之矣六四柔正承五近君当坎险之中资以出坎刚柔相比情一切至故其象如此而终得无咎也

九五【句】坎不盈【句】祗既平【句】无咎

传坎不盈中未大也

彖传曰水流而不盈行险而不失其信维心亨乃以刚中也二五皆不陷于坎而五尤中正居尊为卦之主故不盈之义惟此当之祗之为言适也不盈则适至于平不自侈大自无壅遏之患此君子存心至实而亨者也何咎之有

上六【句】繫用徽纆【句】寘于丛棘【句】三岁不得【句】凶【寘刘瓛作示云众议于九棘之下】

传上六失道凶三岁也

徽纆黑索也巽为绳上爻变巽之象丛棘以棘围墙也坎为丛棘本象周官司圜收教罢民能改者上罪三年而舍其不能改而出圜土者移上六以阴柔而居险极是失中道而终于坎者坎为狱三岁为改舍之期其舍与不舍以三岁为断凶已久矣

离【句】利贞亨【句】畜牝牛【句】吉

传离丽也日月丽乎天百谷草木丽乎土重明以丽乎正乃化成天下柔丽乎中正故亨是以畜牝牛吉也大象明两作离大人以继明照于四方说卦作结绳而为网罟以佃以渔盖取诸离说卦水火不相射日以烜之离也者明也万物皆相见南方之卦也圣人南面而听天下向明而治盖取诸此也燥万物者莫熖乎火离丽也离为雉离为目离再索而得女故谓之少女

离为火为日为电为中女为甲冑为戈兵其于人也为大腹为乾卦为鼃为蟹为羸为蚌为龟其于木也为科上槁序卦陷必有丽故受之以离离者丽也杂卦见坎

离与坎对待自然之象陰丽阳中离离然明也为日为火光明之象凡象之明者偏则蔽中正则通故利贞以卦体观之二五两爻皆中而二尤中正如日之中天而光无不通亨之实也离坤道坤牝马离牝牛二五其体也故有畜牝牛之象柔中而至顺故吉

初九【句】履错然【句】敬之【句】无咎

传履错之敬以辟咎也

阴方厯阳初九承之则阳亦厯阴火性炎上而刚明在下阴阳相厯如履之交错者然夫履之错咎之归也然敬以直内则义足以方外而错者定矣定则行克由礼斩无咎之道

六二【句】黄离【句】元吉

传黄离元吉得中道也

坤五曰黄裳元吉文言曰黄中通理离自坤来而六二尤为中正故其爻象似之黄中色黄离言中之丽也即柔丽乎中正也明体柔顺而中正则不失于苛察者亦不失于偏蔽牝牛之吉在焉故元吉

九三【句】日昃之离【句】不鼓缶而歌【句】则大耋之嗟【句】凶【鼓郑作击耄京房作经蜀本作啞又郑本无凶字】

传日昃之离何可久也

离惟六二中正过此而九三则日之昃矣当前明将尽后明方继之时过刚不中昏瞽 乱喜戚不常鼓缶而歌既忘其时之有尽大耋之嗟又昧乎命之在天不可久存凶之道也

梁氏寅曰三居下离之终乃日昃之时也夫持满定倾非中正之君子不能三处日之夕而过刚不中其志荒矣故不鼓缶而歌则大耋之嗟其歌也乐之失常也其嗟也哀之失常也哀乐失常能无凶乎君子值此之时则思患之心与乐天之诚并行而不悖是故不暇于歌矣而亦

何至于嗟乎

九四【句】 如其来如【句】 焚如【句】 死如【句】 弃如

传突如其来如无所容也

火性焦燥歟忽九四不中不正上逼五而君怒下凌三而党絶前火既在下后火又复来祸起不测无所容于其中弗戢自焚势所必至殄絶生机理所必至终成灰烬事所必至刚烈之际有如是者其凶可知章氏潢曰明之于人犹火之于木火宿于木而能焚木明本于人而能害人顾用之何如耳九四不中不正刚气躁暴其害如此

六五【句】 出涕沱若【句】 戚嗟若吉【戚子夏传作噉】

传六五之吉离王公也

位尊得中前明已息后明正起感已往之不追忧来者之未继至于出涕沱若而戚且嗟若则悔悟深切以处尊位扶衰振靡不难也故吉离火烦忧六五柔中继明之主力救前蔽其象如此所谓忧以天下者人君之所有事也故传曰离王公言其能丽尊位也蔡氏渊曰坎离之用在中二五皆卦之中也坎五当位而二不当位五为胜离二当位而五不当位故二为胜

上九【句】 王用出征有嘉【句】 折首【句】 获匪其丑【句】 无咎传王用出征以正邦也

上九阳刚光明在外离为兵戈变为震动而六五柔中倚而任之故为王用出征之象有嘉云者犹言实嘉赖之也首渠魁也丑胁从者也折取之也谓歼厥渠魁获执之也获不及丑则胁从防治也盖离明之极继照四方故威伐盛而平允成邦赖以正非黥武也故无咎

易翼宗卷四

湖北巡抚晏斯盛撰

下经

咸【句】亨【句】利贞【句】取女吉

传咸感也柔上而刚下二气感应以相与止而説男下女是以亨利贞取女吉也天地感而万物化生圣人感人心而天下和平观其所感而天地万物之情可见矣大象山上有泽咸君子以虚受人序卦有天地然后有万物有万物然后有男女有男女然后有夫妇有夫妇然后有父子有父子然后有君臣有君臣然后有上下有上下然后礼义有所错杂卦咸速也

乾坤刚柔之大分咸恒刚柔之交气恒之刚上柔下得内外之常理而咸之柔上刚下则阴阳之交情此其所以为下经之首也阴阳交故感兑柔艮刚兑女艮男而兑上艮下大象之感也初与四二与五三与六彼此相应艮止兑説彼此倡和体德之相感也以理而言感则通亨也以情而言两少相宜而得正利且贞也以事而言阴阳男女情理相交婚姻之善取女吉也刚柔本乾坤而该万物王道本乎人情此心此理有应皆感然感非有心也故咸之为文感而无心六爻之动皆有心也故以浅深为得失

大象君子以虚受人故六爻皆宜静不宜动繫辞传所谓寂然不动感而遂通天下之故程子所谓廓然而大公物来而顺应周子所谓主静朱子所谓鉴空衡平皆所谓无心之感也

初六【句】咸其拇【子夏传作跗荀爽作母误】

传咸其拇志在外也

咸之最切莫如一身故诸爻皆以身取象拇足之大指最居下体咸之初爻感之最下者所感最浅故以取象拇动身不必动也而意已相属初六之动志在九四所感尚浅未有实事故不言吉凶然吉凶亦槩可知矣

六二【句】咸其腓【句】凶【句】居【句】吉【腓荀爽作肥误】

传虽凶居吉顺不害也

腓足肚也不动者也下体之中也感及其腓则不动者欲动矣六二至静而感及焉气壹动志也妄也此所以凶然艮体而六二柔中还其静几居守其中不为挠动则仍不感于物矣故吉先儒俱以上应九五不待求而感谓即凶义于其腓之文不协六二在静正之中正顺而不害之实居吉之理甚明无庸别生意

九三【句】咸其股【句】执其随【句】往【句】吝

传咸其股亦不处也志在随人所执下也

三居下体之上股象也九以阳刚居偏逼之地欲动者也然不能自主也必随上体而动盖感于上兑之説者也程子所谓阳好上而説阴者正得其情执持也主也主于随上也卦象男下女三上其最切者故传曰所执下且夫倡妇随礼也所执者在随则不自为政非夫妇之道故往吝

本义三随初二而动失咸感之义程传随上从应得卦意

九四【句】贞吉悔亡【句】憧憧往来【句】朋从尔思【憧京房作 】传贞吉悔亡未感害也憧憧往来未光大也系辞易曰憧憧往来朋从尔思子曰天下何思何虑天下同归而殊涂一致而百虑天下何思何虑日往则月来月往则日来日月相推而明生焉寒往则暑来暑往则寒来寒暑相推而岁成焉往者屈也来者信也屈信相感而利生焉尺蠖之屈以求信也龙蛇之蛰以存身也精义入神以致用也利用安身以崇德也过此已往未之或知也穷神知化德之盛也

爻当两感之交人心之位为咸之主故直言感应之理而不言咸其心所以别于诸爻也贞正而固也静也静则虚以受人百感虽纷而中自一也寂然不动感而遂通天下之故廓然大公物来顺应如鉴之空如衡之平也九四以刚为主而不豫期于初六之应未尝以感为心害此所以吉而悔亡也此其本然也往来感而不已以本爻在交感之际又申言之憧憧犹言营营系心于往来也不贞也朋同类也从牵附也犹言纷扰失其心之本体皆客感也悔之所由生也九四刚而不中下应初六则陰私之感亦不能免故传曰未光大光大者心之体精义入神而利用安身以至穷神知化乃为光大光大者贞夫一者也

九五【句】咸其脢【句】无悔

传咸其脢志未也

脢马融云背也郑康成云脊肉也王肃云在背而夹脊孔颖达云大体皆在心上盖切近于心之处九五中正上比上六而乘四是柔说者在上而五之心有定向也是往来者在四而五固安然也志在上六二虽相感不为之动故无悔切问而近思其犹愈于远乎不尤愈于憧憧乎

上六【句】咸其辅颊舌【句】孟喜作侠误

传咸其辅颊舌滕口说也

兑为口上六正其开合之处而位居卦外是感之在外者也感之在外者言语而已辅口辅颊齿颊舌在中皆口之所以言者感人以言感之无实者居咸之末不足以成感矣仁言不如仁声之入人深也美言其可市乎

恒【句】亨【句】无咎【句】利贞【句】利有攸往

传恒久也刚上而柔下雷风相与巽而动刚柔皆应恒恒亨无咎利贞久于其道也天地之道恒久而不已也利有攸往终则有始也日月得天而能久照四时变化而能久成圣人久于其道而天下化成观其所恒而天地万物之情可见矣大象雷风恒君子以立不易方系辞恒德之固也恒杂而不厌恒以一德序卦夫妇之道不可以不久也故受之以恒恒者久也杂卦恒久也咸之覆也艮刚上而为震兑柔下而为巽男女内外尊卑之常震雷巽风象之常巽入震动德之常初柔四刚二刚五柔三刚上柔应之常四者皆恒理也故名恒以恒之体言则天道久而不已之诚也故亨通无过咎而皆利于贞贞正也所以为恒也以恒之用言则天地终始不息之运也故健行而利有攸往恒得天地之大用故其行亦似之

初六【句】浚恒【句】贞【句】凶【句】无攸利【浚郑作濬】

传浚恒之凶始求深也

浚深也恒常也定也不苟动者而初动焉不已早乎犹所谓交浅而言深者也求亲愈疎事所必至以刚柔之交言之巽女也其性入震男也其性动方结褵而即责以夫妇之常道反目之

势也若必往而从之必不宜矣初与四虽为正应而情不应也故凶而无攸利

九二【句】悔亡

传九二悔亡能久中也

浚恒不遄宜有悔矣然九二刚而得中则恒之能以中而久于其道者悔之所以亡也本爻独得恒理若初之浚三之不恒四之羞上之振皆失中也

程氏迥曰大壮九二解初六及此爻皆不着其所以然则以爻明之也

九三【句】不恒其德【句】或承之羞【句】贞吝【或郑作咸大误】

传不恒其德无所容也

恒之为德中而已矣无过分者九三刚而不中在恒上下之界是不恒也志在上进动辄得咎二四既不能比上虽应亦不能合也或者不一之辞

九四【句】田【句】无禽

传久非其位安得禽也

震动之象最常者莫如田猎田非其地安所得禽以恒之理言则以阳刚之性处交接之地与不恒其德者同也

六五【句】恒其德【句】贞【句】妇人吉【句】夫子凶

传妇人贞吉从一而终也夫子制义从妇凶也

恒之德在中六五得中故亦曰恒其德然柔而得中固正也夫恒久之道惟刚健斯为不已不息之常五位虽尊而六则已柔是盖以顺为正者妇人之恒也丈夫而徒为柔顺则不恒矣故

凶此其所以不如九二之刚也

上六【句】振恒【句】凶【振說文作摺虞张作震俱误】

传振恒在上大无功也

恒已可久矣而上六以阴僻之才震动之体当恒之终则是欲举常理而振挠之非徒无益于天下反有祸于生人凶之道也语曰害不什不变法利不百不更制可不慎与

遯【句】亨【句】小利贞

传遯亨遯而亨也刚当位而应与时行也小利贞浸而长也遯之时义大矣哉大象天下有山遯君子以遠小人 不恶而严序卦物不可以久居其所故受之以遯遯者退也杂卦遯退也

咸恒陰阳感应之交遯壮阴阳盛衰之际故遯壮次咸恒遯退避也阴浸长阳避陰也然当遯之时亦有亨理以卦体观之九五刚正得中当乎尊位而六二柔正得中与之为应才足有为随时补救当不至于否塞也第陰势方长欲大声疾呼行其直道得无激小人之怒而失时中之道乎小利贞则权而得正此嘉遯之所以为贞吉也

初六【句】遯尾【句】厉【句】勿用有攸往

传遯尾之厉不往何灾也

尾下也凡物首上而尾下以遯之全体观之则初固尾也六阴柔而处下才不足济阳方遯而情不属危矣厉危也即灾也故占者勿用有所往不往斯不厉先儒俱以先后言尾多不可通以干用九之见羣龙无首及未济上六之濡首观之则首尾固以上下言也

六二【句】执之【句】用黄牛之革【句】莫之胜【音升】說【音脱】

传执用黄牛固志也

六二在陰阳之际阳遯而上陰又迫之去交几絕矣幸而德本柔中上应九五当固执其相应之志而不可解则在遯避之时上下仍相亲也倘听阳之去而不合五以相济不将否而剥乎艮坚确黄中色牛柔顺皆六二本象不必以外卦错坤为牛

九三【句】系遯【句】有疾厉【句】畜臣妾吉【系李鼎祚陆德明俱作系】传系遯之厉有疾惫也畜臣妾吉不可大事也

阳之遯阴其时也而下比二陰系恋而不能去是已为羸惫之疾矣危道也当此之际惟以畜臣妾之道处之斯为吉天下惟女子与小人为难养蓋近之则不逊遠之则怨时虽有所系而刚正在已不遠不近则彼亦不敢肆矣此传所谓君子以遠小人不恶而严之道也若羈系于此而欲大有所为举小人而严以逐之其如势之不可何哉

九四【句】好遯【句】君子吉【句】小人否

传君子好遯小人否也

好遯者君子絕交不出恶声徐徐焉而去耳九四既已脱然于阴之外而下应初六未尝痛加斥弃不恶而严君子之道固然也吉可知矣彼小人者亦安知君子之心哉未防小惩终罹大戒故否

九五【句】嘉遯【句】贞【句】吉

传嘉遯贞吉以正志也

居尊得中有应于二此其遯之亨嘉者也阴方逼阳而六二得中其志犹固则九五在上以中正之德正之吉之道也然曰正志则不恶而严亦可知矣此遯而亨之事也亨者嘉之防嘉即亨也故彖曰遯亨此曰嘉遯

上九【句】肥遯【句】无不利【肥淮南子作飞音误】

传肥遯无不利无所疑也

肥与疾惫异脱然事外超然远引者也上九之所以异于九三也九三系比于二故疾上九外
远于阴故肥肥之为言足也昌黎盘谷歌曰虎豹远迹兮蛟龙遯藏鬼神守防兮呵禁不祥饮
且食兮壽而康无不足兮奚所望其肥遯之谓乎

大壮【句】利贞

传大壮大者壮也刚以动故壮大壮利贞大者正也正大而天地之情可见矣大象雷在天上
大壮君子以非礼弗履系辞上古穴居而野处后世圣人易之以宫室上栋下宇以待风雨盖
取诸大壮序卦物不可以终遯故受之以大壮杂卦大壮则止

大壮遯之覆推大阳也壮盛也阳至于四则盛矣内干刚而外震动又壮之德也此卦之所以
名然大壮之所利者惟其正也大壮之震刚而不过也中也九二之贞是矣次之则九四也若
初之壮趾三之壮罔其何所利乎此君子所贵非礼弗履也礼也者中也天地之情正大也中
而已矣

初九【句】壮于趾【句】征【句】凶【句】有孚

传壮于趾其孚穷也

壮有躁动之象动于初故曰趾位卑处下既无能为亦无可为往则穷耳凶也虽有刚实之志
而自信之过终不免于穷也

九二【句】贞【句】吉

传九二贞吉以中也

彖曰大壮利贞传曰大者正也九二在内卦之中是刚而得中不过于刚则中即所以为正也
彖之所谓利贞者也故吉

九三【句】小人用壮【句】君子用罔【句】贞【句】厉【句】羝羊触藩羸其角【羸
王肃本作縲郑元虞翻作累蜀才作累】

传小人用壮君子罔也

卦本阳刚太盛而爻又居干刚之极位偏承动一于壮往小人之事也君子则非礼弗履罔用壮者三志刚而地危不得为正也非彖所谓利贞矣彖变为兑兑为羊而羝又喜触上卦震为竹为苇藩之象也触藩羝之壮也羸伤败也角刚质触藩羸角用壮之厉

九四【句】贞吉悔亡【句】藩决不羸【句】壮于大舆之輹传藩决不羸尚往也

九四以刚下柔不过于刚虽非中正而刚而能柔亦正也不失利贞之道非壮罔取厉者比也故吉而悔亡六五在上前无阻隔可以有为震藩也变坤则决其藩矣无复羸角之患而坤为大舆輹与輹同车下之干輹壮则任重致远而无难此其所以贞吉而悔亡也

六五【句】防羊于易【句】无悔【羊郭京作牛易郑音亦谓佼易误也陆续作 易 通字汉食货志疆 作易可见】

传防羊于易位不当也

易場通田畔也震为大涂場之象也阳盛而阴离六五柔中而乘重刚适在震体不能无失又变兑为羊故曰防羊于易非大壮之利贞也不如九二之贞吉仅无悔而已位之不当为之也

上六【句】羝羊触藩【句】不能退【句】不能遂【句】无攸利【句】艰则吉

传不能退不能遂不详也艰则吉咎不长也

九三之触藩势方壮也上六两阴丛荟之际当壮之极则已触而入藩矣其体本壮故不能退而爻位皆柔故又不能遂遂者进也人之不揆几度理而入于丛脞之际者似之非大者之正也何利之有然处壮极而质柔是以困心衡虑不敢复用其壮咎可免矣此则其吉也

晋【句】康侯用锡马蕃庶【句】昼日三接【晋孟喜作齐与跻通进也】传晋进也明出地上顺而丽乎大明柔进而上行是以康侯用锡马蕃庶昼日三接也大象明出地上晋君子以自昭明德序卦物不可以终壮故受之以晋晋者进也杂卦晋昼也

晋者离之进而明出于地上也坤顺而离明丽也本卦与明夷反覆相推明夷坤上而离下晋离上而坤下是离之六二进而上行于五得中居尊此皆晋之义也以明之出地上又顺而丽明且二上而为五则人臣覲君宠遇极隆之象矣康侯安国之侯六五柔爻与坤同体有土者也坤为牝马为众马之蕃庶也离为日中自二至五三爻昼日之三接也

初六【句】晋如摧如贞【句】吉【句】罔孚【句】裕【句】无咎

传晋如摧如独行正也裕无咎未受命也

当晋之初柔在下位不急于进故于进而若却也此自守之正吉之道也其摧如也去上行之柔尚远九四虽应而若或间之以其位卑未受五之命也故曰罔孚然以其贞也自觉裕以处之正已而不尤人寡过之至故无咎君子始进之难如是

六二【句】晋如愁如贞【句】吉【句】受兹介福于其王母传受兹介福以中正也

愁如与摧如相类皆拟其处晋之心摧如不以进为急也愁如不以进为喜也盖六二柔体在坤之中本直方大不习无不利者贞也此其所以吉也六五其同德也而六五卦主居尊如王母然故有受福于王母之象介大也王母祖母也不曰母而曰王母者孙妇祔于祖姑昭穆之礼也

六三【句】众允【句】悔亡

传众允之志上行也

大象明出地上六三日之所光临也坤为众三顺极是心地昭然为众所信而上接乎大明之象以视初之摧如罔孚者异矣故曰众允占曰悔亡或曰三不中正而无悔何也晋之时也顺而丽明之际也

九四【句】晋如鼫鼠【句】贞厉【鼫子夏传作硕误】

传鼫鼠贞厉位不当也

四切近于五而以刚处之是处高位而犹贪于进者瞻顾日中如鼯鼠鼯鼠贪而畏日故以取象不知止者殆不知足者辱正危道也

六五【句】悔亡【句】失得勿恤【句】往吉无不利【失孟喜马融郑元王肃俱作矢误】

传失得勿恤往有庆也

以柔中之德晋于尊位虚公无我众阴顺应悔之所以亡也虚则无欲故失得不介于心日进昭明康功受锡其所自至所以往吉而无不利也此晋之主爻传所谓有庆者即彖康侯之锡也

上九【句】晋其角【句】维用伐邑【句】厉【句】吉无咎【句】贞吝传维用伐邑道未光也

角隅曲也进之极而用刚直至于隅曲之地而无可复进矣将所谓大明地上者何有乎邑私邑隅曲之地也照不及远而治其私然尤不可恃也惟以危惕之心处之斯吉而无咎若以必进之道守之则穷无所之必致愧吝

明夷【句】利艰贞

传明入地中明夷内文明而外柔顺以防大难文王以之利艰贞晦其明也内难而能正其志箕子以之大象明入地中明夷君子以泄众用晦而明序卦进必有所伤故受之以明夷夷者伤也杂卦明夷诛也

晋之覆推离下而坤上是明入地中失其明矣故曰明夷夷伤也然离文明而坤柔顺六二中正不失其德艰难委曲自晦其明固守其常则其宜也所谓用晦而明也

初九【句】明夷于飞垂其翼【句】君子于行【句】三日不食【句】有攸往【句】主人有言

传君子于行义不食也

离为雉有飞鸟之象于飞疾飞也垂翼不敢矫羽翱翔而抑然以前也凡鸟飞有专向者翼不数习曰垂明夷之初刚明在下见几而作不复迟回者也下遂申其义君子知伤之将至而决然以去去之惟恐其迟而三日不暇食患难之际所有事也行在道也往所行而至之处也主人所至之主家也羁旅穷迫之中市人亦得而因之小雅曰脊令在原兄弟急难每有良朋况也永叹良朋且然主人得无言乎

垂翼先儒以为见伤见伤则已不能飞矣于夷初不合也不食来氏以为自悲其见伤而不食不得速去之意玩传义不食也则其为见几而作不暇于食之义明矣细味之上下文义皆贯程传颇得此意其引穆生去处一段似为新切然于攸往在道时情景未合

六二【句】明夷【句】夷于左股用拯【句】马壮【句】吉【次夷字子夏作睇旁视也陆续同京房作腴误明张氏所出晋王本无此字股马融王肃作殷左姚信作右拯子夏传说文俱作拊】传六二之吉顺以则也

左股下体幸未至腹心犹可拯也拯而不速无及矣六二中正忠愍不贰文明在内中乎事理变干故曰马壮马壮则拯之急而祸不深故吉

九三【句】明夷于南狩【句】得其大首【句】不可疾【句】贞传南狩之志乃大得也

当明夷之界正夷之所由及重陰之下九三以刚居之能救伤以为明者蓋六四积阴切近于离非至刚不能克也南离方狩征伐之事大首首恶也得之则陰去而明见矣然积染既深非可骤激宜于正固九三刚胜故有此戒○周易观象曰先儒以此为武王之事书曰陈于商郊俟天休命记久立于缀以待诸侯之至也蓋不可疾贞之义

六四【句】入于左腹【句】获明夷之心于出门庭

传入于左腹获心意也

坤为腹卦自下而上是为左旋故古多称左六四其夷已深六五心也四比五腹之切近者上与五同心而下承刚明子然以去出门庭之象也其迹与五虽不同而罔为臣仆逊荒行遯其心意则一也

杨氏时曰腹坤象也坤体之下故曰左腹尊右故也获明夷之心所谓求仁而得仁也此微子之明夷也

六五【句】箕子之明夷【句】利贞【箕子蜀才作其子汉赵賓作莢兹误】

传箕子之贞明不可息也

上六主乎伤者五最切近其伤独深而内有中德能正其志不息其明箕子似之其为时也行谏而囚佯狂受辱不能舍去素患难行乎患难也正也故占者利贞

文王囚羑里演易有筮得明夷大象之事周公爻辞因其时事之切近者而系之箕子宗臣位父师不忘宗社切谏佯狂故以当六五圣人彖传遂因此例观六二之文明中正而直以文王当之可以知圣人作易圣人用易之道蜀人赵賓易箕子二字作莢兹后又作莢滋殆未合圣传详其时事而深求之也毛氏奇龄曰汉书儒林传蜀人赵賓为易饰而文以为箕子明明万物莢兹也又晋邹氏家讳云训箕为莢训子为兹漫衍无经刘向云今易箕子作莢滋则在前止为训诂而此时竟有改此二字者然曰今本则明非古本且夫子已明指箕子则明与文王之时事相类而后儒纷纷何也

上六【句】不明【句】晦【句】初登于天【句】后入于地【不明晦三字郭京举正作至晦谬】

传初登于天照四国也后入于地失则也

明之所以夷晦也晦也者不明也上六阴暗之极所以晦而其明者皆为所夷也原其初而观本晋也明出地上无不可以照临据其后而观则晋之反而为明夷晦昧无明当二卦反覆之际故推言之以见明本其所自有而自伤之是伤明者实自伤其明也

家人【句】利女贞

传家人女正位乎内男正位乎外男女正天地之大义也家人有严君焉父母之谓也父父子子兄兄弟弟夫夫妇妇而家道正正家而天下定矣大象风自火出家人君子以言有物而行有恒序卦伤于外者必反其家故受之以家人杂卦家人内也

咸之似睽之覆也柔为女刚为男六居二四九居三五上女正于内男正于外象故取乎家人象兼男女而又曰利女贞者家人之道验于内者也内正则外之正为之也周南召南极言后妃夫人之德而文王德化之盛益见王道本乎闺门其即此义乎周子曰家人离必起于妇人此家人之所以利女贞也

初九【句】闲有家【句】悔亡

传闲有家志未变也

礼始于谨夫妇为宫室辩内外闲也者家人之礼也女之所以正乎内男之所以正乎外者从兹始也爻在家人之初而九二刚正故能谨乎其防而为正家之始此悔之所以亡也男子生而愿为之有室女子生而愿为之有家曰有家则女贞之意而男之有室其谨始之礼亦可知矣

六二【句】无攸遂【句】在中馈【句】贞【句】吉

传六二之吉顺以巽也

无攸遂坤之无成而有终也六二柔顺得中在家人之内得坤道之纯者也中馈妇人之职六二在中尽妇职者也职在则道在卷耳苹蘩咏于二南饮食服御掌于周礼家人之事王化之本也过此则豫外政鸣牝鸡岂家之利乎坤贞之吉六二有焉此天下古令之常道也

九三【句】家人嗃嗃【句】悔厉吉【句】妇子嘻嘻【句】终吝【嗃嗃荀爽作确确刘瓛作焞焞嘻嘻陆续作喜喜张揖作嬉嬉】

传家人嗃嗃未失也妇子嘻嘻失家节也

嗃嗃过严以义胜恩始悔之中且危之而终吉九三之刚明为之也嘻嘻以情失礼义虽洽而终吝近比于柔为之也爻在上下之交故反复言之

六四【句】富家大吉

传富家大吉顺在位也

以柔顺乎刚是亦坤贞之位彖所谓女贞之利者也家人至四则家道之将成上辅五而下应初助内政而上下理上下理而和致祥富可知已富也者福也非仅多财之谓故为大吉之道

九五【句】王假有家【句】勿恤【句】吉

传王假有家交相爱也

假至也家道之极也是所谓身脩家齐而为王化之源者也勿恤者父父子子兄兄弟弟夫夫妇妇无纤毫芥蒂之疑式相好无相尤也九五中正居尊六四六二相比相应礼立而化行极家道之盛故吉

上九【句】有孚威如【句】终吉

传威如之吉反身之谓也

刚居巽极故有孚与嚚嚚者异刚明在上故威如与嘻嘻者异矣孚信也假家勿恤之所有事也威礼也闲有家之令仪也皆以身作则之实也此家道之成故终吉终吉也者言其吉之长远也

曾氏巩曰家人之义归于反身二南之化本于文王

睽【句】小事吉

传睽火动而上泽动而下二女同居其志不同行睽而丽乎明柔进而上行得中而应乎刚是以小事吉天地睽而其事同也男女睽而其志通也万物睽而其事类也睽之时用大矣哉大象上火下泽睽君子以同而异系辞 木为弧剡木为矢弧矢之利以威天下盖取诸睽序卦家道穷必乖故受之以睽睽者乖也杂卦睽外也

睽家人之覆推巽覆为兑兑为泽动而居下离为火动而居上润下炎上彼此不交质相睽也离中女志在坎兑少女志在艮一中一少各有所归情相睽也故名卦曰睽时虽睽矣然兑說也离丽也明也内說外明其德不爽离在家人六二本居下体睽则上行而为六五又有九二

为之应其材亦足以有为此皆以柔为用也凡卦阳大阴小小事犹言柔道睽时用柔不致激变渐可转移吉之道也

何氏楷曰业已睽矣不可以忿疾之心驱迫之也惟不为已甚徐徐转移此合睽之善术也故曰小事吉小事犹言以柔为事非大事不吉而小事吉之谓

初九【句】悔亡【句】防马勿逐自复【句】见恶人【句】无咎传见恶人以辟咎也

睽初阳刚在下悔也然两刚同德各不相干是无与于睽者所谓同而异也故悔亡其象如防马然勿逐而自复亦小事之吉也以人事言则当睽之初人已不淑遽然绝之睽将成矣其咎安归可见则见不为已甚后患可弥故无咎如郭汾阳之于卢杞既具先见之明抑亦无咎之道

程子谓合则有睽本异则何睽于应爻独得

九二【句】遇主于巷【句】无咎

传遇主于巷未失道也

巷里巷也非臣主之地而遇于斯者时正睽也以九二刚中之才上有柔中之君当睽离之时须之甚殷辱在草莽猝然来遇上下相与睽可合也彖所谓得中而应乎刚也故传曰未失道此所以无咎

张氏清子曰在睽之时惟九二独遇六五之君故曰遇主于巷彖所谓得中而应乎刚者指此爻也

六三【句】见舆曳【句】其牛掣【句】其人天且劓【句】无初有终【掣说文作𨔵郑作防子夏传作契荀爽作骑皆云一角仰也不合文义劓说文作𠂔王肃作𠂔】

传见舆曳位不当也无初有终遇刚也

六三阴柔初二两爻重刚在下后重前轻以柔上刚当睽之间欲行不能舆之曳也离牛象在睽之上刚柔不属掣也其人亦本爻也当曳掣之势有重伤之象天古而字之讹古文相类汉

法有罪髡其鬢髮曰而又周礼梓人为笋簴作而亦谓髡其鬢髮也劓截鼻也柔乘刚而见伤也即无初也至于上九阳刚正应睽极可合故有终 圣传见舆曳位不当也则其牛掣其人天且劓皆在位不当中矣无初有终曰遇刚也则上九正应有不终睽之理如此明白显易而诸家曲为之說妄也至本义以上九为髡劓益误矣

九四【句】睽孤【句】遇元夫【句】交孚【句】厉【句】无咎

传交孚无咎志行也

九四阳刚不中居火泽之间上下离絕睽之已甚孤矣然六五相近同德相与元夫阳也与五相信故交孚四处危地故厉厉也者时睽而不遑宁处也睽而有孚志之合也亦异而同矣故无咎 三四睽之主爻故上着其象此实其名

六五【句】悔亡【句】厥宗噬肤【句】往【句】何咎

传厥宗噬肤往有庆也

六五当睽之时悔也然柔得中而居尊故亡之宗主也亲也上九阳刚在外近比六五以应之又下有九二为应彼此相须往必有合肤鼎肉噬肤宗防之食情相欢也彖所谓得中而应乎刚是以小事吉也故经曰无咎而传曰有庆

上九【句】睽孤【句】见豕负涂【句】载鬼一车【句】先张之弧【句】后說之弧【句】匪寇【句】婚媾【句】往【句】遇雨则吉【弧京房马融郑元王肃翟子元虞翻李鼎祚俱作壶以兑为口离为大腹坎酒在中为壶象啗甚矣】

传遇雨之吉羣疑亡也

上九睽深矣故孤火之与泽两相疑也然睽已极矣极则必反疑可释也居离火之上而下视兑泽两刚负柔既若豕之负涂三应变干为车陰乘乎阳又若载一车疑之甚也睽之所有事也而离为兵戈为弓矢有弧象故当其疑也先张之弧及其久而疑者释故其后乃說之弧皆为三也三为正应初疑之以为寇也至柔与刚合而无疑乃知其为婚媾也兑为泽雨也泽遇火则有相济之功故遇雨吉

丘氏富曰上本与三应不孤也睽极而疑生故亦曰孤豕鬼皆指三也上睽疑而未敢亲近乎三如见豕背之负泥涂又如载鬼满于一车始焉致疑则张弧终焉疑释则説弧知其非而寇讎乃我之婚媾也自此以往阴阳和畅向之疑心羣起者至此尽冰释而亡矣按此据定匪寇婚媾指三而言深得圣传羣疑亡也之义

蹇【句】利西南【句】不利东北【句】利见大人【句】贞吉

传蹇难也险在前也见险而能止知矣哉蹇利西南往得中也不利东北其道穷也利见大人往有功也当位贞吉以正邦也蹇之时用大矣哉大象山下有水蹇君子以反身脩德序卦乖必有难故受之以蹇蹇者难也杂卦蹇难也

二阳四阴坎上艮下与解反覆相推坎险艮止阨难之象由覆推观之则九自解之二往居五而得中能济蹇者故利以本卦之体观之则东北正蹇地也故不利九五中而居尊大人之象故利见又阳刚正位故贞而吉

初六【句】往蹇【句】来誉

传往蹇来誉宜待也

蹇初六柔不欲遽往故传曰宜待往谓进来者艮之止止于蹇之初得蹇之时用所谓知也即其誉王氏弼曰处难之始居止之初独见前识覩险而止以待其时故往则遇蹇来则有誉

六二【句】王臣蹇蹇【句】匪躬之故

传王臣蹇蹇终无尤也

王臣王之臣也谓六二也九五则其王也当坎险之中为蹇之主而六二为正应所以扶危定倾者一德一心君臣之际其分其不可有二观王臣二字而躬皆君有矣蹇蹇重难也九五陷于坎中事极势危六二应于坎下毕智竭力其济君之灵也不济则以死继之躬何有焉诸葛武侯曰鞠躬尽瘁死而后已成败利钝非臣之明所能逆覩匪躬之义尽此矣尤之所以无也若身为王臣而欲脱身蹇外则有身矣得无尤乎济不济非所论也程传来注俱谓六二不能济蹇犹属偏辞

王氏弼曰处难之时当位居中以应乎五执心不违志匡王室者也故曰王臣蹇蹇匪躬之故

九三【句】往蹇【句】来反【反郭氏举正作正谬】

传往蹇来反内喜之也

所以蹇者坎为之也上承坎故往则蹇见险而能止者艮为之也内柔而九三成艮故来则反反谓不入于蹇也亦其刚明之德为之所谓知也故传曰内喜之三四上下卦交接之处故以往来言他卦多类此孔氏颖达曰九三与坎为邻进则入险故曰往蹇来则得位故曰来反程传曰三为下二阴所喜故来为反其所也吴氏曰慎曰九三刚正为艮之主所谓见险而能止者故来而能反止于其所

六四【句】往蹇【句】来连

传往蹇来连当位实也

往谓五蹇之主也既已蹇矣而四承之近君之地无坐视之理而下承九三刚正有力不得不连结以济之情急而势可援也三五皆阳故传曰当位实也

九五【句】大蹇朋来

传大蹇朋来以中节也

九五阳刚居尊当蹇之时而陷坎中故曰大蹇六二为其正应二应则艮之全体俱应即其朋也以阳刚之德居中有节足以感动当世呼召贤哲而正应柔顺得中而艮刚全体俱应实其同德故曰朋来二五情理相关阴阳相应朋来之义甚显而来氏以九三为朋非也且失传中节之义

上六【句】往蹇来硕【句】吉【句】利见大人

传往蹇来硕志在内也利见大人以从贵也

往蹇蹇之极也来硕俯就乎五也蹇极当济而九五比焉志之所在出蹇可矣故吉且九五大人之象近与之比则从之易故又利见

项氏安世曰上六本无所往特以不来为往耳初六本无所来特以不往为来耳

解【句】利西南【句】无所往其来【句】复【句】吉【句】有攸往【句】夙吉

传解险以动动而免乎险解解利西南往得众也其来复吉乃得中也有攸往夙吉往有功也天地解而雷雨作雷雨作而百果草木皆甲拆解之时大矣哉大象雷雨作解君子以赦过宥罪序卦物不可以终难故受之以解解者缓也杂卦解缓也

解蹇之反艮反为震而往坎来居下而复坎险震动动出险外所以名解由此推之东北蹇地既不利而利西南则其解也亦惟西南之为利矣西南为坤坤为众六五柔中难平祸静可与休息人共安之也由坎之来观之则九二得中复得其所亦吉道也然难之解乘平时也时也者中也于是而有所往焉急宜早为之所也苞桑之系萌蘖之生其势不可少缓也缓则失中矣天道人事皆有然者时乎时乎不可失也

初六【句】无咎

传刚柔之际义无咎也

本爻初六自蹇之上六而来当解之始亲承九二又得九四之应以刚济柔适当解蹇之际不少过差无咎之道也

胡氏炳文曰恒九二悔亡大壮九二贞吉解初六无咎三爻之占只二字其言甚简象在爻中不复言也

九二【句】田获三狐得黄矢【句】贞吉

传九二贞吉得中道也

坎为水为沟渎为矢为弓轮黄中色震帅在上而坎险阳刚田猎之象也六三阴柔而疑故不为豕而为狐本爻刚健得中故不为弓轮而为矢弋而取之曰获失而复有曰得九二在中其

来复而攸往夙吉者也

王氏应麟曰世之治也君子以直胜小人之邪易曰田获三狐得黄矢世之乱也小人以狡胜君子之介诗曰有兔爰爰雉离于罗

六三【句】负且乘【句】致寇至【句】贞吝

传负且乘亦可丑也自我致寇又谁咎也系辞子曰作易者其知盗乎易曰负且乘致寇至负也者小人之事也乘也者君子之器也小人而乘君子之器盗思夺之矣上慢下暴盗思伐之矣慢藏诲盗冶容诲淫易曰负且乘致寇至盗之招也

六阴柔三疑惧乘刚中之上小人之妄据也而坎为劳忧负之象也为舆则乘之象也又为盗则寇之象也柔有贞义当解之交而乘刚中之上则吝矣

九四【句】解而拇【句】朋至斯孚【拇荀氏作母误】

传解而拇未当位也

震为足拇之象也四刚五柔彼此相须朋之象也方解之际震刚不宁其位未当故必六五之济而后解可成也

六五【句】君子【句】维【句】有解【句】吉【句】有孚于小人

传君子有解小人退也

六五柔中居尊为解之主操解之势有解之德君子兼德位言之维网之纲也祸网之设一解其维则俱解矣吉之道也其为解也君子道长为之也君子道长则小人道消其消也非仅势力为之盖有以服其心也孚信也小人孚则其解廓然矣天下之势若小人未孚则虽解难于一时而难机犹伏解尚未尽极之于小人之孚斯解之至惟五为能当之

上六【句】公用射隼【句】于高墉之上获之【句】无不利传公用射隼以解悖也系辞

易曰公用射隼于高墉之上获之无不利子曰隼者禽也弓矢者器也射之者人也君子藏器于身待时而动何不利之有动而不括是以出而有获语成器而动者也

隼猛鸷之鸟谓三也三坎上盖尝为蹇者于本卦则为寇故传曰悖而震上解极若垣墉然今在上六则高墉之上矣震动乎苍筤竹则射之象也斯时也蓄久而后动审固而后发获之则首难除矣以其处于解后操必获之道者也故曰于高墉之上获之

易翼宗卷五

湖北巡抚晏斯盛撰

下经

损【句】有孚元吉无咎【句】可贞【句】利有攸往【句】曷之用【句】二簋可用享【簋蜀才作轨误】

传损损下益上其道上行损而有孚元吉无咎可贞利有攸往曷之用二簋可用享二簋应有时损刚益柔有时损益盈虚与时偕行大象山下有泽损君子以惩忿窒欲系辞损德之修也损先难而后易损以远害序卦缓必有所失故受之以损杂卦损益盛衰之始也子夏传孔子读书至损益喟然而叹子夏避席而问答曰自损者益自益者缺是以叹也又淮南子引孔子读易至损益喟然而叹曰或利之适足以害之或害之适足以利之利害祸福之间不可不察

三阳三陰乾坤否泰之分际与益相反覆而本卦上下又自相对待上卦陰多下卦阳多陰主文阳主质当减下卦之阳以补上卦乃不至陰多于阳文浮于质故传曰其道上行此卦之所以名损也上下卦阳皆应陰故有孚孚则以阳益陰元阳为之主矣故元吉彼此相济陰阳不愆故无咎正道也苟可贞道在上行故利有攸往夫以阳益陰尚质之道也以质为文而彼此取称足以徵信则质也者孚之实也不必繁縟之多仪而神明可鉴故又申之曰此尚质之道果何如乎如享祀之礼固将洁粢丰盛备物致敬然与其敬不至而物有余毋寧物不及而敬至也虽二簋可也审其为可损之善物也故传曰应有时先儒皆据六三爻辞三人行则损一人谓干九三升于坤上为损之主非也每卦反覆相推之中又有陰阳对待大分当从其大者观之上经乾坤之后阅十卦而至泰否下经咸恒之后阅十卦而至损益泰否小乾坤也两卦相对待而本卦亦相对待也损益类咸恒也泽山为咸而山泽则损雷风为恒而风雷则益亦两卦相对待而本卦自相对待也蓋泰之下损一阳以益上则为损否之上损一阳以益下则为益其实山泽风雷自相对待本卦之损合两体观之则上卦陰多下卦阳多而阳当损以益陰从泰之损下一阳成损之象以为之纲也是故初爻曰已事遄往又曰酌损之是初固损以益四也二爻曰弗损益之之指五而言益之则损在其中若夫三之三人行则损一人以泰之干去其三之一也一人行以下卦止一陰孤行而上得损干之一阳为艮之上以为益也四之损疾因初之遄往而见五之或益因上为损以益下之主而言上九弗损益之以干一上行故不见其损而实已益若專以三为成损之主则初之酌损之谓之何且卦爻之变皆自下而上无独从三起者来氏知两卦之覆推然其所谓三行上而居四者几成以陰益陰西河知泰否之推移而亦以三为损之实皆失之传曰损下益上下谓干初上谓坤六各爻损益皆酌盈剂虚损阳益陰

初九【句】已事遄往【句】无咎【句】酌损之【已虞翻作祀遄荀爽作顓俱误】传已事遄往尚合志也

已事已然之事当损者也而时值其初上应于四彼正须阳遄往速以益之也彼须益而我益之何咎之有因其事之相须而往则已称量乎时之宜矣故曰酌损之绀华式靡初以为质也遄往于事后则酌损已在其中故传不重释

九二【句】利贞【句】征凶【句】弗损【句】益之

传九二利贞中以为志也

陰阳进退适中而已损也者损其多以益少中也得中而复损之则嗇矣是故弗损乃所以为益九二得中正也故利贞不当复有所往往失正矣故凶夫所谓利贞者守己之道也尚质之事也人心风俗由此而淳是弗损乃所以为益也传专言九二利贞则弗损之益已见矣

六三【句】三人行【句】则损一人【句】一人行【句】则得其友传一人行三则疑也繫辞天地絪縕万物化醇男女构精万物化生易曰三人行则损一人一人行则得其友言致一也

三人干本三阳也损一人减一阳以居上也一人行坤之一陰独行于内也友上刚之应也蓋就干三阳观之则已损其三之一矣就坤三陰观之则分一陰以行于下而其干所损之一阳实为益之主而相与为应损之为益如是皆以陰阳配偶之精而言故系辞传复就天地男女言之致一亦即本传所谓不疑者也

六四【句】损其疾【句】使遄有喜【句】无咎

传损其疾亦可喜也

天下之当损者孰如疾哉今有痿羸者于此忽得补剂以益之则霍然起矣虽疾可药也视无妄之勿药若异而视恒之贞疾已遠故亦可喜即咎之所以无也四柔甚而初九应故有此象

杨氏万里曰六四以柔居四得初九之阳以为应损其疾者也初言遄往四言使遄蓋初之遄实四有以使之也

六五【句】或益之【句】十朋之龟弗克违【句】元吉

传六五元吉自上祐也

干损一阳以益上此损之由名传曰其道上行上盖卦之主也损之所以为益也六五虚中居尊比近相承谦而能受传曰自上祐谓上九也干之一阳上升者正为我助其益也洊至而叠来不一而足也故曰或益之或者众辞也多辞也十朋之龟大龟也弗克违言卜之而从也张子所谓龟弗违言受益之可必信然不疑者是也人事天道交相应也得乾元之助本然至善者也故元吉

杨氏时曰柔得尊位虚己而下人则谦受益时乃天道天且不违况于人乎况于神乎宜其益之者至矣故曰或益之十朋之龟弗克违元吉

郭氏雍曰益之至岂独人事而已虽元龟之灵弗能违此其所以元吉也洪范曰汝则从龟从筮从卿士从庶民从是之谓大同六五之元吉犹洪范之大同也

上九【句】弗损【句】益之【句】无咎【句】贞吉【句】利有攸往【句】得臣无家

传弗损益之大得志也

损下益上其道大行上固损以为益者也故明揭之曰损而弗损也直益之矣此卦之主爻故无咎贞吉与卦辞同无咎云者损而弗损无所为咎也贞吉云者损而为益正所以为吉也利有攸往道上行也得臣无家益之大者贞吉之至也以阳助阴损有余以补不足成艮虚而有光统众阴以效顺故传曰大得志大谓阳

王氏肃曰处损之极损极则益故曰弗损益之得臣则万方一轨故无家也

益【句】利有攸往【句】利涉大川

传益损上益下民説无疆自上下下其道大光利有攸往中正有庆利涉大川木道乃行益动而巽日进无疆天施地生其益无方凡益之道与时偕行大象风雷益君子以见善则迁有过则改系辞包牺氏殁神农氏作斲木为耜揉木为耒耒耨之利以教天下盖取诸益益德之裕也益长裕而不设益以兴利序卦损而不已必益故受之以益

三阳三陰损之覆推艮刚下为震兌柔上为巽阳与陰交阳益陰也而防震又自相对待阳与陰配亦阳益阴也益之所以名也阳君陰民损上益下象即事也上之损而实以益下二五中正为益之主无少屯滯四海防休被润泽而大丰美民之說即道之光也道之光即庆之所以集也何往不利而又言利涉大川者以卦之两质言也防震皆木而虚其中有舟象焉涣与中孚之似也故其辞同震动防入进而无疆舟之利也卦之德也要皆陰阳施生之理时行不息之道也

初九【句】利用为大作【句】元吉无咎

传元吉无咎下不厚事也

作工作也大作如四所谓为依迁国建城郭宫室之事也初自损之上而天下为益之始六四相应民心乐赴灵台之诗曰经始灵台经之营之庶民攻之不日成之经始勿亟庶民子来利用之也传曰下不厚事犹所谓不以为泰者言不惜其力自忘其劳也此本然至善之事何过之有故无咎

六二【句】或益之【句】十朋之龟弗克违【句】永贞吉【句】王用享于帝吉

传或益之自外来也

本爻即损之五而六二中正九五正应受五之益志同道合益之最盛者其曰或者不一而足之词此事之必然无疑者也又曰永贞者二得坤贞亦属臣道必如是而后吉以此享帝天亦降之福其益更不可胜言也传曰自外来谓五也

郭氏雍曰或益之人益之也十朋之龟弗克违鬼神益之也王用享于帝言天益之也天且弗违况于人与鬼神乎

六三【句】益之【句】用凶事【句】无咎【句】有孚【句】中行告公【句】用圭【句】王肃本圭字上有恒字谬】

传益用凶事固有之也

六三受益之位也故曰益之然危地也震极也故其用为凶事如水火眚眚之类及患难非常

之事六三虚而能受上九应之不失其为益故无咎然曰凶事则国之大事矣未信而动可乎陰阳相含有中孚之象焉防在前也如是可以行矣中行行人之官也告公告行于公也用圭行人之币也皆用凶事之所有事

朱子语类益之用凶事犹书言用降我凶德嘉绩于朕邦蔡氏清曰当益之时概当得益而居下之上乃危地也故为益之以凶事之象虽凶事亦益之也所谓苦其心志行拂乱其所为动心忍性曾益所不能也

六四【句】中行告公【句】从【句】利用为依迁国

传告公从以益志也

中行告公因上文而言从者防初近五又有初九之应也利用为依迁国因初九之应利用为大作而言六四承五志在益下念切民依迁国大事询谋僉同此其所以利也程传曰自古国邑民不安其居则迁迁者顺下而动也

九五【句】有孚惠心【句】勿问【句】元吉【句】有孚【句】惠我德传有孚惠心勿问之矣惠我德大得志也

五阳刚得中居尊益下之主六二以中正弗违者应之陰阳相得孚甚矣惠者益之实心者惠之本孚惠心惠由于其心也勿问无计功谋利之见益道之大善也惠我德由我出之人皆利之也有孚惠者其心自勿问而元吉然有孚惠如是人亦德我自然之应也

吕氏祖谦曰人君但诚心惠民不须问民之感如此然后元吉民皆交孚而惠君之德也苟惠民而先问民之感不感是计功谋利非诚心惠民者也安能使民之乐应乎

上九【句】莫益之【句】或击之【句】立心勿恒【句】凶

传莫益之偏辞也或击之自外来也繫辞子曰君子安其身而后动易其心而后语定其交而后求君子修此三者故全也危以动则民不与也惧以语则民不应也无交而求则民不与也莫之与则伤之者至矣易曰莫益之或击之立心勿恒凶

以阳刚而居益之极极则益尽而不可复益矣不但莫益之也且或将击之矣所以然者益之

为道日进无疆与时偕行而上九器盈不可复益已失其道是其心之不恒取败之道也故凶

夬【句】扬于王庭【句】孚号有厉【句】告自邑【句】不利即戎【句】利有攸往

传夬决也刚决柔也健而説决而和扬于王庭柔乘五刚也孚号有厉其危乃光也告自邑不利即戎所尚乃穷也利有攸往刚长乃终也大象泽上于天夬君子以施禄及下居德则忌繫辞上古结绳而治后世圣人易之以书契百官以治万民以察盖取诸夬序卦益而不已必决故受之以夬夬者决也杂卦夬决也刚决柔也君子道长小人道消也

五阳一陰与姤覆推当刚长之时而一柔掩于其上势在必决者也故名夬上切近五而乘之以柔声其罪而去之可也故曰扬于王庭五刚相连是众孚而羣号也亦共危之也而相示以为不可忽孚号之心也故传曰其危乃光是以先治其内而后可以攘外邑近邑也告谋议周详训饬慎密也陰敢自肆而骤以武勇胜之彼将大逞其技以为乱所伤者必多矣故不利即戎而惟是羣阳以渐而进则众正满朝陰邪自消矣卦之为德内健外説即为去恶之道也先儒孚号断句有厉又句是孚号而有厉矣非也有厉即孚号之心也传所谓其危乃光也

胡氏炳文曰以五阳去一陰而彖为警戒危惧之辞不一蓋必扬于王庭使小人之罪明以至诚呼号其众使君子之类合不可以小人之衰而遂其肆也有危道焉不可以君子之盛而事威武也有自治之道焉复利往往而为临为泰为夬也夬利往往而为干也蓋陰之势虽防蔓或可滋穷而为敌君子固无时不戒惧尤不可于小人道衰之时忘戒惧也

初九【句】壮于前趾【句】往不胜【句】为咎【趾荀氏作止】

传不胜而往咎也

当夬之初任壮而动非孚号有厉之心也前趾谓初体刚而动故壮壮于前趾则竟往矣往必不胜不胜则小人得志而君子之势失其过不可补矣故为咎苏氏轼曰大壮之长则为夬故夬之初九与大壮之初九无异

朱子语类曰壮于前趾与大壮初爻同此卦大率似大壮只争一画

九二【句】惕【句】号【句】莫夜有戎勿恤【惕荀爽翟元俱作惕】

传有戎勿恤得中道也

惕内敬号外诚彖所谓孚号有厉者也九二刚而得中央之善道故与彖辞同莫夜有戎陰警也恤忧也勿忧素备无虞也此则彖所谓其危乃光者矣张子曰警惧申号能孚号而有厉也以必胜之刚决至危之柔能自危厉虽有戎何恤

九三【句】壮于頄【句】有凶【句】君子夬夬【句】独行遇雨若濡有愠【句】无咎【頄郑元作防云夹面也蜀才作瞽字声之误明张氏晋王本作尻后人谬改】传君子夬夬终无咎也

九三当刚胜之时居偏危之地恐其过也而上六正应陰阳相合疑于污也故分别言之以尽其情以善其道頄音逵顙也壮于頄犹言发怒见于词色者也众刚同欲决陰而上六正应反若引以为援能无怒乎怒则过矣非决而和之道凶也君子处此惟有夬之又夬不为六移应与之之间虽独有因緣而当之若浼独行遇雨而身已若濡但愠于心而不遽形于色则孚号有厉夬而和者即在是吾志已定小人终去可补过矣故无咎王允之于董卓温峤之于王敦事有类此者

辞之分别爻情本自较然而先儒以为差错胡安定移其文曰壮于頄有凶独行遇雨若濡有愠君子夬夬无咎程子移其文曰壮于頄征凶独行遇雨君子夬夬若濡有愠无咎皆不安盖未尝将壮頄有愠分别本爻应爻而深玩之也

陆氏希声曰当君子之世而应小人故外有沾污之累内有愠恨之心然后获无咎者志有存焉

九四【句】臀无肤【句】其行次且【句】牵羊【句】悔亡【句】闻言不信【次說文及郑本俱作趲一作且马云助语一作趲李鼎祚作趲趲牵子夏传作擊】

传其行次且位不当也闻言不信聪不明也

兑上体之下而居后故为臀变坎则防故无肤次且与趲趲同九四当羣刚决柔之际而刚在兑悦之初怀疑不进悔之道也兑为羊牵制也牵制于兑不变为坎可以亡悔不失为夬而兑变坎为耳为闻言其位不中不正则内无所主故为不信干为言告自邑者也九四虽近而闻之而柔靡居心面从而实背之此行所以次且也利有攸往而不能往也此君子中之小人视九三之夬夬者逖矣当夬之时其何恃哉方氏疑本义让羊使前而随其后则羊乃众君子之象而以谓就兑羊之象言之则羊还是九四是矣至谓羊性善触不至羸角不已圣人教以自

牽其羊抑其很性可以亡悔亦壯頗有凶之意則與傳所謂位不當者不合聞言不信雖分釋而位不當則本爻之大旨也

九五【句】菟陸夬夬【句】中行无咎【陸蜀才作睦誤】

傳中行无咎中未光也

菟陸二草名朱子語類曰菟陸是兩物菟者馬齒菟陸者草陸一名商陸者是也二草繁生以喻小人之滋蔓九五切近上六為夬之主故夬之又夬然懼其過也而九五中正故因其迫而怒之深勿以其細而發之易斯揚于王庭孚号有厉之心行之得中故无咎彖傳曰其危乃光也本爻傳曰中未光謂中之夬夬有輕視上六之志必不過激而後可以无咎也三應六故重夬夬五近六故重中行觀傳發明可見

上六【句】无号【句】终有凶

傳无号之凶终不可长也

夬已盡矣陰至消极可无所用其孚号矣然陰之端倪結于兌體因其柔說而忽之將有破裂而不可收者故凶傳曰终不可长文義甚明猶然其危乃光之意也兌說六柔无号矣凶之道也本义謂小人居窮極之時党類已盡无所呼号终必有凶程傳謂无用号咷畏懼终必有凶蔣氏悌生謂傳義似為小人謀俱未解傳意

姤【句】女壯【句】勿用取女【姤鄭本作遘馮椅云王洙改今文為姤毛西河云雜卦傳石經亦作遘張氏明晉王本作媾義同取陸德明作娶又郭京本无女字俱妄改】

傳姤遇也柔遇剛也勿用取女不可與長也天地相遇品物咸章也剛遇中正天下大行也姤之時義大矣哉大象天下有風姤後以施命誥四方序卦決必有所遇故受之以姤姤者遇也雜卦姤遇也柔遇剛也

一陰五陽夬之覆推不期而會曰遇姤之為遇羣剛之下柔忽然來也柔之初進其几甚防然浸長之勢從此而始是陰為主以此取女未必能貞為其近羣陽而防以入之也防長女亦壯之象幽王之得褒姒高宗之立昭儀明皇之立貴妃歷代女禍皆不謹始之貽不爽之應

冯氏椅曰古文姤作遘遇也亦婚媾也以女遇男为象王洙易改为今文为姤杂卦犹是古文郑本同按今文先于古文改遘误也姤虽今文实则初本

初六【句】系于金柅【句】贞吉【句】有攸往见凶【句】羸豕孚蹢躅【柅子夏传作鏹苍颉篇作欄王肃本作柅蜀才本作尼俱误】

传系于金柅柔道牵也

金柅本义谓所以止车以金为之来氏谓柅者收丝之具金者簠上之孔毛西河谓金柅弱木实如黎而黄未见定义然朱子本程传程传本汉儒旧解义较长仍从之柅以止车而系之则不行可知初六一陰而遇羣阳在方进之时犹可及止也止则不自失其身贞道也故吉不然贪于所遇而有所往则丧其所守女祸滋张必见凶矣如羸豕之初孚而蹢躅跳扰也夫狐媚惑人入宫见疾可丑之态其端已露可不谨哉

九二【句】包有鱼【句】无咎【句】不利賓【包荀爽本作肥明晋王本作庖俱非】传包有鱼义不及賓也

初姤之主质陰下翔鱼象也九二切近相比所居得中足以制初故曰包有鱼包而有之其义專一不可有二是故初与四应则四固賓也而二以比近相遇物有所主故无与于宾若四起而争之则犯义矣其何利哉

李氏开曰剥之贯鱼姤之包有鱼皆能制陰者也胡氏炳文曰包如包苴之包容之于内而制之使不得逸于外也

九三【句】臀无肤【句】其行次且【句】厉【句】无大咎

传其行次且行未牵也

三在下体之上亦臀也姤三即夬四故辞略同而彼以位言此以势言贪初柔之遇而二间之次且欲进至于危厉刚动之故也然刚居下体不牵连于四不应于初终不犯体仍无大咎则又其位之善于夬四者矣

九四【句】包无鱼【句】起凶

传无鱼之凶遠民也

四与初为正应当遇者也而已遇于二矣是初陰本已所当有之物而不为己有则其居于四也仅拥虚位而于正应也亦抱虚名论陰阳之义则如夫之不能有其妇论上下尊卑之分则如君之不能有其民其事已出常情之外其变必在萧牆之内凶虽未见然由此而起矣陰阳之祸非一朝一夕之故也或曰鱼之无非四之罪然四之所以遇此者槩可知也且四终不能忘情于初也欲无凶得乎

九五【句】以杞包【句】含章【句】有陨自天【以子夏传作郭京作似包子夏传作匏俱谬】

传九五含章中正也有陨自天志不舍命也

阳刚居尊得中而正制姤之主又于初陰不比不应其下视之如杞之高而下以包 絕不相与者然而变而为杂有文明之象故曰含章以至尊之位中正之德不迹不殖天德内蕴则制陰之任在己所谓勿用取女者天运可自我回也至姤转为复虽曰天命岂非人事哉传曰志不舍命亦于其中正而知之也

上九【句】姤其角【句】吝【句】无咎

传姤其角上穷吝也

姤者一陰之生也九二而外诸阳之所忌无取乎遇也九三为二所间不相遇也故厉而无咎上九则其去初陰为益遠矣尚何咎哉但感遇者又忌其穷九以刚居上坚不可移物之角象之是终不求遇者亦终无所遇矣人至于无所遇遗世违众行何之乎吝矣

徐氏几曰上九处姤之穷与初无遇虽吝亦无咎陰不必遇也

萃【句】亨【句】王假有庙【句】利见大人【句】亨【句】利贞【句】用大牲吉【句】利有攸往【项氏安世曰卦名下元无亨字独王肅有王弼遂用其說孔子彖辞初不及此字按马郑注虞本俱无此字】

传萃聚也顺以説刚中而应故聚也王假有庙致孝享也利见大人亨聚以正也用大牲吉利有攸往顺天命也观其所聚而天地万物之情可见矣大象泽上于地萃君子以除戎器戒不虞序卦物相遇而后聚故受之以萃萃者聚也杂卦萃聚而升不来也

二阳四陰与升覆推与比相似六十四卦中二阳相连者五小过在互中名义故别至二阳在初二曰临二阳在二三曰升名相近似至二阳在四五曰萃二阳在五上曰观名既相近而观之象曰盥而不荐萃之象曰王假有庙皆以祭起义蓋艮为宗庙兑为巫坤为众为土而阳泄于五上故曰观上有一陰以二阳在坤上而中含故曰萃凡观之盛莫盛于灌将之际萃之防莫防于假庙之日以萃言之坤顺兑説五刚得中有应于下萃之实也王者合万国以享先至顺且説精之所萃昭格诚至坤户兑巫有庙象焉故曰王假有庙九五位尊大人也九四相比羣陰相协而应故利见孝治天下君臣皆会典也礼也故亨且贞大祭必用牢故用大牲又坤为牛亦牲象坤顺应五故利有攸往物之所聚即情之所向天地万物无有二致

赵氏汝腾曰阳居五而五陰从之为比阳居五与四而四陰从之为萃二卦相似然比者众陰始附之初圣人作而万物睹之时也萃者二阳相比羣萃而归之君臣同德万物盛多之时也

何氏楷曰用大牲吉承王假有庙言利有攸往承利见大人言

初六【句】有孚不终【句】乃乱乃萃【句】若号【句】一握为笑【句】勿恤【句】往无咎【握傳氏作渥郑氏亦读屋】

传乃乱乃萃其志乱也

初也而虑其不终以四五皆陰之萃也视比之一阳当五终来有他吉者异矣将萃四乎而五为萃主将萃五乎而四为正应虽孚于四而其志乱矣则甚矣专一之为贵也若专号乎五则一握手而为笑矣勿徒忧恤惟往萃五斯无咎耳如是者所以定志也言此以足乱萃之意玩传可见

钱氏曰萃与比同所异者多九四一阳耳比初无应曰有孚者一于五也萃初与四应曰有孚不终者有二阳焉不终于四也及此时而号以求萃可以破涕为笑同人先号咷而后笑者是也

六二【句】引吉无咎【句】孚乃利用禴【禴蜀才作跃刘瓛作□俱谬】传引吉无咎中未变也

六二中正应五当翦萃之时汲引之吉故无咎其所为萃者二五相孚皆以朴诚无事繁文故利用禴禴祭之薄者是彖所谓利见大人亨利贞也王氏家传曰彖以用大牲为吉而六二以用禴为利何也备物者王者所以随其时有孚者人臣所以通乎上

六三【句】萃如嗟如【句】无攸利【句】往无咎小吝

传往无咎上防也

六三陰柔不中与二阳相承固萃如矣而上与五隔夫萃之主则又嗟如与利见大人者异矣然而上承九四可因以萃五故无咎其无咎之嗟亦小吝耳无咎是本分嗟如小吝是余意玩传可见

吴氏澄曰与二陰萃于下而上无应故嗟叹不得志虽无应而近九四之阳苟能往而上求九四之阳则可无咎

九四【句】大吉无咎

传大吉无咎位不当也

九四不中近五比陰是大臣之近君得众者危地也危事也在此位者非合羣下以奉一尊之大善难当此萃矣传曰不当位非君位也处萃之难地也项氏安世曰无尊位而得众心故必大吉而后可以无咎胡氏炳文曰比卦五陰皆比五之一阳萃四陰皆萃五与四而五曰萃有位以见四之萃非有位也无尊位而得众心非大吉安得无咎

九五【句】萃有位【句】无咎【句】匪孚【句】元永贞【句】悔亡传萃有位志未光也

有位九五也萃所当萃也匪孚九四也各有所萃也贞正也五正其位四不能分也彖所谓亨利贞也萃二阳上一陰而下四陰转若四之萃者多也故传曰未光

来氏知德曰九五当天下之尊为萃之主臣民皆萃可以无咎矣然四分其萃未免匪孚上溺陰私未免有悔故必反己自修俾元善中正之德长永贞固斯悔亡而人孚矣

上六【句】賁咨涕洟无咎【咨虞翻李鼎祚俱作资又曰咨同俱误】

传賁咨涕洟未安上也

上六萃之极不得萃矣四方归附而一人向隅能无泣乎其艱脆不安形为賁咨至于涕洟怨艾之深尚可免咎视比之后夫又稍异矣

升【句】元亨【句】用见大人勿恤【句】南征吉【升郑作升】

传柔以时升防而顺刚中而应是以大亨用见大人勿恤有庆也南征吉志行也大象地中生木升君子以顺德积小以高大序卦聚而上者谓之升故受之以升四陰二阳萃之覆推萃坤下兑上而此则坤上防下六得进而居五众陰因风而上故名升内防而外顺九二得中六五应之攸此合德而上下相须大亨之道也以刚中之德遇虚中之主见且恨晚何恤之有征行也由防而坤皆行南方升象在焉行之而顺志无不得故吉

初六【句】允升【句】大吉

传允升大吉上合志也

允信也柔以时升坤也初六柔爻与坤同体坤之所以升即初之所以升也上与四合即与坤之全体俱合其心甚孚故曰允方升之初志可知矣大吉之道也

来氏知德曰本卦原是坤土上升初与四皆坤故允升

九二【句】孚【句】乃利用禴【句】无咎

传九二之孚有喜也

刚健得中上应六五之主此象所谓刚中而应者相信之深不假外物语曰苟有明信要之以礼涧溪沼沚之毛苹蘩蕰藻之菜筐筥錡 之器潢污行潦之水可以荐于神明可以羞于王公则利用禴之谓矣何咎之有传曰有喜益知其无咎矣禴时享祭之薄者祭薄而诚至也防

为臬上与五孚有升歆之象故以杞言诗曰上帝居歆胡臭亶时毛西河讥禴为薄祭之无理然以东邻杀牛不如西邻之禴祭实受其福观之则禴之为薄祭亦明矣以时享视郊禘故薄也

九三【句】升虚邑

传升虚邑无所疑也

上坤有城邑之象阳实陰虚坤纯陰故曰虚邑九三当上升之际以刚正之才临至顺之境一往莫御传曰无疑亦卦情也

六四【句】王用亨于岐山吉无咎【亨亨通】

传王用亨于岐山顺事也

柔以时升五其主也四近五疑于迫矣而以六居之则在坤体柔顺之初不为躁进有土者祀其所祀而神明享文王三分有二以服事殷祀其封内用此道也顺之至也故传曰顺事

六五【句】贞【句】吉【句】升阶

传贞吉升阶大得志也

六五当升之时居尊位以柔中之德下应九二其升甚大而从容有序象所谓柔以时升者也贞正也即中正而应也吉之道也阶拾级而登顺且易也故曰升阶

熊氏良辅曰以顺而升如歷阶然

上六【句】 升【句】利于不息之贞

传 升在上消不富也

昧也上六陰昧升已极矣而犹不知止故曰 不息之贞止也消退而不敢据也坤变艮则止矣此与豫上正同彼乐极而不知返此进极而不知退故皆曰 彼变离为明故有渝而无咎者此变艮为止故利于不息之贞又与晋上之义通彼当晋极之刚故曰角此当升极之柔故曰 然皆有不已之心可以自治彼刚故维用伐邑此柔故利于不息之贞石氏介曰已在升极是昧于进升之理若能知时消息但自消退不更求进乃利也

困【句】 亨【句】 贞【句】 大人吉【句】 无咎【句】 有言不信

传困刚揜也险以說困而不失其所亨其惟君子乎贞大人吉以刚中也有言不信尚口乃穷也大象泽无水困君子以致命遂志系辞困德之辨也困穷而通困以寡怨序卦升而不已必困故受之以困

三陰三阳与井覆推坎刚而兌柔二五刚而三上柔皆压乎刚而不得舒传曰刚揜而困之名义显矣坎险兌說有可亨之理以九二九五之刚中也贞也大人也吉之道也又言无咎者以当困之时似不免咎矣而刚中贞吉实所以亨困之道故无咎然而兌說于外言语之象柔美无实失所为贞无可亨之道矣故曰尚口乃穷

初六【句】 臀困于株木【句】 入于幽谷【句】 三歲不覿【木陆德明作术谬】

传入于幽谷幽不明也

困而在于初初而又为六是困之最深而陰暗之至不能自振者也株木身犹言椿木如所谓株守者也凡人坐则臀居下臀困于株木则坐困之象也幽谷陰僻之地坎象也坎初六曰入于坎窞是矣三歲不覿困之久而不可见也离为明坎者离之反故传曰不明蓋愚陋之甚所以坐困之深也

九二【句】 困于酒食朱紱方来利用享祀【句】 征凶【句】 无咎【紱郑作輶】

传困于酒食中有庆也

本爻刚而得中与五同德贞也有大人之吉者然身在困中惟安于日用之常且饮且食所谓困而不失其所者至于九五同志则诚而奉之可也贞吉之理也亨矣不然处困之时而急于征行则失所为贞故凶谓有中德而知悔仅可无咎而已困于酒食与征字对贞与不贞之

别也朱紱方来利用享祀九五应而九二从也凶无咎拂九五之刚中而二当补过也

六三【句】困于石【句】据于蒺藜【句】入于其宫不见其妻【句】凶

传据于蒺藜乘刚也入于其宫不见其妻不祥也繫辞易曰困于石据于蒺藜入于其宫不见其妻凶子曰非所困而困焉名必辱非所据而据焉身必危既辱且危死期将至妻其可得见邪

陰极乘刚石也困而不可转也本为撝刚之主据非其地而邪不敌正侧足切肤如负芒刺又终不能自脱至于死而后已凶之甚也困人者之自困如此初六坐困不覲而止六三则妄行而困伤于外者必反其家而刚柔相悖非其妻矣家将安归

九四【句】来徐徐困于金车吝【句】有终【徐徐子夏传作荼荼翟元本同王肃本作余余】

传来徐徐志在下也虽不当位有与也

自内而外曰往自外而内曰来九四以初六为正应陰阳相得志之所在故徐徐而来而体刚不中际困之位乘坎车之上不免于困也故吝然九五刚中亨困之主地分亲切君臣相与以渐而合故有终盖困之所以亨惟刚中为能有之大人之吉九二有焉四亦近之

九五【句】劓刖困于赤紱【句】乃徐有說【句】利用祭祀【劓荀爽王肃陆绩本俱作斲刖荀陆王俱作 京房本作劓郑云劓刖当作倪防无据祭陆作享亦无据】

传劓刖志未得也乃徐有說以中直也利用祭祀受福也

截鼻曰劓去足曰刖上下皆柔撝乎刚者齷齪刑余之人也赤紱贵者之服即九二方来之朱紱谓九五也以刚中之尊而上有上六下有六四为其所撝是以小人而困君子其初必有不遂之志至以中体观之则兑本从容和說而刚中之德诚敬之至足以交于神明而况于人乎九二同德必同志矣此困之所以亨也贞也大人之吉也诚以奉祭祀而实用祭祀之诚以用人也祭天神祀地示尊者之事故属五享人鬼臣下之事故属二

上六【句】困于葛藟【句】于臲臲曰动悔【句】有悔征【句】吉【臲說文作防薛本同臲說文作 薛本作机】

传困于葛藟未当也动悔有悔吉行也

葛纏累之物藟亦葛类上六陰柔揜刚而处困终似之困人者人恒困之而况九五乎况当困之已极乎于此而危促不安曰动辄得悔此固困于葛藟之时之心绪也然当此困之已极而犹不知变计则甘受挠累何能出困惟其有悔心而即决然以行则困极而亨此其时也故吉上六变干健行者也故曰征征则出困矣

九二征凶而此征吉何也曰彼亨困贵贞而此出困尚变也

或曰动悔有悔吉传连而分句不连何也曰动悔连于臲臲有悔连征吉字故另解其意曰行也是省括之句也

井【句】改邑不改井无丧无得往来井井【句】汔至【句】亦未繙井羸其瓶【句】凶【羸蜀才作累】

传防乎水而上水井井养而不穷也改邑不改井乃以刚中也汔至亦未繙井未有功也羸其瓶是以凶也大象木上有水井君子以劳民劝相繫辞井德之地也井居其所而迁井以辨义序卦困于上者必反乎下故受之以井杂卦井通而困相遇也

困之覆推兑反为防而来坎下坎往而居防上是防下入而水上行有井象焉卦之所以名也夫古之耕田而食者皆凿井而饮是以八家为井四井为邑皆养道也然雨公之奉不皆世及邑可改也而乡田同井则仍不改其间之凿井而饮者无所丧也亦无所得蓋有定分矣二五两爻上下反易而刚中不易君子之不失其守似之夫分定者用亦不穷是以往来者皆井其井而资之以不匮由五之井洌至六之井収勿幕有孚是矣则井养之成矣若几至于泉而井亦未可繙则功有不到终至于羸其瓶是失其所养归于自弃又不仅井泥井谷而已凶之道也养之为道岂可苟焉已哉

不从凿井而饮井四为邑观之则井邑之改不改及无得无丧与爻辞之旧井无禽大象之劳民劝相皆悬宕无着先儒亦多忽过

初六【句】井泥不食【句】旧井无禽

传井泥不食下也旧井无禽时舍也

泥污塞也水泉不通也不食不可食也井曷为乎泥也旧井也废弃之地也古者田赋出车搜苗獮狩必获禽马井废则田废故无禽也是田赋所不到故泥也所以然者何也爻在本卦之下不能上行者也

九二【句】井谷【句】射鲋【句】瓮敝漏【射荀作耶讹瓮説文作甕郑作瓦】传井谷射鲋无与也

谷窍也井有谷则出于泥矣然非八家所往来也惟射鲋而已鲋鱼之小者庄子所谓周视辙中有鲋鱼者也今谿壑之间有小鱼往来若织者即射鲋矣其水甚浅虽异于泥然欲汲而不可得也瓮更敝且漏矣欲汲而无其具也九二虽刚中而尚在井下与五之寒泉不应汲引之所不及故传曰无与

九三【句】井渫不食【句】为我心恻【句】可用汲【句】王明【句】并受其福

传井渫不食行恻也求王明受福也

九三承坎离乎谷矣故渫洁可食此而不食则行者惜之上坎下防水木相接之际正汲象也故可用汲国家之汲引人才视此矣上方虚己以接下王之明也下亦实以承上臣之愿也亦社稷之福也九三六四相须之理也

蔡氏清曰为我心恻我指旁人所谓行恻也非指九三自恻也可用汲带连王明并受其福皆恻之之辞也

六四【句】井甃【句】无咎

传井甃无咎修井也

四居三五之间下有渫井上有冽泉无以蓄之则渫者谷且泥矣不能成冽泉之功故修之而不使汨于泥不致泄于谷泉之冽者赖之矣惟无应与故不言汲然不害其为自修之道也故无咎

来氏知德曰六四陰柔得正近九五之君蓋修治其井以瀦蓄九五之寒泉者也占者能修治臣下之职则可以因君而成济物之功斯无咎矣

九五【句】井洌【句】寒泉【句】食

传寒泉之食以中正也

洌清也井之色寒泉泉寒而甘美也井之味食饮也九五阳刚而中正正坎之中满故其色清洌其味甘寒其质则泉也稼穡作甘皆赖乎此此同井者所共食也内养充裕足以济物者也

上六【句】井收勿幕【句】有孚【句】元吉【收苟作甃误勿于宝作罔】

传元吉在上大成也

收取也幕揜蓋也井以上出为功水以流通为利彖曰防乎水而上水井至于上则井成矣收而勿幕取之无禁也彖所谓往来井井也孚信也六比于五实有泉源如期而至犹潮汐之言信潮也彖所谓养而不穷者也如此而后完井之量故辞曰元吉传曰大成

李氏过曰初井泥二井谷皆废井也三井渫则渫初之泥四井甃则甃二之谷既渫且甃井道全矣故五井洌而寒泉上井収而勿幕功始及物而井道大成矣

革【句】已日乃孚【句】元【句】亨【句】利【句】贞【句】悔亡

传革水火相息二女同居其志不相得曰革已日乃孚革而信之文明以說大亨以正革而当其悔乃亡天地革而四时成汤武革命顺乎天而应乎人革之时大矣哉大象泽中有火革君子以治歷明时序卦井道不可以不革故受之以革杂卦革去故也

四阳二陰鼎之覆推睽之同体泽火有相灭之质兑离有异配之志革之所以名也已已然也天下事害不什不变法必见其害之已然然后人信之而不疑十干甲首也庚更也是故蛊方有事则曰先甲三日而后甲三日而传曰终则有始防以申命则曰先庚三日而后庚三日而传曰无初有终此当改革之日如日自甲而已当庚之际故曰已日乃孚而传曰革而信之也数以五而一变至已则革之时矣举当其时离明兑說二五中正而应孚可知矣此大善亨通而利且贞之道也革无不当悔之所以亡也以革之理言则天地四时其大者也以革之事言则汤

武革命其大者也传故特表之

李氏简曰已日者已可革之时也先时而革则人疑而罔孚故已日乃孚 何氏楷曰已日即六二所谓已日也乃孚即九三九四九五所谓有孚也悔亡即九四所谓悔亡也所以云已日者变革天下之事不当轻遽乃能孚信于人乃难辞也下三爻方欲革故而为新故有谨重而不轻革之意上三爻则故者已革而为新矣九四当上下卦之交正改命之时故悔亡独于九四见之即彖卦所谓革而当其悔乃亡也

初九【句】 巩用黄牛之革

传巩用黄牛不可以有为也

革不可以轻试也当其初尚非可革之时坚其所守慎而不发可也黄牛之革物之坚者借象也九之刚正似之离为牛色黄故曰黄牛毛西河谓兽有皮而改去其毛因以名革按此则书称希革毛毳为革字之通义黄牛之革当对虎变豹变看

刘氏牧曰下非可革之位初非可革之时要在固守中顺之道而不敢有革也

龚氏焕曰易言黄牛之革者二遯之六二居中有应欲遯而不可遯者也革之初九在下无应当革而不可革者也

六二【句】 已日乃革之【句】 征吉【句】 无咎

传已日革之行有嘉也

彖曰已日乃孚则已日固当革之矣六二中正有庆文明为体有革之才革之德而主之者五也与为正应又以柔顺当之则不敢自尊固其分也然刚正之主在上乘已日之有孚时乎时乎不可失也由是出而从君拨乱世而反之正有相得益彰之美吉可知矣何咎之有传曰行有嘉征吉之谓也不征则失革之时矣此二五之分也

九三【句】 征凶【句】 贞厉【句】 革言三就【句】 有孚

传革言三就又何之矣

刚而不中居革之介自用自尊非喜事则径情也革太骤而害随之故征凶三危地也实危道也九四九五之所不与也第有应于上兑口相孚革有成言至于三焉因以通五庶几乎无妄尔传曰又何之言不以疾征而致凶也言有孚而已匪征也非已日之孚也先儒谓此亦有孚而可革非也革必四五而后可也观四之有孚改命可见

九四【句】悔亡有孚【句】改命吉

传改命之吉信志也

水火既已相接则革之事行矣命令也如汤武之作誓作诰也九四刚而能下又近乎五当革之际方将创制显庸与天下一变为新不得不革之时也而革之为事出于非常疑有悔矣然以义制事即事以义起是革而当其悔乃亡也故曰悔亡是其革非私也是其命非美言小数也作新斯民天下信之故曰有孚悔亡而有孚然后可以改命也不然非有公天下之志而遽然改命四岂无惭德乎传曰信志从悔亡有孚而知之也以四之能承五也

九五【句】大人虎变【句】未占有孚

传大人虎变其文炳也

九五阳刚中正而居尊位为革命之主中天下定四海礼乐法度焕然一新本义所谓自新新民之极顺天应人之时是也彖曰已日乃革之传曰革而信之五之与二刚柔相应孚之至者可以不言而信也故曰未占有孚见之者曰帝王自有真也闻之者曰天下自此太平矣其亦未占有孚之谓乎

九五得干之一体有利见大人之象而兑为卦体位在西方其宿称虎故不曰龙而曰虎干德健举故曰飞革道武成故曰变虎之变也莫如秋兑正秋也鸟兽毛毳光洁鲜明而虎可知矣传称其文威德寓焉其次于圣作而物睹者乎

上六【句】君子豹变【句】小人革面【句】征凶【句】居贞吉传君子豹变其文蔚也小人革面顺以从君也

上六柔顺在外当革之既成内有刚正之主俯而从之方宣力而効忠亦敷文而演武依日月之光见名声之烂盖辅大人以成其革者故称君子亦勳文治以光其革者故曰豹变豹虎类

也而虎则兽之王也当虎变之时君子固豹变而兴矣其在小人睹作新之化亦相视而喜向之面从者至是且革面矣是天下所归往也革成而复他往则自外于大人之世矣故凶惟居贞得柔顺之正亦从君之道故吉

龚氏焕文曰九三与上六皆曰征凶而有贞厉贞吉之殊者三之征凶戒其不可妄动也上之征凶谓事之已革者不可复变也三当革而未革故守贞则厉上已革而当守故居贞则吉三革道未成上革道已成故也

鼎【句】元吉【句】亨【毛西河曰程传以吉字作美文本义作衍文皆无据而元吴澄本明季本本竟从而删之何其妄也】

传鼎象也以木防火亨飪也圣人亨以享上帝而大亨以养圣贤防而耳目聪明柔进而上行得中而应乎刚是以元亨大象木上有火鼎君子以正位凝命序卦革物者莫若鼎故受之以鼎杂卦鼎取新也

革之覆推革内之离往外六二上行而居五革外之兑来内为防九二之刚与六五应而皆有中德防顺离明两相为用是元善且吉而亨通之理也又水风为井而火风为鼎取象甚类其义亦皆言养也然井养者民而鼎养者贵其用又有大焉者传故以享帝养贤实之并及两体而着其德之实焉

初六【句】鼎颠趾【句】利出否【句】得妾【句】以其子【句】无咎传鼎颠趾未悖也利出否以从贵也

颠倒也趾下也初在鼎下六动为用故曰颠趾鼎自革来初当革故鼎新之始而二为鼎实初虚而就实亦去故取新之象故利出否否宿秽也凡有事于鼎者初必洗鼎亦其事也上离下防皆女而六五位尊初六位卑以六五而视初六则初固妾矣以其子以其能生子也九二者六五之正应而初六承之陰阳相与有生育之理焉妾能生子则母以子贵不害其为阳也故无咎

以其子与利出否对其义亦同出否传曰以从贵也而得妾以其子不复释者亦以其从贵也以初六九二有生新之理也先儒俱谓以其子为应四尚未知谁之为妾谁之为贵也

九二【句】鼎有实【句】我仇【句】有疾不我能即【句】吉

传鼎有实慎所之也我仇有疾终无尤也

阳实陰虚九二居鼎之中则鼎之实矣有能有其实也诗曰防且有是也中也鼎之主也仇匹也谓六五也诗曰公侯好仇又君子好逖传曰逖与仇同则不必其为怨耦也六五者九二之正应是固其匹矣而下乘初六若有嫉妬之象焉而九二得中六五正应不昵于初莫得而疾之故曰不我能即并妻匹嫡之祸所由遠也故吉先儒皆以仇为怨耦故谓初为仇而所谓疾与不能即者皆空泛无着且不知二之守正者何在也传之所谓终无尤者亦不知其何故也胡氏炳文曰鼎诸爻与井相似并以阳刚为泉鼎以阳刚为实井二无应故其功终不上行鼎二有应而能以刚中自守故吉

九三【句】鼎耳革【句】其行塞【句】雉膏不食【句】方雨亏【句】悔【句】终吉

传鼎耳革失其义也

三当木火相接之际鼎革互换之位以九居之过刚失中如鼎之方中而耳忽革又无应与上下不属举莫能胜故其行塞六二离明鼎中之腴也而隔四不遇离为雉六柔为膏故曰雉膏不食夫雉膏之美鼎所自有也而以耳革行塞失之是自有而自失之也悔矣然离明在上而光不到亏也至防变为坎则雨矣坎以承离有水火相济之理鼎之用也始虽有悔而终则吉盖所以救耳革之失也

亏失也传所谓失其义也方雨亏言亏在方雨之际也离不照也防变为坎则亏者满矣言其失之可救也故申断之曰悔终吉先儒以方雨亏悔为句来氏知德以方雨为句亏悔又句俱未协

胡氏炳文曰井鼎九三皆居下而未为时用井三如清洁之泉而不见食鼎三如鼎中有雉膏而不得以为人食然君子能为可食不能使人必食六五鼎耳三与五不相遇如鼎耳方变革而不可举移故其行不通然五文明之主三上承文明之照以刚正自守五终当求之方且如陰阳和而为雨始虽有不遇之悔终当有相遇之吉井三所谓王明并受其福者亦犹是也

六四【句】鼎折足【句】覆公餗【句】其形渥【句】凶【形渥晁氏本作刑剗郑氏本渥亦作剗】

传覆公餗信如何也繫辞子曰德薄而位尊知小而谋大力小而任重鲜不及矣易曰鼎折足覆公餗其形渥凶言不胜其任也

刚而不中三阳重叠一陰居下不能相承折矣鼎实既满势重而力不能任覆矣四近君故曰公餗当尊而败公自顾赧顔故形渥夫餗之覆四之刚重为之也系辞所谓德薄位尊知小谋大力小任重是也本传所谓信如何者即所谓不度德不量力也

胡氏炳文曰初未有鼎实故因颠趾而出否四已有鼎实故折足而覆餗

形渥旧有作刑剗解者释文云剗重刑京房云刑在頄为剗又周礼司烺氏屋诛谓所杀不于市而以适甸师屋读如其刑剗之剗此于爻义无所证而本文其形渥犹诗渥赭渥丹之类正德薄位尊知小谋大力小任重者自愧之状传曰信如何亦形容之辞未尝有刑辟之意朱氏震曰其形渥羞赧之象泽流被面沾濡其体也此为得之

六五【句】鼎黄耳【句】金 【句】利贞

传鼎黄耳中以为实也

黄耳中五之虚也金 贯上之刚也鼎至黄耳而金 则实在其中矣九二曰鼎有实本爻之传曰中以为实意正相因利贞云者贞正也即中也六五柔中故利贞五与二应实其所自有也而必及金 者上九阳刚之助所以成鼎之功不可相离故也非正其能合乎

徐邈曰读局仪礼设局鼎郑元注今文局为 陆德明曰局鼎扛也又公食大夫礼右人抽局士虞礼左人抽局注局即 字西河易注曰仪礼谓之局周礼谓之鼎攷鼎旧注云与局同以木贯鼎从门音同与鼎异正韵亦云鼎与局同鼎与幂幂同各为音义然六书 部有鼎无鼎是局鼎本二物二义而以为一音者误也至局之为 则无异义然局无用金玉者或 即鼎而不必别为鼎欤以鼎之上观之其象亦若鼎然

上九【句】鼎玉 【句】大吉【句】无不利

传玉 在上刚柔节也

鼎之为用主于调和若偏刚偏柔如五味之專一则失其节矣上九与六五相比既刚柔之得宜而九居六上又有刚而从柔之道是鼎之成也享上帝而养圣贤之宝器也以观其上蓋而饰之以玉者然刚柔协而五味齐用之贵行之利故其占曰大吉无不利

程子曰在上为 虽居无位之地实当用也与他卦异井亦然

易氏祓曰鼎与井其用在五而其功皆在上井至上而后为元吉鼎至上而后为大吉皆所以全养人之利者也

易翼宗卷六

湖北巡抚晏斯盛撰

下经

震【句】亨【句】震来【句】 【句】笑言哑哑【句】震惊百里【句】不丧匕鬯
【震归藏作厘 荀爽作愬愬毛西河曰吴澄以震来以下八字系初九爻词竟以已意删去季本四同从之何无忌惮至此】

传震亨震来 恐致福也笑言哑哑后有则也震惊百里惊远而惧迩也出可以守宗庙社稷以为祭主也大象洊雷震君子以恐惧修省説卦雷风相薄雷以动之帝出乎震万物出乎震震东方也动万物者莫疾乎雷震动也震为雷震为足震一索而得男故谓之长男震为雷为龙为 黄为雉为大涂为长子为决躁为苍筤竹为萑苇其于马也为善鸣为馵足为作足为的颡其于稼也为反生其究为健为蕃鲜序卦主器者莫若长子故受之以震震者动也杂卦震起也

以八卦言则干交于坤之初以六十四卦言则于艮为覆推阳动于下故名震阳动则嘉故亨震来两震相重震而又震即大象所为洊雷也 恐惧貌敬也哑哑赤子之初声又读如扚镇定之至一笑一言有常度也百里侯国之地凡雷之动闻于百里声之所至境内皆震也执匕荐鬯主祭者之事即所谓主器也震为长子而初爻刚正故继体出治临事变而守不失也敬以主之德足长人矣

敬也非 也哑哑有则也非放也不丧匕鬯有则之实也不忘所有事也居处恭执事敬其常也不必其震来然临事而惧不疑所行亦并行不悖矣胡氏炳文曰震惊百里以震雷取象不丧匕鬯以长子主器取象

初九【句】震来【句】 【句】后【句】笑言哑哑【句】吉

传震来 恐致福也笑言哑哑后有则也

此爻成卦之主以故全用象辞止加一后字以明之而直断其吉言此即象所谓震来 笑言哑哑者然必敬谨之至而后言笑有则 者主于中而后哑哑者形于外也

六二【句】震来【句】厉【句】亿丧贝跻于九陵【句】勿逐【句】七日得【亿伪古本作噫谬】

传震来历乘刚也

震来震之初来也厉危也阳方震动六二迫而乘之危地也亿多也六五象传训大是也丧贝跻于九陵失其所有至于最远之地也九阳数之极也陵林木丛荟之处震之为也勿逐能自守也以六二之柔顺而中正也敬天之怒无敢驰驱也七日少阳之数刚退而柔安故失者可得也处震之道莫善于敬二虽不如五之无丧有事然亦能自守而有得

六三【句】震苏苏【句】震行【句】无眚

传震苏苏位不当也

六三以柔处下卦之极不中不正故震之一终而遂苏苏然不甚惊惧也与 者异矣震行对震来震往而言此爻震之一终如雷声之已行也凡雷之震既已发声则其势愈盛更当自省其身使无一眚不得苏苏然少释其恐惧也

九四【句】震遂【句】泥

传震遂泥未光也

内震已成则遂矣至九四而阳防于上下羣阴之中则泥而不通是失震之所为亨者

胡氏炳文曰初与四皆震之所以为震者然震之用在下四溺于阴柔之中故震之亨在初而不在四

六五【句】震往来厉【句】亿无丧有事

传震往来厉危行也其事在中大无丧也

往谓内卦来谓九四六五得震之最中往者已然来者同体远鉴近察皆为震地盖无时无处不自厉也然震而得中敬以直内中有所主故不丧其所有事五之所事至大也故曰亿无丧

有事而传释之曰大无丧也彖所谓不丧匕鬯彖传所谓出可以守宗庙社稷为祭主是也

震之往来当在四而四泥矣不若五之光也震之不丧匕鬯当在初也而五则出而守宗庙社稷矣初者震之主爻五者震之正位合初与五观之而彖义始备震来虩虩恐致福即往来厉之心也笑言哑哑后有则即亿无丧有事守宗庙社稷以为祭主之本也虞氏翻曰可以守宗庙社稷为祭主故无丧有事也熊氏良辅曰震往亦厉来亦厉皆以危惧待之故能无丧有事盖不失其所有也此卦辞所谓不丧匕鬯能主器以君天下者与

上六【句】震索索【句】视矍矍【句】征凶【句】震不于其躬【句】于其邻【句】无咎【句】婚媾有言

传震索索中未得也虽凶无咎畏邻戒也

震极矣索索然志气之消沮也故其视矍矍然神貌之闪烁也上六陰柔之至中无所主故也志先乱矣行将何之凶道也然沮丧者固败行而儆戒者可无虞也当震之未及其身方及其邻之时而早图之则修省生于恐惧虽未能致福亦可寡过也故无咎邻比近于身者谓六五六五震往来厉不敢康寧如彼上六当观此而知戒也上六变而成离长男中女有婚媾之象又为噬嗑故有言而连类及之见不可徒震也

赵氏光大曰陰处震极故当震之来志气消沮瞻视傍徨惊惧之甚也以是而行其志先乱凶也所以然者不能图之于早也若未及身而方及邻之时豫为图之则无索索矍矍之咎矣

艮其背【句】不获其身行其庭不见其人【句】无咎

传艮止也时止则止时行则行动静不失其时其道光明艮其止止其所也上下敌应不相与也是以不获其身行其庭不见其人无咎也大象兼山艮君子以思不出其位說卦山泽通气艮以止之成言乎艮艮东北之卦也万物之所成终而所成始也故曰成言乎艮终万物始万物者莫盛乎艮艮止也艮为狗艮为手艮三索而得男故谓之少男艮为山为径路为小石为门阙为果蓏为閤寺为指为狗为鼠为黔喙之属其于木也为坚多节序卦物不可以终动止之故受之以艮艮者止也杂卦艮止也

周子曰艮其背背非见也静则止止非为也为不止矣其义也深乎

以八卦言则干交于坤之三以六十四卦言则与震相覆推阳止于上阳外陰内各止其所而彼此敌应若有所限者然故名艮一阳二陰卦象如人之背艮文如身之反故曰艮其背凡人

见其前不见其后背者人所不见之地也艮其背则身不可得而迹矣身不可得而迹识盖居天下之先矣识居天下之先其行实不处天下之后将迹其行乎当于其庭而行其庭已不见其人矣其行固在众行之先矣是其行也即其止也岂复有人之见哉事物纷纭动矣然各止其所而不乱则亦静也所谓动亦静也此艮之大义也艮为门阙故言庭

玩传艮其背一句是主不获其身行其庭不见其人三句相连中着是以二字更明总是静为之主则动亦静不滞于行斯止之极也道理十分圆相先儒以艮其背行其庭平对者皆失之千里蔡氏清曰天有四时冬不用地有四方北不用人有四体背不用一理也盖体立而后用有以行此理若充得尽即是定之以中正仁义而主静陈氏琛曰背者北也人之一心静之所养有浅深则 之所中有多寡而于静全无得者一步不可行也二說得之

初六【句】艮其趾【句】无咎【句】利永贞【趾荀作止通字】

传艮其趾未失正也

艮取象于身则初即其趾也凡人之行其趾先动六柔得止之正故曰艮其趾艮其趾则不妄行矣故无咎然趾易动者也六柔贞也即正也必永其贞斯不失艮之初意也不然趾不自禁而能为艮乎

六二【句】艮其腓【句】不拯其随【句】其心不快【拯陆作承】

传不拯其随未退听也

上下敌应五虽同德而陰必从阳故六二舍五而比三陰阳有相与之象欲止而不能自主者也凡卦从上者进从下者退比三而不从初故传曰未退听取象于身在限之下趾之上则腓也腓足肚也不动者也然随足而动其必然之势不能止也是违心而动也故不快

咸二曰咸其腓此曰艮其腓象之同也皆艮之下体也三曰咸其股执其随往吝义之同也咸随四而此随三也陰阳之相牵也

九三【句】艮其限【句】列其夤【句】厉薰心【夤郑作 說文作腓荀作肾】传艮其限危薰心也

限上下体之交腰际也夤夹脊骨也薰蒸动也冲也犹言忧心冲冲也止其所而后为艮人之一身上下运动皆在其限则限非可止之所也而九三以刚居之坚确之甚止其所不当止若艮其限者然艮于其限则其间之骨节坚强不可运动又若横列其夤矣危道也身危则心不安故厉薰心此所谓气壹动志者也

杨氏启新曰此爻恶动以为静而反至于动心者盖心之与物本相连属时止而止时行而行则事应于心而心常泰然有意绝物则物终不可绝而心终不可静矣

六四【句】艮其身【句】无咎

传艮其身止诸躬也

限以上身之正体一止则无不止矣然艮之为道艮其背必不获其身也而四之为止仅在其身是能止于有形而未能止于无形也免咎而已守身而安非复艮限列夤之厉亦无艮腓不快之忧

胡氏瑗曰人之体统而言之则谓之一身分而言之则腰足以上谓之身六四出下体之上在上体之下是身之象也夫人患不能自止其身令能止之得其道使四肢不妄动故无咎也

六五【句】艮其辅【句】言有序【句】悔亡【辅虞翻李鼎祚作孚】

传艮其辅以中正也

六五得中中则无不中于理者而于人身若口辅然口容止止非默也言中伦伦序也序则其止也斯所谓止其所之一端矣夫驷不及舌悔也言之无序也诗曰莫扞朕舌扞则艮矣故艮其辅而后无悔也龚氏焕曰艮其辅非不言也言而有序所以为艮也谷氏家杰曰止在言前非出言方思止也然有序为止亦非缄默之谓也

上九【句】敦艮【句】吉

传敦艮之吉以厚终也

敦厚也以阳止阴之谓艮而本爻在重艮之上当艮之终要艮之成止之极也定且静而物不

能摇也是之谓厚艮其背不获其身之究竟也艮背体之神敦艮用之实主静者必自得之

胡氏炳文曰敦临敦复皆取坤土象艮山乃坤土而隆其上者也其厚也弥固故其象为敦其占曰吉艮之在上体者凡八而皆吉

渐【句】女归吉【句】利贞

传渐之进也女归吉也进得位往有功也进以正可以正邦也其位刚得中也止而防动不穷也大象山上有木渐君子以居贤德善俗序卦物不可以终止故受之以渐渐者进也杂卦渐女归待男行也

渐归妹与咸恒似以四卦皆乾坤之子女而刚柔内外有相交之理故取象于夫妇嫁娶之事咸曰取女此曰女归彼少男少女之相感此少男长女之中应也渐辞曰女归下卦曰归妹彼少女长男之相从此少男长女之相订也本卦与归妹覆推故杂卦曰渐女归待男行也归妹女之终也义尤显切渐者礼之始也礼始于谨夫妇女之归最为有渐纳采问名纳吉纳徵请期亲迎六礼备而后成婚是渐莫如女之归也艮止于下而防进于上是止以为进亦渐也渐本进而有序之文女归则渐之义矣吉得其义也利贞爻之中也以归妹覆推则下卦之兑上进为防而九二居于九五位既尊而有功阳刚得中又正而可以正人贞之道也故利贞

初六【句】鸿渐于干【句】小子厉【句】有言【句】无咎

传小子之厉义无咎也

鸿之寘也随阳南北而其行有序卦体阴阳相次乙乙徐徐亦似雁行故爻俱取鸿象婚礼用雁义亦然也干水涯也初六渐之最初柔弱处下而不进若舍磐之安而不有者似危也故无识者疑之是厉也因厉而有言言谄让也此亦小子则然耳然以渐之义揆之则正慎始安身之道故无咎用柔所以不躁而能渐也观晋初之摧如可知同一难进之义矣若升之初六曰众允则以其为卦主也义自不同

六二【句】鸿渐于磐【句】饮食衎衎【句】吉【磐史记汉武纪引作般注云水涯堆也】

传饮食衎衎不素饱也

磐大石也广泽大阿之间有之水鸟栖息之所衍衍从容而不竞也必于磐而后得饮食之衍衍则前乎此者有渐也饮食衍衍以图进则后乎此者有渐也盖鸿之为物秋南春北未尝寧处故饮食衍衍非终安乎此也传曰不素饱其义精矣渐之最中正者也又有应于五也

胡氏炳文曰艮为石则有磐象鸿食则呼众饮食衍衍和鸣也初之小子厉有言危而伤也二饮食衍衍安且乐矣时使之然也

九三【句】鸿渐于陆【句】夫征不复【句】妇孕不育凶利御防【孕荀作乘误】

传夫征不复离羣丑也妇孕不育失其道也利用御防顺相保也

以刚而处危地失所为渐者也陆路也如南陆北陆之陆鸿之为物木落南翔水泮北归此随日之南北陆以为行也即渐也而九三过刚又无应与秋未立而遽南春未立而遽北其去也独行无侣非上九渐陆之义惟一往不返耳九阳爻故称夫将遽进而以防女为妇耶陰阳相比似可以孕矣然少男长女时未至也非夫妇之道不可以生育凶可知矣其刚急之性将何所用哉惟寇之至也御之以健捷则退所谓渐不可长者此则其利也内卦艮象止也于义为顺故可以相保

六四【句】鸿渐于木【句】或得其桷【句】无咎

传或得其桷顺以防也

防为木六四柔而下乘故为桷桷柯也鸿本不木栖而当渐之交叉防之下体适渐于此未可托也然柯尚可容足不至颠坠得柔顺之道不失渐之义故无咎进近九五多惧而以柔处之故安也以陰从阳亦顺事也

房氏乔谓上附于五可也其谓五为桷则不可也九五尊而高非足履之象惟以本爻之柔为平柯而托乎其间以附五斯得之君臣之义夫妇之道也

九五【句】鸿渐于陵【句】妇三歲不孕【句】终莫之胜【句】吉传终莫之胜吉得所愿也

鸿或南陆北陆以为饮食之所耳磐则其所也于陵则已遠矣然九五得中于陆为仪即在其

上无所间也岂至于九三之失道孕而不育哉以妇道言之亦不过三歲不孕而已渐之贞也本卦归妹之反故兼以妇道为象即彖之女归同一意也

上九【句】鸿渐于陆【句】其羽可用为仪【句】吉

传其羽可用为仪吉不可乱也

陆胡氏程氏本皆云当作逵朱子谓以韵读之良是至范谔昌吴澄季本直改作逵皆非也朱氏震来氏知德毛氏奇龄知陆之不可改为逵而朱氏据虞翻以九三为陆谓上所往进也所反亦进也渐至九五极矣是以上反而之三来氏谓九三之中爻水在山上故自干而陆此爻变坎又水在山上故又有鸿渐于陆之象毛氏谓上与三为表里上防极即三止极故复渐于此亦非也陆字汉隋以后竝无讹误隋卢思道孤鸿赋序云大易称鸿渐于陆羽仪盛也是其传已久若以韵证则逵仪不叶顾氏炎武曰古人读仪为俄不与逵为韵足破前误至谓上复渐于三又大失爻理不知陆之为路不必其为逵也不知渐之各异不得以为三也日行南陆则鸿渐而南日行北陆则鸿渐而北三未极而渐陆故离羣而失道上已极而渐陆则羣飞翱翔行列整齐故其羽可用为仪仪也者徐徐然有次第也乙乙然相聯属也传曰不可乱正以其行列言也为异說者当细玩之

归妹【句】征【句】凶【句】无攸利

传归妹天地之大义也天地不交而万物不兴归妹人之终始也說以动所归妹也征凶位不当也无攸利柔乘刚也大象泽上有雷归妹君子以永终知敝序卦进必有所归故受之以归妹杂卦归妹女之终也

归妹渐之覆推与咸恒悖防反为兑为少女妹象也艮反为震为长男而兑女下之归也然女先而男后女說而男以动是女为之主故不曰妹归而曰归妹也妇人谓嫁曰归嫁娶之道男先于女六礼行而后成婚此咸之所以取女吉渐之所以女归吉也今不以渐而归者妹非咸之正失恒之道者其体则陰爻皆外而阳居内其象则女先而男后行之悖理凶可知矣不特此也二刚而三乘之四刚而五乘之是妇将制其夫矣复何所利哉不善如此总之此为渐之反而大遠于咸恒者是故士女之行礼为大失礼者凶必随之

初九【句】归妹以娣【句】跛能履【句】征吉

传归妹以娣以恒也跛能履吉相承也

尔雅女子同出谓后生为娣曲礼世妇侄娣是娣者女弟从嫁者也兑本少女而初又居其下则娣象矣人之四肢下者为足兑体为毁折又变坎为陷为曳是跛也然有阳刚之德而尚可支撑中馈是能履也居下而承上可也虽不及远其分为善以是而行亦吉也女归不待男非礼也亦失时也初为娣则从嫁之媵于礼未失时时可待也卦征凶而爻征吉其分异也

九二【句】眇能视【句】利幽人之贞

传利幽人之贞未变常也

归妹阴阳之相应者惟二与五而以阳承阴近与六三相比正当兑之上缺是眇也然本体刚而得中则目未尽盲也故能视而其为刚中也为阴所掩则幽隐之地矣第不为三所比昵而自守以中是即贞也妇人之常道也则其利矣不然非刚明在中得无变节乎

胡氏一桂曰初二跛眇兑毁折象履卦六三亦兑体故取象同

六三【句】归妹以须【句】反归以娣【须荀爽陆绩作繻误】

传归妹以须未当也

须女之贱者天文织女贵须女贱志曰须女四星贱妾之称六三不中不正居长男少女之间是婢妾之类而居卦下之上是又与妹为同体则娣矣长男在上尚非配也须不当也娣愈不当也取女之吉何有焉彖所谓无攸利者也

九四【句】归妹愆期【句】迟归有时

传愆期之志有待而行也

刚而失中又处可惧之地未成其为归妹也故曰愆期愆期则非归妹之征凶矣彼有取女之吉此有女归之渐故曰迟归有时传称其志者刚而实也

六五【句】帝乙归妹【句】其君之袂【句】不如其娣之袂良【句】月几望【句】吉【几荀作既误】

传帝乙归妹不如其娣之袂良也其位在中以贵行也君即所归之妹也如诸侯妻称小君后世称县君之类对娣媵言此则君矣本爻位尊而柔顺得中下应九二是天子之妹下嫁于诸侯之象贵盛其所自有谦而不居故服饰其所自有俭而不奢也是以娣之袂反觉美焉衣之饰在袂故特举之月与日相对谓之望月受日之光者也六五下应九二正相对也曰几者不自满也此爻得泰之六五故其辞同而于归妹之义则于礼独合何也凡婚礼男家主之而王姬下嫁之礼则女家主之在彖自凶而此爻自吉观防通以行典礼此其显者

上六【句】女承筐无实【句】士刲羊无血【句】无攸利

传上六无实承虚筐也【筐郑作匡古通字】

上六归妹之究竟而本爻陰虚处外且承应皆陰将何所承乎是妇终不成其为妇也不成其为妇则夫无以祀先故刲羊亦无血此彖所谓征凶无攸利者也故以全体观则兑女也震虚筐也震又男也兌之不配则无血之羊也象之所以为辞也

程子曰上六女归之终而无应女归之无终者也妇者夫所以承先祖奉祭祀不能奉祭祀则不可以为妇矣筐篚之实妇职所供也古者房中之俎苴之类后夫人职之诸侯之祭亲割牲卿大夫士皆然割取血以祭礼云血祭盛气也女当承事筐篚而无实无实则无以祭谓不能奉祭祀也夫妇共承宗庙妇不能奉祭祀乃夫不能承祭祀也故刲羊而无血亦无以祭也谓不可以承祭祀也妇不能奉祭祀则当离绝矣是夫妇之无终者也何所往而利哉此传相承而下正得圣传專释承筐无实之旨朱子本义未协

丰【句】亨【句】王假之【句】勿忧【句】宜日中

传丰大也明以动故丰王假之尚大也勿忧宜日中宜照天下也日中则昃月盈则食天地盈虚与时消息而况于人乎况于鬼神乎大象雷电皆至丰君子以折狱致刑序卦得其所归者必大故受之以丰丰者大也杂卦丰多故也

丰旅之覆推离明震动天地功用之大者明而动则百昌时遂百为交作百物俱备嘉之会也故亨假大也传曰尚大言方大也勿忧忧也方丰大之时即为消落之渐能勿忧乎然日中者忧其昃惟常守其中则持盈保泰而丰者不至于嗇矣何也丰多故非明不足以照之物丰则明易蔽也惟中则物不足以蔽之六五由艮内而为外震得中居尊为丰之主与离二同德相

应皆中虚而不自满也明也丰之主故称王应离即宜日中爻辞来章之吉正发此旨

胡氏炳文曰丰之大有亨道焉大则必通也亦有忧道焉大则可忧也不必过于忧如日之中斯可矣泰晋夬家人升皆曰勿恤此曰勿忧皆极盛之时常人所不忧而圣人所深忧其辞曰勿忧深切之辞非谓无忧也

初九【句】遇其配主【句】虽旬无咎【句】往有尚

传虽旬无咎过旬灾也【配郑作妃旬荀作均刘 作钩俱古通字】

彖曰宜日中离日也六二离之主而阴与阳配初九六二一阳一阴故曰配主相比故曰遇旬十日也十日之内犹然日中离明下照故无咎然时不可失也日中几何往则速遇故有尚言尚往也传曰过旬灾见日中之为宜也

先儒俱以四为配主然两阳非配亦非丰主又与宜日中之义不合不知离中为日之主也

来氏知德曰因宜日中爻辞皆以日言文王象丰以一日象之故曰勿忧宜日中周公象丰以十日象之以一月论已一句也正丰之时也

六二【句】丰其蔀【句】日中见斗【句】往得疑疾【句】有孚发若【句】吉【蔀郑元薛仁贵本作菩斗孟喜本作主】

传有孚发若信以发志也

离日也日以虚而明以实而蔽又火日内暗而蔀者日积之数汉书律历志七十六岁为蔀首又蔀日二万七千七百五十九蔀丰则交食日食甚则斗昼见又蔀鄣也丰二离体上有重刚既实而多蔽又质阴而无光故有此象往进也谓比三四蔽之者也故疑孚合也谓应五虚相照也二有中德与五相信去其所蔽则志共见矣故曰发若

蔀鄣也蔽也鄣蔽之至则日中而斗见本爻离中而两刚相比不得骤与六五相应故有疑象疑者以重刚之蔽也先儒俱以上应六五为柔暗之君故疑非也六五本有来章之庆何谓柔暗蔀当作虚活字或以为草名皆别义如郑元薛仁贵本作菩注云小席广雅云 蔀鱼薺也俱与象义无涉且作实字则后所称蔀其家者难通也

九三【句】丰其沛【句】日中见沫【句】折其右肱【句】无咎【沛一作旆子夏传作芾沫汉书及字林子夏传郑元马融本俱作昧肱姚信本作股】

传丰其沛不可大事也折其右肱终不可用也

沛当作旆王弼以为幡幔者是也蓐如步鄣之蔽旆则幄幔之施更切近矣沫斗杓后星最小难见日中见沫如日食之更甚而小星皆见也服防谓日中而昏者是也离体阴阳切近无光故有此象卦例上右下左三为离上爻折半则折其右肱矣居下卦之上当丰大之时任大事者也然日中而昏不明之甚岂所以为丰哉偏暗无为故传曰不可大事盖昏而不明其体已亏何所用之如人之运动惟在右肱而伤折其半终不可以任事也无咎云者言无所归咎也

九四【句】丰其蔀【句】日中见斗【句】遇其夷主【句】吉

传丰其蔀位不当也日中见斗幽不明也遇其夷主吉行也

离为日本爻与日不相对照不能受光故丰蔀见斗与六二同传曰位不当谓阳处偏僻亦不当日故幽而不明但六五柔中为丰之主九四承之则刚柔相遇亦相资也故吉夷正也大也善也诗曰降福孔夷不尽训平也六五居尊故曰夷主六二离为下卦之主故曰配主先儒以初为夷主不知四有近君之义六五有居尊得中之庆也且主而又曰等夷亦不成文义于彖辞宜日中之义亦全无关照又传曰行也是行而遇五也若遇初则反而退矣岂可谓之行

六五【句】来章【句】有庆誉【句】吉

传六五之吉有庆也

此所谓宜日中照天下者也两虚相含离明照耀正丰而得中者无盈昃之虑也六五柔中居尊下有离中文明之德为之应则章之来也方未有已而豫大之庆美盛之誉其所自有此丰之最善而无忧者故吉

上六【句】丰其屋【句】蔀其家【句】闚其户【句】阒其无人【句】三岁不覿【句】凶【丰说文作豐闚姚信本作窺阒孟喜本作室】

传丰其屋天际翔也闚其户阒其无人自藏也

宜日中宜照天下而此则位处丰极在于天上不富天下而仅有其家者也丰其屋丰之极也鄙其家以自蔽也两陰居中幽隐在内故窥其户而阒寂无人蔽之深也三歲不覲蔽之久也去日已遠不明之甚盈且昃也故凶

旅【句】小亨【句】旅贞吉

传旅小亨柔得中乎外而顺乎刚止而丽乎明是以小亨旅贞吉也旅之时义大矣哉大象山上有火旅君子以明慎用刑而不留狱序卦穷大者必失其居故受之以旅杂卦亲寡旅也

旅丰之覆推离外而艮内离柔而艮刚家在外而止之若寄寓然丰内之离为旅之外卦而六五得中惟中故顺而两刚比近彼此相资又艮止离明而柔丽乎其中亨道也是所以亨者柔中为之也阳大陰小故曰小亨以德言之则止者不穷于所往明者不昧于所止皆正道也故曰旅贞吉不然行不知止必穷于行止而不明必失其所是亨虽小而义则大矣故曰道不可须臾离造次顛沛必于是也

胡氏炳文曰在旅而亨亨之小者也然事有小大道无不在大亨固利于贞不可以亨之小而失其贞也正道果可须臾离哉

初六【句】旅琐琐【句】斯【句】其所取灾【斯郭京作防据王本改之者失古文意】
传旅琐琐志穷灾也

琐琐鄙细貌斯贱役其所取灾犹言自辱也本爻陰柔不中处于最下观其行止之鄙细是斯役之为也以此处旅失路谁悲人以为行之穷也而实其志之穷也李斯见鼠而叹以为安可如鼠顾其自处何如而不知其志之早失终如鼠也其所取灾辨之可不早乎

王氏应麟曰旅初六斯其所取灾王辅嗣注云为斯贱之役唐郭京谓斯合作防愚按后汉左雄传职斯禄薄注云斯贱也不必改防

六二【句】旅即次【句】怀其资【句】得童仆【句】贞【九家易李鼎祚本童作僮通字】

传得童仆贞终无尤也

次旅舍之所即就也资与赍同聘礼所谓几月之赍是也旅次所恃者资资之所恃者童仆倘其不贞则挟资而走或耗败不赍旅次其能安乎六二柔顺中正在艮之中则已止矣故为次陰爻为矣利故怀资艮为少男而得其中以临下故为童仆贞虽无六五之誉已逮初六之灾矣九三九四丧童得资均不如者知柔中之善处旅也

九三【句】旅焚其次【句】丧其童仆【句】贞厉

传旅焚其次亦以伤矣以旅与下其义丧也

旅小亨惟柔得之九三刚而不中是不能安于旅者旅以外为家而上逼离火则焚次之象以止下者为童仆而相隔重陰则丧失之义以刚居危当旅之界故虽贞亦厉

丘氏富曰九三爻辞全与二反二即次而三焚二得童仆而三丧二之贞无尤而三之贞则厉者二柔顺得中三过刚不中也过刚岂处旅之道哉

九四【句】旅于处【句】得其资斧我心不快【资子夏传及众家并作齐蓋赍字之讹】

传旅于处未得位也得其资斧心未快也

处诗曰于时处处是也四多惧而以刚乘刚非可处之地也非可处之地而处焉是旅而处者也失其所矣非所以安身也虽上近六五下应初六而得其资斧心终未快身未安故心未安也资财货斧器用六五有美在中资也有资则必有斧

六五【句】射雉一矢亡【句】终以誉命

传终以誉命上逮也

人君无旅而五居尊位亦未可以等常视也火地之晋也曰康侯火山之旅也其诸应得国之亡人乎如公子重耳之在外十九年终反国而受天子之命是也若夫少康之居有仍宣王之依周召光武之在南阳未尝非旅也一举而光旧物亦未尝不与爻辞合也要之艮手离弓射象也离又文明则雉之象矣中虚亡矢之象誉美名命词诰皆文事离之光也六五柔中而居尊位当旅之时有事戎行然一举而可得也一矢亡言亡一矢而获之贾谊称无亡矢遗镞之患言不战也此曰一矢亡则一战而克也终以誉命则以文告终也传曰上逮云者本卦与丰

覆推离本丰之下卦今离为上卦则自二而居五是上及也程传曰射雉谓取则于文明之道而必合如射雉一矢而亡之 无不中则终能致誉命也朱子语类曰亡字如秦无亡矢遗镞之亡不是如伊川之說然程子以亡属雉固觉未合而以亡一矢若因雉而失之亦非文意不知一矢亡言仅需一矢也

上九【句】 鸟焚其巢【句】 旅人先笑后号咷【句】 丧牛于易【句】 凶

传以旅在上其义焚也丧牛于易终莫之闻也

离为火火炎上上九刚 处旅之极又为科上槁故有鸟焚其巢之象笑刚上自以为得意快志也后号咷遇灾而悲也易场通牛离象变震为大涂又变小过故有此象如处牧地而不自保致其所有者而失之凶可知矣前传曰以旅与下此传曰以旅在上义正相对下谓初与则九三之过刚自是不察其情之睽若弃所有而与之者然上即本爻故曰在以上之过高自喜不知其祸之至若适当有此者至丧牛于易则又知其终莫之救亦莫之悔矣

先儒專以丧牛于易为致凶之道上下文义隔絕然此爻旅之极过高自任罹灾而终不知救者也传曰终莫之闻犹言人莫以告告亦不能听也

防【句】 小亨【句】 利有攸往【句】 利见大人

传重防以申命刚防乎中正而志行柔皆顺乎刚是以小亨利有攸往利见大人大象随风防君子以申命行事系辞防德之制也防称而隐防以行权說卦雷风相薄风以散之齐乎防防东南也齐也者言万物之洁齐也桡万物者莫疾乎风防入也防为鸡防为股防一索而得女故谓之长女防为木为风为长女为绳直为工为白为长为高为进退为不果为臭其于人也为寡发为广颡为多白眼为近利市三倍其究为躁卦序卦旅而无所容故受之以防防者入也杂卦见兑

以八卦言则坤交于干之初以六十四卦言则与兑相覆推陰伏入于阳之下故名防以两防相重观之则九二九五刚在防中而五尤得正中正以行令则风流而令行初六六四柔在刚下顺而承之承顺以善下则风从而行遠以柔下刚言是陰之为也阳大陰小故曰小亨以其行之顺而言则一往无阻故曰利有攸往以九五刚中居尊言则大人之位故曰利见大人

张子曰陰在内阳在外故周旋不舍而为风是陰阳相防也而陰为之内于义尤备朱子语类曰防有入之义防为风如风之入物只为防便能入义理之中无细不入此见防之性情

初六【句】进退【句】利武人之贞

传进退志疑也利武人之贞志治也

六陰柔初防下是以进退不决疑贰而趑趄也夫防以申命而命方初下每怀迟疑将格而不行矣惟断以定谋勇以作气如军令然有进无退斯克济也此防初之利也

王氏弼曰处令之初未能服令者也故进退也成令齐邪莫善武人故利武人以整之

九二【句】防在牀下【句】用史巫纷若【句】吉无咎

传纷若之吉得中也

防以申命牀坐而下令之所杜甫诗曰去歲兹辰捧御牀又王建宫词曰柘黄新帕御牀高又如庾亮之据牀谈咏王道之指呼坐是牀固所以坐而言也五出令者也二行令者也初则奉令者也下而最亲又防之所由名初固防也以二视之则在牀下矣令由中出不少迟留或卜吉征凶而付之史或祭祀祓禳而付之巫纷纷若若承之者顺也惟其令之自中出也故吉且无咎非下之进退者可比也

令之善者言之而有与为听纷纷若若听之者众也二能用下也上之防在四虽同在牀下而隔五不为上用故凶

周礼太史读礼协事司巫祝以孝告嘏以慈告又周官史掌卜筮巫掌祓禳卜筮占吉凶祓禳除灾害毛西河曰礼王前巫而后史前后记告纷纷若若注云若多也史绶若若

荀爽谓史以书勲巫以告庙征伐既毕史巫竝用此承武人專以用兵言牵合未当

九三【句】频防【句】吝

传频防之吝志穷也

当上下两防之间故曰频防防为风风之恒也为咎徵防以申命命之烦也为乱政上无应下无与将比四乎又从五而不从三穷矣处频防之地则然吝道也频复者德之亏频防者命之

乱也

毛西河曰三当下防之终而接上防之始以防承防防之频者也夫下防至三而防穷上防至上而防又穷虽三在过防上在不防而其防之穷则一也按此频防甚协其曰过防则非也爻刚亦不防也

六四【句】悔亡【句】田获三品

传田获三品有功也

柔爻本致防主象初之进退而疑者柔之穉也四之悔亡而有功者柔承五也九五本刚正之君而六四为柔正之臣近而相得往必有功防风之动春田之时又为利三倍故所获必多三品一为干豆二为賓客三充君庖备举之言其多也○四似初疑于悔矣然上得九五与初不应则悔固亡之矣是四之善以柔而得五为功也故传專及下句然言有功则悔之亡亦可知矣

郭氏雍曰六四近君志决于进无初六之疑则悔亡矣是以有田获三品之功也六四至柔不应有田猎之功而以此顺乎刚得之由是观之则防之为道岂柔弱畏懦之谓哉

九五【句】贞吉【句】悔亡【句】无不利【句】无初有终【句】先庚三日后庚三日吉

传九五之吉位正中也

五为申命之主以九居五正所谓刚防乎中正而志行者故贞吉九二不应前命之阻也而以九五之刚正者更之则悔亡矣彖所谓大人为防所利见故无不利此当两防之中是申命而非初也故曰无初命至重申则震动恪恭日新又新矣故有终前汉书厯律志曰釁更于庚是更之为言更也言事至此而当更也更则申命于先也又必申命于后也初已往矣凡所以申命者皆为终计也先庚三日后庚三日则为终事计者周矣此所以有终也

程子曰先庚三日后庚三日出命更改之道当如是也甲者事之端也庚者变更之始也十干戊己为中过中则变故谓之庚事之改更当原始要终如先甲后甲之义如是则吉也胡氏炳文曰蛊者事之坏先甲后甲者飭之使复兴起防者事之权先庚后庚者行之使适变通张氏清子曰甲者十干之首事之端也故谓之终则有始庚者十干之过中事之当更者也故谓之无初有终况防九五乃蛊六五之变以造事言之故取诸甲以更事言之故取诸庚易于甲庚

皆曰先后三日者蓋圣人谨其始终之意也按此皆得先庚后庚正义而朱子本义以为先庚三日丁也后庚三日癸也說本郑元而于义未当汉律厯志曰火盛于丁未尝解为丁寧也陈揆于癸未尝專为揆度也至毛西河以先庚三日为丁戊巳后庚三日为辛壬癸谓以庚为主木为金所克则去木之柔而用金之刚甲乙为木防方所属行防令者必去之甚为凿谬大易一书只道陰阳并无纳甲生克消泄之义知洁淨精防之教者必识之

上九【句】防在牀下【句】丧其资斧【句】贞凶

传防在牀下上穷也丧其资斧正乎凶也

外卦之所以为防者四也以上视之亦在牀下然上处卦外无位者也将以四为本卦防入之资乎而五方尊临在中惟命之从上不可得而有也是失其所资之象也故曰丧其资斧其丧也上自致之资斧非其所能有也故正乎凶传意相承而下言丧其资斧正其穷之为也

向来牀俱以为卧榻不知古人坐卧皆牀也礼父母舅姑将衽长者奉席请何乡少者执牀与坐则亦不竟称卧也

兑亨【句】利贞

传兑說也刚中而柔外說以利贞是以顺乎天而应乎人說以先民民忘其劳說以犯难民忘其死說之大民劝矣哉大象丽泽兑君子以朋友讲习說卦山泽通气兑以說之說言乎兑兑正秋也万物之所說也故曰說言乎兑說万物者莫说乎泽兑說也兑为羊兑为口兑三索而得女故谓之少女兑为泽为少女为巫为口舌为毁折为附决其于地也为刚卤为妾为羊序卦入而后說之故受之以兑兑者說也杂卦兑见而防伏也以八卦言则坤交于干之三以六十四卦言则为防之覆推二阳一陰阳内陰外如水之内渚而润外溢如草木百果鸟兽之内坚实而鲜洁外着故于水为泽而于时为秋自爻观之则初二四五刚皆在内三上两爻柔皆在外刚中正者說之实柔外见者說之着说则人情相协事必亨通故直指之曰兑亨也是其說也皆以刚健中正者主之也故利贞传刚中而柔外正以說之实而言惟說故亨是其說本中正之为也故传曰說以利贞明其非驩虞小喜之所为也推之至于顺天应人而使忘劳忘死非中正而能之乎不中正而能为說乎向来以刚中释亨柔外释利贞未知圣传之精即未知彖辞直指兑亨之义亦未审兑說之真也此以全体观說不必破碎分晰也乾道成男坤道成女则一陰二阳俱宜陰为之主矣然自其既成女观之则坤道也而其最初则仍是阳施而陰受蓋效法之谓坤此三女之用所以异三男也故兑防虽陰体而仍以阳为之主也

初九【句】和兑【句】吉

传和兑之吉行未疑也

爻刚无比在兑說之初赤子之性啼笑皆真礼所谓不妄說人者也不妄說人则发皆中节故谓之亦和而不同矣私不得而干利不得而诱故吉本卦二三四五上皆陰阳相比比则昵昵则同而不和不和则疑即在所說之中矣惟初未与物牵行其心之所安虽违众亦不害其为和也故传曰未疑

九二【句】孚兑【句】吉【句】悔亡

传孚兑之吉信志也

二比三孚矣然三方来兑易致非道之說似未免于悔然二刚而居中德足乎已而人信之来兑者亦不得而乱之故吉且悔亡

孚德足以孚之也以我为主非来与引者之务在說人也

六三【句】来兑【句】凶

传来兑之凶位不当也

重兑交接之地以柔居之上下两刚皆有可說一兑方成又来一兑故曰来兑左右逢迎巧言令色何所不至哉妄說人者辱及其身而莫之悟也故凶来兑与频防相似谓居两兑之间致說者来而不已也不中不正谐媚之心有感皆說人情见可欲而动其几亦岂在遠哉

九四【句】商兑未寧【句】介疾【句】有喜

传九四之喜有庆也

九四下比三上承五三陰柔而可說五刚正而当說将說三乎则违五将說五乎则失三两相商而未安也然三本柔邪疾也五则刚中居尊有得君之象喜也而三在下体非我同类五为同体实我尊亲如田之有界不可苟同也惟以三为疾而介不相乱则專于承五而喜起一心

矣情虽可商而分有定属故传亦專释喜

来氏知德曰四与三上下两体犹疆介然故以介言之比乎五者公也故不敢舍公而从私比乎三者私也故不敢割情而就理此其所以商度未寧也商者四介者九

九五【句】孚于剥【句】有厉

传孚于剥位正当也

剥陰剥阳也谓上六而九与之比则孚于剥矣有厉者危之也九五阳刚中正而拟其孚慮其危者当兌之尊位容悦者众而六以兌极相引志在剥阳近而易入势有可危然不至咎凶者刚中正者为之也惟其为刚中正也故其孚也尚悬拟之其厉也亦若为或有之见其实可以自主也彖所谓說以利贞者也履之九五健体皆因其位而象之钱氏一本曰兌五說体与履五健体不同履五健体恐其和之难危在夬兌五說体不觉其說之易危在孚故皆有厉之象

上六【句】引兑

传上六引兑未光也

上六重兌之所由成說之极而不自己引而长之不知所终故曰引兌而传曰未光言其陰柔而暗昧也毛氏璞曰所以为兌者三与上也三为内卦故曰来上为外卦故曰引

来氏知德曰不言吉凶者五已有危厉之戒也

涣【句】亨【句】王假有庙【句】利涉大川【句】利贞

传涣亨刚来而不穷柔得位乎外而上同王假有庙王乃在中也利涉大川乘木有功也大象风行水上涣先王以享于帝立庙說卦剝木为舟剡木为楫舟楫之利以济不通致遠以利天下蓋取诸涣序卦說而后散之故受之以涣涣者离也杂卦涣离也

三阳三陰阳上陰下散而不居坎防而防入水流而风行故名涣其定体则节之覆推也坎来居内则刚来居二仍得其中兌往居外则柔位乎四上同乎五此其所以亨也节苦而涣亨亦其对也王假有庙九五刚中以聚涣也萃之王假有庙九五刚中能致萃也防木坎水以水乘

木舟楫之象故为涉川而二五刚中防行坎上故利惟九五刚正乃克有济也故又利贞

初六【句】用拯【句】马壮吉【拯子夏传作拊】

传初六之吉顺也

当涣之初势犹未败则犹可及止也然稍缓则不及故必马壮乃吉用涣初之用也拯救也马壮九二也坎为亟心之马而九二得中初六相承相比阴阳相济于以收将散之人心资涉川之大利成假庙之肤功不难也传所谓顺言其势也

来氏知德曰初六当涣之初未至离披之甚犹易于拯者也但初六阴柔才不足以济之幸九二刚中有能济之具者初能顺之托以济难而得壮马也○又曰陈平交欢太尉而易吕为刘仁杰潜授五龙而反周为唐皆拯急难而得马壮者也

九二【句】涣【句】奔其机【句】悔亡

传涣奔其机得愿也

机几也周礼五几通作机左传说机而不倚是机即几也易旧注机依据之物宋礼部韵引此爻辞注云承物者是也二则已涣矣然坎自节之外而来此爻正象所谓刚来而不穷者是九来居二坎为劳卦得其所安而初六比近相承有几象焉故曰奔其机奔则疑有悔矣而得其几则劳而得逸危而得安也故悔亡传曰得愿谓刚而得中也

郭氏雍曰九二之刚自外来而得中得去危就安之义故有奔机之象惟得中就安象传所以言不穷也

六三【句】涣其躬【句】无悔

传涣其躬志在外也

涣至于三则已及其身矣而有应于上以阴从阳义也借以济涣宜也忘其身以从上亦不至于自失也阴柔处危有志于时得阳刚为之应则心之所向专一不知有其身矣阴柔悔也应刚故无悔

六四【句】涣其羣【句】元吉【句】涣有丘【句】匪夷所思【丘姚作近误夷荀作弟误】

传涣其羣元吉光大也

此爻即象所谓柔得位而上同者以柔下刚正位也近承九五上同也虚而守正一心奉君其本立矣九五而外旁无比应人臣义无私交公也忠也本然之善也天下之涣皆起于人自为羣涣其羣则无所为涣矣正本清源莫大乎是以视初之拯马壮二之奔其机三之涣其躬者径庭也故元吉夫涣而聚之人所知也至即涣以为聚人所不知也孔安国书序曰丘聚也涣有丘则是涣之中即有聚之道焉莫之致而致不期然而然公忠之感善类将盈庭矣岂平常思虑之所及哉言其用之神也

胡氏瑗曰天下之涣起于众心乖离人自为羣六四上承九五当济涣之任而居阴得正下无私应是大臣秉大公之道使天下之羣尽散则天下之心不至于乖散而兼得以萃聚故得尽善元大之吉也先儒谓此能散小羣以成大羣按此有语病凡羣皆私也党也无小大之分故涣羣乃所以为聚

九五【句】涣汗【句】其大号【句】涣【句】王居无咎

传王居无咎正位也

此象所谓王假有庙利涉大川利贞者也去患如去疾然有寒疾者必汗之有深患者必涣之此其涣之当如汗之也非大声疾呼曷克有济其大号则如汗之涣矣防为风有呼号之象故曰大号凡此皆王之为也九五阳刚中正能正其位足以 号施令取羣邪而涣之乃合九有而奉一尊矣此王之居为无咎也以承先言则曰王假有庙以御众言则曰王居无咎至出纳王命者则六四也故曰柔得位而上同

上九【句】涣其血【句】去【句】逖出【句】无咎

传涣其血逖害也

汗则汗之而已血则针灸也亦去疾之事语曰去疾莫如尽涣血则疾之根可拔也言其象也又变坎为血卦故有此象可舍而去之逖逖也出如出亡之出谓去之外境言逖去也此言其

事当涣之极位处卦外有阳刚变柔之质见人心之离已极而豫逖之祸不及也故无咎此言其占

小畜六四血去惕出谓忧恤去而惕伤可出四字为句此涣其血与涣汗对三字为句各不相蒙本义谓逖当作惕与小畜六四同者误至云涣其血则去涣其逖则出文义亦未安

朱氏震曰逖逖也去逖出一本作惕出然象曰逖害当从逖矣

钱氏一本曰去不复来逖不复近出不复入其于坎血逖而又逖何咎之有

节【句】亨【句】苦节不可贞

传节亨刚柔分而刚得中苦节不可贞其道穷也說以行险当位以节中正以通天地节而四时成节以制度不伤财不害民大象泽上有水节君子以制数度议德行序卦物不可以终离故受之以节杂卦节止也此与涣覆推涣防上坎下故柔得位而上同此坎上兑下坎刚兑柔故刚柔分而刚得中得中谓坎之刚得九五也毛西河引卢氏之說曰此本泰卦分干九三上升坤五分坤六五下处干三是刚柔分而刚得中不知杂卦反覆相推之法更不假此而前后浑合也泽上有水恐其过也故节之卦之取名言当节也唯刚得中故能节能节故亨传说以行险之下皆节之所以亨也节以制度皆法天地四时以为节节即礼也其在性则发而皆中节也礼以嘉天下之会节之大者故亨此可贞之常道也若过其节则苦矣礼盛则离岂常道哉故传曰其道穷言非节之本然也程传不可固守以为常本义不可守以为贞俱未协观初九之不出户庭九二之不出门庭一为无咎一为凶此可知节之为道非拘苦执一之谓矣岂独上九为贞之穷哉

初九【句】不出户庭【句】无咎

传不出户庭知通塞也繫辞不出户庭无咎子曰乱之所生也则言语以为阶君不密则失臣臣不密则失身机事不密则害成是以君子慎密而不出也

止水之流为泽坎塞其下为兑故初九为节之基当节之初时不可出知此而安贫守道无与于世默足以容道固然也初无所苦何咎之有户庭户内之庭不出内藏也密也

王氏申子曰阳刚在下居得其正当节之初知其时未可行故谨言慎行至于不出户外之庭是知节而能止者故无咎

九二【句】不出门庭【句】凶

传不出门庭凶失时极也

门庭门外之庭出而见人之所二已非遗人离世之地而仍不出焉过矣阳刚固守不与五应失时之宜即失节之道与节亨者异矣故凶

钱氏立志曰泽所以钟水也水始至则增其防以潏之初九是也水渐盛则啓其窦以泄之九二是也二与初同道则失其节矣

六三【句】不节若【句】则嗟若【句】无咎

传不节之嗟又谁咎也

节也者中也正也六三偏暗处危即不节也不节而自昧之终无补过之日矣如其嗟若则由侈泰而敦礼数自悔深切修己诚至人终不得而咎之传曰不节之嗟是自嗟其不节也自知之明犹在也如初之知通塞二之失时极皆明不明之辨故嗟若者有补过之道焉

李氏彦章曰临之六三失临之道而既忧之节之六三失节之道而嗟若皆得无咎易以补过为善者也

六四【句】安节【句】亨

传安节之亨承上道也

泽为钟水之区节也六四承九五之中满而流通之下归于泽是安节之象也以其位言之则六居乎四上承九五秉礼奉法所谓安汝止者也上下相与其志大行故亨

九五【句】甘节【句】吉【句】往有尚

传甘节之吉居位中也

坎为水水有源而流通者必甘故美泉曰甘泉无源而涸竭者苦故死水曰苦水是故甘也者美在中也中也者礼也中节也和也九五居中得正为节之主有常不溢斯其所以为甘乎顺天地而协四时其吉可知行而中节即嘉会之合故有尚尚嘉也彖所谓当位以节中正以通者也

朱子语类曰甘便对那苦甘节与礼之用和为贵相似

上六【句】苦节贞【句】凶【句】悔亡

传苦节贞凶其道穷也

居节之极穷无所之苦矣苦节不可贞而贞焉得无凶乎以之处已则固以之处世则逆悖天则而失人情凶之道也即所谓不可贞也传曰道穷犹言行不去也悔亡言无不节之悔而已尚不能无咎也故传止释贞凶先儒以寧俭寧固释悔亡亦未得节字之义文理亦费周折

苦节不可贞故凶至不节之悔则亡之

中孚【句】豚鱼吉【句】利涉大川【句】利贞

传中孚柔在内而刚得中說而防孚乃化邦也豚鱼吉信及豚鱼也利涉大川乘木舟虚也中孚以利贞乃应乎天也大象泽上有风中孚君子以议狱缓死序卦节而信之故受之以中孚杂卦中孚信也

中孚与小过对待相推六三六四两柔在内九二九五两刚得中柔内则虚而无一私之间刚中则实而有至诚之契此中孚之所以名也卵化为孚生生之真也豚鱼江豚也天将风则出拜至信不爽生大泽之中卦体上风下泽故象及之信如豚鱼无所作为出于本然则孚之至矣孚则无有不感者故吉至信自可以涉险而泽上乘木中虚有舟象焉故利涉也然孚之所以吉者惟其中也即正也九二九五鹤鸣子和有孚挛如何所不利苟其不贞重然诺矜期许男女相私盗贼相救孚亦何取焉

豚鱼先儒皆分二物取象坎防惟来氏知德以为江豚取义风泽更觉切合从之

苏氏轼曰中孚信也而谓之中孚者如羽虫之孚有诸中而后能化也内无阳不生故能刚得中然后为中孚也语亦亲切

初九【句】虞【句】吉【句】有他【句】不燕

传初九虞吉志未变也

虞娱通易虞与忧对言安乐也又魏相传云君安虞而民和睦娱义也非虞度之谓故传曰志未变初九当孚之始守已自安则吉然有应于四惧其贰也贰则不安矣故曰有他不燕他谓四也不虑四之必贰者孚初不变之义为重

荀氏爽曰虞安也初应于四宜自安虞无意于四则吉故曰虞吉也有意于四则不安故曰有他不燕也

九二【句】鸣鹤在阴【句】其子和之【句】我有好爵【句】吾与尔靡之【靡埤官作縻陆绩作防京房作𦍋】

传其子和之中心愿也系辞鸣鹤在阴其子和之我有好爵吾与尔靡之子曰君子居其室出其言善则千里之外应之况其迩者乎居其室出其言不善则千里之外违之况其迩者乎言出乎身加乎民行 乎迩见乎远言行君子之枢机枢机之发荣辱之主也言行君子之所以动天地也可不慎乎

鹤当秋而鸣兑正秋也又为口故取象鹤鸣九阳也而居下卦之中故曰在阴其子谓防也防兑之反禽类而九五同德六四含虚彼此相对故和彖曰柔在内而刚得中爻传曰中心愿正谓二五之合也二五实而含三四之虚非和鸣之致乎阴美而利好爵也上下共之靡縻通系而不解共天位食天禄彼此相维我无间五非二谁与共此乎故曰我有尔靡此曰縻五曰牵其理正同

言行应违皆由中出繫辞之义一也兑口出言防风申命亦有象焉

六三【句】得敌【句】或鼓或罢【句】或泣或歌

传或鼓或罢位不当也

孚者惟中而六三处偏危之地将从二乎则已过之将从五乎则又不及有应者上九耳本爻不中不正上九亦然故曰敌阴阳协应故曰得有应于上则中益不孚何者情相牵也又当中

孚之界上下卦交接之地情牵于外若将鼓矣而失其所孚则又或罢失所孚则或泣矣而不正之投则又或歌此中孚之所以不贵应也既无初九虞安之吉而有他不燕则此爻專之

来氏知德曰六三陰柔不正而上九应之此为悦之极彼为信之穷皆相敌矣是以或鼓或罢而作止不定或泣或歌而哀乐无常其象如此占者不能孚信可知矣

六四【句】月几望【句】马匹亡无咎【几京房作近荀爽作既】

传马匹亡絕类上也

陰受阳光四与五近如月之将望五孚之主万邦作孚不可以二而六四比三稍有繫累咎必随之然以陰从阳地位亲切三虽同类不相及也坤牝马故柔爻亦称马同类故称匹亡舍之而从五也如是则孚者專矣故无咎初九有他不燕六四马匹亡无咎知孚之贵專也

九五【句】有孚挛如【句】无咎

传有孚挛如位正当也

九五孚之主也刚健中正与九二同德相与中含二陰臣民之际浑然天合绸缪固结上下一致有若挛然孚之至也彖所谓孚乃化邦者也贞以应天者也然仅曰无咎云者人君以天下之心为心一有不孚则睽且否矣咎可胜言哉缉熙敬止烈假不瑕不闻亦式不谏亦入斯所谓无咎非盛德未易臻此也二曰靡五曰挛卦情可想见矣

来氏知德曰挛如即鹤鸣子和我爵尔靡也靡与挛字皆有固结而不可解之意靡者繫恋也挛者相连也如与九二合成一体包二陰以成中孚故有此象无咎者上下交而德业成也

上九【句】翰音登于天【句】贞凶

传翰音登于天何可长也

高亢不中孚之穷而失实者也以九五之盛德而矫而出之以为不足信以九二之忠摯则疎而遠之以为不足与所应者惟有六三而不中不正未足以为孚也张其文貌纯盗虚声务外不情不为鹤之鸣而为飞鸟之遗音不在陰而于天其势不可久居终究之道也故凶彖曰利

贞而此曰贞凶者彼九五应乎天而此之登于天者出乎天位之外也

胡氏瑗曰翰者鸟羽之高飞也上九在一卦之上居穷极之地是无纯诚之心笃实之道徒务其虚声外饰以矫伪为尚如鸟之飞登于天徒闻其虚声而已苏氏轼曰翰者飞且鸣者也处外而居上非中孚之道飞而求显鸣而求信者也故曰翰音登于天九二在陰而子和上九飞鸣而登天其道盖相反也来氏知德曰礼记鸡曰翰音而此亦曰翰音者以防为鸡也因错小过飞鸟遗之音故九二曰鹤鸣而此曰翰音也鸡信物天将明则鸣有中孚之意防为高天之象又居天位亦登天之象也登升也言鸡之声登闻于天也九二上孚于五在陰而子和上九不下孚于三翰音反登天其道盖相反矣中孚与小过相为对待孚尽则为小过矣翰音登于天借小过彖辞飞鸟遗之音为辞良有以也本义及来氏皆据礼文以翰音为鸡盖取其信也豚鱼也鹤也鸡也皆信物故有所取尔也鸡不于埘而于天必无之事斯所谓信穷而妄者欤

小过【句】亨利贞【句】可小事【句】不可大事【句】飞鸟遗之音【句】不宜上【句】宜下【句】大吉

传小过小者过而亨也过以利贞与时行也柔得中是以小事吉也刚失位而不中是以不可大事也有飞鸟之象焉飞鸟遗之音不宜上宜下大吉上逆而下顺也大象山上有雷小过君子以行过乎恭丧过乎哀用过乎俭繫辞断木为杵掘地为臼臼杵之利万民以济盖取诸小过序卦有其信者必行之故受之以小过杂卦小过过也

中孚之对待也二阳四陰阳大陰小陰多于阳故曰小过刚柔偏胜皆过也然过柔尚可以自处故有亨通之道而其亨亦必柔正不然则防懦不可为矣故利贞二五之中即正也以处小事何所不利三四偏邪刚不如柔矣故不可大事阳内连而陰分列若鸟羽然故有飞鸟之象两羽方张其过迅疾故仅有遗音二五皆中而二为尤正故宜下不宜上上谓五下谓二是何也六五之词曰已上也大吉得适中之道又不仅小事之吉已也大事关乎天下国家小事日用常行

王氏弼曰飞鸟遗其音声哀以求处上愈无所适下则得所安愈上则愈穷莫若飞鸟也按此上下之义亦活

初六【句】飞鸟以凶

传飞鸟以凶不可如何也

小过之初尚未过也下也彖曰宜下则当吉矣然过之几浸浸乎动又有应于四不安于下以

陰居初不安于小偏妄之萌往而不返虽欲止之鸟乎止之六爻惟初与上拟以飞鸟与彖同象蓋四陰排列如鸟之翼初上如羽之张故直象之曰飞鸟也以凶云者谓自取也

孔氏颖达曰小过之义上逆下顺而初应在上卦进而之逆同于飞鸟之无所措足故曰飞鸟以凶项氏安世曰初六在艮之下当止而反飞以飞致凶上六居震之极其飞已高则丽于纲罟

龚氏焕曰大过卦辞以栋为象而初上两爻亦以鸟言大过阳过于中而三四又阳之中也小过陰过于外初上又陰之外也

六二【句】过其祖【句】遇其妣【句】不及其君【句】遇其臣【句】无咎

传不及其君臣不可过也

妣祖姑也孙妇祔于祖姑礼也六二柔中越两阳而与六五相应若孙妇之祔祖姑彼此同德故相遇也阳陰之君也越两阳而同五疑若过之然阳不相应而二有中德非相抗也故曰不及五虽尊位然陰坤也臣道也彼此同心而未尝失君臣之大分故曰遇其臣要之六二中正得陰之纯虽处过之时而自守以道故不过也彖所谓贞也下也吉之道也无咎则小过之大吉也

周易观象曰此爻与五两陰相应有妣妇之配无君臣之交故其越四应五是过祖而遇妣也无正应于上而居下位是不及君而自得其臣也窃按小过中孚陰阳之大分本卦以陰之过乎阳故曰小过也阳大陰小阳君陰臣同一二五之应不得谓臣妣有异遇也传曰臣不可过正谓不及其君与过其祖之文稍异耳不与阳应故不及也六五则未尝不同德相遇也

九三【句】弗过【句】防之【句】从【句】或戕之【句】凶

传从或戕之凶如何也

本卦阳少陰多是阳不能过乎陰也三四阳爻故皆曰弗过阳不能过乎陰则陰欲害阳者也本爻虽有应于上正所当防而九三偏危之地未免少智是不能防人者不防则甚且以陰为美矣得无溺而从之乎从之则上且挟其已过之势因戕之矣戕害也覆败死丧皆不防之致凶何可言

来氏知德曰弗过者阳不能过乎陰也两字絕句本卦陰过乎阳故二阳皆称弗过防之者当

备惧防乎其陰也

九四【句】无咎【句】弗过【句】遇之【句】往厉必戒【句】勿用永贞传弗过遇之位不当也往厉必戒终不可长也

九四承五以刚自胜可无咎也阳少于陰亦弗过矣然不中不正近承六五不能不相遇也所处之位则然也其遇之而往也有危道焉陰盛而五为之主四又多惧故也不可不戒所戒者永长而固守也小过之时为之也象之利贞为六二言爻之勿用永贞为九四言也

六五【句】密云不雨【句】自我西郊【句】公弋【句】取彼在穴传密云不雨已上也

陰阳和而后雨泽降小畜陰畜阳一陰主之小过陰胜阳六五主之故本卦爻辞与小畜象辞同一不雨自西之象陰盛为云云升则不雨震动而艮止亦不雨也震变兑为泽又西方也六五陰过乎阳而居尊其事已大其势已上六二不相与也其将何所取哉深求于上其类穷矣所取甚防非公狩所有事也已上之势难乎为尊此象所谓不宜上也不可大事也震张弓之象上六木杪巢穴之象又卦象飞鸟飞之穷者则在穴之象先儒谓下应六二为取穴之义未知小过之时六五已上与下不交传止释密云不雨曰已上则知下文皆同义矣非谓上文不雨而下文又别有所取也翼义显然明尽惜乎味之者少也

上六【句】弗遇【句】过之【句】飞鸟离之【句】凶【句】是谓灾 传弗遇过之已亢也

宜下不宜上上则穷矣当其在下犹相遇也上则陰阳离絕竟不遇矣所谓小过者此则竟过之矣鸟飞而不止至于离其羣而不复栖未有不入于网罗者其凶可知象曰飞鸟遗之音此且不闻其音矣以人事言之所谓凶者外灾内 不一端也复之上曰迷复凶有灾 此曰弗遇过之飞鸟离之凶是谓灾 彼阳复之穷此陰过之穷也

既济亨【句】小【句】利贞【句】初吉终乱

传既济亨小者亨也利贞刚柔正而位当也初吉柔得中也终止则乱其道穷也大象水在火上既济君子以思患而豫防之序卦有过物者必济故受之以既济杂卦既济定也

既未济两卦对待相推六十四卦中泰否天地之合既未济泰否之杂坎离之交水火之资天地之用故以终篇实时事往复之几也天地之无终无始者也本卦水上火下其用交故曰既济此如泰然然泰为天地之交既济则水火之交故泰曰吉亨而此曰亨又曰小也既济言亨则已小矣然莫非亨也即思患豫防之义又既济当用柔刚大柔小故曰亨又曰小也九五六二刚外柔内皆得正而当位是其利且贞也既济之初犹未济也内卦离体柔而得中虚已以上交审几而度务此小者之所以亨也故吉既济之终未尝非小而穷陰在上偏暗不中不能永终以持其蔽乱矣上六曰濡首厉传曰何可久此济之所以难为终也

初九【句】曳其轮【句】濡其尾无咎

传曳其轮义无咎也

卦之初多称尾初刚离体不遽进者故有曳轮濡尾之象又坎为舆舆下则轮也轮车之所恃以行者方既济之始初九刚明是时方济而不敢自恃者车之行恃乎轮曳轮则行者止矣濡尾有应于险能止险善补过也故无咎

周易观象曰既济之初可以济而犹未可轻济也初居下当济时有濡尾之象然有刚正之德故能曳其轮而不进则虽濡其尾而无咎矣盖欲进而即止临事而惧者也故无咎

先儒因下小狐濡尾遂以本句亦取狐象上下文义两端未贯传曰曳其轮义无咎也上句是主甚为明显惟周易观象深得翼义

六二【句】妇丧其茀【句】勿逐【句】七日得【茀子夏传作髥荀爽作紱董遇作弗】
传七日得以中道也

六二柔顺至中当既济之时而不苟于济者彖所谓小者之亨初之所以吉也有慎仪守礼时不克违之象爻柔故称妇行必有蔽茀蔽也丧其蔽则仪弗修礼不备勿逐不急索之也不行也有待也五本正应而三隔之四间之不能遽合也至七日则阳数一周而自复仪无弗修礼无弗备斯济之至善者矣传曰得中道以二之德盛也非仅得其所丧之谓茀虞仲翔曰谓鬢髮也王辅嗣亦曰首饰也子夏传亦作髥毛西河据此谓先儒不当解为车茀是不观二之为妇柔中得位贵也其为翟茀亦可知矣不必以蒲藻为类也茀第通

九三【句】高宗伐鬼方【句】三年克之【句】小人勿用

传三年克之惫也

三当既济之半是济之将过者九三刚危之地又离为兵戈故有克敌之象上承六四坎体陰爻本卦水火之交离东坎西鬼方西戎也三年爻数也以三刚伐六四之陰期在必克故至三年三年则师劳力竭财用殫耗矣夫以国家之全势必三年而后克之则济之难可见克伐至于鬼方济之盛亦可见也然其时已将过矣又承坎险小人之象而上六正应柔悦藏奸不可不慎故戒勿用师之上六曰开国承家小人勿用蓋事平之后当定规模非偏长制胜所能为亦非怀安溺志者所能与也其以高宗当之者易之时几也殷道屡兴至武丁之世中兴之后不复再兴正既济将过之时也象以此爻当之而又曰小人勿用者殆与文王同一忧时之心乎西羌传云殷室中衰诸侯皆叛至高宗征西戎三年乃克是其事也

六四【句】繻【句】有衣袽【句】终日戒【繻释文作襦子夏王虞本作□說文作需王弼云繻当作濡】

传终日戒有所疑也

繻之为濡王辅嗣說也蓋舟漏之谓袽败絮塞舟漏之物与帑同徐锴云帑帛臭书盘庚篇云若乘舟汝勿济臭厥载则袽之足备舟漏自古有然矣六四既济坎体故有渐濡之象而以柔居之不敢自恃其济者故既有衣袽以补罅漏至终日戒严而不稍懈弛上有九五之君下有重刚之乘应是不安其所居者也四本多惧此又甚焉故传曰有所疑

古者削帛为繻关门符信也故旧說有以终日戒为关防戒备者毛西河谓不当以汉制解周易良是然汉制近古符信在身而衣败絮不敢出以示人蓋亦疑惧之时为之也存之以见本字之义

张氏清子曰六四出离入坎此济道将革之时也济道将革则罅漏必生四坎体也故取漏舟为戒终日戒者自朝至夕不忘戒备常若坐敝舟而水骤至焉斯可以免覆溺之患

九五【句】东邻杀牛【句】不如西邻之禴祭【句】实受其福【禴汉书作澮】

传东邻杀牛不如西邻之时也实受其福吉大来也九五既济之君盛已极矣然六二为其正应是犹有尚俭之意焉杀牛祭之丰者禴祭之薄者东西彼此之辞言彼之丰不如此之俭蓋郊用太牢在冬而禴祭在夏祭得其时宗庙用享故受福也此亦亨小之意离坎本东西之卦而离有牛象坎得中内实有致诚尚实之象致诚尚实时之大者故祭则受福潘氏士藻曰五以阳刚中正当物久丰盛之时故借东邻祭礼以示警惧夫祭时为大时苟得矣则明德馨而

黍稷可荐明信昭而沼毛可羞是以东邻杀牛不如西邻之禴祭实受其福在于合时不在物丰也东西彼此之词不以二五对言

姚氏舜牧曰人君当既济时享治之盛骄奢易萌而诚敬必不足故圣人借两邻以为训若曰东邻杀牛何其盛也西邻禴祭何其薄也然神无常享享于克诚彼杀牛者反不如禴祭者之实受其福信乎享神者在诚不在物保治者以实不以文此盖教以祈天保命之道

上六【句】濡其首【句】厉

传濡其首厉何可久也

当既济之终柔暗之甚而居坎险之极故有濡首之象厉危也传曰何可久言济极而衰也此象所谓终乱者也

薛氏温其曰濡其尾者有后顾之义濡其首者不虑前也恃以为济遂致陷没没而至首其尾可知歷险而不虞患故曰乱者有其治者也既济终乱其义见矣

朱氏震曰以画卦言之初为始为本上为终为末以成卦言之上为首为前初为尾为后

未济【句】亨【句】小狐汔济【句】濡其尾无攸利【史记引本狐涉水濡其尾】传未济亨柔得中也小狐汔济未出中也濡其尾无攸利不续终也虽不当位刚柔应也大象火在水上未济君子以慎辨物居方序卦物不可穷也故受之以未济终焉杂卦未济男之穷也

与既济覆推亦相对待水火不交故曰未济否之似也然未济有当济之理离往居外则六居五而得中是能审度时势而不失缓急之宜者济之主也所以亨之才也坎来居内则九居二而未出中亦几几乎济矣然险而难恃也故又有濡尾之戒言当慎始斯有终也

汔几也几几乎济也九二之才也而又言濡尾无利者惧其陷于险不终济也坎之中也下二句本戒辞而非九二之实象也传曰小狐汔济未出中也已了九二之事矣而于濡尾无利作一句解之曰不续终也是别有可虑之意故又合通体而结言之曰虽不当位刚柔应也则亨且济之意居多矣先儒俱未全绎传义

胡氏炳文曰天地不交为否否不曰亨否不通也水火不交为未济非不济也未焉尔故曰未济亨

初六【句】濡其尾【句】吝

传濡其尾亦不知极也

未济之初柔邪偏暗又有九四为之应则喜于援上而不安其居故昧焉一往不知其所终极以此言济羞不免矣濡尾犹言失始也濡尾即濡首之渐既济之濡尾无咎而此则吝者才为之也时与变为之也既济之初才甚刚正事方济而能止未济之初则才甚柔邪急于济而犯险此其所以异也

九二【句】曳其轮【句】贞吉

传九二贞吉中以行正也

九阳爻才刚与五相应似勇于济者而二有中德则不敢轻济矣故亦有曳轮之象贞吉者得中即所以为正也故传曰中以行正也

六三【句】未济征凶【句】利涉大川

传未济征凶位不当也

征凶不济也利涉大川则又竟济矣是何也爻当上下卦之间火水不交之地故直提卦名曰此未济者也以柔居危防懦观望不离于险征行固凶然于斯时也未济已半坎难将尽必勇于济而后离者合也下出坎险上应阳刚则未济者济矣此又为三勉也

九四【句】贞【句】吉悔亡【句】震【句】用伐鬼方三年【句】有赏于大国

传贞吉悔亡志行也

九四出险近君有志于济而有济之才当济之任者以刚济柔正也吉之道也多惧之地虽若有悔而刚以济柔实亡悔也是刚岂非未济求济之要哉以高宗之时观之可见矣殷道中衰诸侯不朝人心离散非大加振作其何能济则所以震叠其声灵者先伐而后赏骏厉严肃之

遗犹可睹也故用伐久叛之逖国至于三年之久必克之而后已于是大国之効命者赏锡之典行焉一伐一赏所以为震者至矣此所谓贞吉而悔亡者也传曰志行以济为志即以志为贞也

来氏知德曰未济与既济相综未济九四即既济九三故爻辞同亦如损益相综损之六五即益之六二夬姤相综夬之九四即姤之九三所以爻辞相同

六五【句】贞吉【句】无悔【句】君子之光【句】有孚吉

传君子之光其晖吉也

柔而得中即所以为正亦无所为悔也六五位尊而离明故曰君子之光又虚中而应九二上下相资故有孚以爻之柔而得中言则贞而吉矣以爻之虚而有应言则有孚而吉也未济而适能济其善不胜言也

贞吉悔亡咸大壮及本卦之九四也皆以时义为贞而亡其所悔至此爻连属而言贞吉无悔则中德之盛为之又有异于他爻者矣

上九【句】有孚于饮酒【句】无咎【句】濡其首【句】有孚失是传饮酒濡首亦不知节也

未济之极则将济矣水火交而饮食衎衎所以需时也故无咎时乎时乎不可失也若溺于其中不复求济则失之矣养其身以有为惟知节者能之

丘氏富国曰既言饮酒之无咎复言饮酒濡首之失何也盖饮酒可也耽酒而至于濡首则昔之有孚者今失于是矣

李氏简曰未济之终甫及既济而复以濡首戒之惧以终始其要无咎此之谓易之道也

易翼说

易翼說卷一

湖北巡抚晏斯盛撰

系辞上传【此合下篇史记俱称大传】

天尊地卑乾坤定矣卑高以【郑 作已】陈贵贱位矣动静有常刚柔断矣方以类聚物以羣分吉凶生矣在天成象在地成形变化见矣

推明易之大原法象天地而乾坤为卦爻之宗也天地陰阳之体也乾坤卦也尊卑势也卑高即尊卑动静陰阳之机也方之类物之羣陰阳之际也贵贱者乾坤内尊卑之等刚柔者动静中卦爻七八九六之分吉凶者方物内羣类得失之异莫非乾坤之陰阳也陰阳无所不在在天则有象高者可仰在地则有形卑者可察皆乾坤刚柔之交而变化者也

是故刚柔相摩八卦相荡鼓之以雷霆润【乐记作奋】之以风雨日月运行一寒一暑乾道成男坤道成女

承上文变化而言上文之尊卑贵贱类聚羣分皆乾坤之刚柔故遂即卦爻之刚柔以言之乾坤两卦之刚柔相摩而有六子遂为八卦八卦交相推荡而有六十四卦六十四卦八卦耳八卦刚柔耳雷霆风雨刚柔之交气日月寒暑刚柔之大分其间成男者三震也坎也艮也由刚而来乾道也成女者三巽也离也兑也由柔而来坤道也前言成象成形者刚柔之体两在也亦不测即本文变化之所由成此言成男成女者刚柔之质交感也亦分定即所谓变化之道前以天地明卦爻此即卦爻见天地

干知大【王肃作泰】始坤作成【虞姚俱作化】物

申言乾坤之事干彖曰乾元亨利贞彖传曰大明终始大哉乾元万物资始此干之知所为大始也干之为体刚健高明 廓无际为万象先也坤彖曰坤元亨利牝马之贞彖传曰至哉坤元万物资生乃顺承天坤厚载物德合无疆此坤之能所为成物也坤之为体柔顺安贞凝承有象为万物母也震巽坎离艮兑虽因乾坤而各成男女而干始坤成又未始非一气也

干以易知坤以简能

申言乾坤之蕴天数奇无所先天行健无所阻一元之气流行不滞易也此其知之所以大始地数耦因乎天地势坤顺以承安贞之吉效法不迁简也此其能之所以成物

易则易知简则易从

此言人得乾坤之理易简乾坤之蕴天地之性也得天之易则元良之知无有幽险人所共知

秉彛之知是也故知之易得地之简则贞良之能无有烦苛人所共能懿好之能是也故从之易健顺也刚柔也仁义礼智也人人而知之人人而能之易简尔已来氏知德曰易知易从皆我非人知人从郑氏维岳曰易简原是一理依易之理作之则为简

易知则有亲易从则有功有亲则可久有功则可大可久则贤人之德可大则贤人之业

此言人体乾坤之事深险莫测者虞之所以诈也得干之易而易知天德之元廓然大公人所共见初无物欲之间故有亲烦苛难理者治之所以乱也得坤之简而易从地道之贞翕然大同人所共由终无形势之阻故有功无间于物者必不息于中故久无阻于外者必厚载于内故大久者吾所得于天之理是之谓德大者吾所以成乎身之事是之谓业非有外也天德王道合外内而一之者也圣人也贤人即圣人犹乾坤两卦所称君子

易简而天下之理得矣天下之理得而【马王下俱有易字】成位乎其中矣

结言两者之所以一而人参之也天地之易简本一而人心一易简易兼三才而成六位中庸致中和而成位育者此也

右第一段段各分小节后仿此

言法象本乎天地而人兼体之乃作易之本原而上下传及說卦诸篇之纲领也○通体以乾坤为纲后所谓与天地准与天地相似易之蕴易之门者俱始于此而本义于刚柔相摩节用邵子先天說以谓二相摩而为四四相摩而为八八相荡而十六以至于六十四失章内纲领乾坤之意其鼓之以雷霆节以为在天成象乾道成男节以为在地成形然雷霆风雨日月亦长少男女之卦雷霆风雨不尽天气而寒暑亦无象人物之有息者根诸天不尽地气而乾道又非地形俱有未协来氏知德以首节言伏羲圆图之对待次节言文王圆图及序卦之流行然義文未尝立图而卦之对待者又未始不流行也周易观象分首节言造化不易之体刚柔相摩节言造化交易之情鼓之以雷霆至坤道成女言造化变易之用然上下之文义相承而不易交易变易一气俱到体立用即行无容分别

圣人设卦观象系辞焉而明吉凶【虞本下有悔吝二字】刚柔相推而生变化

设卦谓六十四卦参伍错综反覆往来而排列之象谓卦爻之象系辞谓各卦爻下所系之辞吉凶卦爻所象之事然其所以设且观焉而系之以辞者何蓋由八卦而观则乾坤之刚柔相推而成由六十四卦而观则八卦之刚柔相推而成由六爻而观则皆刚柔之上下相推而成或刚变而化柔或柔变而化刚则事之为吉为凶而系之以辞者不出乎此此易之大凡也

是故吉凶者失得之象也悔吝者忧虞之象也变化者进退之象也刚柔者昼夜之象也【虞作昼夜者刚柔之象也】六爻之动三极之道也

本上文而言吉凶悔吝所系之辞失得忧虞所观之象凡此因象而系辞者不外变化刚柔行于六爻之间也何者象以变化而显以刚柔而立或刚变为柔则柔进而刚退或柔变为刚则刚进而柔退一刚一柔若昼与夜之相代此所为刚柔相推而生变化也是皆因乎动者也一卦之成必有六爻其动而为刚柔之变化者则参三才而两之皆天地人之理存焉故也此申明设卦系辞之大防也

是故君子所居而安者易之序【虞作象】也所乐【虞乐作变】而玩【郑作翫】者爻之辞也

序六十四卦之次序兼卦辞言辞三百八十四爻之辞兼象言居之而安者其序之自然而不可易刚柔相推秩然有定乐而玩之者其辞之微妙而不尽变化进退悠然可思言序则有象有辞言辞则有本爻之象

是故君子居则观其象而玩其辞动则观其变而玩其占是以自天祐之吉无不利【吴澄本无是以下十字】

上文序兼象辞辞兼爻象盖卦辞爻辞皆因乎象也未事时则统观其象而详玩卦爻之辞以穷其理有事时则又观其变化之刚柔深玩所占之辞以履其事由是凶与悔吝省身复理防防之中若或相之故吉而无不利二节俱言君子学易之事

象者言乎象者也爻者言乎变者也吉凶者言乎其失得也悔吝者言乎其小疵也无咎者善补过也

象言一卦之象爻言一爻之变皆易之辞也象变中有得有失有小疵有可补之过故吉凶悔吝无咎辞各有别此下皆申观象玩辞

是故列贵贱者存乎位齐小大者存乎卦辨吉凶者存乎辞忧悔吝者存乎介震无咎者存乎悔

位谓爻六爻之间尊卑上下其位秩然变之所由出也卦者六爻之体全体之中阴小阳大截然不乱象之所以见也此易之自具于爻象者不必有文字也然象变之中得失忧虞之理未易明也惟圣人之辞能辨之悔吝固言其小疵然岂徒言之而已方忧之而谨其几无咎固善其补过然震其过也必先之以悔

是故卦有小大辞有险易辞也者各指其所之

齐小大者存乎卦而象者言乎其象小险大易辞各有当如复泰大有诸卦大而易睽困小过诸卦小而险是也爻辞亦然举卦以该爻爻辞多 明彖义右第二段

此段首二节言圣人作易后五节皆言君子学易之事前后相承本是一意先儒分吉无不利以上象者言乎象者也以下各为一章今合之以便观玩

易与天地准故能弥纶天地【陆德明作下】之道仰以观于天文俯以察于地理是故知幽明之故原始反【郑虞李俱作及】终故知死生之說精气为物游魂为变是故知鬼神之情状

申首段天地乾坤刚柔变化之意准则也弥则充满言无不贯纶者比合言无不总易乾坤之刚柔即天地之陰阳天地之道即下文一陰一阳之谓文理始终精魂幽明死生鬼神皆天地陰阳之往来即乾坤刚柔之进退也天象之文有次可分地形之理有条不紊其间阳极陰生陰极阳生陰幽阳明一以贯之事物得陰阳之理原其方进而为始及其既尽则反而终其死其生非有二致人物之生陰精阳气聚而为质游魂出入变而有常耳目口鼻呼吸寂感造化良能一屈一伸情状可睹易辞中天文地理人物始终气质聚散幽明之故死生之說鬼神之情状无所不该此其所以弥纶天地之道而与之准也初非有外于乾坤刚柔之进退也

与天地相似故不违知周乎万物而道【郑作导】济天下故不过旁行而不流【京房作留】乐【虞作变】天知命故不忧安土敦乎仁故能爱

承上文而言以申首段易知简能之事似肖也不违适与之合也上文所谓与天地准也知周乎万物而道济天下故不过易知也知周万物而道必足以济天下知以啓乎能易之至知之至也干象传所谓首出庶物万国咸宁文言所谓同声相应同气相求水流湿火就燥云从龙风从虎圣人作而万物睹本天亲上本地亲下各从其类者此也旁行而不流简能也旁行而必不流能以神乎知简之至能之尽也坤象传所谓安贞之吉应地无疆文言所谓敬以直内义以方外敬义立而德不孤直方大不习无不利则不疑其所行者此也天者理之本然命者理之流行乐而知之心与理一所知益融何忧之有土者随时所寓仁者因地之施安而敦之行与境洽能之曲尽爱无不周是穷達广狭皆易简之知能也此虽圣人事然皆以易言

范围【马王俱作犯围】天地之化而不过曲成万物而不遗通乎昼夜之道而知故神无方而易无体

承上文准天地似天地而极言之天地本无过也而化有不齐易弥纶之而不违故能协赞化育使之不过万物天地之化也曲成之而不遗所谓范围之而不过也知周道济旁行不流之实也何也以刚柔之进退协陰阳之来往幽明生死鬼神一昼夜也知之故弥纶之而不违是即神之所为运而易之所为变化者也神以陰阳之动静言易以刚柔之变化言无方者妙于不测无体者妙于生生与神为体者易行乎易之中者即神易字应首易字以起下文一陰一阳

一陰一阳之谓道

一陰一阳所谓易也易之在天地者即天地之道也对待则陰阳各一流行则陰阳总一周易观象曰此释前所谓天地之道也幽明死生鬼神一陰一阳而已

继之者善也成之者性也仁者见之谓之仁知者见之谓之知百姓日用而不知故君子之道鲜【郑作𡵚】矣此道之在人天地之所付人得之而为人者也知愚贤不肖莫不有之而或偏或暗亦未尝出乎其外继之者善阳变陰合粹然至精成之者性阳健陰顺五常一理即天命之谓性易知简能仁知备足者也然成性之中理虽一而气质殊仁者见之为仁知者见之为知仅得知能之一端百姓不知不能虽日用之而无得君子之道仁知兼全率性之谓也周易观象曰此释与天地相似之性也

显诸仁藏【郑作臧】诸用鼓万物而不与圣人同忧盛德大业至矣哉富有之谓大业日新之谓盛德

此道之陰阳互根而为易简之知能者也阳之所以为知者内也而能显之为仁陰之所以为能者用也而知蕴之于内一机鼓动万物化生非有心者所能与也虽然不与圣人同忧而德业则圣人之所同也藏用而为盛德显仁而为大业显仁者简能而可大是以富有藏用者易知而可久是以日新仁知互根在天地乾坤者即在圣人者也百姓固日用而不知知者仁者亦不及也故曰至张子曰富有者大而无外日新者久而无穷

生生之谓易

承上文而言一陰一阳之道皆易也前之所谓易无体也陰生阳阳生陰本一气之变化也周易观象谓此释易无体者是也

成【蜀本作盛】象之谓干效【蜀本作効陆德明作爻】法之谓坤极数知来之谓占通变之谓事

生生之理阳先陰后阳气最先而成象健之体也故为干首段所谓干知大始者此也陰质从后而效法顺之形也故为坤首段所谓坤作成物者此也凡阳之数起于一终于九陰之数起于二终于十阳数顺以九为极陰数逆以六为极陰极而阳生则七阳极而陰生则八生生不穷因往知来取其极以为占所占者即变动之爻以爻体事皆所以通其变也此之谓易

陰阳不测之谓神

上文之乾坤往来通变者皆陰阳之生生也易也然一陰一阳则两在不测而神行乎其间矣周易观象谓此释神无方者是也

夫易广矣大矣以言乎遠则不御以言乎迩则静而正以言乎天地之间则备矣

应首易字本义曰不御言无尽静而正言即物而理存备言无所不有周易观象曰弥纶天地故遠不御与天地相似故静而正范围天地之化故于天地之间则备矣

夫干其静也專【陆作夷】其动也直是以大生焉夫坤其静也翕其动也辟是以广生焉

易虽有六十四卦而皆统于乾坤乾坤之各有动静则一阳一陰之道两在不测之神也專直无所私曲易也干之成象翕辟无所作为简也坤之效法本义曰乾坤各有动静于其四德见之静体而动用静别而动交也干一而实故以质言而曰大坤二而虚故以量言而曰广蓋天之形虽包乎地之外而其气常行乎地之中也易之所以广大以此

广大配天地变通配四时陰阳之义配日月易简之善配至德

前言易与天地准与天地相似而易以乾坤为纲乾坤之广大与天地同体乾坤两卦各有动静彼此变通直專翕辟即天地之有四时而一寒一暑也乾坤各爻一刚一柔更相往复即天地之有日月而一昼一夜也以其主宰言之则干以易知坤以简能即天地之至德也孔氏颖達曰初章易为贤人之德简为贤人之业今总云至德者对则德业别散则业由德而来俱为至德也

子曰易其至矣乎夫易圣人所以崇德而广业也知崇礼【礼蜀本作体】卑崇效天卑法地天地设位而易行乎其中矣成性存存道义之门

因前屡言易而重赞之以申明首段易简理得成位乎中之意也易可久而为贤人之德可大而为贤人之业贤人即圣人也圣人于可久之德崇之以易于可大之业广之以简夫干以易知而知极高明故知崇坤以简能而礼极谦约故礼卑干天也干易知而可久则贤人之德以干之易崇德故崇效天坤地也坤简能而可大则贤人之业以坤之简广业故卑法地天尊地卑而乾坤之位定成象成形而刚柔之变化见是天地之位设而易即行乎其中人于其中得天地易简之理以成性而存之又存复乎继善之初仁知浑全则藏用而显诸仁仁显能而约为礼知礼出而由之安则为道知礼用而行之宜则为义内外体用皆易也所以成位乎中道为三极

右第三段

通段申明天地乾坤刚柔变化易简理得成位乎中之意先儒分章离析太多气脉不贯周易观象颇合之而未尽又逐段各成义类未见天地易简前后相承之意故总五章为一节以便观玩

圣人有以见天下之赜【九家作册京房作嘖】而拟诸其形容象其物宜是故谓之象

此因第二段圣人设卦而言象六十四卦之象赜繁也或擬其形或擬其容皆肖其物之所宜

此立象之精也

圣人有以见天下之动而观其防通以行其典【京作算姚作曲】礼系辞焉以断其吉凶是故谓之爻

此因第二段系辞而言爻者六十四卦各爻之动动者阳九陰六所效天下之变防欸防通变通其间协乎当然秩以节文则为典礼辞因之而系以吉凶此系爻之审也

言天下之至 而不可恶【九家作亚】也言天下之至动【郑 作 九家作册俱讹虞翻本作动】而不可乱也

恶犹厌也至赜不可恶是万为一至动不可乱万一各正潘氏士藻曰有至一者存所以不可恶有至常者存所以不可乱周易观象曰不可恶不可乱故可以居安

拟之而后言议【郑作仪】之而后动拟议以成其变化言动天下之至赜至动者爻象无所不该观象玩辞观变玩占则变化成下七爻即其例

鸣鹤在陰其子和之我有好爵吾与尔靡【古文作靡京房作𩇛】之子曰君子居其室出其言善则千里之外应之况其迹者乎居其室出其言不善则千里之外违之况其迹者乎言出乎身加乎民行 乎迹见乎远言行君子之枢机枢机之 荣辱之主也言行君子之所以动天地也可不慎乎

释中孚九二爻辞象传言中心愿以二之实也此又即其意而畅言之言行即上文言动蔡氏渊曰居其室即在陰之义出其言即鸣之义千里之外应之即和之义感应者心也言者心之声行者心之迹言行乃感应之枢机也

同人先号咷而后笑子曰君子之道或出或处或默或语二人同心其利断金同心之言其臭如兰

释同人九五爻辞象传言以中直以五刚与二柔相应也此又即其意而明其心之同周易观象曰心同则无嫌于迹异非物之所能间而其号咷也相闻其笑语也相洽后汉郎顗疏云愿扬干刚援引贤能勤求机衡之寄以获断金之利益亦君臣朋友之意

初六借用白茅无咎子曰苟错诸地而可矣借之用茅何咎之有慎之至也夫茅之为物薄而用可重也慎【古一作顺】斯术【马融本作道】也以往其无所失矣

释大过初六爻辞象传言柔在下以初之柔承刚也此又即其义以明其当大过之初而用柔也周易观象曰欲为大过之事基于敬慎之心故栋重物也而犹患其倾桡茅虽薄物而所以防倾桡者在是是用可重也

劳谦君子有终吉子曰劳而不伐有功而不德【郑作置云当作志按古惠字之误】厚之至也语以其功下人者也德言盛礼言恭谦也者致恭以存其位者也

释谦九三爻辞象传劳谦君子万民服也以谦三阳刚为羣陰所归附而止于下卦之上此又即其意而明其德之盛礼之恭也杨氏万里曰人之谦与傲系其德之厚与薄德厚者无盈色德薄者无卑辞如钟磬焉愈厚者声愈缓薄者反是故有劳有功而不伐不德唯至厚者能之其德愈盛则其礼愈恭矣

亢龙有悔子曰贵而无位高而无民贤人在下位而无辅是以动而有悔也

释干上九爻辞已见文言此重言之者对谦卦而观玩之也孔氏颖达曰上既以谦德保位此明无谦则有悔故引干之上九亢龙有悔证骄亢不谦也

不出户庭无咎子曰乱之所生也则言语以为阶【姚作机】君不密则失臣臣不密则失身凡事不密则害成是以君子慎密而不出也

释节初九爻辞象传言知通塞以刚正居节之初也此又即其意而明其节之最要者吳氏澄曰此爻辞所象慎动之节而夫子以 言之辞释之程子曰在人所节惟言与行节于言则行可知言当在先也

子曰作易者其知盗乎易曰负且乘致寇【徐作戎】至负也者小人之事也乘也者君子之器也小人而乘君子之器盗思夺之矣上慢下暴盗思伐之矣慢藏诲【虞作悔】盗冶【郑及诸家作野太平广记作蛊】容诲淫易曰负且乘致寇至盗之招也

释解六三爻辞象传言负且乘亦可丑也自我致戎又谁咎也此又即其意而明致寇之实也小人而处尊位未有能自固者周易观象曰解小人乃解乱之根本○七爻俱承言动而发明之示人儆议以成变化之大端也前后相贯其义显然吳氏澄竟行删去妄也毛西河谓本文言传而脱误于此亦非也瞿塘易亦多所易置甚属无谓其改鸣鹤在陰于下篇尤无意义总当如旧

右第四段

此申明第二段圣人设卦系辞学者观变玩占之意

大衍之数五十其用四十有九

槩举蓍策之数五十本策总数四十九虚一也求卦陰阳大少之策有此体用

分而为二以象两挂一以象三揲之以四以象四时归奇于扚以象闰五歲再闰故再扚而后

挂【京作卦】

详分挂揲归之法象

天数五地数五五位相得而各有合天数二十有五地数三十【三十石经作卅】凡天地之数五十有五此所以成变化而行鬼神也

释上文衍数天谓奇一三五七九也地谓耦二四六八十也一得五而合六二得五而合七三得五而合八四得五而合九五得五而合十此奇耦之流行者也一得九而合十二得八而合十三得七而合十四得六而合十五得五而合十此奇耦之对待者也阳者天之元始故太阳居一而含九少阳居三而含七陰者地之效法故少陰居二而含八太陰居四而含六四象无五与十藏其体也大衍虚一所以存体而其四十九者则皆四象之实用矣分之挂之揲之归之扚之法拟乎象故莫不得乎天地之实数而老阳变陰老陰变阳一屈一伸于其间故曰成变化而行鬼神鬼神者屈伸之谓也

天地之数五十有五而大衍之数五十何也曰五十有五中除五以存五十之五也详见初津学者因圣人之言而立图一五一十陰阳老少灿然可攷后儒指二图为河洛而改易经文不知旧本次第自秦汉以来未之有改也今悉如旧

毛氏奇龄曰华山陈希夷以此为图不曰大衍数图而曰河图以图衍数者反曰衍数合图并取干凿度大乙九宫法见之后汉书张衡传中者名之曰洛书而经学大晦

干之防【马作莢】二百一十有六坤之防百四十有四凡三百有六十当期【徐作碁】之日

释乾坤六爻所得之防以见皆天五地五阳九陰六之数也老阳数九一爻三十六防六爻二百一十六老陰数六一爻二十四防六爻百四十有四合之总三百六十应天地一期之数少阳数七一爻二十八防六爻一百六十八少陰数八一爻三十二防六爻一百九十二合之亦三百六十独言老阳老陰者举一隅也犹言乾坤以该六十四卦也

二篇之防万有一千五百二十当万物之数也

言六十四卦同此天五地五阳九陰六之数也二篇三百八十四爻陰阳各半合万一千五百二十防少阳少陰合之亦万一千五百二十

是故四营而成易十有八变而成卦

四营谓分二挂一揲四归奇是为一变如是者三乃成一爻初变不五则九二变三变不四则八得五四者三共十三防而过揲则三十六防是为老阳四其九也得九八者三共二十五防

而过揲则二十四防是为老陰四其六也得一五四二九八共二十一而过揲则二十八防是为少阳四其七也得一九八二五四共十七而过揲则三十二是为少陰四其八也一卦六爻则十八变矣此言一卦六爻之所以成也

八卦而小成引而伸【古作言】之触类而长之天下之能事毕矣

此因上文十有八变成卦而伸言之九变已得八卦之一是为小成再九变则又得八卦之一蓋引乾坤震巽坎离艮兑而申之触天地雷风水火山泽之类而长之则六十四卦三百八十四爻四千九十六事之能全备其间总以十有八变得之也

显道神德行是故可与酬酢【国策作讐柞說文作畴醋周礼注酬作训京房酢作醋误】可与祐【荀爽作侑】神矣

蓍防器也而陰阳之道以显陰阳之道天也而人之德行以神四千九十六事之间一往一来应之有余则吾之德行神而天之道显神也人也合而有助

子曰知变化之道者其知神之所为乎

蓍防卦爻皆陰阳老少之变化是之谓道然而两在不测即神之所为知之非有二也惟圣人深知之而极致咏叹结上文以起下辞变象占子曰二字赞辞

易有圣人之道四焉以言者尚其辞以【古文此下三句或无以字】动者尚其变以制器者尚其象以卜筮者尚其占

圣人知变化之道故作为易书而其道有四易之理详于辞而所系之言不虚易之用主乎变而六爻之动不妄易之体具于象而蓍防之器尽其制易之事见乎占而有疑以卜筮赞其决前节观象玩辞观变玩占以君子学易之功言此以圣人用易之事言蓋圣人之情见乎辞而辞因变系变因象生象因占立又有此序

是以君子将有为也将有行也问焉而以言其受命也如响【虞作响】无有遠近幽深遂知来物非天下之至精其孰能与于此

此明辞占之实上文以言者尚其辞以卜筮者尚其占而此则以筮者之言赞卜之命易辞皆为之响应来无不知体物之工也粹而不杂故曰至精

参伍以变错综其数通其变遂成天地之文极其数遂定天下之象非天下之至变其孰能与于此

此明象变之实上文以动者尚其变以制器者尚其象而此之参伍者以陰阳老少之变错综

者以七八九六之数参伍则陰阳之变通而刚柔交错之文成错综则七八九六之数极而天地风雷火山泽之象定动而不居器应无方也故曰至变

易无思也无为也寂然不动感而遂通天下之故非天下之至神其孰能与于此

此总辞变象占而言之所谓变化之道神之所为也至精至变者非有心也寂无思为而有以妙天下之感一几不测故曰至神

夫易圣人之所以极深而研几【蜀本作擘郑 作机】也唯深也故能通天下之志唯几也故能成天下之务唯神也故不疾而速不行而至

此言圣人之体易也无思无为寂然不动则极其深而天下之志皆通至变之体所以立也感而遂通天下之故则研其几而天下之务以成至精之用所以行也寂感一几皆神之至故妙应而莫测

子曰易有圣人之道四焉者此之谓也

至精至变至神不外辞变象占

右第五段

此明蓍防卦爻之变化示人象辞变占之道而当观玩之以申明第二段之意

天一地二天三地四天五地六天七地八天九地十二十字先儒改属前段之首今还旧此下文所谓天地变化圣人效之河出图洛出书圣人则之一奇一偶浑然全体筮法衍之而为大衍即上所谓天数五地数五天地之数五十有五者实指之以起下文蓍卦之本如上段之举衍法以起义也

子曰夫易何为者也夫易【古本一无此二字】开物成【王肃本作闢】务冒天下之道如斯而已者也是故圣人以通天下之志以定天下之业以断天下之疑

易天地奇偶而已冒总也开物者志之通成务者几之研皆一理往来于其间所谓道也天下之志者天地之心天下之业者天地之事天下之疑者天地之几因上言极深研几通志成务以起下筮卦爻辞之意

是故蓍之德圆而神卦之德方以知六爻之义易以贡【京房陆绩虞本作工荀爽本作功】圣人以此洗【石经京房荀爽蜀本俱作先】心退藏于密吉凶与民同患神以知来知以藏【刘瓛作臧】往其孰能与于此哉古之聪明睿知神武而不杀者夫

蓍卦爻义皆此天地之奇耦也原本互为体用圆神方知易贡各就其盛者而言圆神者四十九之数方知者六十四之象易贡者一刚一柔之变寂然不动其体深而通天下之志感而遂通其几动而成天下之务洗心退藏于密极其深也故有以开物而通志吉凶与民同患研其几也故有以成务定业而断天下之疑其神知与蓍卦合知来开物于未然藏往成务于前定聪明睿知知也神武不杀神也作易所以冒天下之道也

是以明于天之道而察于民之故是兴神物以前民用圣人以此斋戒以神明其德夫【一本无夫字】

明天之道者聪明睿知契天地奇耦陰阳刚柔之理察民之故者神武不杀研吉凶同患之用神物即蓍卦前用即开物成务而断疑斋戒以神明其德则洗心藏密

是故阖户谓之坤辟户谓之干一阖一辟谓之变往来不穷谓之通见乃谓之象形乃谓之器制而用之谓之法利用出入民咸用之谓之神

此申言兴神物以前民用皆天地奇耦动静之几也坤地也耦也翕敛者也干天也奇也开舒者也即陰阳诸卦之象然一奇一耦一陰一阳动极复静九而八也静极而动七而六也敛舒互乘也即陰阳卦爻之变此往彼来酬酢不穷即辞义所系民故之通取户喻之以见前民用者无所不在也要而论之则可见者为象有形者为器尽制者为法宜民者为神象谓卦器谓蓍法谓揲蓍求卦利用出入民咸用之之神谓圣人之辞卦蓍擬陰阳之迹辞则直决其所以然知来藏往之神所寓也皆兴神物以前民用之事也

是故易有太极是生两仪两仪生四象四象生八卦八卦定吉凶吉凶生大业

此象器制用之法即前段虚一分二揲四成卦引伸以毕天下之能事者太极即周子所谓无极本不可以象器求而为象器之始故于五十中虚一以象之雨仪天地奇耦之大像四象即四时陰阳奇偶老少之分数八卦六十四卦之本体吉凶卦爻之系辞大业所谓成务也

或曰蓍法不及挂一归奇何也曰挂一归奇非实数也初揲五九每有盈缩也过揲之总则老阳必三十六老陰必二十四少阳必二十八少陰必三十二言揲四而挂归者可知矣或曰此不为画卦之次第何也曰一卦六爻各有四象也

是故法象莫大乎天地变通莫大乎四时县象着明莫大乎日月崇高莫大乎富贵备物制用立成器【荀悦汉纪作立象成器】以为天下利莫大乎圣人探颐【九家作册】索 钩深致遠以定天下之吉凶成天下之亹亹者莫大【陆德明作善】乎蓍

此因上文见象形器而申言之阖户辟户固乾坤之象而天地则乾坤之大象也雨仪也一阖一辟固谓之变往来不穷固谓之通而四时之阖辟往来于天地间者又变通之大者也四象也见乃谓之象而县象着明昼夜阖辟升沈往来又与四时为变通之大者也兴神物以前民

用者有位之圣人也故崇高富贵备物制用立成器为天下利而形乃谓之器则生八卦定吉凶成大业者惟蓍 吳氏慎曰此节赞蓍 之大用而先之以五者又与阖户八句相应

是故天生神物圣人则之天地变化圣人效之天垂象见吉凶圣人象之河出图洛【王肃作雒】出书圣人则之此承上制器利用莫大乎蓍 而言以终段首天地奇偶之数也神物即蓍 蓍衍数 卦象则法而象之也然由蓍体卦由卦有爻由爻有辞效爻也天地奇偶之变辞则卦爻之文也因陰阳奇耦而有吉凶卦者奇耦之体奇耦者卦之用天象日月星辰之数图书奇耦之形即蓍之法而卦之象所谓天之神物而圣人则之也

易有四象所以示也系辞焉所以告也定之以吉凶所以断也

承上文天之象河之图洛之书蓍之数卦之象而言易之以数得象也数七八九六象陰阳老少象示人可观故曰示辞贡人可玩故曰告吉凶者事之象断者辞之用此易之要也下文遂引易赞之

易曰自天祐之吉无不利子曰祐者助也天之所助者顺也人之所助者信也履信思乎顺又【郑 作有】以尚贤也是以自天祐之吉无不利也

上文极言易之利用故引易大有上九言得天之祐而无不利者以赞之犹前段显道神德行可与酬酢祐神之意

子曰书不尽言言不尽意然则圣人之意其不可见乎子曰圣人立象以尽意设卦以尽情伪系辞焉以尽其言变而通之以尽利鼓之舞之以尽神

上文言圣人立象设卦系辞之事详矣此复申明之欲学者深致其观玩也后三节皆 此意意无穷言有尽象则无所不该故立象则足以尽意象立则卦设情伪尽则意尽因象之意而系以辞则亦足以尽言辞因象之变而系皆有鼓舞之神利用出入民咸用之也前节言圣人尚辞尚象尚占此段言学者当观象玩辞观变玩占两段正相对

乾坤其易之緼邪乾坤成列而易立乎其中矣乾坤毁则无以见易易不可见则乾坤或几乎息矣是故形而上者谓之道形而下者谓之器化而裁之谓之变推而行之谓之通举而措之天下之民谓之事业

原象所由立辞所由系与阖户谓之坤节对彼明蓍卦之端此明象辞之本乾坤奇偶之大者象之宗也有乾坤两象则六十四卦三百八十四爻交易变易者皆由此出此见而谓之象者即形乃谓之器也超乎其上则乾坤之理圣人所欲言之意也有形者即乾坤之质圣人所因以立之象也其中化裁之变推行之通举措之事业则圣人所欲尽之言而辞所由系也下文遂详言之

是故夫象圣人有以见天下之 而拟诸其形容象其物宜是故谓之象圣人有以见天下之动而观其防通以行其典礼系辞焉以断其吉凶是故谓之爻极天下之 者存乎卦鼓天下之动者存乎辞

详立象系辞之实天下之 形器之分天下之动变通之迹立之象以极其 系之辞以鼓其动圣人所以尽意尽言而足以尽利尽神者此也

化而裁【古作财】之存乎变推而行之存乎通神而明之存乎其人默而成之不言而信存乎德行

圣人既立象尽意系辞尽言学者观玩即当由辞防象由象防意也变通者意之所在人事之化裁推行悉蕴于中惟能神明其德则意在不言象在形上默成不言犹所谓得意忘言得言忘象德行者心得躬行措诸事业之本

右第六段

此段由奇偶天地之数以及蓍卦象辞之理示人观玩之实也与上段文法相类

六段通为一章

易翼說卷二

湖北巡抚晏斯盛撰

系辞下传

八卦成列象在其中矣因而重之爻在其中矣

乾坤震巽坎离艮兑八卦也天地雷风水火山泽象也六十四卦重也兼三而两六位时成爻也此全经卦象爻象之体段也

刚柔相推变在其中矣系辞焉而命【孟喜作明】之动在其中矣

七九刚六八柔彼此迭乘即陰阳之变系辞所以明变化之理爻变为动而事应之

吉凶悔吝者生乎动者也刚柔者立本者也变通者趣时者也

吉凶悔吝辞也必动而后见所谓系辞而动在其中也刚柔变通之体故曰立本变通刚柔之用故曰趣时所谓刚柔相推而变在其中此全经卦爻之运用

吉凶者贞胜【姚信作称】者也天地之道贞观者也日月之道贞明者也天下之动贞夫一者也

明吉凶悔吝之生乎动而举天地日月以例之见爻象之动卦象之体也不言悔吝省文也贞常也胜如胜负之胜爻变之中非刚胜柔则柔胜刚故吉凶无两可之理以天下之动一理也如天地之垂象日月之着明皆常理也

夫干确【說文作霍】然示人【句】易矣【句】夫坤隤【孟喜作退陆绩姚信作妥】然示人【句】简矣

申天地之贞观不言日月省文也示观也确然者不贰故易隤然者不烦故简此天地之常理也卦象此理则爻象亦此理下文遂总言之

爻也者效此者也象也者像此者也

爻即卦象之爻故兼言之

爻象动乎内吉凶见乎外功业见乎变圣人之情见乎辞

爻动即象动小象亦大象之分见以变为动因动系辞张子曰因爻象之既动明吉凶于未形故曰爻象动乎内吉凶见乎外随爻象之变以通其利故功业见也圣人之情存乎教人而已吳氏澄曰圣人与民同患之情皆于易而着见

天地之大德曰生圣人之大宝【孟喜作保】曰位何以守位曰仁【仁陆德明作人吕氏本亦作人】何以聚人曰财理财正辞禁民为非曰义

承上文圣人之情见乎辞而言以起下生人之道理财正辞禁非之义圣人崇高富贵吉凶与民同患聪明睿知神武而不杀即天地生生之德也审于吉凶贞胜之理使舍非取是而趋吉避凶则义也正所以行其生生之德生生之德即仁中间仁字仍古本作人正与生意贯

古者包牺【包本宓字读作庖古作包牺孟京作伏戏云服戏化也马融作虞羲】氏之王天下也仰则观象于天俯则观【汉书作察】法于地观【汉书作睹】鸟兽之文与地之宜【干凿度引孔子曰观万物之宜王昭素谓与地之宜多作与天地之宜然司马贞史记补引此无天字】近取诸身远取诸物于是始作八卦以通神明之德以类万物之情

自包牺以下皆圣人有生生之德大宝之位而义以生人者象天法地如健顺高卑日月风雷火山泽鸟兽之文如干马坤牛巽鸡离雉地宜如干之木果震稼之反生坎木之坚多心近取诸身如干首坤腹坎耳离目远取诸物如干圆坤布震之 黄巽之绳直皆是虽未有辞而乾坤震巽坎离艮兑八象无所不该通德八卦形上之蕴类情八卦爻象之变此生生之大者

作结绳而为网【石经作罔】罟以佃【古作田】以渔【古作 𩺰】盖取诸离离丽也中虚网罟似之网以佃罟以渔佃渔可以养生财之属也取诸云者言有此象非因物作卦亦非因卦造物

包牺氏没神农【虞作农】氏作斲木为耜揉【食货志作𣪠】木为耒耒耨之利以教天下盖取诸益

益象震动巽入二体皆木耒耨似之养生之大者财之属

日中为市致天下之民聚天下之货交易而退各得其所盖取诸噬嗑

噬嗑之象离明震动日中营为似之谋生之事财之属

神农氏没黄帝尧舜氏作通其变使民不倦神而化之使民宜之易穷则变变则通【古一本无此三字】通则久是以自天祐【祐古作佑】之吉无不利黄帝尧舜垂衣裳而天下治盖取诸乾坤

乾坤易简可久可大黄帝尧舜之治似之通鉴前编曰帝作冕垂旒充纁为 衣黄裳世纪曰

帝尧黄収纯衣书帝曰日月星辰山龙华虫作防宗彝藻火粉米黼黻絺绣以五彩彰施于五色作服垂衣裳者文治之象授时画野作乐制服自黄帝始至尧舜而大备穷变通久立教之事前后多言养此專言教教之生人尤大故独详王氏申子曰神农以上民用未滋所急者食货而已此聚人之本也及黄帝尧舜之世民用日滋若复守其朴畧则非变而通之之道故黄帝尧舜氏作通其变使民由之而不倦神其化使民宜之而不知凡此者非圣人之喜新也穷则变变则通通则久易之道然也

剡【陆德明作桡】木为舟剡【陆作挾】木为楫【郑 作楫】舟楫之利以济不通致远以利天下蓋取诸涣

涣彖传曰乘木有功大象曰风行水上正舟楫利济之意亦生人之一财之属

服【説文作 𠂔】牛乘马引重致远以利天下【一本无此四字】蓋取诸随随以阳随陰以驯而致服牛乘马似之亦养生所需财之属

重门击柝【説文作 柝】以待暴【郑 作 𠂔 干宝作暴古文】客蓋取诸豫豫坤顺固于内而震警动于外闕门夜禁似之卫生之道禁非之一守财之事

断木为杵掘地为臼臼杵之利万民以济蓋取诸小过小过震木动于上而艮石承于下臼杵之利似之养生之一财之属

木为弧剡木为矢 矢之利以威天下蓋取诸睽睽离兵戈而兑附决又武事以睽而后用故弧矢似之亦卫生之道禁非之一守财之属

上古穴居而野处后世【説文作代】圣人易之以宫室上栋下宇以待风雨蓋取诸大壮

大壮上震下干刚大而正栋宇之壮似之养生之一财之属

古之葬者厚衣之以薪葬【汉书作藏】之中野不封不树丧期无数后世圣人易之以棺槨蓋取诸大过

大过泽中有木四阳居陰之中过于厚者送死宜之亦生人之道

上古结绳而治后世圣人易之以书契百官以治【白虎通作理】万民以察蓋取诸夬

夬兑说于外干健于内主于决断彖曰扬于王庭书契之治察有之生人之道禁非之一

是故易者象也象也者像【孟京虞董姚俱作象】也彖者材也爻也者效天下之动者也是故吉凶生而悔吝着也

上文皆因象有取而爻之变与天下之动在其中言此以结十二卦之意而应篇首爻象二字之义材者卦之质吉凶悔吝者爻之效

阳卦多陰陰卦多阳其故何也阳卦奇陰卦耦其德行何也阳一君而二民【仲长统传引民作臣】君子之道也陰二君而一民小人之道也

申明象者材也之意应篇首八卦成列卦字震坎艮阳卦皆一阳二陰巽离兑陰卦皆一陰二阳阳卦主奇陰卦主耦也干奇之宗也乾道成男震长男坎中男艮少男皆乾道也坤耦之宗也坤道成女巽长女离中女兑少女皆坤道也陰恶其專專则小人之道吳氏慎曰阳卦固主阳而陰亦主阳可见阳有常尊也陰之为小人为其二君而一民若其能助阳则亦非二君也凡陰皆以助阳为善为民者本皆以民自处也如巽之入下阳也离之明丽阳也推之六十四卦如同人之二大有之五不为小人者以其居中一能同乎阳一能有乎阳也其非一陰一阳之卦凡阳为主于内者治陰为主于内者乱泰否损益是也阳居内而先陰者正陰居内而先阳者邪随蛊渐归妹是也或以上下为贵贱或以尊卑为倡随皆臣道妇道以助阳为善也

右第一段

前言卦象爻辞之别中言圣人生生之情未言卦象之材而爻之效动俱见

易曰憧憧【京作 𡇗】往来朋从尔思子曰天下何思何虑天下同归而殊涂一致而百虑天下何思何虑

因咸四之辞而言其意象传曰未光大以其爻在两感之交下感于初而九三六二又若为之间也感不二于人心人自纷于百感不二者理也憧憧朋从者私也私未融故未光大

日往则月来月往则日来日月相推而明生焉寒往则暑来暑往则寒来寒暑相推而歲成焉往者屈也来者信【韦昭云古伸字】也屈信相感而利生焉

往来者感也日月往来而明生寒暑往来而歲成其屈与信感于自然故利利者自然之用也此所为同归一致者无所容其憧憧也张子曰屈信相感而利生感以诚也情伪相感而利害生杂之伪也

尺蠖之屈以求信也龙蛇【虞陆作虵】之蛰以存【陆董姚作全】身也精义入神以致用也利用安身以崇德也

此同归一致之功所以息憧憧之扰尺蠖无不屈之信龙蛇无不存之蛰学者无无用之体则亦无无体之用张子曰精义入神事豫吾内求利吾外也利用安身素豫吾外致养吾内也

过此以往未之或知也穷神知化德之盛也

用功既极自无憧扰湛然之心与天同运矣精义入神之初即为穷神之路利用安身之际即为知化之门穷神者极过化不测之妙知化者契天地自然之机张子曰气有阴阳推行有渐为化合一不测为神其在人也知义利用则神化之事备矣德盛者穷神则知不足道知化则义不足云又曰穷神知化乃养盛自致非思勉之所能强故崇德而外君子未或致知也○合下总十一爻皆以 明爻者效天下之动吉凶生而悔吝着之意各自为义先儒专以本爻贯十爻又或牵合上篇俱未协

易曰困于石据于蒺藜入于其宫不见其妻凶子曰非所困而困焉名必辱非所据而据焉身必危既辱且危死期【期陆德明作其】将至妻其可得见邪

困困三之辞而言其意象传曰据于蒺藜乘刚也入于其宫不见其妻不祥也爻义已明而此更申言之非义之求辱也非分之得危也名身俱失死矣凶也困三阴柔不中不正有之

易曰公用射隼于高墉之上获之无不利子曰隼者禽也弓矢者器也射之者人也君子藏器于身待时而动何不利之有动而不括是以出而有获语成器而动者也

困解上六之辞而言其意象传曰以解悖也此更申言之韩氏康伯曰括结也君子待时而动则无结阂之意

子曰小人不耻不仁不畏不义不见利不劝【举正作动】不威不惩【说苑作不威小不惩大】小惩而大诫此小人之福也易曰屡校灭趾无咎此之谓也

困噬嗑初九辞而言其意象传曰不行也此更申言之能见小人之情有馭小人之道冯氏椅曰不以不仁为耻故见利而后劝于为仁不以不义为畏故畏威而后惩于不义

善不积不足以成名恶不积不足以灭身小人以小善为无益而弗为也以小恶为无伤而弗去也故恶积而不可掩【石经作揜】罪大而不可解易曰何校灭耳凶

困噬嗑上九辞而言其意象传曰聪不明也此更申言之恶莫大于积积之初起于小推见至董氏仲舒曰积善在身犹长日加益而人不知也积恶在身犹火之销膏而人不见也

子曰危者安其位者也亡者保其存者也乱者有其治者也是故君子安而不忘危存而不忘亡治而不忘乱是以身安而国家可保也易曰其亡其亡系于苞桑困否九五之辞而言其意象传曰大人之吉位正当也此更申言之五有刚中之德而当否之几倾未亡一线所以保之者微矣其亡其亡心常惕也

子曰德薄而位尊知小而谋大力小而任重鲜【陆作尠】不及矣易曰鼎折足覆公餗【马作粥】其形渥凶言不胜其任也

因鼎四之辞而言其意象传曰信如何也此更显言之张氏浚曰居台鼎之任德力知三者一有缺则弗能胜其事而况俱不足者乎有德无知不足以应变有知无力不足以镇浮若夫德之不立虽有知力亦无以感格天人而措天下于治

子曰知几其神乎君子上交不谄下交不渎其知几乎几者动之微吉【汉书引此有凶字】之先见者也君子见几而作不俟终日易曰介于石不终日贞吉介如石焉宁用终日断可识矣君子知微知彰知柔知刚万夫之望因豫二之辞而言其意象传曰以中正也居中得正不溺于豫断也实其明也项氏安世曰谄者本以求福而祸常基于谄渎者本以交懽而怨常起于渎易言知几而孔子以不谄不渎明之此真所谓知几者矣欲进此道唯存察之密疆界素明者能之此所以必归之介如石者与

子曰顏氏之子其殆庶几乎有不善未尝不知知之未尝复行也易曰不遑复无祇悔元吉

因复初之辞而言其意象传曰不遑之复以修身也此借顏子修身之事以明之居复之初几最明决虞氏翻曰复以自知自知者明谓顏子不迁怒不贰过克己复礼天下归仁也

天地絪縕【虞翻姚信作氤氲說文作壹防班氏典引作烟煴李鼎祚縕作纁】万物化醇男女构【郑作覩徐作媾】精万物化生易曰三人行则损一人一人行则得其友言致一也

因损三之辞而言其意象传曰一人行三则疑也此更明言之絪縕化醇言气化构精化生言形化也侯氏行果曰此明物情相感当上法絪縕化醇致一之道

子曰君子安其身而后动易其心而后语定其交而后求君子脩此三者故全也危以动则民不与【举正作辅】也惧以语则民不应也无交而求则民不与也莫之与则伤之者至矣易曰莫益之或击之立心勿恒凶

因益上辞而言其意象传曰莫益之偏辞也或击之自外来也此更申言之益之上无可益则将击之矣总由立心之不恒安其身易其心定其交惟恒以立心者能之郭氏鹏海曰事不顺理从欲惟危为危以动心知非理自觉惶恐为惧以语恩非素结信非素孚为无交而求

右第二段

前言爻者效天下之动是故吉凶生而悔吝着此因举十一爻而 挥之使知爻之效动者意深遠也

子曰乾坤其易之门【桓虞下有户字】邪干yang物也坤陰物也陰阳合德而刚柔有体以体天地之撰以通神明之德此言卦之所由起乾坤成列而易立乎其中故曰门六十四卦成于八卦八卦成于乾坤乾坤陰阳之宗也一陰一阳互根互宅德性相交而刚柔之体质以立爻象纷错皆具造化所谓撰也化裁通变存乎其人默而成之不言而信所谓德也伏羲之画

已备六十四卦而未有名然易之全体已具

其称名也杂而不越【说文作防】于稽其类其衰世之意邪此言卦之所为名伏羲虽已重卦而八卦总名之外五十六卦未尝有名文王序卦时始从而名之九家易曰名谓卦名阴阳虽错而卦象各有次序不相逾越侯氏果行曰易象考其事类但以吉凶得失为主则非淳古之时也故云衰世之意

夫易彰往而察来【句】而微显阐【句】幽开【句】而当名辨物正言断辞【句】则备矣

此言辞之所由系易知来藏往故彰往察来如卦序之反易对待往来见义是也微者显而阐之幽者开而明之彰察之理也卦名当而卦象之物杂因有象爻正言其理系之以辞断其吉凶彰察之事也备也者无遗蕴也郭氏雍曰当名卦也辨物象也正言象辞也断辞系之以吉凶者也

其称名也小其取类也大其防逖其辞文其言曲而中其事肆而 因贰以济民行以明失得之报

此申当名辨物正言断辞之意名卦名类物象小者名之分大者象之用当名故称名也小辨物故取类也大防言之意辞象之文逖者言不尽意文者因象尽言正言则防逖断辞则辞文防逖则多 约故曲辞文则有条理故中名小则事物之细微无不具故肆类大则仪象之阴阳无不涵故 贰疑也吉凶者失得之象此言占也圣人吉凶与民同患之事故为衰世之意

易之兴也其于中古乎作易者其有忧患乎

申言上文衰世之意圣人吉凶与民同患而文王之世身罹忧患则吉凶同民之心益深且切周易所为重卦命名而系象也于其名之杂而不越即可以见其心下遂陈九卦而反覆之以见例

是故履德之基也谦德之柄也复德之本也恒德之固也损德之修【马融作循】也益德之裕也困德之辨也井德之地也巽德之制也

处忧患之道在乎反身脩德九卦其最切者履上天下泽定分秩然而不可乱德以履为质若筑室者之有基谦坤顺艮止卑以自牧而不可逾德以谦自持若执物者之有柄复阴极阳生见天地之心而元善日长德以仁为体若树木之有本恒刚柔皆应立不易方而久于其道德安固而不摇损山止泽丽惩忿窒欲而私日去德以勤脩而不已益风行雷动迁善改过而理日积德以优裕而有成德贵明辨困则险以说而不失其所德贵厚养井则畜之深而不穷于给德贵时宜巽则顺乎理而不乖其度

履和而至谦尊而光复小而辨于物恒杂而不厌损先难而后易益长裕而不设困穷而通井居其所而迁巽称而

申九德之实履定体也上下之分定则不争然皆天理之极则故和而至所以为德之基谦自下也自下则人敬之是以卑而不可逾故尊而光所以为德之柄一阳最为小矣然审几明而欲不能乱故辨于物复之为也所以为德之本陰阳相错杂矣然守之固而能久于其道恒之为也所以为德之固损克己之事故先难然损之又损以至于无则后易矣故为德之脩益集义之功故长裕然益非袭取而自得之则不设矣故为德之裕穷患其不通而困有心亨之效此所以为德之辨也失所居者不能迁而井则养而不穷此所以为德之地也称适均也然潜而不露巽顺而入故兼有之此所以为德之制也

履以和行谦以制礼复以自知恒以一德损以远害益以兴利困以寡怨井以辨义巽以行权

申九德之用所谓和而至者行事之不可离也惟履能定分故有以和之尊而光者礼节之不可逾也惟谦能撙节故因而制之小而辨于物者心体之本然也惟复则善端之萌不自掩蔽故能自知杂而不厌者專壹之心为之也惟恒则理存于心贞固不摇故能一德先难而后易者攻其恶无攻人之恶也害之所由远也惟损有之长裕而不设者集义所生不谋其利也利之所由兴也惟益有之困唯心亨穷而能通者自反也故无怨尤井养不穷居其所而能迁者取汲也故能辨义巽顺以入其称而 者适宜也故能行权

右第三段

此段由卦之所緣起原卦之所由名因及其辞义之精微后四节又因其名之称歷陈九卦以见作易者之志前后意义相承

易之为书也不可遠【句】为道也屡迁变动不居周流六虚上下无常刚柔相易不可为典要唯变所适

言易之用在乎爻位也不可遠言崇德广业者所当居安而乐玩也道者一陰一阳两在不测者也变动不居者卦爻之 用也六虚六位也六位言虚孔氏颖达所谓位本无体因爻始见是也外三爻为上内三爻为下无常者即六虚之变动不居也刚柔相易乃指其实而言之易道虽大不过一刚一柔于各卦反覆对待之间九六二用或刚易而柔或柔易而刚所以周流乎六位之间而无常也是谓神无方而易无体者故不可执以为典要唯其变之所趋而已变者易之用也

其出入以度外内使知惧

承上文而言以起下文出入以上下卦之往来言外内以上下卦之成象言言其上下无常者虽不可为典要而其出入于上下之间者则有一定之度如天文之有躔次也出者为外入者

为内两体取用吉凶分明使人戒惧

又明于忧患与故无【一本无无字】有师保如临父母

此言系辞明吉凶之事圣人吉凶与民同患故系之以辞明于民之忧患与其致忧患之故虽无有师保之训戒而如父母之临于其上言其知惧之至不由教勉动于自然也

初率其辞而揆其方既有典常苟非其人道不虚行此言学易之事由辞而入而体之者又不仅以其辞也圣人之情见乎辞而辞也者各指其所之所谓方也吉凶之所在也初学之始既学之中由辞而知其方则出入之度显然可据易之上下无常不可为典要者至此而有典常矣然书不尽言言不尽意默而成之不言而信则存乎德行道之屡迁者不虚行也变动不居周流六虚易本无方体又当由所谓有典常者而知道之唯变所适也

右第四段

约言易道之变与辞之用学者玩其辞又当观其象而默成之也

易之为书也原始要终以为质也六爻相杂唯其时物也

言系彖系爻理相因也质体也彖辞言一卦之体段推原其始而要于其终所以为六爻之纲也物位也爻辞言各爻之细节即其时与物而分晰之所以为一卦之目也

其初难知其上易知本末也初辞拟之卒成之终若夫杂物撰【郑作算】德辨是与非则非其中爻不备

申言爻义初爻其防微而难知上爻其义显而易知凡卦自下而上初之时与物若探其本上之时与物如循其末所以有难易之分所系之辞于初爻多拟议于未然如潜龙勿用履霜坚冰至之类是也卒末也上爻之辞据成之于终而言其已然如亢龙有悔龙战于野其血 黄之类是也中四爻有承有乘有应其时与位各不同错杂于爻位贵贱上下之间撰合乎卦德健顺刚柔之际于中德位分而是非以见此时物之大备也

噫亦要存亡吉凶则居可知矣知【徐作智】者观其彖辞则思过半矣

结上文之意言爻辞亦 明彖辞也亦要云者约而言之也爻之所以为存亡吉凶槩可知也何也彖辞为六爻之大纲如屯以初为侯蒙则以二为子师则以二为将比则以五为君彖先之而爻随申之也苏氏轼所谓彖者常论其用事之爻故观其彖则其余皆其爻之所用者是也

二与四同功而异位其善不同二多誉四多惧近也【郭京本无近也二字谓王弼注惧近也

后误将近也二字作经毛氏奇龄曰按所据韩康伯王弼原注今王注已无惧近也句而康伯乃有位逼于君故多惧之语则直是经文不得妄诞】柔之为道不利遠者其要无咎其用柔中也

此合下段复论中四爻以申杂物撰德之意二四皆中爻也其功同而内外之位各异故其善因之不同是以二则多誉辞四则多惧辞夫二之所以多誉者何也以其在内卦之中也近也刚柔处之而皆善者也若夫四则遠矣刚柔处之皆惧也然而柔更不利焉蓋柔无致遠之才惟资刚以济之则柔而不过无咎者善补过也柔中而已故曰其要无咎其用柔中也柔居四而顺乎刚亦柔中矣

旧解以近也属四多惧遂以为近君非也如其說四近君而多惧则二以遠故多誉矣二遠君而多誉何以下文又曰柔之为道不利遠者乎不知二在内为近四在外为遠二多誉以其近也刚柔之所同四多惧以其遠而柔尤不利焉无咎而用柔中则柔之所独

三与五同功而异位三多凶五多功贵贱之等也其柔危其刚胜邪

三五皆亦中爻也其功同而尊卑之位各异惟其位之异也故三则多凶五则多功何也五位尊贵也三位卑贱也自具之等也刚柔皆有之者也然就多凶而论之则柔尤危刚较胜也三偏暗非刚明不能居也

旧說以二四为柔三五为刚于是四多惧近也之下柔之为道不利遠者格碍不可解三五皆刚以刚处之又曰刚胜皆不合义理且上下节文体亦不合也右第五段

此因前段率辞揆方而详言彖辞爻辞所系吉凶悔吝之理

易之为书也广大悉备有天道焉有人道焉有地道焉兼三才【石经作材】而两之故六六者非它也三才之道也广大者体统之浑含悉备者条理之详密易之为道陰阳两象耳因陰阳之所值而三之则三其两矣初为地二为人三为天是为八卦因而重之止此八卦之三画耳再加八卦是兼三才而两之则两其三矣是为六爻六爻则六十四卦也六爻之间皆天地人之布列统天地人则广大兼而两之为六则悉备此前篇所谓三极之道也申言之以引起下文六爻之动

道有变动故曰爻爻有等故曰物物相杂故曰文文不当故吉凶生焉

此言六爻之动亦因以明前六爻相杂唯其时物之义陆氏绩曰天道有昼夜日月之变地道有刚柔燥湿之变人道有行止动静吉凶善恶之变圣人设爻以效三者之动故谓之爻吳氏慎曰以时义之得为当时义之失为不当不以位论汪氏咸池曰文即相杂岂能皆当故有以刚居柔以柔居刚而位不当者亦有以柔居柔以刚居刚而位不皆当者则吉凶于是而生矣何氏楷曰不当者非專指阳居陰位陰居阳位也卦情若淑则以不当为吉卦情若慝则以当

位为凶要在随时变易得其当而已按吳說胜右第六段

此申六爻之动三极之道以终前节六爻相杂之意

易之兴也其当殷之末世周之盛德邪当文王与纣之事邪是故其辞危危者使平易者使倾其道甚大百物不废惧以终始其要无咎此之谓易之道也

圣人吉凶与民同患又当忧患之世故辞危忧世之意也凡人操心危则能使之平若视之易则必至于倾此辞之所以危也道大關乎世也物事也废坏也不废即不倾之谓象辞原始要终以为质而外内使知惧则惕于危矣无咎则危者平此易之大防

夫干天下之至健也德行恒易以知险夫坤天下之至顺也德行恒简以知阻

承上文而言易之危而使平者本易简之理也六十四卦不外八卦八卦不外乾坤乾坤之理不外易简而健顺则其性也刚柔之德也险阻即上文所谓危易以知险简以知阻则有以平之天下以险测险以阻防阻人心之危易以知险简以知阻天理之安圣人作易全体乾坤故屡 明之

能說诸心能研诸侯【虞翻云坎为心虑干一之坤为震为诸侯杨易云侯当作民周易观象云诸为侯之反或古音释误入】之虑定天下之吉凶成天下之亹亹者

說诸心契易简之理研诸虑审险阻之几定天下之吉凶知之深所以开物成天下之亹亹平险阻所以成务

是故变化云为吉事有祥象事知器占事知来

变化云为即乾坤之交错吉事有祥者动几之先见不言凶者因易简之善也象事知器以制器者尚其象也占事知来以卜筮者尚其占也此言以易简而知险阻也

天地设位圣人成能人谋鬼谋百姓与能八卦以象告爻象以情言刚柔杂居而吉凶可见矣

承上文而言圣人作易之事天尊地卑而乾坤定易简理得而成位乎中因乾坤而圣人之能事起谋及乃心谋及卿士谋及庶人人谋也谋及卜筮鬼谋也易道兴而百姓日用之亦可与能何也天地设位而易立乎其中八卦成列而象在其中作易者由乾坤生六子而有八卦有八卦则六十四卦之象已具象事知器者此也故曰八卦以象告言象则爻在其中象辞爻辞于是系焉而圣人之情见乎辞占事知来者此也故曰爻象以情言刚柔杂居者八卦之象吉凶可见者爻象之情蔡氏清曰八卦以象告则刚柔杂居矣爻象以情言则吉凶可见矣

变动以利言吉凶以情迁是故爱恶相攻而吉凶生遠近相取而悔吝生情伪相感而利害生

凡易之情近而不相得则凶【句】或害之【句】悔且吝

明爻象以情言系辞之大凡也刚柔杂居则有变动变动以趋时故以利言趋时之利在辨吉凶而吉凶因乎爻象之情圣人之情即见乎辞故以情迁二句为一节之纲吉凶悔吝利害辞也爱恶之相攻远近之相取情伪之相感情也相因而生此系辞之以情迁也未又约而言之凡系辞之情爱恶情伪皆统于远近一卦六爻中有乘承比爻彼此相附者也有应爻彼此相关者也有主爻彼此成体者也皆近也情不相得则恶矣伪矣甚者凶浅者害又浅则悔且吝远则反是爱恶情伪远近天下之险阻圣人以易简之理知之而立象以尽变系辞焉以断吉凶使之趋时之利则有平而无倾矣故曰圣人之情见乎辞

将叛者其辞慙中心疑者其辞枝吉人之辞寡躁人之辞多诬善之人其辞游失其守者其辞屈【杨易作诎】

叛背也慙恶忍疑贰也枝支离吉人善也寡不烦躁人迫也多不择诬善之人妄也游浮诞不实失其守者弱也屈巽懦不伸此辞之因乎情者彖爻之辞盖能尽其情者圣人当忧患之世其辞危知天下之险阻而使之平也

右第七段

极言圣人之情见乎辞推言设卦之本与彖爻之用以见全篇系辞之要

七段通为一章

易翼說卷三

湖北巡抚晏斯盛撰

說卦传

昔者圣人之作易也幽赞于神明而生蓍

赞相也蓍灵草也圣人通神明之德用蓍草作为筮法以宣神明之意苏氏轼曰介绍以传命谓之赞天地鬼神不能与人接也故以蓍 为之介绍

干凿度曰垂皇防者羲 防传曰天下和平王道得而蓍茎长丈其丛生满百茎

参天两【說文作两】地而倚【周礼注作奇蜀本同】数

数算法之目次也倚依也着也天地之理无迹而依着于数以见也参三数之也一而三三也三而五五而七七而九亦三也一三五七九皆天故曰参天两两数之也一而二两也二而四四而六六而八八而十亦两也二四六八十皆地故曰两地即大衍之天数五地数五也太阳天数之首分一而得九则三其三矣少阳天数之次分三而得七则一三而两二矣太陰地数之盛两二为四除四而得六则两其三矣少陰地数之次两一为二除二而得八则一二而两三矣天地一二三四之数即所以为九八七六此揲蓍求卦之所倚而用之者也孔氏颖达曰七九为奇天数也六八为耦地数也故取奇于天取耦于地而立七八九六之数也何以参两为目奇耦蓋古之奇耦亦以参两言之且以两是耦数之始三是奇数之初故也

观变【马融本多一化字】于陰阳而立卦 挥【释文作辉】于刚柔而生爻和顺于道德而理于义穷理尽性以至于命

数者天地陰阳之数也圣人观变于陰阳而立八卦重之为六十四卦卦立而爻具矣卦之陰阳即爻之刚柔圣人又 挥之而系以辞易于是乎大备是虽为占卜而设然皆圣人之蕴也其为人所共由者为道为人心所同得者为德措之而无不宜者为义因刚柔之进退而调剂之使不乖则和利导之使不拂则顺条析分辨之使不乱则理然道德义非有外也其当然所以然者为理得于天命者为性流行于天者为命穷之则不以一毫私意自蔽尽之则不以一毫私欲自累至之则尽人以合乎天何氏楷曰数既形矣卦斯立焉卦既立矣爻斯生焉和顺于道德而理于义从合而分穷理尽性以至于命从分而合理义非二也程子谓在物为理处物为义是也性命与道德非二也子思谓天命之谓性

昔者圣人之作易也将以顺性命之理是以立天之道曰陰与阳立地之道曰柔与刚立人之道曰仁与义兼三才而两之故易六画而成卦分陰分阳迭用柔刚故易六位【马融作画】而成章

上言和顺于道德而理于义穷理尽性以至于命此相承而申言之性命即德也性命之流行即道也性命之蕴于事物为理即道德之散而为义者也故合言之曰性命之理和顺于道德而理于义正所以穷理尽性而至于命顺正所以为和故浑言之曰顺性命之理陰阳以气言刚柔以质言皆天命之理仁义则在人之性立之者其本然也上言观变于陰阳而立卦 挥乎刚柔而生爻此相承而申言之八卦三画三才也因而重为六十四卦则两其三才而为六画六画成六十四卦易道斯备自卦言之则分陰分阳自爻言之则迭用柔刚六爻相杂曰文故六位成章何氏楷曰此言卦画顺性命之理即上所谓和顺于道德而理于义穷理尽性以至于命者以一言蔽之也性者人之理命者天地之理陰阳刚柔仁义正所谓性命之理也分陰阳用柔刚以断吉凶而成亹亹则仁义之道固在其中矣

天地定位山泽通气雷风相薄水火不相射八卦相错上言观变于陰阳而立卦又言分陰分阳迭用柔刚此乃举卦以明之为卦乾坤艮兑震巽离坎一阳一陰两相对待首乾坤次六子即系辞首章所谓天尊地卑而乾坤定在天成象在地成形而乾道成男坤道成女者也八卦之定体也然相对即相待相对者不易也相待者交易也乾坤之交而有六子六子相对亦相待则亦相交山与泽异形也而高下气通雷与风异候也而奋挠相薄水与火异质也而相济不相射二气实一气也故相错错交错也言八卦则六十四卦可知即系辞首章所谓刚柔相摩八卦相荡者也

数往者顺知来者逆是故易逆数也雷【汉书作靄】以动之风以散之雨以润之日以暄【徐虞作暄荀作烜古文作暄】之艮以止之兑以說之干以君之坤以藏之

由乾坤而生六子陰阳对待以顺行故曰数往者顺由六子而遯乾坤则逆推陰阳所由来故曰知来者逆全部易书六子之用为多然皆本于乾坤故曰易逆数也遂因前卦而逆数之震阳动于下巽陰入于初坎阳满于中离陰丽于内艮阳止于上兑陰說于外皆干阳为之主而坤陰为之含此所谓知来者逆也系辞首章成男成女之后继之曰干知大始坤作成物者此也

张子曰陰性凝聚阳性 散陰聚之阳必散之其势均散阳为陰累则相持为雨而降陰为阳得则飘扬为云而升故云物班布太虚者陰为风驱敛聚而未散者也凡陰气凝聚阳在内者不得出则奋击而为雷霆阳在外者不得入则周旋不舍而为风其聚有遠近虚实故风雷有小大暴缓和而散则为霜雪雨露不和而散则为戾气噎霾陰常散缓受交于阳则风雨调寒暑正

以上二段先儒以为伏羲先天八卦图解皆自一而二自二而四自四而八此自邵子一家之言先圣未尝有此說且其自一二以至八而成卦则天地风雷火山泽一时竝到造化之初恐不如此以人拟之则父母子女长幼一时竝生亦无次第又本义以起震歷离兑至干数已生之卦为数往者顺自巽歷坎艮至坤推未生之卦为知来者逆下文又别之曰易之生卦则以干兑离震巽坎艮坤为次故易逆数是既判图与生卦之序为二亦离经之上下文为二矣圣人只是见一于二故有对有待有交错系辞具在本是一意义圣之画亦非两义故因经立

之图亦第可曰八卦对待图耳不必指为先天图也毛西河易先天八误一曰画繁二曰四五无名三曰三六无住法四曰不因五曰父母子女竝生六曰子先母女先男少先长七曰卦位不合八曰卦数无据

帝出乎震齐乎巽相见乎离致役乎坤說言乎兑战乎干劳乎坎成言乎艮

前卦拟天地之定体此拟四时之流行四方之布濩也本段先明流行布濩之意为卦震巽离坤兑干坎艮帝元气也乾元之阳帝也干以君之而此其元阳也首震而出次巽入陰而齐次离丽陰而明次坤陰众而役次兑陰泽之而說次干刚断而战次坎阳陷陰中而劳次艮阳止陰上而成自干至震为阳自巽至兑为陰然震出而艮成皆帝为之主宰一元之大运也此流行布濩之意

万物出乎震震东方也齐乎巽巽东南也齐也者言万物之洁【石经作洁】齐也离也者明也万物皆相见南方之卦也圣人南面而聽天下向明而治蓋取诸此也坤也者地也万物皆致养焉故曰致役乎坤兑正秋也万物之所說也故曰說言乎兑战乎干干西北之卦也言陰阳相薄也坎者水也正北方之卦也劳卦也万物之所归也故曰劳乎坎艮东北之卦也万物之所成终而所成始也故曰成言乎艮

此流行布濩之实震巽离干坎艮各举方位而兑举时令干举陰阳坤举象离举人蓋错言之以备其义各卦兼有时令方位陰阳体象人事在而四时八方犹其要也蓋夫震阳春起东作仁元巽风扇之春夏蕃鲜离明夏正火丽南天坤众载厚固夏胎秋兑說秋清西爽金流干健覆高阳刚战惕坎劳冬令归于正北艮止冬深歲成功毕合而观之南方阳也而坤总三陰卦于西南北方陰也而干统三阳卦于东北盛夏阳也而陰已伏严冬陰也而阳已包是分陰分阳而陰阳实互根也震为歲功之首生育之方艮为歲功之成收藏之府二卦反对相为终始干统众阳坤总羣陰二卦对待中为纲维坎离水火有既济之功震兑春秋有舒敛之用故对待而居四正巽则与震对以类相从故居东南下文遂合而言之

神也者妙【王作眇】万物而为言者也动万物者莫疾乎雷挠万物者莫疾乎风燥万物者莫熯乎火【說文作莫暵乎离】說万物者莫說乎泽润万物者莫润乎水终万物始万物者莫盛乎艮故水火相逮【陆本作不相逮】雷风不相悖山泽通气然后能变化既成万物也

此合前四节而言六子皆乾坤之用其流行者即其对待者也神即乾坤之行乎六子中而为妙者不言乾坤以六子皆乾坤之陰阳为之总统也前以主宰言故称帝谓其为元阳也此以功用言故曰神谓陰阳之不测也惟神故妙震巽离兑坎艮皆神动挠燥說润终始皆妙帝出乎震矣万物皆出而实雷以动之也齐乎巽矣万物洁齐而实风以散之也相见乎离矣万物相见而实日以暄之也說乎兑矣万物泽說而实兑以說之也劳乎坎矣万物所归而实雨以润之也成言乎艮矣万物成终而实艮以止之也水火仍相逮也雷风仍不相悖也山泽仍通气也坎离震巽艮兑流行者即其对待者也变化者陰阳之相错也神也神不可见于万物见之

干健也坤顺也震动也巽入也坎陷也离丽也艮止也兑說也

此言八卦之性情邵子曰干奇也阳也健也故天下之健莫如天坤耦也陰也顺也故天下之顺莫如地所以顺天也震起也一阳起也起动也故天下之动莫如雷坎陷也一阳陷于二陰陷下也故天下之下莫如水艮止也一阳于是而止也故天下之止莫如山巽入也一陰入二阳之下故天下之入莫如风离丽也一陰丽于二阳其卦错然成文而华丽也故天下之丽莫如火又为附丽之丽兑說也一陰出于外而說于物故天下之說莫如泽按此邵子之說之最醇者俱以对待见义观后一索再索三索之理可见离丽也句不必如张子所谓阳附于陰为火之說与经防又别出也

乾坤生六子自是八卦之本然故下文俱用此序 明

干为马坤为牛震为龙【虞翻作駉引尔雅𩇑皆白駉】巽为鸡坎为豕【京房作彘】离为雉艮为狗兑为羊

此遠取诸物马性健行遠其蹄圆牛性顺任载其蹄圻龙潜渊而动鸡伏宇而入豕淤浊下陷雉文采外见狗御夜外刚羊悦羣毛柔

干为首坤为腹震为足巽为股坎为耳离为目艮为手兑为口

此近取诸身首尊而上圆腹广而内实足下动股陰伏耳内陷目外明手上动而执持口上圻而笑倩

干天也故称乎父坤地也故称乎母震一索而得男故谓之长男巽一索而得女故谓之长女坎再索而得男故谓之中男离再索而得女故谓之中女艮三索而得男故谓之少男兑三索而得女故谓之少女

明八卦次第画卦之初一陰一阳耳一而参之三阳为干三陰为坤干交于坤之初中上而为震坎艮坤交于干之初中上而为巽离兑六子皆乾坤所生故称父母一阳之卦以阳为主故谓之男一陰之卦以陰为主故谓之女

朱子语类云干求于坤而得震坎艮坤求于干而得巽离兑一二三者以其画之次序言也此条显易明白而吳氏澄谓坤交于干求取干之初中上三画而得长中少三男干交于坤求取坤之初中上三画而得长中少三女左矣

干为天为圆为君为父为玉为金为寒为冰为大赤为良马为老马为瘠【京房荀爽作柴】马为驳【释文作防通作驳】马为木果推广乾象道之大也鸢飞鱼跃无所不察陰阳之变也洪纖鉅细无所不贯自此以下故推而言之大而天地风雷水火山泽君民父母男女细而动植飞潜以至有形有色有声之属莫不有陰阳之象则夫天地之间目之所触耳之所通身

之所接皆此理之充周正所谓活泼泼地不得仅以为形下也要亦随举以见例耳孔氏颖达曰干既为天天动运转故为圜为君为父取其尊道而为万物之始也为玉为金取其刚之清明也为寒为冰取其西北寒冰之地也为大赤取其盛阳之色也为良马取其行健之善也老马取其行健之久也瘠马取其行健之甚瘠马多骨也驳马有牙如锯能食虎豹取其至健也邵子曰木结实而种之又成是木而结是实木非旧木也此木之神不二也此实生生之理也来氏知德曰纯阳而至健为天天体圜运不息故为圜干之生乎万物犹君之主万民也故为君干知太始有父道焉故为父纯粹为玉纯刚为金为寒为冰者冰则寒之凝也干居亥位阳生于子也大赤盛阳之色也寒冰在子以阳之始言之大赤在午以阳之终言之良马马之健而纯健之不变者也老马健之时变者也瘠马健之身变者也驳马健之色变者也乾道变化故以变言之木果圆之在上者也

附

九家易为龙为衣为直为言【列本义】荀易为德为王为人为神为盈为甲为施为嘉为健来易为郊为带为旋为知为富为大为顶为戎为武补象删要为元为光为终日为大首为颞为庆为祥为诚为大车为金柅为辐为轮为战为遄为行为瓮为鼎腹

右汉以下诸儒因其已见于爻象者采补而明儒来氏知德緣其例取易辞所有者再补至元同补象则摭拾太多故为删而存其要者不附经下以正经也

坤为地为母为布为釜为吝【京房作遴】嗇为均【礼记注作旬】为子母牛为大舆为文为众为柄其于地【一作色】也为黑推广坤象孔氏颖达曰坤既为地地受任生物故为母也为布取其广载也为釜取其化生成熟也为吝嗇取其生物不转移也为均地道平均也为子母牛取其多蕃育而顺之也为大舆取其载万物也为文取其万物之色杂也为众取其载物非一也为柄取其生物之本也为黑取其极陰之色也来氏知德曰纯陰为地资生为母为布者陰柔也且地南北经而东西纬亦布象也为釜陰虚也且六十四升为釜亦如坤包六十四卦也其静也翕凝聚不施故为吝嗇其动也辟不择善恶之物皆生故为均性顺而生物生生相继故为子母牛能载物为舆曰大舆者乃顺承天之大也三画成章故为文耦画成羣故为众柄者持成物之权黑者为极陰之色

附

九家易为牝为迷为方为囊为裳为黄为帛为浆【列本义】为乱【本无义】虞易为理为事为大业为臣为民为见为虚为乙为拇为丧为终为害为死为萃为土为器为晦为国为兕虎干寶易有为顺卢易有为师左杜注有为马来易为末为小为朋为户为敦补象删要为西南为野为国为邑为阶为丘为荒为臣为有土之公为畴为亿为羣为夷于德为安为宁为燕为承为智为章为含为括为裕为迟为防于物为彙为大牲为蕃庶于器为舆为缶于味为甘

震为雷为龙【虞于作防】为 黄为雉【虞姚作專纂作敷与华通】为大涂为长子为决

躁为苍筤【徐作琅】竹为萑【荀作荻石经作藿】苇其于马也为善鸣为鼻【京荀俱作朱】足为作足为的【説文作𨔵尔雅作𨔵】𨔵其于稼也为反【虞作坂陆作阪】生其究为健为蕃鲜

推广震象孔氏颖达曰为元黄取其相杂而成苍色也为萑取其春时气至草木皆吐萑布而生也为大涂取其万物之所生也为长子震为长子也为决躁取其刚动也苍筤竹竹初生色苍也为萑苇竹之类也其于马也为善鸣象雷声之远闻也为鼻足马后足白为鼻取其动而见也为作足取其动而行健也为的𨔵白额为的𨔵亦取其动而见也其于稼也为反生取其始生戴甲而出也其究为健极于震动则为健也为蕃鲜取其春时草木蕃育而鲜明俞氏琰曰阳长而不已则其究为干之健三爻俱变则为巽故为蕃鲜

附

九家易为玉为鹄为鼓【列本义 吳氏澄曰玉当作圭鹄当作鹤】虞易有为侯为主为兄为夫为言为行为乐为出为作为麋鹿蜀易有为喜为笑左杜注有为木为诸侯国语韦注有为车来易为青为升为奋为官为园为春耕为东为老为筐为土车补象删要为斗为陵为 为百里为往为济为击为荐为灾眚为震惊为失丧为渝为 为机于物为柝为簋为茅为朵为鸟隼为鸿为翮为鸣

巽为木为风为长女为绳直为工为白为长为高为进退为不果为臭【王肃作为香臭虞翻作嗅李鼎祚本同】其于人也为寡【古本作宣云黑白杂为宣郑本同谓四月靡草死髮在人体犹靡草在地虞云巽为白故宣释文作蒜毛西河云考工记车人之事半炬谓之宣注头发頽落曰宣与寡同义】发为广【郑作黄】𨔵为多白眼为近利市三倍其究为躁卦

推广巽象巽一陰在下二阳在上木性柔而外刚根陰伏于下而枝榦阳生于外故大象于升曰地中生木井曰木上有水鼎曰木上有火渐曰山上有木皆谓巽也张子曰陰在内阳在外而不得入则周旋不舍而为风长女见本传前来氏知德曰木曰曲直绳直者从绳以取直而工则引绳之直以制木之曲者也巽德之制故能制器为工孔氏颖达曰为白取风能去尘故洁白也为长取其风行之远也为高取其木生而上也为进退取其风性前却为不果亦进退之义来氏曰臭以风而传陰伏于重阳之下郁积不散故为臭姤卦包鱼不利宾者以臭故也为寡髮者髮属血陰血不上行也广𨔵阔额也阳气独上盛也眼之白者为阳黑者为陰所以离为目巽二白在上一黑沈于下故为多白眼巽本干体为金为玉利莫利于干也坤一索为巽巽性入则干之所有皆入于巽矣故近利市三倍曰近者亦如市之交易有三倍之利也震为决躁巽错震故其究为躁卦亦如震之其究为健也震巽以究言者刚柔之始也

附

九家易为杨为鸛【列本义○吳氏澄曰鸛当为鸿杨上茂而下虚鸛身瀉而瘦足皆二竒上盛一耦下植之象】虞易有为妻为处为随为鱼为号为包为杞为白茅为舞来易为进为官

人补象删要为月几望为庙为居为令为戒为大号为富为盥为浚为深为牵为击为拏为磨为繻为纟于体为肱亦为泣于器为舟为牀为资斧于物为莽为桑为瓜为鲔为豚鱼为羸豕其德入故为损为摧为不荐

坎为水为沟渎为隱伏为矫【一作桥】輶【宋衷王虞作揉京房作柔荀爽作挠】为弓轮【姚作伦】其于人也为加忧为心病为耳痛为血卦为赤其于马也为美脊为亟【荀作极云中也】心为下首【荀作 𠂔】为薄蹄为曳其于舆也为多眚为通为月为盗其于木也为坚多心

推广坎象孔氏颖达曰坎为水取其北方之行也为沟渎取其水行无不通也隱伏取其水藏地中也为矫輶使曲者直为矫使直者曲为輶水流曲直故为矫輶也为弓轮弓者激矢如水激射也轮者运行如水行也为加忧取其忧险难也为心病忧险难故心病也为耳痛坎为劳卦北方主听听劳则耳痛也为血卦人之有血犹地有水也为赤亦取血之赤其于马也为美脊取其阳在中也为亟心亟急也取其中坚内动也为下首取其水流向下也为薄蹄取水流迫地而行也为曳取水磨地而行也其于舆也为多眚取其表里有陰力弱不能重载也为通取其行有孔穴也为月月是水之精也为盗取水行潜窃其于木也为坚多心取刚在内也来氏知德曰水内明坎之阳在内故为水阳画为水二陰夹之故为沟渎阳匿陰中为柔所掩故为隱伏弓与轮皆矫輶所成故为弓轮阳陷陰中心危虑深故为加忧心耳皆以虚为体坎中实故为病为痛蓋有孚则心亨加忧则心疾矣为赤者得干之一画与干色同但不大耳干为马坎得干之中爻柔在上故首垂而不昂柔在下故蹄薄而不厚因下柔故又为曳蓋陷则失健足行无力也盗能伏而害人刚强伏匿于陰中故为盗

附

九家易为宫为律为可为栋为丛棘为狐为蒺藜为桎梏【列本义】荀易有为志虞易有为车左杜注有为众来易为沫为泥涂为淫为北为幽为孚为河补象删要为云雨为膏为沛为井为川为涉为濡为拯为戎为鬼为鬼方于体为心为中为心不快为肱为孕为血于德为归为反为敬为得获为纳为乱为毒为眚为疾为忧为惕恤为涕洟于事为筮为包为结绳为拘系为弋为引为田为即鹿为刑为狱于物为乘马为水泉为不盈之平流为不通之室为巷为櫺为穴为窞为幽谷

离为火为日为电为中女为甲冑为戈兵其于人也为大腹为乾【董作干】卦【古作挂】为鼃为蠃为羸【京作螺姚作蠡】为蚌【古作蚌】为 其于木也为科上槁【虞作析郑作槁于作槁】

推广离象孔氏颖达曰离为火取南方之行也为日日是火之精也为电人之类也为中女离为中女为甲冑取其刚在外也为戈兵取其刚以自捍也其于人也为大腹取其怀陰气为乾卦取其日所烜也为鼃为蠃为羸为蚌为 皆取其刚在外也其于木也为科上槁科空也陰在内为空木既空中上必枯槁也俞氏琰曰离中虚而外干燥故为木之科上槁蓋与坎之坚

多心相反来氏知德曰干音干水流湿故称血火就燥故称干

附

九家易为牝牛【列本义】又有为飞鸟虞易有为隼为鹤为夏为罔马融王肃传有为矢侯易有为黄牛何易有为文明于易有为画为斧左杜注有为鸟为诸侯来易为苦为朱为三为焚为泣为歌为号为墉为城为南为不育为害补象删要为日中为旬为牖为明为光为见为覲为窥为朋为嗃嗃为灾于人为戚为不孕于德为蓄为言为眇为失得为愠为恤惕号咷涕嗟于事为食为餽为 为征伐于物为雉为飞为贝为灵 朋 于器为轮为莛为 为瓶

艮为山为径路为小石为门阙为果蓏【京作墮】为闾【徐作防】寺为指为狗【虞作拘云指屈伸制物为拘狗字误】为鼠为黔【郑作黠云虎豹贪冒之类】喙之属其于木也为坚多【陈氏考异云古本一无多字一无坚字】节推广艮象孔氏颖达曰陰在下为止阳在上为高故艮象山也项氏安世曰震为萑为涂为蕃鲜草木之始也艮为果蓏草木之终也果蓏能终而又能始故于艮之象为切来氏知德曰山止于地故为山一阳塞于外不通大涂与震相反故为径路刚在坤土之上故为小石上画相连下画双峙而虚故为门阙木实植生曰果草实蔓生曰蓏实皆在上故为果蓏闾人掌宫中门之禁止物之不应入者寺人掌王之内人及宫女之戒令止物之不得出者刚止内柔故为闾寺人能止物者在指物能止物者在狗鼠之为物其刚在齿鸟之为物其刚在喙黔者黑色鸟喙多黑曰属者不可枚举也狗鼠黔喙皆谓前刚也坎阳在内故木坚在心艮阳在上故木坚多节木枝在上方有节

附

九家易为鼻为虎为狼【列本义】虞易有为背为皮为尾为笃实为求为宗庙为小子为童仆为城为狐郑易有为鬼防门左杜注有为言来易有为牀为握为终为宅为庐为仰为童为尾补象删要为东北为磬为庐为家为舍为阙庭为丘园高上于人为君子为童仆为臣仆为琐琐为躬为生为不死为握为御为罢为已事为损疾为有终于物为豕为革为肤

兑为泽为少女为巫为口舌为毁折为附决其于地也为刚卤为妾为羊【郑 作阳云阳养无家女任炊爨贱于妾者郭璞引鲁诗阳如之何又曰巴濮自称为阿阳杨慎引后汉西南夷女为娼徒虞翻作羔】

推广兑象孔氏颖达曰兑为泽取其陰卦之小地类卑也为少女兑为少女也为巫取其口舌之官也为口舌取西方于五事而言也为毁折为附决兑为西方之卦取秋物成熟稌秆之属则毁折也果蓏之属则附决也其于地也为刚卤取水泽所停则咸卤为妾取少女从姊为娼也来氏知德曰柔附于刚刚乃决柔故为附决震阳动故决躁兑陰說故附决兑非能自决乃附于刚而决也

附

九家易为常为辅颊【例本义】虞易有为妹为孔穴为刑人为小来易为笑为五为食为跛为眇为西补象删要为雨为陰为西山岐山为幽人祝史为面为言为誉为剗刖为羸为虞为素得所则为悦为利为和失所则为号为咨嗟陰居上为菀为葛藟为臲为脆两兑为鸣为和为商

右传一篇先儒分十一章离析太多气脉不联今合为一自首至四段言蓍数卦爻之大源五段六段言卦之对待七段八段言卦之流行九段言流行对待之一理十段言八卦之性情十一段遠取诸物十二段近取诸身十三段言八卦之次第十四段至终篇皆推广八卦之象合而玩之条理分明可以破支离可以解拘牵可以正 遠

易翼說卷四

湖北巡抚晏斯盛撰

序卦传

有天地然后万物生焉盈天地之间者唯万物故受之以屯屯者盈也

天地谓经首乾坤二卦盈满也言天地之气充塞乎两间也天地之气不可见于物见之雷雨之动满盈万物屯屯然萌矣此屯屯然者即天地之气之充塞也屯不训盈盈以气言

屯者物之始生也物【郭京作始】生必蒙故受之以蒙蒙者蒙也物之穉【古作稚】也

屯萌动之意蒙生初之象阳陷而止精神未 然也

物穉不可不养也故受之以【李鼎祚本无以字】需需者饮食之道也

蒙方小之时需俟养之候水在天上万物所需

饮食必有讼故受之以讼【僧一行易纂引孟喜序卦曰陰阳养万物必讼而成之君臣养万民亦必讼而成之】

饮食生人之大欲需之急者两需必争干糲以愆豕酒生祸故讼

讼必有众起故受之以师师者众也

事起于争因而动众阳刚为主险于内而众附于外

众必有所比故受之以比比者比【郭京本比下有亲字】也

人何以众众何以不离以其有所附也一阳中正居尊而羣陰归之是为比

比必有所畜故受之以小畜

畜止而留之也众得所归则必有以留之一陰得正近君而羣阳皆留故曰畜

物畜然后有礼故受之以履【吳氏澄曰此下当有履也者礼也五字今韩注有之而王弼略例引此五字当是后人误以正文作注者】

礼义生于富足畜积既富则礼行焉礼也者人之所履也上天下泽名分秩然礼也故为履

胡氏一桂曰乾坤至履十变陰阳之气一周矣

履而泰【本义引晁氏云郑无而泰二字】然后安故受之以泰泰者通也安上治民莫善于礼有礼然后泰泰然后安地天交陰阳和泰也

物不可以终通故受之以否

盛之极也入于衰泰之极也反而为否陰阳之交者不交矣

物不可以终否故受之以同人

上下不交所以成否同人则柔得位得中而应干畴昔俭德辟难之君子相与出而济之所谓于野利涉者也

与人同者物必归焉故受之以大有

能同乎人人亦与之所有者大大谓阳以柔得尊位而羣阳应也

有大者不可以盈故受之以谦

所有者大易至于盈谦者持盈可大之道也山下于地止而顺卑而不可逾也

有大而能谦必豫故受之以豫

以谦有大则絶盈满之累不犯人神之所恶大斯久矣当斯时也得不快然于心乎顺以动豫也

豫必有随故受之以随

阳随陰陰亦随阳随也和乐之际人喜随

以喜随人者必有事故受之以蛊蛊者事也

蛊随之反也有事之秋也平日之以喜随人者必以蛊而事其事也

有事而后可大故受之以临临者大也

可大之业因事而生蛊坏也非事也事因坏而起事其事而以大临小之业见二阳进而逼四陰駸駸乎大矣

物大然后可观【説文引地可观者莫可观于木】故受之以观

临非大义大者阳也以阳进而临陰故曰大德大则光辉着业大则黜猷烂人之所瞻仰也二阳在上四陰仰而观之

可观而后有所合故受之以噬嗑嗑者合也

大观在上则翕然向往吾知其必有合也观其德者信之观其业者从之也三阳合三陰若噬之而嗑

物不可以苟合而已故受之以贲贲者饰也

君臣父子夫妇昆弟朋友之际合也径情直行苟矣有情则有文束帛委贄教胄承欢亲迎倡随徐行雁行献纓赠缟文之所必至也柔来文刚刚上文柔贲也

致饰然【李作而】后亨则尽矣【淮南子引云剥之不可遂尽也与此不同】故受之以剥剥者剥也

文胜矣将灭质一阳在上而羣陰胜之几几乎尽矣故曰剥

物不可以终尽剥穷上反下故受之以复

元气无或息之理剥之阳穷于上七日来复则反于下矣硕果不食物固有然人亦如之

复则不妄矣故受之以无妄

周子曰不善之动妄也无妄则诚矣故无妄次复元者善之长一阳来复元善之存自见其天天理浑然不杂伪妄理欲之不并立也其几如此

有无妄然后可畜故受之以大畜

无妄者诚也诚以天德以固大畜之能止健畜天德也是以刚健笃实辉光日新其德

物畜然后可养故受之以頤頤者养也

物之生也必固而畜之然后可致培养之功使其滋息盛大人之修德亦然

不养则不可【李此下有以字】动故受之以大过

动者措诸事业也不專一则不能直遂不翕聚则不能散是故精义入神以致用人有不为而后可以有为志大则才大才大则事业亦大

物不可以终过故受之以坎坎者陷也

才过人者人忌之功过人者人危之动必以中为贵大过者又当知也不然得无坎圻乎一阳在二陰之中故陷

陷必有所丽故受之以离离者丽也【王昭素下增丽必有所感故受之以咸咸者感也晁以正古本取之毛西河曰上下分篇本文王旧文故夫子于上传至此而止不必增】陷而无所附则陷必深欲出坎之险必丽离之明一阳一陰相附丽也

右上经凡三十卦

有天地然后有万物有万物然后有男女有男女然后有夫妇有夫妇然后有父子有父子然后有君臣有君臣然后有上下有上下然后礼义有所错【荀爽传引易云礼义备则人知所厝】

三陰三阳一乾坤也男下于女两少相配一陰一阳两两相应则夫妇之义尤切父子以陰阳

之相感而生君臣上下以九五六二之相应而见一陰一阳彼此相交以交错之成文言为礼以交错之得宜言为义皆陰阳相感之用此夫妇之道闺门之中所以为万化之始也吳氏澄曰乾坤咸不出卦名者以其为上下经之首也

夫妇之道不可以不久也故受之以恒恒者久也天地之道悠久而无疆礼曰一与之齐终身不改久之谓也惟恒故久感而能久则化成

物不可以久居其所故受之以遯遯者退也

居其所胶于一而不迁不可以久也恒常也知常而不知变暗于物矣恒者天地之常经遯者物情之变态陰浸而长能无遯乎

物不可以终遯故受之以大壮

遯退也消也消则必长故壮遯阳退而壮阳长也

物不可以终壮故受之以晋晋者进也

晋者壮之势也不可以终壮言不止于壮也明出地上阳将四达岂仅壮乎

进必有所伤故受之以明夷夷者伤也

进而不已过矣日中则昃势也

伤于外者必反其家故受之以家人

于飞垂翼思其故乡舍家无复之矣閻氏彦升曰以利合者迫穷祸患害相弃也以天属者迫

穷祸患害相收也明夷之伤岂得不反于家人乎

家道穷必乖故受之以睽睽者乖也

周子曰家人离必起于妇人故睽次家人以二女同居而志不相得也

乖必有难故受之以蹇蹇者难也

和气致祥乖气致变内且睽矣能无难乎险而止其时也

物不可以终难故受之以解解者缓也

祸不可长必将解之解则缓矣缓也者出险而动也

缓必有所失故受之以损

事当解散之后势则缓矣缓则失防失检能无损乎

损而不已必益【説苑孔子告子路语与此不同按系刘子正自为辞他多类此】故受之以益

损之之至惩艾自深修省倍力益之所由来也

益而不已必决故受之以夬夬者决也

益之既多盈不自持能无夬乎一陰乘五阳之上有骄盈之意所当夬也

胡氏一桂曰咸恒十变为损益亦犹乾坤十变为泰否也

决必有所【李无所字】遇故受之以姤姤者遇也

阳决阴去小人也阴承阳遇君子也去小人即遇君子事相因也

物相遇而后聚故受之以萃萃者聚也

君子之不相遇也则踽踽独行耳遇则声应气求合志同方不言而同然观所萃而知道之隆也

聚而上者谓之升故受之以升

地中生木其势日上升也然必其类之聚而后积小以高大善类之升也亦然

升而不已必困故受之以困

自下而上进不知止将水落而泽竭困矣防升在上所以穷也

困乎上者必反下故受之以井

困泽上穷也其反为井则水上于木尚可汲以自养也

井道【虞无道字】不可不革故受之以革

井泥不食旧井无禽不革也井甃无咎井冽寒泉井收勿幕革也革则泥去泉冽而井成

革物者莫如鼎故受之以鼎

革固井道也而以革之事言之则化生而使之熟去故而即于新象之以器又莫如鼎所谓革故而鼎新也

主器者莫若长子故受之以震震者动也

鼎家之重器也祭祀用之而震为长子继父而主祭者也故震次鼎此以象相承者以言其德则动所以起下文也

物不可以终动【句李此下有动必二字】止之【句】故受之以艮艮者止也

动静相因震反为艮

物不可以终止故受之以渐渐者进也

静极复动艮以渐进

进必有所归故受之以归妹

渐进之道婚礼似之妇人谓嫁曰归进之渐而得所归也归妹有焉胡氏彦升曰晋者进也进必有所伤渐者进也进必有所归何也曰晋所进者有进而已此进必有伤也渐之所谓进也渐进而已乌有不得所归者乎

得其所归者必大故受之以丰丰者大也

得所依归可以有为事业必大同人之物必归焉者谓人归已此之得所归者谓已归人朱氏

震曰前曰与人同者物必归焉故受之以大有此曰得其所归者必大大有次同人者处大之道也丰次归妹者致大之道也

穷大者必失其居故受之以旅

席丰大而穷极之汰侈非分终并其所居之位而失之失所居则转为寄旅之寥落矣

旅而无所容故受之以巽巽者入也

寄旅之际落寞寡亲向之得所归者无所复入矣谁则容之惟巽则善入

入而后说之故受之以兑兑者说也

人情相拒则怒相入则说巽柔伏于下故入兑柔见于外故说

说而后散之故受之以涣涣者离也

泽见于外故说风行水上故涣巽以得说者终必散也散者说之尽也

物不可以终离故受之以节

离而不节涣者无所底止矣放诞散漫荡然礼法之外可为训乎予之以节则名教不致终溃也

节而信之故受之以中孚

节者制之于外孚者信之于中信于中则节者不知所苦

有其信者必行之故受之以小过

信之深而后行之力其才亦有过人者行易至于不足笃行者仁也勇也故大过曰动小过曰行非以信果得过之谓观大象君子以行过乎恭丧过乎哀用过乎俭可见

有过物者必济故受之以既济

才气过人乃克有济水火相制而亦相资才之胜物者亦然

物不可穷也故受之以未济终焉

天下之物无穷而吾之才有限济若已穷矣然繁变纷纭终不可穷也则是犹有未济者在也济之者又必有时也陰阳上下生生之理未有涯也

项氏安世曰坎离水火之交谓之既济此生生不穷之所从出也而圣人犹以为有穷也又分之以为未济此即咸感之后继之以恒久之义也蓋情之交者不可以久而无弊故必以分之正者终之右下经凡三十四卦

序卦传一篇圣人作之以明上下经六十四卦之序中间交接周通之意蓋理无所不在道无所不贯随举之而有其端在学者善领之而已乃或者以谓非圣人之书又或以谓非圣人之蕴妄也论设卦正法则乾坤震巽坎离艮兑八八相加论宋儒先天之法则干兑离震巽坎艮坤八八相加如用正法序之则干之后当继以无妄姤讼同人等卦既不得天地万物相生之理如用先天法序之则当自干夬大有大壮而终于观比剥坤将干之后即夬陰乎何不防姤陰之进而夬上乎夬而大有而大壮不亦急乎大观者当在比后而先之可乎方比也何遽剥乎剥尽而坤何以资生乎夫六位时成则天地万物各有定象矣不从陰阳之对待反易往复序之岂复与天地相似所谓与四时合其序者何在乎系辞曰范围天地之化而不过曲成万物而不遗序卦蓋有之矣不可谓非圣人之蕴也若夫乾坤之后继以屯而圣传曰刚柔始交而难生屯之后继以蒙而曰以刚中 之后继以需而曰云上于天其蕴自深而已散见于彖爻之间各举其显者见义言岂一端而已夫各有所当也

杂卦传

干刚坤柔

上经三十卦对待者六反覆者十二下经三十四卦对待者二反覆者十六此首举其对待者也乾坤者刚柔之宗故直言本体干之元亨利贞坤之元亨利牝马之贞悉由于此

坤【归藏爽】震【归藏厘】艮【归藏很】损【归藏员】大畜【归藏 】无妄【归藏母亡】升【归藏称】谦【归藏兼】蛊【归藏蜀】咸【归藏誠】涣【归藏涣】解【归藏荔】古归藏易久亡世所传者惟六十四卦名而又阙其四何氏取其名之异者附订诂又有瞿钦规夜分五卦岑 林端马徒三卦不知当周易何卦于义既不可揣臆而名同文异者十六其义之最无当者如坤之为爽赤色也诗小雅路车有爽韎韐有爽是也于坤顺之义何居震之为厘理也周书保厘东郊是也又予也诗大雅厘尔女士是也又与禧同福也贾谊传受厘宣室是也又读利曹子建皇太子颂潜和积石钟天之厘是也又与防同刘向封事贻我厘甿是也于震动之义何居至大畜之为 解之为荔俱无所取殆贗古也第以世有传之者附载于此以征异同

比乐师忧

反易卦师之反为比比之反为师比位尊而众附故乐师任重而馭众故忧比彖曰吉原筮元永贞不宁方来而师象则曰贞又曰丈人吉又曰无咎乐与忧之分可见朱氏震曰忧乐以天下也

临观之义或与或求

反易卦观之反为临临之反为观以大分言之临民为与众观为求然合言之则临者为与而所临者为求观者为求而所观者为与临之刚中与也而应则求矣观之下观而化求也中正以观天下则与矣

屯见而不失其居蒙杂【郭京作稚】而着

反易卦蒙之反为屯屯之反为蒙本义曰屯震遇坎震动故见坎险不行也蒙坎遇艮坎幽昧艮光明也苏氏轼曰君子以经纶故曰见盘桓利居贞故曰不失其居蒙以养正蒙正未分故曰杂童明故曰着按再三渎渎则不告杂也刚中志应着也

震起也艮止也

反易卦艮之反为震震之反为艮震阳动于下故曰起艮阳极于上故曰止

损益盛衰之始也

反易卦益之反为损损之反为益又咸恒之对待而否泰之近似也损刚上而柔下少男少女相对柔进而刚止之主于减损益刚下而柔上长女长男相乘则刚交于柔柔资于刚主于补益损之至则益益之甚则损循环相因故曰盛衰之始损上九曰弗损益之益上九曰莫益之或击之其义较然

大畜时也无妄灾也

反易卦无妄之反为大畜是无妄下卦之震上而为大畜之艮故曰刚上而尚贤大畜之反为无妄是大畜上卦之艮下而为无妄之震故曰刚自外来而为主于内畜极而通时为之也故上九曰何天之衢亨无妄而穷灾匪正也故上曰无妄行有眚

萃聚而升不来也

反易卦升反而为萃二阳聚于四五而阴乘之故曰刚中而应萃反而为升三阴上行巽柔方进故曰柔以时升亦曰刚中而应萃聚而多助故九四曰大吉无咎九五曰萃有位上六赍咨涕洟而亦无咎升往而不返故自初至五皆吉而上六则曰防升利于不息之贞

谦轻而豫怠【京作治虞作怡】也

反易卦豫反为谦鸣豫者为鸣谦也谦反为豫鸣谦者为鸣豫也谦者心虚故视已也轻豫者志满故自处也怠

噬嗑食也賁无色也

反易卦賁反为噬嗑离往居上艮反为震故曰柔得中而上行噬嗑反为賁离来居下震反为艮故曰柔来而文刚又曰分刚上而文柔頤中有物噬之而合食也白賁无咎质以为文无色也

兑见而巽伏也

反易卦巽反为兑柔外见而説兑反为巽柔下伏而入二卦与震艮对待震艮以阳为起止此以陰为伏见

随无故也蛊则飭【王肃本作节一云郑本作飭】也

反易卦蛊反为随上卦艮之刚下而为震二三上之刚居初四五故曰刚来而下柔随反为蛊上卦兑之柔下而为巽初四五之刚居二三上二三上之柔居初四五故曰刚上而柔下随从新也忘其故蛊理坏也飭其新

剥烂也复反也

反易卦复反为剥羣陰剥阳生意欲尽如物质之朽故曰柔变剥反为复一阳初动生意复萌如往者之来故曰刚反

晋昼也明夷诛也【孙奕以诛当作昧叶当如暮杨慎云诛有之由切昼亦音周毛西河曰鱼虞尤三韵竝通不必读周且平上去三声竝通昼亦不必读周此如风三星在隅与见此邂逅叶无声无臭与万邦作孚叶又如张衡西京赋取殊材于八都岂稽度于往旧淮南子纵志舒节以驰大区可以步而步可以骤而骤皆然按顾氏音学五书云古音注后人误入四十九宥亦三声通韵不必读周】

反易卦夷反为晋离往居上故曰柔进而上行明出地上昼之象晋反为明夷离入坤下故曰明入地中晦其明也伤之象诛伤也

井通而困相遇也

反易卦困反为井上卦之兑下为井下卦之巽养而不穷通也即不困井反为困下卦之巽上为困上卦之兑刚遇柔揜困也即不通

咸速也恒久也

反易卦恒反为咸巽柔上为兑震刚下为艮故曰柔上而刚下刚柔交感为咸有感则速男女不二咸反为恒艮刚上为震兑柔下为巽故曰刚上而柔下刚柔定位为恒有恒则久夫妇偕老

涣离也节止也

反易卦节反为涣节之坎刚也来居下卦而九二得中节之兑反为巽柔也居上卦六四得位故曰刚来而不穷柔得位而上同风行水上其势涣散故离涣反为节涣巽乘坎柔外而刚内节坎乘兑刚外而柔内又九五得中故曰刚柔分而得中节以制度故止

解缓也蹇难也

反易卦蹇反为解下卦之艮往外为震居坎之上是出乎险矣得以稍舒故缓震动坎险所谓动而免乎险也解反为蹇上卦之震反为艮来坎之下是险在前矣适际忧危为难坎险艮止所谓见险而止也

睽外也家人内也

反易卦家人之反为睽内离居上外巽反为兑居下离中女志在乎坎兑少女志在乎艮情不相亲外也故曰火动而上泽动而下二女同居其志不同行睽之反为家人离来居内兑反为巽居外一三五刚爻协柔二四柔爻下刚俱得其正九五六二得中而应情谊相亲内也故曰男女正天地之大义

否泰反其类也

反易卦泰反而否干上而坤下故曰大往小来天地不交否反而泰坤上干下故曰小往大来天地交否塞而泰通也否极而泰泰极而否故否之上九曰倾否泰之上六曰城复于隍

大壮则止【熊氏来氏作上】遯则退也

反易卦遯之反为大壮艮反为震在干之上刚以动壮往也然彖曰利贞大象曰非礼勿履则止之义也不然得无触藩而不能退不能遂乎壮之反为遯震反为艮在干之下刚虽当位而应然陰浸而长阳离而往遯也故彖曰小利贞大象曰遠小人 不恶而严则退之为也此好遯嘉遯肥遯所以吉无不利也不然得无系遯之厉而有疾惫乎

大有众【荀作终】也同人亲也

反易卦同人之反为大有离在干上六五一陰居尊得中羣阳皆统众也故曰柔得尊位大中而上下应之大有之反为同人离来干下六二中正羣阳皆与亲也故曰柔得位得中而应乎干

革去故也鼎取新也

反易卦鼎之反为革巽往离上为兑为泽上泽下火火盛则水消水决则火灭故彖传曰水火相息是去故之义也革之反为鼎兑来离下为巽为木上火下木木入而火燃故彖传曰以木巽火烹飪也是取新之义也

小过过也中孚信也

对待卦中孚之对为小过二阳四陰陰多于阳逾其常也故过小过之对为中孚二陰四阳陰虚阳实得其中也故信传曰小者过谓陰也刚得中谓二五也

丰【句】多故亲寡【句】旅也

反易卦旅之反为丰艮上为震居离之外以明而动丰大之象豪盛之时车马填门多故之谓也六五曰来章有庆誉其故尤善丰之反为旅震来为艮居离之下止而丽乎明少男下于中女非其家也旅寓之象羁穷之际谁悲失路亲寡之谓也六二曰得童仆贞有亲为难

离上而坎下也

对待卦离对坎两阳一阴而虚其中故明而炎上象传曰明两作离炎于上也坎对离两阴一阳而实其中故陷而润下象传曰水洊至习坎润在下也

小畜寡也履不处也

反易卦履之反为小畜以一阴而系众阳其势寡象曰密云不雨小有畜也小畜之反为履以兑柔而蹶干刚不遑宁处象曰履虎尾危乎履也

需不进也讼不亲也

反易卦讼之反为需坎上干下险在前而刚健不陷有所俟而不前象曰云上于天安以俟之也需之反为讼干上坎下上刚下险情既乖而思逞象曰天与水违行乖而相戾也

大过颠也姤遇也柔遇刚也渐女归待男行也颐养正也既济定也归妹女之终也未济男之穷也夬决也刚决柔也君子道长小人道忧也

右王氏本程传本义竝同

大过颠也颐养正也既济定也未济男之穷也归妹女之终也渐女归待男行也姤遇也柔遇

刚也夬决也刚决柔也君子道长小人道忧也

右蔡氏本

自大过以下卦不反对本义曰或疑错简今以韵叶之又似非误盖用王氏本蔡氏又据卦改定如右按反对为义有卦可证有经可据且篇中亦不全用韵也蔡氏改之良是然王氏本于句之次第虽不合卦而反对之义则仍与卦合即如原文亦未尝不见反对之意但蔡氏本犹便观玩故两存之而解说以蔡氏本为次

大过頤对待卦頤之对为大过兑上巽下四刚在中而上下两柔故彖曰栋桡传曰本末弱弱故桡桡则颠也大过之对为頤艮上震下四柔中虚而上下两刚有口象故彖曰頤贞吉观頤自求口实传曰养正则吉也

既济未济反易卦未济之反为既济坎上离下水火交故相济男外女内九五六二刚柔得位故定传所谓刚柔正而位当也既济之反为未济离上坎下水火不交不能相济男内女外六五九二刚柔不正而男为女之纲不正其身非家人之道故穷传所谓不当位也

归妹渐反易卦渐之反为归妹震上而兑下以爻观之则三五两柔乘刚刚柔交而女下男故曰归妹妇人谓嫁曰归归则女之终事归妹之反为渐巽上而艮下以爻观之则阴皆近阳以德观之则止而巽故曰渐进不逾节之谓渐渐则女待男行于归之礼姤夬反易卦夬之反为姤兑反为巽来干之下五刚在上一柔初进若相遇然姤之反为夬巽反为兑在干之上五刚并进上据一柔欲决去之去疾莫如尽虽一阴而必并力去之此君子之道长小人之忧也由此例之则姤之相遇小人方进为君子之忧亦自可知故不重出夬上六曰无号终有凶传曰终不可长姤彖传曰勿用取女不可与长也阴阳消长之几圣人慎之如此

右传一篇卦之对待不易者八反易者二十八以三十六为六十四盖合上下经阴阳往覆之义而括之以明易之要也夫刚柔之相需泰否剥复夬姤既济未济之相寻六十四卦中自然之几如寒暑之更昼夜之代确不可移间不容发文王周公情见乎辞圣人特表而出之所以开示后学者要矣胡氏炳文以谓始干终夬有先天图意非也圣人之于易以乾坤为纲震巽坎离艮兑为用以八卦为纲八八相加为用反覆推移无他谬巧乾坤坎离自相对不可易也震艮巽兑兑巽艮震合之为小过中孚大过頤亦相对不可易反覆之而无他象也此外则阴阳一易位而象殊象殊而爻殊爻殊而理殊矣所为反覆往来者之多也然而相对者实相需也往来之大者也观天地日月而乾坤坎离之对待可睹矣小过大过中孚頤亦一大坎离也

易翼說卷五

湖北巡抚晏斯盛撰

彖上传

大哉乾【句】元【句】万物资始【句】乃统天【句】云行雨施【句】品物流形【句】大明终始【句】六位时成【句】时乘六龙以御天大哉赞元之大也元者最初之理乾元者干之元也乾象天数奇气阳德健其最初者则天之心健行之肇而阳气之萌也万物之所资以始也元不可见于万物之始见之所谓生意者也观万物之生意知天心之呈露一元之理无所不贯其亨其利其贞皆由于此此所谓天之心也故曰统天此乾元之所以为大也云雨者天之气品物者气之聚云之行雨之施品物之形之流非即物之资始乎大明天之体象也始元也六位六爻大明在上终即其始无有间断无有止息六位因时而成一卦六爻皆一元之动静六龙即六阳爻也天地之间无非一元之理为之主宰以为运行也故曰御天而统天益可见矣云行雨施品物流形申言万物资始之意大明终始六位时成时乘六龙以御天申言统天之意皆谓元也

九家易曰观干之始以知天德惟元为大故曰大哉元者气之始也

朱子语类曰元者天地生物之端倪也元者生意在亨则生意之长在利则生意之遂在贞则生意之成若言仁便是这意思仁本生意生意则恻隐之心也苟伤着这生意则恻隐之心便若羞恶也是仁去那义上 若辞让也是仁去那礼上 若是非也是仁去那智上 若不仁之人安得更有礼义智

乾道变化【句】各正性命保合大和【句】乃利贞【伪古本以此次乃利贞之后谬】

释亨利贞之本一元也乾道也者元也统天以御天者变化运行而资始流形者宣通交畅即其亨也亦各尽其利矣形之流而资之于始者性始之为所资而流为形者命元气至是分定矣水流湿火就燥各一其元不相假借各正也性命之理俱冲融满足元气至是完固矣果之硕木之干具体一元无少亏欠则保合也是其贞也亦即其利也乃利贞云者言由乾道之变化而乃然也此乾元之所以大也

首出庶物【句】万国咸宁

此言圣人之体元而亨利贞也首出庶物元也具此元德变而通之化而裁之不异乾道之变化而亨通尽利则地平天成于变时雍即万物之各正性命保合太和也所谓本天亲上本地亲下圣人作而万物睹者也

八卦多释卦名而乾坤不释何也八卦之首阴阳之宗故直赞起义然曰大则知大始曰至则合无疆亦已释之矣文法若倒揭然未尝不与释卦名者相近然泰否谦贲颐旅节等卦亦不释卦名古人文章正不必拘板如一

分四德而提重一元方与天地相似非生而知之心与干契不能 明至此先儒以大通而利在正固了之于干之体象未得也又向来知乾元资始之为元而乃以云行雨施品物流形为亨以大明终始三句为圣人之元亨以乾道变化三句为利贞而以首出庶物三句为圣人之利贞文理割裂意义不贯大失本来面目如谓品物流形为亨则是品物咸亨混入坤象矣且资云雨而流其形犹然始生之事而非亨也又此节既已释亨下节将何所指无已则以为圣人之元亨不知句内大明字六位时成时乘六龙等字究无下落且传明言六位六龙而独以九五一爻当之仍牵合也保合太和以为利贞而于乾道变化四字亦无所着首出庶物万国咸宁其于咸宁固有利贞意而首出庶物于利贞之义则大不类也反覆潜玩提重一元以贯亨利贞与干之体象正相浑合亦与文言相 明末二句乃言圣人之事条理分明而意味亦无穷也

先卦之元亨利贞而后及圣人坤亦先卦之元亨利贞而后及君子次第分明

至哉坤【句】元【句】万物资生【句】乃顺承天【句】坤厚载物德合无疆【句】含
光大品物咸亨

至哉赞辞谓能配大坤元者坤之元也坤象地数偶质阴德顺其最初者则地之力顺行之肇而阴质之萌也坤之元亦无可见于万物之生见之犹所谓生质者也观万物之生质知地德之始基一元之用所以着干之生其亨其利其贞亦起于此盖资之以生者由有资之以始者也故曰乃顺承天此坤之元也顺承者坤之厚故物生而兼载之天大无外无疆也大生者惟地能载故德与之合犹所谓配天者也其为载也含容而 博光华而盛大此万物丰嘉之象亨也即变化之通

游氏酢曰其静也翕故曰含 含无所不容 无所不有其动也辟故曰光大光无所不着大无所不被此所以德合无疆也

牝马地类行地无疆【句】柔顺利贞

释利牝马之贞坤纯阴地象牝阴物故曰地类龙飞天而马行地天行健而马之行地无疆此取象之切也牝马行地至柔至顺是其利也无疆则其贞也此据其义而言也言以柔顺为利而且贞也拟而言之则曰利牝马之贞质言之则曰柔顺利贞

君子攸行【句】先迷失道【句】后顺得常【句】西南得朋乃与类行【句】东北丧朋

乃终有庆【句】安贞之吉【句】应地无疆君子攸行起下之辞即君子有攸往也失道失坤道也坤不先物故先则迷得常得坤之常理也坤以顺承为常故后则得之西南防离兑阴卦皆坤之类不先迷也故得朋东北坎艮震阳卦阴以阳为主丧朋则从阳矣后顺得常也故终庆应地无疆谓合地道

屯【句】刚柔始交而难生【句】动乎险中【句】大【句】亨【句】贞【句】雷雨之动满盈【句】天造草昧【句】宜建侯而不宁

刚柔谓乾坤始交谓震难生谓坎此屯之体震动坎险此屯之德大亨贞释元亨利贞大亦长义玩无利字则大字另读不释利字者于亨贞内见也雷震雨坎雷雨交作故满盈观雷雨之交作则知天意之所在草杂乱也昧晦防也雷雨交作万物将生杂乱晦防天若啓之造犹言开辟当此之际宜作之君不遑宁处皆主震初言释利建侯不释勿用有攸往者建侯不宁则不轻往矣故省

防【句】山下有险【句】险而止【句】防【句】防亨【句】以亨行时中也【句】匪我求童防童防求我【句】志应也【句】初筮告【句】以刚中也【句】再三渎渎则不告【句】渎蒙也【句】蒙以养正【句】圣功也【张元冲传明晋府本止字上有能字防亨二字下无以亨字】

山谓艮险谓坎坎险方来而上遇艮止故曰蒙此释卦名以亨行时中谓亨之道行乎时中也以二五之得中也盖因下匪我求童防童防求我初筮告再三渎渎则不告而言志应刚中实指其义志应谓五与二应刚中谓九二也渎蒙则非亨道此释亨之理及匪我求童防五句小学为大学之基贞正也养之以正即以作圣释利贞

需【句】须也【句】险在前也【句】刚健而不陷【句】其义不困穷矣【句】需有孚光亨贞吉【句】位乎天位【句】以正中也【句】利涉大川【句】往有功也【位乎石经作位于】

须有所待也险在前谓坎刚健谓干刚健故不为坎困皆能需之义此释卦名天位谓九五居中得正释有孚光亨贞吉也往有功谓干刚能出坎险释利涉大川

讼【句】上刚下险【句】险而健【句】讼【句】讼有孚窒惕中吉【句】刚来而得中也【句】终凶【句】讼不可成也【句】利见大人【句】尚中正也【句】不利涉大川【句】入于渊也

上刚谓干下险谓坎卦之体坎险干健卦之德此讼之所以名刚来得中坎之九二自需之五而来居二也中实故有孚得中在内不过于刚故窒惕中吉讼不可成忿不可长也释终之所以凶中正谓九五居中得正能靖讼者释大人渊谓坎坎下陷天与水违行不能济者故曰入释不利涉川

师【句】众也【句】贞【句】正也【句】能以众正【句】可以王矣【句】刚中而应【句】行险而顺【句】以此毒天下而民从之【句】吉【句】又何咎矣

众正大槩释其名义因以见王者之师顺人心而能正天下也刚中谓九二即丈人也应谓六五丈人之合德者坎险坤顺险则毒顺则从释吉字义皆刚中而应为之也又何咎矣言必如是而后无咎 毒者攻治之谓语曰亨之毒之毒药所以攻病而能活人

比【句】吉也【句】比辅也【句】下顺从也【句】原筮元永贞无咎【句】以刚中也【句】不寧方来【句】上下应也【句】后夫凶【句】其道穷也【比吉也郭京王昭素皆谓误增也字朱子本义谓三字俱衍未安】

吉也也字引起下二句之辞言比之吉也以比辅而下顺从也辅谓众阴皆附下顺从谓坤与四羣阴相从槩从体象释卦名刚中谓九五九五干阳正位故有元善永贞贞固之德上下应九居尊而羣阴从有归附不已之意其道穷谓上六人皆归而已独后失比之道穷无所之故凶此释辞义

小畜【句】柔得位而上下应之【句】曰小畜【句】健而防【句】刚中而志行【句】乃亨【句】密云不雨【句】尚往也【句】自我西郊【句】施未行也

四承五六柔爻以柔居上卦之下故亦曰得位羣阳皆系于一阴故上下应是皆一阴为之也凡卦阳大阴小以阴畜阳故曰小畜此释卦名干健防入二五刚中健而能巽又刚而得中故志行此所以亨也本卦与履相反易三往居四六四阴柔密云也不雨未雨也雨之势也故曰尚往自我施之始也邑外谓之郊西郊近地未及远也故曰施未行文辞本相连属而传分别释之者所以着小畜之时也密云不雨如三分有二自我西郊如以服事殷观此则周公之志

亦觀矣

履【句】柔履剛也【句】說而應乎干【句】是以履虎尾不啞人亨【句】剛中正【句】履帝位而不疚光明也【疚陸續作疾誤】

履小畜之反六四之柔來履三之剛又兌柔干剛柔躡乎剛之下亦履也此以卦體釋名兌說干健柔以應剛故亨此以卦德釋亨義帝位謂九五剛中正故光明光明故不疚又申不啞人亨之意以卦體有不盡之義也

泰【句】小往大來【句】吉【句】亨【句】則是天地交而萬物通也【句】上下交而其志同也【句】內陽而外陰【句】內健而外順【句】內君子而外小人【句】君子道長【句】小人道消也天地乾坤體象天氣下降地氣上行故曰交交則氣通故吉且亨泰為否之反陽剛來居內陰柔往居外卦中往來之義吉亨之理也上下君子小人又以人事言之志同而後謂之泰則上下之交非徒以其文也此又君子小人內外之辨消長之機也

否之匪人【句】不利君子貞【句】大往小來【句】則是天地不交而萬物不通也【句】上下不交而天下無邦也【句】內陰而外陽【句】內柔而外剛【句】內小人而外君子【句】小人道長【句】君子道消也

否泰之反干往坤來干外坤內無邦則志不同可知內陰外陽內柔外剛色厲內荏亦小人之象

吳氏綺曰六十四卦獨乾坤泰否四卦言陰陽乾坤陰陽也惟泰否二卦內外皆得乾坤之全體故亦以陰陽言也

同人【句】柔得位得中【句】而應乎干【句】曰同人【句】同人曰同人于野亨利涉大川【句】干行也【句】文明以健【句】中正而應【句】君子正也【句】惟君子為能通天下之志【王氏弼曰所以能同人于野而利涉者非二之所能也以干行也故特加同人曰孔氏穎達曰同人曰猶言同人之卦曰也按此則程子易傳作美文朱子本義作衍文俱未安】

柔得位得中谓六二应乎干五五应而羣阳俱应此释卦名同人曰三字述象之辞干行健也健则无私健则有功干在外卦来同于二是有大公之心兼克济之才于野涉川所由取象又离文明而干健五中正而应乎二皆以正合也二五得中故曰志君子之志正故天下之志通释利君子贞

大有【句】柔得尊位大中【句】而上下应之【句】曰大有【句】其德刚健而文明【句】应乎天而时行【句】是以元亨

柔得尊位大中谓六五上下应谓九二应而羣阳俱应皆为所有阳大故曰大有此释卦名刚健谓干文明谓离当其可之谓时以离得干之应当乎天理与时偕行释辞元亨

谦亨【句】天道下济而光明【句】地道卑而上行【句】天道亏盈而益谦【句】地道变盈而流谦【句】鬼神害盈而福谦【句】人道恶盈而好谦【句】谦尊而光【句】卑而不可逾【句】君子之终也【亏马融本作毁福京房后汉刘备碑作富】

一阳止于坤顺之下有天道下济光明照物之象坤顺行乎艮刚之上有地卑上行之象合谦之亨而言之天之下济地之卑谦也光明上行则亨亏盈益谦者天之运变盈流谦者地之势害盈福谦者鬼神之性恶盈好谦者人之情由此观之谦有必亨之理谦尊而光言尊者能谦则威望愈见光显卑不可逾言卑者能谦则德器不可限量释君子有终

豫【句】刚应而志行【句】顺以动【句】豫【句】豫顺以动【句】故天地如之【句】而况建侯行师乎【句】天地以顺动【句】故日月不过而四时不忒【句】圣人以顺动【句】则刑罚清而民服【句】豫之时义大矣哉

刚谓四应谓羣阴相从阳主乎阴则志行卦之体也顺谓坤动谓震卦之德也此释卦名天地之气运无非顺以动则以豫之顺动而建侯行师自无不利释辞已毕又引申而极赞之日月之往来四时之递禅天之顺以动也不过不忒利也圣人体天因民立法明刑弼教顺以动也大畏民志民之服也利也当其候之谓时合乎宜之谓义动之顺与不顺时为之义为之也动者之所不可不审也故赞其大

程子曰诸卦时义与用之大者皆赞其大矣哉豫以下十一卦是也豫随遯姤旅言时义坎睽蹇言时用颐大过解革言时各以其大者也项氏安世曰豫遯姤旅皆若浅事而有深意故曰时义大矣哉欲人之思之也坎睽蹇皆非美事而圣人有时而用之故曰时用大矣哉欲人之

别之也頤大过解革皆大事大变也故曰时大矣哉欲人之谨之也

随【句】刚来而下柔【句】动而说【句】随【句】大亨贞无咎而天下随时【句】随时之义大矣哉【大亨下郭京谓脱利字谬天下随时时字王氏肃本作之字随时之义句王氏肃本作随之时义】

随与蛊两卦反易蛊之艮反为震防上为兑艮刚兑柔刚来柔下是阳之随阴而阴亦随阳也震动兑说是体与意之相随也释卦名随则与时偕宜之道也天下之大莫不因时故大亨且贞而后无咎非其时则失随之正其义不可不审故赞其大

蛊【句】刚上而柔下【句】防而止【句】蛊【句】蛊元亨而天下治也【句】利涉大川【句】往有事也【句】先甲三日后甲三日【句】终则有始【句】天行也

随反为蛊艮上防下震反为艮兑反为防体与爻皆刚往上而柔来下阴阳不交防入而艮止情坏之象此释卦名事坏必有以救之元亨则坏者治矣艰难之际事之所集若济巨川舟楫相资故象为涉川作事在谋始甲者日之首始也天运循环周而复始乱极治生理之必然故曰天行

临【句】刚浸而长【句】说而顺【句】刚中而应【句】大亨以正【句】天之道也【句】至于八月有凶【句】消不久也

刚谓初九九二长谓方进阳临阴大临小临之义也释卦名兑说坤顺刚中谓九二应谓六五刚长而内说外顺刚中而应柔中此所以大亨且贞阳长阴消天道之常故曰天之道时至于临则观之反易而知剥之将及阴虽消而不久夏至建酉之月为观说见翼宗三

大观在上【句】顺而防【句】中正以观天下【句】观盥而不荐有孚颙若【句】下观而化也【句】观天之神道而四时不忒【句】圣人以神道设教而天下服矣

大谓阳在上谓九五上九在羣阴之上内坤外防中正谓九五天下谓羣阴此释卦名下观而化因颙若之孚也诚相感也感则神矣四时不忒天之神为之神道设教而天下服圣人之神为之要皆诚也九五刚中观之本也

頤中有物曰噬嗑【句】噬嗑而亨【句】刚柔分【句】动而明【句】雷电合而章【句】柔得中而上行虽不当位【句】利用狱也山雷頤象口之中虚此中间一阳若物在頤中者必噬之而后合名卦之义也为体三刚三柔离析分布井然不混为德震动而离明为象震雷离电并作而分章为位本卦与贲反易而成以贲下卦离之柔中易而上行为外卦六二者上为六五柔亦得中皆亨之道夫以刚柔之分布动断而明察明动并用幽隐俱章为狱之利以位言之六五以阴居外虽若不当然柔而得中则不滥不纵寬猛得宜矜恤明允兼而有之此其所以利用狱也

贲【句】亨【句】柔来而文刚【句】故亨【句】分刚上而文柔【句】故小利有攸往【句】天文也【句】文明以止【句】人文也【句】观乎天文以察时变【句】观乎人文以化成天下【贲亨与比吉同例朱子本义疑衍未合故小利有攸往下郭京据王弼本有刚柔交错四字毛西河曰考王弼本竝无此四字但以四字释柔来文刚刚上文柔二句耳增此妄矣】

噬嗑反易而为贲离柔卦也自噬嗑之外卦来居内而文艮之刚刚主质而离明在内六二中正则美德中含文以辅质调剂得宜此亨之道艮刚卦也分自噬嗑内卦之震上为外卦而文离之柔柔主文而艮刚在外上九坚确则华而不靡质以成文维持勿敝此小利有攸往之事以柔来文刚刚上文柔观之则刚柔之交错无异天文经纬之错综以两体之德观之则离文明而艮止是即人文之礼达而分定鸟火虚昴天文也而四时之变可察法度典章人文也而天下之化可成皆贲之用也

剥【句】剥也【句】柔变刚也【句】不利有攸往【句】小人长也【句】顺而止之【句】观象也【句】君子尚消息盈虚【句】天行也【剥剥也郭京本作剥剥落也谬】

变即剥字之义一阳在上而羣阴害之为刚之祸变此释卦名小人长谓羣阴方盛坤顺而艮止之言阴长当止释不利有攸往又观此卦之象前乎此者方大观在上而即至于剥剥之后乃可以复消息盈虚天运必然当此之际君子审之必不轻往

复【句】亨【句】刚反【句】动而以顺行【句】是以出入无疾朋来无咎【句】反复其道【句】七日来复【句】天行也【句】利有攸往【句】刚长也【句】复其见天地之心乎【刚反动而以顺行汉魏皆如此读以七字为句虞翻曰刚从艮以入坤从震反故曰

反动按刚反谓艮反为震以剥复反易言也动而以顺行则以卦体震坤言甚为明白自当以刚反为句但不必如朱升本增一也字耳】

剥之反易为复刚反释复之所以名刚谓初九反谓自剥之上九而来阳气萌生日见其通释复之所以亨动谓震顺谓坤动焉而顺何往不可释出入无疾朋来无咎天行即健也日度也由剥至复少阳数七故七日仍行阳道释反复其道七日来复刚长则君子道长可知释利有攸往元者天地之心也运行无终息之理剥之极而复来其为于穆不已者于是见之

无妄【句】刚自外来而为主于内【句】动而健【句】刚中而应【句】大亨以正【句】天之命也【句】其匪正有眚【句】不利有攸往【句】无妄之往何之矣【句】天命不祐【句】行矣哉【动而健郭京本作动而愈健祐马融作右连下云天不右行谬陆德明本作佑误】

无妄与大畜反易相推大畜外卦之艮来本卦之内成震而为一卦之主震为干之初爻初九得干之一体内有主则实体乎干则纯此无妄所以名其为德则震动干健其为体则九五刚中而六二正应此所以大亨且贞纯是实理一无私伪无妄所以全其天也匪正则妄妄则起愆无妄之往往即妄也非天也行复何之

大畜【句】刚健笃实辉光【句】日新其德【句】刚上而尚贤【句】能止健【句】大正也【句】不家食吉【句】养贤也【句】利涉大川【句】应乎天也【辉光日新郑虞管崔诸儒皆于此为句王弼本以日新其德为句俱通】刚健谓干笃实谓艮辉光者刚健笃实之日新者刚健笃实之功凡此皆所畜者大故也此名以义见者本卦与无妄反易震反为艮刚往居上六五虚中尚而敬之又为卦之主爻艮止干健大者所以能畜惟其刚正为之也此释利贞养贤由六五之所尚也故不家食应天谓应干以其健故能济

颐贞吉【句】养正则吉也【句】观颐【句】观其所养也【句】自求口实【句】观其自养也【句】天地养万物【句】圣人养贤以及万民【句】颐之时大矣哉

养正则吉释彖辞首句颐之大防如上之由颐正也余爻之颠拂则不正也颠拂而得从由颐者亦近于正也观其所养谓观其所养之道观其自养谓观其所自养之实养其大者为大人上九之由颐也养其小者为小人初九之朵颐也盖养人者必能自养自养之正者在于养人推而言之养道之大莫如天地圣人养万物养贤以及万民养之最得其正者故极赞其时之大养万物养贤及万民上九之象

大过【句】大者过也【句】栋桡【句】本末弱也【句】刚过而中【句】防而说【句】行【句】利有攸往乃亨【句】大过之时大矣哉阳大阴小阳多于阴故曰大者过此释卦名本谓初末谓上弱阴柔本末之所以弱者以中四爻刚之多也本弱则下无以自立末弱则上不能相承栋之所以桡也人事用刚之过亦如之败道也然亦可以亨者以爻位二五得中而卦德防入兑说中则刚者不至于暴烈防而说则刚者亦未尝为决躁如是以行乃有亨道当大过之时者宜审也故赞其大

习坎【句】重险也【句】水流而不盈【句】行险而不失其信【句】维心亨【句】乃以刚中也【句】行有尚【句】往有功也【句】天险不可升也【句】地险山川丘陵也【句】王公设险以守其国【句】险之时用大矣哉

险坎之陷也重险两坎也歷险者重则习之义也水坎象性主流往过而来续常流而不盈至平而有则流而不盈故能行险是之谓润下润下者其性也即其信也此释有孚刚中谓二五刚而得中心心惟刚则不挠于物中则不溢于邪此所以亨往有功刚中之见于事者心亨则行亦可尚也天之不可升险也地之山川丘陵险也在人则国之城池陁壑亦险也当险之时有险之用故赞其大

离【句】丽也【句】日月丽乎天【句】百谷草木丽乎土【句】重明以丽乎正【句】乃化成天下【句】柔丽乎中正故亨【句】是以畜牝牛吉也【土王氏肃作地张氏玩辞离丽也下即接柔丽乎中正三句后接日月丽乎天四句毛西河谓较与诸卦辞例相合按本文承丽字下亦自相从不必改易】

丽歷也阴歷乎阳故曰丽此释卦名阴得阳而明在天则日月见其光辉在土则百谷草木其华实此离之义也卦象上下皆离重明也丽乎正则其明四照不为偏蔽君明于上臣明于下上下皆正文明于世天下化成此离所以利于贞也以爻言之六五得中六二得中即得正是皆利乎中正中正则虚而明明则通此离之所以亨也是皆柔之善物也牝牛柔象坤为牛离自坤来六二六五尤其本质坤利牝马之贞离畜牝牛而吉明乎柔中之善也

彖下传

咸【句】感也【句】柔上而刚下【句】二气感应以相与【句】止而说【句】男下女

【句】是以亨利贞取女吉也【句】天地感而万物化生【句】圣人感人心而天下和平【句】观其所感而天地万物之情可见矣

人心寂然耳动以心之所同则感陰之欲得阳阳之欲得陰心之所同也以卦体观之咸恒两卦反覆相推恒之防上而为兑恒之震下而为艮兑柔而艮刚故曰柔上而刚下有感即有应应亦感也以卦爻观之一刚一柔既以对待相为感应而初四二五三上又以上下相为感应刚柔相与咸之所以名也以言其德则艮止而兑说以言其象则艮男而兑女止而为说好合之情诗所以咏嘉止男下乎女倡随之义礼所以重亲迎也其道亨通而利于正其事则取女吉也此释卦辞天地之交感咸之大者圣人之感人心即此理也观其所感以卦爻言天地万物之情统人心言此极言感通之理也

恒【句】久也【句】刚上而柔下【句】雷风相与【句】防而动【句】刚柔皆应【句】恒【句】恒亨无咎利贞【句】久于其道也【句】天地之道【句】恒久而不已也【句】利有攸往【句】终则有始也【句】日月得天而能久照【句】四时变化而能久成【句】圣人久于其道而天下化成【句】观其所恒而天地万物之情可见矣

恒之为字心亘之合心亘亘常存也久而不变所以为恒本卦咸之反易艮刚上而成震兑柔下而成防故曰刚上柔下雷风两体刚柔对待故曰相与防入震动各成其德初四二五三上一刚一柔彼此相应刚上柔下分阳分陰之定分震动防入雷风相薄之定体防之与动震防自成之一德刚柔皆应卦爻不忒之正位皆恒也此释卦名恒之为道正固而已矣人心有恒事必亨通行无过咎而所利者要以贞之正固久于其道正而固者主之非然则不恒其德何能久乎斯道也天地之道也天健行不息而地顺应无疆皆恒久而不已也恒之体也动而不穷变通尽利故又利有攸往恒之用也日月之照四时之成恒之大者圣人之化即此理也日月之久照曰得天随天左旋以为昼夜也四时之久成曰变化一气推迁以为节候也久于其道悠久无疆与天地配也天地万物之情亦统天下之人言此极言恒久之道

遯【句】亨【句】遯而亨也【句】刚当位而应【句】与时行也【句】小利贞【句】浸而长也【句】遯之时义大矣哉

遯而亨明其为遯之亨也因刚当位而言起下之辞刚当位谓九五应谓六二与时偕行以其时上下之志犹固也然当陰之渐长欲直行其志亦有不能故小利贞遯之亨当如此大象所谓君子以遠小人 不恶而严者是也此遯之时为之义之所当审也

程传谓君子遯退乃其道之亨此处遯之道自刚当位而应以下则论时与卦才尚有可为之理此分遯而亨也为一意下文又一意也文气不免齟齬

朱子语类问遯亨遯而亨也分明说能遯便亨更说刚当位而应与时行也是如此曰此其所以遯而亨也陰方防为他刚当位而应所以能知时而遯此以刚当位而应与时行也一段为能遯也又不合卦才与九五嘉遯之爻位难通详玩文意遯之亨小利贞与睽之小事吉困之亨贞大人吉诸卦俱以其才言之而遯之刚中而应尤善故有亨理蓋陰渐长而犹未至于否之匪人也辞意遯字絕句亨字又句小利贞又句亨小利贞两句相足传意亦层层相足言遯本非亨而其为亨也以九五刚当位而六二应故与时行也亨也而必小利贞者以陰浸长避小人之恶也君子之志志在维世故九五爻曰嘉遯而传曰以正志也遯不必其避世也危行言逊亦遯意至上九则庶几高世遠俗者矣

大壮【句】大者壮也【句】刚以动故壮【句】大壮利贞【句】大者正也【句】正大而天地之情可见矣

大谓阳四阳正盛是大者壮也刚谓干动谓震刚以动则有壮往莫御之意此释卦名大者正亦据阳而言阳气刚明贵乎得中如九二是也此释利贞又举天地之情以明之天以阳为正地承天从阳者也是天地皆以阳为正所以成其大故复于一阳见天地之心壮于四阳见天地之情

晋【句】进也【句】明出地上【句】顺而丽乎大明【句】柔进而上行【句】是以康侯用锡马蕃庶昼日三接也

明出地上谓离在坤上此晋之象坤顺而离丽以顺承明盛世一德晋与明夷反覆相推明夷之离上行坤上则六二之柔上进于五而臣得覲君恩宠稠叠于此可见以释彖中之彖

明入地中【句】明夷【句】内文明而外柔顺【句】以蒙大难【句】文王以之【句】利艰贞【句】晦其明也【句】内难而能正其志【句】箕子以之【内文明而外柔顺李鼎祚本无而字文王以之郑荀俱作似之王肃作能又文王上有惟字俱讹】

明离也地坤也离在坤下是日入地中伤其明矣此释卦名离在内内文明也坤在外外柔顺也此释卦德大难关乎天下之难蒙被也谓非意之遭文王当羑里之时正其事也故引以实之独言文王者作易忧患之心于此见也晦其明外坤晦内离明六五柔中深自韬晦不见其二之明内难离伤于内一家之难也正志守已不枉也此六五爻义以释利艰贞箕子商之亲臣諫而不听佯狂为奴以存宗祀即其事也故引以实之独言箕子者因爻辞也繫辞说卦各传多言殷之末世与周之盛德蓋有感乎此也

家人【句】女正位乎内【句】男正位乎外【句】男女正【句】天地之大义也【句】家人有严君焉【句】父母之谓也【句】父父子子兄兄弟弟夫夫妇妇而家道正【句】正家而天下定矣

男刚女柔此所谓男女者以爻之刚柔言也又九五刚六二柔彼此正应刚皆在外柔皆在内所以为家人以体释名亦见卦辞利贞之义天地刚柔之大者天尊地卑其义秩然本卦刚柔之正义法天地遂推而言之自父子以至夫妇一家无不利于正者天下则一家之推莫非家也

睽【句】火动而上【句】泽动而下【句】二女同居其志不同行【句】说而丽乎明【句】柔进而上行【句】得中而应乎刚【句】是以小事吉【句】天地睽而其事同也【句】男女睽而其志通也【句】万物睽而其事类也【句】睽之时用大矣哉

离火兑泽火炎上水润下质之睽离中女兑少女一志乎坎一志乎艮情之睽此睽所由名以言其德则兑说而离明以观其爻则家人覆推六二进而上于五得位之中而应九二故虽睽而小事吉天地男女万物又推而言之以尽睽之时用故赞其大

蹇【句】难也【句】险在前也【句】见险而能止【句】知矣哉【句】蹇利西南【句】往得中也【句】不利东北【句】其道穷也【句】利见大人【句】往有功也【句】当位贞吉【句】以正邦也【邦荀陆本俱作国为汉讳】蹇之时用大矣哉

险谓坎也在前谓上卦以其在前故曰见险止谓艮明哲知几不防于难故曰知此释卦名往得中谓坎中九五由解之下卦右旋而往也不终蹇故利道穷东北艮坎相连正蹇本象故不利往有功因上往得中而言中者九五也大人也刚正而尊足以济蹇九五阳之正位贞也大人正位乎上则邦国之间拨乱而反之正矣故吉西南东北先儒以坤艮为义而西南不合坎来氏以先天方图坤坎居上为义亦不合辞意周易观象以先迷后得为义而无其象不若就坎艮东北成蹇观之为有据

解【句】险以动【句】动而免乎险【句】解【句】解利西南【句】往得众也【句】其来复吉【句】乃得中也【句】有攸往夙吉【句】往有功也【句】天地解而雷雨作【句】雷雨作而百果草木皆甲拆【句】解之时大矣哉【得众也下李鼎祚本有无所往

三字又皆甲拆之皆郑读懈拆马郑陆俱作宅郑注根曰宅俱讹误】

坎险震动动而出乎险之外故免乎险所以为解此释卦名往自蹇之艮而往为震震为长子足以统众得中自蹇之外而来九二居中与九五应故吉往有功再申往义止者动而后能解险也反覆相推之义雷震象雨坎象天地阴阳之大者震之所以动坎之所以来皆天地之时百果草木之甲拆亦解之象因雷雨也其春分之时乎时乎时乎所系者大

损【句】损下益上【句】其道上行【句】损而有孚【句】元吉无咎可贞【句】利有攸往【句】曷之用【句】二簋可用享【句】二簋应有时【句】损刚益柔有时【句】损益盈虚【句】与时偕行损下谓减干之下爻以益上皆以阳益阴上行之道也损而有孚为阳与阴本卦对待相应也故有如彖辞之善然皆尚质之道也又非质之偏胜也盖酌其时之宜为之故二簋之薄用享可也何者阴阳之盈虚是已阴不欲其盈也故损一阳以补之此如四时之消息不欲其偏且胜者也损之为用惟其时也此有孚之所为要也

益【句】损上益下【句】民说无疆【句】自上下下【句】其道大光【句】利有攸往【句】中正有庆【句】利涉大川【句】木道乃行【句】益动而防【句】日进无疆【句】天施地生【句】其益无方【句】凡益之道【句】与时偕行【木道程传作益道然改经无据】

与损反易亦裒多益寡之意内卦二阴一阳则阳乏而阴盈外卦二阳一阴则阳多而阴少故当减上一阳以益下损上以益下是自上而天下也此益之所由名夫益下即益民也君减在公之赋而济下民之歉被泽者众故其说无疆且益下即所以益上也夫所益者自九重之上而下及闾阎之下则无疆之益见朝宁之昌明称仁圣之天子其益不尤大乎以其才言之则九五以中正位乎上而六二以中正应之是主圣臣贤不致屯膏而自上而下者得下于下庆行海内其所必然故利有攸往以象言之上防下震皆木木行惟舟故可利涉以德言之震动有奋之勇而防入有渐进之功故德日崇业日广进而无疆斯道也天地之道也天地间一阴一阳而已阳气行而阴之品物之流形万物之资生莫非益也即时也春生夏长秋收冬藏皆此道也

夬【句】决也【句】刚决柔也【句】健而说【句】决而和【句】扬于王庭【句】柔乘五刚也【句】孚号有厉【句】其危乃光也【句】告自邑不利即戎【句】所尚乃穷也【句】利有攸往【句】刚长乃终也

决谓断而去之一柔在五刚之上五刚并进以去一柔此以卦体释名健谓干说谓兑内健外说则决而和矣健则不姑宽以容其奸说则不猛暴以激其变和者说为之也此言其德以着夬之道五君象一柔以乘于其上罪恶显著扬于王庭声其罪也五阳同决一阴众共危之事乃光显盖志孚而羣号决所当决也健以说为用故危而乃光所尚即即戎程传所谓夬时所尚谓刚武者是也决以和为贵故即戎不利刚长而为纯干斯决之尽而无阴掩之虑矣倘微阴稍留犹不能终夬也故利有攸往

项氏安世曰其危乃光与中未光相应不利即戎与莫夜有戎相应刚长乃终与终有凶相应

吴氏曰慎曰复利有攸往譬如平地之一簣故喜其进曰刚长也夬利有攸往譬如九仞之尚亏一簣故恐其止曰刚长乃终也

姤【句】遇也【句】柔遇刚也【句】勿用取女【句】不可与长也【句】天地相遇【句】品物咸章也【句】刚遇中正【句】天下大行也【句】姤之时义大矣哉【柔遇刚也下郭京本有女壮字勿用取女句郭京本无女字俱妄自增刚】

柔进而方长上接五阳故曰柔遇刚释姤之名男先于女非授聘不交不亲礼也今以柔而进与刚遇则自媒私奔之行也女自主之是之谓壮岂可偕老此所以勿用取女也以其体言之则五阳为天一阴为地姤当五月亨嘉之防故品物咸章以其才言之则九五阳刚中正足以制阴羣阳协辅天下事尚可为也此又遇中之善者阴柔方长所当谨其几阳德正亨所当持其防此姤之时为义甚大君子审之

萃【句】聚也【句】顺以说【句】刚中而应【句】故聚也【句】王假有庙【句】致孝享也【句】利见大人亨【句】聚以正也【句】用大牲吉【句】利有攸往【句】顺天命也【句】观其所聚而天地万物之情可见矣【利见大人亨郭京有利贞字妄增聚以正之聚荀本作取讹聚以正也下九家易及李鼎祚有利贞字亦谬】

坤顺兑说卦德有相聚之情九五刚而得中六二柔中应之卦体有相聚之实此释聚之所以名以事言之王者合万国之欢心以祀其先格庙之际精诚所聚故为极致其孝享聚以正谓九五刚正为利聚之主即彖所谓大人当萃之时礼必丰盛行必有合故祭用大牲见大人则利往阴阳和防天理自然其聚皆天也天地之间万物之繁气类相感必无孤立之理皆聚之情为之也故极赞之

柔以时升【句】防而顺【句】刚中而应【句】是以大亨【句】用见大人勿恤【句】有庆也【句】南征吉【句】志行也

升与萃反易兑反为防坤升防上六五居尊得中是其时也释卦名防内卦顺谓外卦坤是防以九二刚中而上有六五之中应之此元亨之义上有六五之虚中则下必应之升也必矣此遭逢之庆也用见大人勿恤之义也志行志得行也九二实中是其志

困【句】刚揜也【句】险以说【句】困而不失其所【句】亨【句】其惟君子乎【句】贞大人吉【句】以刚中也【句】有言不信【句】尚口乃穷也

以上下卦言则坎刚为兑所揜以内体言则坎之九二为初三两阴所揜以外卦言则兑之九四九五为上六所揜刚不得舒所以困此释卦名险谓坎说谓兑险中有所以自说时虽困而不失其自有之理自见其亨此释困亨之义而又举君子以实之刚中九二九五也贞也其人则大人即所谓君子此不失所亨之人也非其人则穷斯滥贫而谄矣兑之说者尚口矣然当困而言人所轻忽欲以口免困而困益甚所尚者即所以自穷也岂复能亨

防乎水而上水【句】井【句】井养而不穷也【句】改邑不改井【句】乃以刚中也【句】汔至亦未繙井【句】未有功也【句】羸其瓶【句】是以凶也【改邑不改井下郭京本有无丧无得八字乃以刚中也下荀爽李鼎祚本有无丧无得二句未有功也下荀李本有井字多系臆增】

防自困之上来居坎之下故曰防乎水坎自困之下来居防之上故曰上水因卦之反推而见是防木入坎而取水以上也此释卦名养而不穷井之本然也改邑不改井井之定分也分定故得丧无与亦往来相继皆刚中之德主于中故也传不及无丧无得往来井井者省文也井以得水为功几至于井而未可繙与无功同或枯渴之甚而强繙之以至并丧其汲水之具不惟无功且至凶矣故养人而转以困人与自养而至于自困者有如是

革【句】水火相息二女同居其志不相得曰革【句】己日乃孚【句】革而信之【句】文明以说【句】大亨以正【句】革而当【句】其悔乃亡【句】天地革而四时成【句】汤武革命【句】顺乎天而应乎人【句】革之时大矣哉【息说文作熄訛】

兑为泽泽钟水之区故亦称水离为火息灭也水盛则火晦火炎则水涸泽火相并有相灭之象离中女志在坎兑少女志在艮故不相得亦彼此改革之情此以象释名革而信之释己日

乃孚文明以说离兑之体又申明孚信之象盖见之真而足以说服乎人也大亨以正二五之中正也正则揆之事而离揆之理而合无不当者悔所以亡也天地之间阳极阴生春夏秋冬荣枯代谢四时改观而时乃成邦国之际汤受夏周受殷天命有德人归有道顺而应之又革之大者惟其时也不可不审故极赞之

鼎【句】象也【句】以木防火【句】亨饪也【句】圣人亨以享上帝而大亨以养圣贤【句】防而耳目聪明【句】柔进而上行【句】得中而应乎刚【句】是以元亨【而大亨以养圣贤郭京本无而大亨三字臆删】此卦取名于器与他卦异故释之曰象也以制器者尚其象而鼎为国之重器故取其象以名卦而释之如此防木体其德为入离为火木火之资烹饪之事鼎烹祭祀燕宾之用享上帝以特牲享宾以饗牲牢礼也此又言鼎之以释象也防入则聪而离明为目又鼎为革之反离往居外六二之柔进而上于五得爻之中兑反为防九二应之此彖辞元亨之义也吉在其中

震【句】亨【句】震来【句】恐致福也【句】笑言哑哑【句】后有则也【句】震惊百里【句】惊远而惧迩也【句】出可以守宗庙社稷以为祭主也【吴氏澄以震来恐致福也笑言哑哑后有则也十六字系初九象辞删去季本四同从之然震体自有此象不必删又惊远而惧迩下郭京本有不丧匕鬯四字王昭素据徐氏说云宜有此四字范潆昌旦云受之许坚坚受之李溉溉受之陈抟程传朱本义俱从之吴氏澄及季本四同俱增此四字然以恐致福而后有则则不丧匕鬯在其中矣不必增】

震之名显故不释卦名而专释震之所以亨恐者之义致福则亨也恐者敬以主之也人当震悚之际敬以持之则危者可安故足以致福后承恐而言则法则也心主于敬修省切至则不愧不怍循理守法无改常度上下语意相足言敬存于中而安舒于外也惊远惧迩百里之间内外皆震出可以守宗庙社稷以为祭主者长子之义序卦传曰主祭者莫若长子匕鬯主器也长子继世而出能承先业故得主祭上文恐致福有法则之实也俱主初爻刚正而言张氏清子曰出者即说卦帝出乎震之谓主者即序卦主器莫若长子之谓若舜之烈风雷雨弗迷可以出而嗣位矣

艮【句】止也【句】时止则止【句】时行则行【句】动静不失其时【句】其道光明【句】艮其止【句】止其所也【句】上下敌应不相与也【句】是以不获其身行其庭不见其人无咎也【艮其止晁氏谓当依卦辞作艮其背熊过谓古文背作北与止形近故讹止】

阳止阴上故艮为止然止非以其迹也时者自然之运而因乎一定之理当止则止非有心于止止也当行则行不妄动于行亦止也合动与静皆不失其时则动亦静也人心至虚妄动则悔时止时行主静立极虽动亦静湛然无物凝然有主无物则虚有主则实艮体笃实所以光明此因卦名而言其理以起释辞之端也艮其止言背即止也犹言止其止也故释之曰止其所也所谓当止之地也止所当止行所当行动静合一者也以一卦言则阳上阴下各止其止以重卦言则上艮下艮止其止也以其爻言则上下阴阳相敌不应两无所为不相干与亦各止其所也止于不见之地也其止也内不见己故不获其身其行而亦止也外不见人故行其庭不见其人

渐之进也【句】女归吉也【句】进得位【句】往有功也【句】进以正【句】可以正邦也【句】其位刚得中也【句】止而防【句】动不穷也【渐之之字明晋王本作渐注云以渐重文故误之也此说近是女归吉郭京谓误增也字王肃本也字下有利贞字吴草庐竟删也字增利贞字轻易改窜非也】

渐不遽进其进以渐也故连卦名而言曰渐之进也与晋进也异君子所谓进必以礼如女归以渐乃吉也此卦名卦辞之相因而见者以卦体观之渐与归妹反覆相推归妹下卦之兑进而为防则九二往居五既尊而可以有为以阳居五又正而可以正人此其所以吉且利贞也在归妹则九二昵兑说之中而不正进为九五则刚正得中此所以有功而能正邦也又兼言吉之所以利贞也以卦德观之艮止防入是以止为进也未进之先廉静无求将进之际因应有体无求者时不能阻有体者势不得干其进所以不穷亦吉且利贞之道也

归妹【句】天地之大义也【句】天地不交而万物不兴【句】归妹【句】人之终始也【句】说以动【句】所归【句】妹也【句】征凶【句】位不当也【句】无攸利【句】柔乘刚也

夫妇之义施生倡随与天地同天地交则万物育不然则阳离阴绝生意息矣夫妇之义交从归始杂卦传曰归妹女之终也女事终而夫妇之交从此始兑说而震动女先于男震长男而兑少女是所归者妹也此以德象释名因以见始交之未善也以体观之与渐相反艮往居外四既不顺五亦不安五皆失正位是为不当故征凶征往也以比乘观之九二刚而六三柔九四刚而六五柔是妇制其夫故不利

丰【句】大也【句】明以动故丰【句】王假之【句】尚大也【句】勿忧宜日中【句】宜照天下也【句】日中则昃【句】月盈则食【句】天地盈虚【句】与时消息【句】

】而况于人乎【句】况于鬼神乎【爻孟喜作稷未知何据食陆德明云或作蚀非】

大为丰之义明谓离动谓震明以动谓以明主于内而后动于外也释丰之义而明其所由致以释卦名尚大犹言方大照天下日中之象以明主之常守其中则普照不偏兼照不蔽此所以宜然丰固难保也日方中则旋旻月既盈则必食此天地间盈则必虚一消一息自然之运天地且不保其常盈而人事从可知矣将祈鬼神之庇而鬼神恶盈能矫举乎鬼神以祭享言先儒以造化言者复盈虚消息

旅【句】小亨【句】柔得中乎外而顺乎刚【句】止而丽乎明【句】是以小亨旅贞吉也【句】旅之时义大矣哉

旅与丰反易丰下卦离为旅之外卦六二之柔上为六五居外卦之中而顺乎比近之刚若寄旅者之自处柔中而有助于比邻也艮止而以离明丽之若寄旅者之安于所寓而明以察事也此皆处旅之正其体与德固小有亨道而以之处旅则贞吉也人生遇合羁旅为难不可以其为小事而忽之也故赞其时义之大与豫随同

重防以申命【句】刚防乎中正而志行【句】柔皆顺乎刚【句】是以小亨利有攸往利见大人

上下皆防故曰重防命诏令也风有声能鼓物命令之行似之申重也重防故为申命中正谓九五志行能行其志也刚中正而防以行之无过中失正之弊以建中以表正可矣然志可行而下或不顺行亦未达也今初六顺乎二三四顺乎五上柔在下而皆上顺乎刚是令出人从之也九五又为大人之象顺而从之亦义也故占有如辞所系者

兑【句】说也【句】刚中而柔外【句】说以利贞【句】是以顺乎天而应乎人【句】说以先民【句】民忘其劳【句】说以犯难【句】民忘其死【句】说之大【句】民劝矣哉

内外卦皆一阴居二阳之上阴说于阳而阳亦说阴故兑之义为说说则亨可知矣然亨非以其容说也二五刚中三上柔外是外虽柔说而内实刚介则刚以主之故兑之说必利贞也刚中天德也即王道也天德全则行合天理故顺事出人心故应先民兴作也犯难戎行也天顺人应故忘劳忘死非夫驩虞小补之所得与也

涣【句】亨【句】刚来而不穷【句】柔得位乎外而上同【句】王假有庙【句】王乃在中也【句】利涉大川【句】乘木有功也【郭京本利涉大川下有利贞二字臆增】

涣与节反易相推节上卦坎中之刚来居二仍得中而不困于坎是为来而不穷节下卦兑三之柔反为防正位乎四而近同于五是得位上同此所以亨王在中谓九五九在中则王也木防也在坎水之上故曰乘此假庙涉川之象在中则诚足以相感涉川则舟足以相济

节【句】亨【句】刚柔分而刚得中【句】苦节不可贞【句】其道穷也【句】说以行险【句】当位以节【句】中正以通【句】天地节而四时成【句】节以制度【句】不伤财【句】不害民【中正以通下郭京据王弼注有然后乃亨也五字谓是大文误入者是以后人注入经文也意为增改妄也】

节涣反易坎往居外防反为兑来居于内坎刚兑柔刚外柔内是其分也得中谓二五皆中也节惟得中此所以亨其道穷谓上六居节之极柔虽正而已过故爻辞九五言甘而上六言苦也兑说坎险九五当位节谓有节制不过也九五得中得正通而不滞亨之主也前言得中兼九二皆亨而九五位尊德盛尤亨之大者故重申之天地刚柔之大者阳极阴生阴极阳生自有分限不至过差故一年之中凡有八节乃成四时不然则愆此节之见于天地者也圣人法之以治天下于是因民性而制为礼礼有物则是为度如周礼六官所掌皆有定限是也国有好用而不至伤财上有常供而不至害民因天因地因时此圣人所以得节之道也盖极言之以见九五之中正尽节之用也

中孚【句】柔在内而刚得中【句】说而防【句】孚乃化邦也【句】豚鱼吉【句】信及豚鱼也【句】利涉大川【句】乘木舟虚也【句】中孚以利贞【句】乃应乎天也【信及豚鱼也郭京本无豚鱼二字谬】

柔在内谓六三六四居六爻之内刚得中谓九二九五在上下卦之中此孚之体兑说防入此孚之德以释卦名柔内则虚刚中则实虚则无物实则有主此说而彼入皆实理虚衷之合上下交孚是之谓化孚者乳卵之谓鸟之孚卵皆如其期至实也含至虚也故至信也此可以观化王者之世信如天地诗曰万邦作孚言化也不孚可言化哉信及豚鱼及至也江豚之信出于自然信至如是则不言而信吉可知矣乘木防上兑下木乘乎泽也两体中虚则如舟也有舟则可言济矣故利涉川凡此皆天事也诚也苏氏轼曰天道不容伪是也中孚以利贞谓九五也此中孚之主故重言之

小过【句】小者过而亨也【句】过以利贞【句】与时行也【句】柔得中【句】是以小事吉也【句】刚失位而不中【句】是以不可大事也【句】有飞鸟之象焉【句】飞鸟遗之音【句】不宜上宜下大吉【句】上逆而下顺也【是以小事吉也郭京本作是以可小事石经同按与吉也意重必系后人误增有飞鸟之象焉程传以此句系解者之辞误入彖中吴仁杰伪造古文遂删此句明陈氏捷解注曰古文无误也】

小者过所以明其为阴爻多于刚也小者过而亨言卦爻中有所以亨之道也连下之辞因与时行而言过以利贞与时行也足上之辞贞正也又因下柔中下顺而言过所以利于正非为邪也与时宜之调剂以协中也柔得中谓六二六五皆爻之中刚失位谓九三九四皆失中不得地小事阴类以柔中处之故吉大事阳类以刚而失中处之故不可卦体中实而四阴并列如鸟舒翼释辞之象上逆下顺又从二五之中而分别之爻辞传上六曰已亢六五曰已上其义较然柔不宜远也不正也六二则中而且正是则顺之至也过以利贞之极致也故不特小事吉而又曰大吉也

先儒多以当小过之时必过而亨未合爻辞观之惟龚氏颇得义理

龚氏焕曰道贵得中过非所尚然随时之宜施当其可则过也乃所以为中也故曰过以利贞与时行也与时行而不失其贞则过而非过矣

既济【句】亨【句】小者亨也【句】利贞【句】刚柔正而位当也【句】初吉【句】柔得中也【句】终止则乱【句】其道穷也【既济亨句本义谓亨字上脱小字举正谓亨字下脱小字俱误位当李鼎祚本作当位臆改无谓】

既济亨即包小亨而言小者亨也明尚柔之意泰否者天地之大运既未济者水火之一气盖事端之往复也处事者刚躁易败柔谨无愆既济之时尤无取乎刚胜也下文柔得中即申此意二卦皆刚柔正位此既济之体也故利贞柔得中谓六二在下卦之中有应于五方在济中初所以吉九五济之将终故象传曰不如西邻之时上六则济之已终故象传曰何可久此终之所以乱

既未济泰否之似泰之善在二而否之善在五此两卦二五之善正同盖气运事几之时势为之也

未济【句】亨【句】柔得中也【句】小狐汔济【句】未出中也【句】濡其尾无攸利

【句】不续终也【句】虽不当位【句】刚柔应也既未济两卦反覆相推义亦彼此相对柔得中谓六五当未济之中以柔中为之主事之所以必济也故亨未出中谓九二在未济之内得爻之中亦可济也不续终以坎险在终尚宜审慎濡尾无攸利不可不戒也此二之济所以异于五也虽不当位又言火上水下皆失其所所以未济然六五柔中九二以刚应之所以能亨夫既济之终止则穷而未济之濡尾曰不续知事之贵善终而未济欲济者尤贵能继也传复结言刚柔之应者见其有可济之理又为不续终者勉也

蔡氏渊曰既济之后必乱故主在下卦而亨取二未济之后必济故主在上卦而亨取五

易翼說卷六

湖北巡抚晏斯盛撰

文言传

元者善之长也亨者嘉之防也利者义之和也贞者事之干也

干健而已一诚不息纯粹至善者也分之则为元亨利贞是元亨利贞皆善也而元居其首故曰善之长亨次之则善者见其美而无所不及故曰嘉之防利又次之则善之美者协其宜而无所于过故曰义之和贞要其成则善之美且宜者又正以固而实其所有完其本初故曰事之干盖生生之原天理浑然仁也三千三百无一事之非仁即礼也等威裁制节文损益礼从其宜即义也义正而礼秩实其体事而无不在之仁则智也分之有四而合之则一者也彖传曰大哉乾元万物资始乃统天云行雨施品物流形乾道变化各正性命保合太和乃利贞此以在天者言也文言曰元者善之长也亨者嘉之防也利者义之和也贞者事之干也此以在人者言也本义春夏秋冬推本其在天者言之其于人则为仁义礼智四语乃属本文

四字分释多疑利字与全经作虚活字用例有不同试思此篇乃所谓文言犹字释也凡偏属之例如利居贞利建侯利涉大川亦皆以其宜且遂者言之也即义之和之一端也何不可分属乎至元之为始为善之长则更无处不见然在干则天理之全与他卦又自不同

朱子语类问元者善之长曰元亨利贞皆善也而元乃为四者之长是善端初 见处也问亨者嘉之防曰且以草木言之 生到盛夏时好处都来凑会嘉只是好处会期防也又曰利者义之和义宜于不和矣然处之而各得其所则和义之和处便是利问程子云义安处便为利只是当然处便安否曰是正好去解义之和句义截然而不可犯似不和分别后万物各得其所却是和和不和生于不义义则无不和和则无不利矣又曰贞者事之干智是那默运事变底一件物事所以为事之干又曰正字不能尽贞之义须用连正固說其义方全正如孟子所谓知斯二者弗去是也知斯是正意弗去是固意又问有所谓不可贞者是如何曰也是这意思只是不可以为正而固守之

君子体仁足以长人嘉防足以合礼利物足以和义贞固足以干事【体仁京房董遇本作体信误】

有生皆得乾元之理以为生生之性则仁即所谓善之长者也君子全体皆仁则乾元之理在我资始而统天者亦我矣欲立立人欲达达人以养以教而羣生于此待命故足以长人自其生意之盛而美欢欣谐畅懿是好者同而化则乾元而亨者在我而乾道之变化亦我矣有仪有象节之文之而羣动于以交中故足以合礼礼之为用和乃为贵则元亨而利者在我变化

而各正者亦我矣制而宜之小大由之行各止其所而不相乱故足以和义仁礼义皆根于心而主之者有猷有为则元亨而利且贞者在我保合太和者亦我矣思曰睿睿作圣操者约守之贵执其极而要其成故为事之干

朱子语类云体仁不是将仁来为我之体我之体便都是仁也又云元是善之长万物生理皆始于此众善百行皆统于此故于时为春于人为仁亨是嘉之防嘉美也防犹齐也盖春方生育至此乃无一物不畅茂其在人则礼仪三百威仪三千事事物物一齐到恰好处所谓动容周旋皆中礼故于时为夏于人为礼利者义之和万物至此各遂其性事理至此无不得宜故于时为秋于人为义贞者事之干万物至此收敛成实事理至此无不的实故于时为冬于人为智又曰体者以仁为体仁为我之骨我以之为体仁皆从我 出故无物不在所爱所以能长人欲其所防之美当美其所防盖其厚薄亲疎尊卑大小相接之体各有节文无不中节即所防皆美所以能合于礼也能使事物各得其宜不相妨害自无乖戾而各得其所分之中和知其正之所在固守而不去故足以为事之干干如版筑之有桢干

胡氏炳文曰礼者仁之着智者义之藏

林氏希元曰君子克己复礼使仁充乎中而见乎外中之所存无一念之非仁外之所行无一事之非仁则君子之身浑是一个仁非体其体而体夫仁也体仁仁之至也故无一物不在所爱之中而足以长人安土敦仁故能爱正是如此

君子行此四德者故曰乾元亨利贞

元亨利贞干之事也健也四德行之无少余欠则干道在我矣此君子体干之实也其要则健行尽之大象曰天行健君子以自彊不息即此意也彖传曰大明终始六位时成时乘六龙以御天乾道变化各正性命保合太和乃利贞此以在天者言亦所性而有者也

自首节至此皆以申明彖传之意

初九曰潜龙勿用何谓也子曰龙德而隐者也不易乎世不成乎名遯世无闷不见是而无闷乐则行之忧则违之确乎其不可拔潜龙也

龙德干德也隐潜而尚未见者也大德在躬故世不能易实德在我故名不足成不易乎世故遯世无闷而自足乎己不成乎名故不见是而无闷而无待于外非固也乐则行之济世显名其所愿也岂恶此而逃之然时方潜矣是则可忧违而去之遯世无名何容心焉识有定也力有定也确乎不可拔此所以不易乎世不成乎名而无闷也

自此以下至乃见天则皆申明彖传之意本节以后七节言各爻象中之功用潜龙勿用下也以后七节言各爻取象之时位潜龙勿用阳气潜藏以后七节言各爻以时位起象之义

程子曰初九阳之微龙德之潜隐乃圣贤之在侧陋也守其道不随世而变晦其行不求知于时自信自乐见可而动知难而避其守坚不可夺潜龙之德也蒋氏悌生曰行道而济时圣人之本心故曰乐则行之不用而隐遯者非圣人所愿欲也故曰忧则违之蔡氏清曰遯世无闷二句尤重于不易乎世二句乐则行之三句更重于遯世无闷二句此三句明其无意必也论龙德者必至是而后尽

九二曰见龙在田利见大人何谓也子曰龙德而正中者也庸言之信庸行之谨闲邪存其诚善世而不伐德博而化易曰见龙在田利见大人君德也

龙德干也正中九二也惟其中也故庸言亦信而有实庸行亦谨而不过庸言庸行之信且谨所以闲邪也非徒却外诱之缘也皆其存存以成性即诚也善世诚之着也不伐忘善也诚之至也内极纯实而外极含宏德之博也诚中形外而正己物正德之化也此干之中缊所谓龙德而正中者也虽未若九五之得位而已具圣作物睹之本矣故曰君德君德者天德也

程子曰以龙德而处正中者也在卦之正中为得正中之义庸言庸行造次必于是也既处无过之地则惟在闲邪邪既闲则存诚矣善世而不伐不有其善也德博而化正己而物正也皆大人之事虽非君位君之德也

李氏舜臣曰干画☰实则自诚坤画☷虚则生敬故干九二言诚坤六二言敬诚敬二字始于包牺心画而天地自然之理也

冯氏椅曰易者理学之宗而乾坤二卦又易学之宗也子思孟子言诚者天之道先儒谓诚敬圣学之源皆出于此

九三曰君子终日干干夕惕若厉无咎何谓也子曰君子进德修业忠信所以进德也修辞立其诚所以居业也知至至之可与几也知终终之可与存义也是故居上位而不骄在下位而不忧故干干因其时而惕虽危无咎矣

九三居下之上高而可危之地德业之见视二为已难而干以继干自治之勤所有事也故进修之功日有孳孳忠尽己而不浮信自慊而毋欺则德之缊于内者不已其进矣事理之施抒为辞修辞不苟一归于诚则业之着于外者实而可居矣知其所至而至之德业之始事知以起行也故可与几知其所终而终之德业之终事行以实知也故可与存义几者事之端也故曰与义者理之宜也故曰存德业无穷进修不息惟知行兼到而已其位虽在上下之间而进德修业干干惕若如是何骄忧之有无咎之实也忠信与修辞立诚皆诚身之事而精神振厉与存诚者之安安稍异以所处之地不同也

本义因孔颖达疏以知至至之为进德之事以知终终之为修业之事于上文忠信所以进德修辞立其诚所以居业二句未安不如语类更清程传以知至至之专属致知以知终终之专属力行于本文至之知终四字亦未安其曰始条理终条理则义理较密然知至而即至之知

终而必终之明是知行互进德业并到未可偏属也但程传较详尽程传曰三居下之上而君德已着将何为哉唯进德修业而已内积忠信所以进德也择言笃志所以居业也知至至之致知也求知所至而后至之知之在先故可与几所谓始条理者知之事也知终终之力行也知所终则力进而终之守之在后故可与存义所谓终条理者圣之事也此学之始终也君子之学如是故知处上下之道而无骄忧不懈而知惧虽在危地而无咎也

明道程子曰修辞立其诚不可不仔细理防言能修省言辞便是要立诚若只脩饰为心只是为伪也修其言辞正为要立己之诚意

朱子语类曰忠信只是实若无实如何防进如播种相似须是实有种子下在泥中方可日见生若把个空壳下在里面如何防生道理须是实见得若徒将耳听过将口说过济甚事忠信所以为实者且如那孝须实是孝方始那孝之德日进一日如弟须实是弟方始那弟之德日进一日若不实却是无根了如何防进立其诚诚依旧是上面忠信修辞是言语照管得到那里面亦须是照管得到进德是自觉意思日强似一日日振作一日不是外面只是自见得意思不同又曰忠信修辞且大纲說所以进德修业之道知至知终则又详其始终工夫之序如此忠信心也修业事也然蕴于心者所以见于事修于事者所以养其心此圣人之学所以为内外两进而非判然二事也知至则知道之所止至之乃行矣而验其所知也知终则见其道之极致终之乃力行而期至于所归宿之地也知而行行而知知行交相警而其道益光明终日干干又安有一息之间哉又曰忠信进德修辞立诚与敬以直内义以方外分属乾坤盖取健顺二体忠信立诚自有刚健之体敬义便有静顺之体进修便是个笃实敬义便是个虚静故曰阳实阴虚

俞氏琰曰德与忠信皆主于心者也业与辞皆见于事者也事已成谓之业修业者业未成则修而成之也居业业已成则居而守之也辞言辞也修谓修省非修饰也诚即忠信也立其诚谓立其诚意而不为私意所汨挠也若但以修饰言辞为心则伪矣君子闲邪存其诚则无一念之不正也修辞立其诚则无一言之不实也

蒋氏悌生曰干干因其时而惕时字正解爻辞终日之义见圣人省察之心无少间断也

蔡氏清曰忠信所以进德也每应一件事便着一个心为之主惟心之所主者一于诚则德之在内者进矣而其于事也又处置恰好如其所言则是诚有所归宿安顿处是之谓立诚而业之见于外者修矣又曰闲邪之外更无存诚工夫故承之曰存其诚修辞之外更无立诚工夫故承之曰立其诚诚即忠信向也诚存于心今则见于事而诚有立矣又曰中庸章句云反诸身不诚谓反求诸身而所存所有一有未实也所存之实即忠信也所一之实即修辞立其诚也合进德修业总是中庸之诚身大学之诚意正心脩身又曰九三居下之上是亦有位其上者则九三为在下位矣亦有位在下者则九三又为居上位矣若于初二必不兼言居上位若于九五必不兼言在下位此亦当知

郑氏惟岳曰不曰所以修业而曰所以居业盖修辞立诚即是修矣既修则有可居矣犹之屋

然修者方在营构既成则可居也

杨氏啓新曰心之存诸中者纯乎忠信而不妄则心无外驰而得于己者日进而不已言之见于事者致其修省而有实则事皆实理而体诸身者安安而不迁

九四曰或跃在渊无咎何谓也子曰上下无常非为邪也进退无恒非离羣也君子进德修业欲及时也故无咎

居五之下可上也而卑服抑畏固无常矣然犹是上之下也不逾分而并上无常者有常也故非为邪四近于五可进也而周旋审顾固无恒矣然犹是羣龙也不壮往以轻进无恒者有恒也故非离羣若此者何也时为之也忠信之心修辞之诚无亏欠也彖文一或字 明尽致无咎之实也

项氏安世谓进退上下不敢自必相时而动所谓自试然时即理也心主乎理则与时宜之非不敢自必且自试云者自考之谓亦非姑尝也

林氏希元曰可上而不上疑于以隐为高可进而不进疑于遯世离羣及时之时上进之时也欲及时是应非为邪离羣句无咎得时也

九五曰飞龙在天利见大人何谓也子曰同声相应同气相求水流湿火就燥云从龙风从虎圣人作而万物覩本乎天者亲上本乎地者亲下则各从其类也乾元得位同体皆应圣人之时也圣人者人伦之至亲睦平章风动时雍一尽性而无不尽者也传中 明利见之义精蕴无遗同声同气以形言流湿就燥以性言云从风从以气言皆释利见之理圣人作释飞龙在天万物覩正所谓利见者也亲上亲下又举动植之物以明物覩之故各从其类亲上亲下之各有所本也同声同气水火龙虎亦类也程传 明详尽程传曰人之与圣人类也五以龙德升尊位人之类莫不归仰况同德乎上应于下下从于上同声相应同气相求也流湿就燥从龙从虎皆以气类故圣人作而万物皆覩上既见下下亦见上

孔氏颖达曰周礼大宗伯有天地产大司徒云动物植物本受气于天者是动物天体运动含灵之物亦运动是亲附于上也本受气于地者是植物地体凝滞植物亦不移动是亲附于下也按此则程传谓本乎天者日月星辰本乎地者虫兽草木殊有未协不如孔氏之有据也

朱子语类曰本乎天者亲上凡动物首向上是亲乎上人类是也本乎地者亲下凡植物本向下是亲乎下草木是也按此则孔氏之言是也又曰天下所患无君不患无臣有如是君必有如是臣虽使而今无少间也必有出来云从龙风从虎只怕不是真个龙虎若是真个龙虎必生风致云也

项氏安世曰圣人先得我心之所同然者故为同声同气之义圣人之于民亦类也故为各从其类之义

上九曰亢龙有悔何谓也子曰贵而无位高而无民贤人在下位而无辅是以动而有悔也

五千之位也上九过乎五是贵矣而实无位也无位故无民此以上九之所处言所处既过不能如九五之中则九四以下虽同德而不相辅凡此皆亢之为也故悔

程传曰九居上而不当尊位是以无民无辅动则有悔以首句为主得爻位之义本义止释无辅便空至谷氏以贵高贤人作三平看更去之远矣李 一以尧舜有天下不与言张彦陵谓圣人自无之更支离不顾文义

潜龙勿用下也

下谓初在诸爻之下也言下则潜可知勿用亦可知矣即前所谓龙德而隐不易乎世不成乎名者皆由于此象传曰阳在下兼爻质言此专言下则阳之不能施用亦可知矣

见龙在田时舍也

龙德宜在天位而出潜之始尚在下卦之中时虽有位而尚非其位也时未至也暂次于此如次舍然故曰时舍舍当读去声本义谓未为时用程传谓随时而止俱未安与前后文义互异

终日干干行事也

行事指干干之实而言之象传反复道也言干干之象本传上文进德修业言干干之功此曰行事即承上文而实指之也

或跃在渊自试也

自试自考也非有慕乎其外之心仍是进德修业之事前传曰欲及时必时已至而后为及未及九五之时德之进业之修日有孜孜而已本义姑试其可程传随时自用俱未安

飞龙在天上治也

刚健中正天德也九五天位也以圣人而在天位最盛之时治可知矣观此则象传所谓大人造上文所谓圣人作更可知矣苏氏濬曰上治犹言盛治五帝三王皆治之上者也

亢龙有悔穷之灾也

穷极也阳极于上也即亢也象传所谓盈也盈不可久故取灾上文贵而无位穷也无民无辅则灾之所由生

乾元用九天下治也

用九不亢也不亢则阳刚得中矣乾元之本然也乘龙御天而云行雨施即在于是变化各正天下有不治乎首庶物而不为首天德浑然至诚能化程传曰用九之道天与圣人同得其用则天下治也

朱子语类曰九是天德健中便是有顺用之则天下治如下文乃见天则则便是天德

潜龙勿用阳气潜藏

释潜龙二字之义而勿用可见阳气潜藏即传象所谓阳在下也上文所谓下也彼以位言此以气言观阳气之潜藏则上文所谓龙德而隐者时也圣人不出殆气运为之矣

见龙在田天下文明

干体高明初出地上气象光昌仪章教令蔚然人望象传曰德施普言其所及此曰文明言其所见以中德也上文所谓龙德而正中亦德博而化矣

苏氏轼曰以言行化物故曰文明

终日干干与时偕行

时行不已干干不息天与圣人一也即进修之诚也

或跃在渊乾道乃革

上下之交变革之时时当变革不可不审象传言进无咎上文言进修欲及时又言自试皆审慎之意以其时之当革也

飞龙在天乃位乎天德

龙德以九五为正位有是德宜有是位也首出庶物天所命也乾元之位至此而正也象传言大人造上文言圣人作皆以德言之而本文更为完备不曰天位而曰天德以是为本然耳

亢龙有悔与时偕极

极即上文之所谓穷也处干之极时不可为位极而时极处此者亦极矣极则所谓盈不可久者益深切而着明上文所谓动有悔穷之灾皆时之所必然也

乾元用九乃见天则

天运而不已然四时行而有常此天之用也即天之则也象传言天德不可为首盖浑然在中往则必复无少过差者天也过则有首矣岂可为则乎言天则而不为首在其中动静无端进退有序乾元之谓乎其即无首之谓乎

乾元者始而亨者也利贞者性情也

此合言亨利贞之本一元也乾元之所以统天也始而亨者言亨之始即元也利贞者性情言即元之精蕴非有二也

语类问利贞者性情也曰此性情如言本体元亨是 用处利贞是收敛本体处如春时 生到夏时长茂条达至秋结子有个收敛摄聚底意思但未坚实至冬方成在秋虽是已实渐欲脱去其本之时然受气未足便种不成故须到冬方成人只到秋冬疑若不见生意不知都已收敛在内

胡氏炳文曰性情只是一健健者干之性而情其着见者也且性情并言昉于此释彖曰性命此则曰性情言性不言命非知性之本言性不言情非知性之用按此以情为健之着见未是利贞皆结实处谓贞下起元后之着见者由此则可谓贞为健之着见则已入亨字境界矣不可也

干始【句】能以美利利天下不言所利【句】大矣哉

此言元之所以为亨利贞也元所以为善之长也亦乾元统天之意始元也美亨也利天下利也不言所利贞也大矣哉赞辞言元之所包者广也

上节言元亨利贞之合一此言元亨利贞之一贯本义始者元而亨亨字似未清晰不若以美字属亨为显程传末句谓赞其利之大似未得传意盖本节亨利贞皆元之所为非专赞利也程子曰亨毒化育皆利也不有其功常久而不已者贞也诗曰维天之命于穆不已者贞也朱子语类曰明道说得好不有其功言化育之无迹处为贞

俞氏琰曰干始即乾元也元乃生物之始也美即亨也亨乃众美之会也

林氏希元曰上既即物之生长收藏以释干之四德此则归其功于干始而赞其大即彖传统天之說也谓干虽四德之流行要一元之所统何也干既始物由是而亨就能以美利徧利乎天下又收敛于内不言其所利是皆干始之所为也不其大与盖万物归根复命之时造化生物之功不复可见韩 诗云须防慰满三农望敛却神功寂若无亦是此意

大哉干乎刚健中正纯粹精也六爻 挥旁通情也时乘六龙以御天也云行雨施天下平也

此总言干之本体为纯粹以精之性而 挥于一卦六爻之间以旁通其情所存所 皆天德也措之天下惟其时而已圣人得之以居天位亦如天之云行雨施由元而亨焉至于天下平则首出庶物而万国咸宁是亦能以美利利天下不言所利而利且贞者俱在是矣刚健中正干之位也纯粹以精干之性也六爻 挥干之用也旁通其情性之动也乘六御天元能统也行施平治此则首出庶物万国咸宁也刚阳也健其性也中爻之中也居干之五正也刚健干之体也中者刚健之无过不及正者刚健之不偏不倚中正即纯粹以精非中正之外又纯粹以精也纯者中正之不杂粹者中正之无疵精则纯粹之至本义谓纯粹为刚健中正之至极于义未安乔氏中和以元亨利贞分贴刚健中正亦未当

篇首分言四德既各为一理矣然非于元之外别有根柢也故自乾元者始而亨以下至此复合而言之以见其理之一也是故学易者莫大于体干体干者莫先于体元也

君子以成德为行日可见之行也潜之为言也隐而未见行而未成是以君子弗用也

成德为行之行去声以体诸身者言日可见之行之行行而未成之行平声以措诸天下者言学本内外合一体用一原体诸身者即可出而措诸天下未措于天下则惟体诸身而已是故君子以成其德者为本身之行即日可以见于世措于天下日即日也无所待也然此爻曰潜龙则隐而未可见矣既未可见则事业未就故行而未成君子弗用不遽出而问世也

可见之行即乐则行之隐而未见行而未成即忧则违之隐而未见行而未成故不易乎世不成乎名日可见之行犹言用之则行隐而未见行而未成犹言舍之则藏行而未成即领可见之行行字遯世无闷不见是而无闷君子弗用之心也

此下七节又重申象传之用以申龙德而隐以下七节之意

蔡氏清曰言君子之所以为行者以成德为行也夫既以成德为行而九德以成矣则日可见之行也夫既可见之行矣而又何以曰勿用盖初九时乎潜也潜之为言也隐而未见隐而未见则行犹未成是以君子亦当如之而勿用也

来氏知德曰君子以已成之德举而措之于行则其事业之所就指日可见矣初九其德已成则日可见之行也而占者乃曰勿用何也盖圣人出世必有德有时人之所能者德所不能者时今初九虽德已成然时当乎潜也潜之为言也隐而未见也惟其隐而未见故行而未成时位阨之也是以占者之君子亦当如之而勿用也

君子学以聚之问以辨之宽以居之仁以行之易曰见龙在田利见大人君德也

前言信谨闲存未及学问此言学问居行未及德化然庸言庸行之信谨以至于闲存则学问可知矣此言宽居仁行则德化可知矣重申之曰君德明其体用之一也所以为龙德而正中者也

来氏知德曰之者中正之理龙德正中虽以爻言然圣人之德不过此至正大中而已盖乾道刚健中正民受天地之中以生惟中庸不可能苟非学聚问辨有此致知工夫宽居仁行有此力行工夫安有龙德之正中乎聚者多闻多见以求防聚此正中之理也辨者讲学也亲师取友辨其理之精粗本末得失是非择其正中之善者而从之即讲学以耨之也宽者优游厌饫勿助勿忘俾所聚所辨此理之蓄于我者融防贯通渣滓浑化无强探力索凌节欲速之患也盖宽字以久遠言有从容不迫之意非专指包含也居者守也据也仁以行之者无适而非天理中正之公而无一毫意必固我之私也盖辨者辨其所聚居者居其所辨行者行其所居故必宽以居之而后方可仁以行之若学聚问辨之余涵养未久粗心浮气而骤欲见之于实践则居之不安资之不深安能左右逢原而大公以顺应哉此为学一定之序也有是四者宜乎中正之德博而化矣即前九二之君德也

九三重刚而不中上不在天下不在田故干干因其时而惕虽危无咎矣

重刚谓以刚承刚刚之过也不中未若二五之中也三居下之上既不能如九五之得位又不能如九二之应君位为之时为之时也干以继干之际日致其敬畏谨戒之诚进德修业乾道不失故危而无咎或曰初非刚而不中耶文言何不之及也曰初非重刚也可进于二也三则下卦之极又逾乎二上隔乎五故有不同

周易观象曰申居上不骄为下不忧之意

九四重刚而不中上不在天下不在田中不在人故或之或之者疑之也故无咎

爻处重卦之间干上又乘干也故曰重刚不二不五已逾乎三是离羣见天之地不可不审或跃也自试也此进修所以及时也

如旧說三四为人位则九四固人矣而曰不在人则三四为人非也其曰不在人者与不在天不在田同类盖天田皆象中假借之字犹曰上不在五下不在二中逾乎三云尔三君子终日干干人事也故四又曰中不在人因君子而言也

来氏知德曰在人谓三也四三虽皆人位四则居下之上而近君矣非三之不近君故曰不在人重刚不中之中二五之中也中不在人之中六爻中间之中也按此以四之为人有难以解于不在人三字而为之說不知人因君子之事而言也其实参三才而两之上下两卦各有天地人也

毛西河曰本义以四非刚位不当言重刚谓重字衍考虞氏易九三以刚爻刚位为重刚九四以上干接下干为重刚与九三千干同则不当衍按以刚爻刚位为重刚九三九四不可通干以继干两刚卦相接乃重刚也是为正义

周易观象曰申上下无常进退无恒之意

夫大人者与天地合其德与日月合其明与四时合其序与鬼神合其吉凶先天而天弗违后天而奉天时天且弗违而况于人乎况于鬼神乎

天地日月四时鬼神之合中正而已日月四时鬼神皆天也有天道将然之事而先之一本中正与天相合故弗违有天道已然之事而后之率由中正与天相协故奉若民之义鬼神之吉凶一也未有能违乎中正之德者即上所谓位乎天德也上治之本也亲上亲下同此作覩也本义先天弗违谓意之所为默与道契后天奉天谓知理如是奉而行之意本程传程传曰大人与天地日月四时鬼神合者合乎道也天地者道也鬼神者造化之迹也圣人先于天而天同之后于天而能顺天者合于道而已合于道则人与鬼神莫能违也

程子曰天且弗违况于鬼神乎鬼神言其功用天言其主宰

来氏知德曰合德以下总言大人所具之德皆天理之公而无一毫人欲之私若少有一毫人欲之私即不合矣天地者造化之主日月者造化之精四时者造化之功鬼神者造化之灵覆载无私之谓德照临无私之谓明生息无私之谓序祸福无私之谓吉凶合序者如赏以春夏刑以秋冬之类也合吉凶者福善祸淫也先天弗违凡制作之类虽天之所未为而吾意之所为默与道契天亦不能违乎我是天合大人也奉天时者奉天理也后天奉天时如谓天叙有典而我惇之天秩有礼而我庸之之类虽天之所已为我知理之如是奉而行之而我亦不能违乎天是大人合天也盖以理为主天即我我即天故无后先彼此之可言矣

周易观象曰此申圣人作而万物覩之意

亢之为言也知进而不知退知存而不知亡知得而不知丧

任刚之失总由不知不知故无民无辅动而有悔

其惟圣人乎知进退存亡而不失其正者其惟圣人乎【王肃本以上圣人圣字作愚字谬】

知者人心之明元之澈乎始终者也不失其正天则在焉即天下治焉岂至与时偕极哉此圣人所以有见羣龙无首之吉也此用九之事因上文而叹想之见知与不知间不容发

坤至柔而动也刚至静而德方后得主而有常含万物而化光坤道其顺乎承天而时行

坤纯阴至柔也及生物而动厚载无疆则又至刚焉柔则至静矣地类也而行地无疆则动刚者其德又方焉此彖所谓元亨而利牝马之贞者也天一而地二坤地也干先而坤后故效法谓坤其至柔而动刚至静而德方者皆效法之事后顺则得其常此彖所谓先迷后得主也西南坤方万物皆致役焉不为先迷东北艮方笃实光辉得所主故能含且化而光此彖所谓利

西南得朋东北丧朋者也地势坤顺之象后顺得常之道也前之应地无疆者实天为之主也惟坤承之时行不悖此彖所谓安贞之吉也前传既分释彖文以着其义此又串合言之以见坤之配干也

至柔而动也刚至静而德方与六二直方大之义同盖六二为坤之正位如九五为干之正位也

何氏楷曰干刚坤柔定体也坤固至柔矣然干之施一至坤即能翕受而一生之气机一动不可止遏屈挠此又柔中之刚矣干动坤静定体也坤固至静矣及其承干之施陶冶万类各有定形不可移易此又静中之方矣柔静者体也刚方者用也赵氏汝楫曰坤无干以为始孰开其端先迷也天先施而地后生先阳后阴乃天地生生之常理

俞氏琰曰坤道之常盖当处后不可揜先也揜先则失坤道之常矣惟处干之后顺干而行则得其所主而不失坤道之常也

王氏宗传曰惟其动刚故能德应乎干而成万物化育之功惟其德方故能不拂乎正而顺万物性命之理此坤之德所以能配天也后得主而有常则申后顺得常之义含万物而化光则申含光大品物咸亨之义

周易观象曰坤至柔而动也刚至静而德方申释元亨利贞也柔静者坤之本体动刚则其也元亨也德方则其成也利贞也后得主而有常申释先迷后得主也柔静是其居后也刚方是其得主也惟居后故能得主而有常也含万物而化光含光大亨也西南之位又申西南得朋之义坤道其顺乎承天而时行以顺承天而行无疆贞元相生东北之位也又申东北丧朋之义又曰六二卦主故其德即坤德动刚则二之直也德方则二之方也所以虽柔静而能直方也化光则用与天配顺承则体与天合是皆二之所谓大而不习无不利也干彖传以九五明辞义故于此文言之

按周易观象各条俱有着落然以含万物而化光坤道其顺乎承天而时行分贴西南得朋东北丧朋稍有未安盖东北丧朋乃终有庆即后得主之义而坤顺承天则安贞之义也

积善之家必有余庆积不善之家必有余殃臣弑其君父非一朝一夕之故其所由来者渐矣由辨之不早辨也易曰履霜坚冰至盖言顺也

积由初起渐由初进故当辨之早重阴始凝不可听其驯致也

毛西河曰顺驯也音义并同此即本文积渐小象驯致之义与顺承顺字有别本义顺慎同则慎字在小象四爻不合

周易观象曰阴阳之类在人心则为理欲之消长而有善恶在人事则为君父臣子之顺逆而

有治乱其理一也

直其正也方其义也君子敬以直内义以方外敬义立而德不孤直方大不习无不利则不疑其所行也六二坤之正位中虚而无物欲之挠所谓至柔而动也刚则刚即其直也中正之本体也坤为地地有四方方各有宜故曰至静而德方则方即其义也事物之当然也人心本直而肆则失之惟斋庄静壹则一私不扰可以直其内制行有方而昧则违之惟明晰精当则一事不苟可以方其外是敬立乎方之体义立乎直之用内外交养德合无疆故不孤是即象所谓大矣凡人之行多疑惧而不安者由其内外之无所主持也至敬义立而德不孤则安固而不摇宁静而不惑行而宜之矣夫何疑君子自修之功此为切至皆实而可循者也

明道程子曰敬以直内义以方外合内外之道也释氏内外之道不备者也敬义夹持上达天德自此问必有事焉当用敬否曰敬只是涵养一事必有事焉须当集义又问义莫是中理否曰中理在事义在心问敬义何别曰敬只是持己之道义便知有是有非顺理而行是为义也若只守一个敬不知集义却是都无事也又问义只在事上如何曰内外一理岂特事上求合义也

朱子语类曰敬以直内是持守工夫义以方外是讲学工夫直是直上直下胸中无纤毫委曲方是割截方正之意是处此事皆合宜截然不可得而移易之意又云敬义夹持直上达天德自此最是下得夹持两字好敬主乎中义防乎外二者相夹持要放下霎时也不得只得直上去故便达天德自此表里夹持更无东西作去处上面只更有个天德问义形而外方曰义是心头断事底心断于内而外便方正万物各得其宜又云文言将敬字解直字义字解方字敬义立而德不孤即解大字敬而无义则作事出来必错了只义而无敬则无本何以为义皆孤也须是敬义立方不孤施之事君则忠于君事亲则悦于亲交朋友则信于朋友皆不待习而无一之不利也

黄氏干曰干言德业坤言敬义虽若不同而实相为经纬也欲进干之德必本之以坤之敬欲修干之业必制之以坤之义非敬则内不直德何由而进非义则外不方业何由而修终日干干虽进修夫德业而所以进修者乃用力于敬义之间用力于敬义固可以至于大而所谓大者乃德之日新而业之富有也王氏应麟曰丹书敬义之训夫子于坤六二文言一之孟子以集义为本程子以居敬为先张宣公谓工夫并进相须而成也

胡氏炳文曰干九三明诚并进也坤六二敬义偕立也主敬是为学之要集义乃讲学之事

薛氏瑄曰敬以直内涵养未一之中义以方外省察中节之和又曰敬以直内戒慎恐惧之事义以方外集义之事内外夹持用力之要莫切于此

蔡氏清曰敬义二字皆以见成之德言然直不自直必由于敬方不自方必由于义直即主忠信方即徙义直即心无私方即事当理

周易观象曰凡物之直者未必大也以其直而周方之积厚之则大矣敬而无义其德犹孤程子所讥佛氏之学是也然非直则不能成方如申韩引绳墨切事情而卒流于偏曲故敬者事之本也

阴【句】虽有美【句】含之【句】以从王事弗敢成也【句】地道也【句】妻道也臣道也【句】地道无成而代有终也

六居于三在下之上若将表着其美者然坤体阴盛与二相从故特揭之曰此亦阴爻也虽章美于内仍含之而不自暴也所以从王事弗敢成也又实指之曰此地道也正言坤体也以人伦言之则妻之于夫臣之于君同此道也代终释地道光天事代之以终地之所以配天也代终代天事终天事也地无事生长收藏皆天事也

程子曰天地日月一般月之光乃日之光也地中生物者皆天气也惟无成而代有终者地之道也谷氏杰曰爻言有终此言代有终则并其终亦非坤之所敢有也

何氏楷曰干能始万物而已必赖坤以作成之故曰代有终正对干之始言

天地变化【句】草木蕃【句】天地闭【句】贤人隐【句】易曰括囊无咎无誉【句】盖言谨也

四上下交接之地以干四重刚不中观之则此为重阴而不中矣与六二隔绝而六五无情惟初六似之初六爻辞曰履霜此曰括囊其文言曰盖言顺也此曰盖言谨也前后文意相承初盖防其渐四则慎其出也重阴不中二五不协故有天地闭贤人隐之象然辞曰括囊而文言直曰天地闭贤人隐彼象物理此抉天人小大实一致也象传曰慎不害即本文当谨之意

君子【句】黄【句】中通理【句】正位居体【句】美在其中【句】而畅于四支发于事业【句】美之至也

君子谓六五指其人以实之也黄中通理释爻辞之所谓黄者以其中也惟中故通而不累于物理而不淆于私正位居体释辞所谓裳者以其位乎中而正也正故得乎坤之体是六五之善惟其中而已故又申言之曰黄中通理则美在其中矣黄中之色通理中之德也其正位居体即畅于四支而发于事业矣四支者体也事业身之施也皆中之致也故又重言以结之曰美之至也象传曰文在中一言蔽之矣蔡氏渊曰黄中通理释黄义正位居体释裳义黄中正德在内通理文无不通言柔顺之德蕴于内也正位居在中之位居体居下体而不僭言柔顺之德形于外也美在其中黄中通理也畅于四支于事业正位居体也二五皆中二居内卦之中其见于外者不疑其所行而已五外卦之中其施于外有事业之可观坤道之美至此极矣

蔡氏清曰黄裳二字分而言之则黄为中裳为顺合而言之则惟中故顺存于中为中形于外

为顺理一而已天下无有形于外而不本乎中者惟有黄中之德故能以下体自居

林氏希元曰文言既分释黄裳了又恐认为二物不知归重处故 美在其中一条见得其所谓顺乃本于中与象传文在中也及六二之动直以方也意思一般

周易观象曰二言直方五言中顺者二居下贵有刚方之操故以直方言五居上贵有虚冲之美故以中顺言也然内直之至即无不中矣外方之至即无不顺矣中庸之学始于敬义极于中和者此也或问乾坤之学何以不同曰干二之存诚干三之忠信即坤二之直坤五之中也干二之言信行谨干三之修辞立诚即坤二之方坤五之顺也盖阳实阴虚人心之德必兼体焉以其实心体之谓之存诚谓之忠信以其虚心涵之谓之直谓之中而其为性之存存无异也以其实心而形于事谓之立诚谓之信谨以其虚心而顺乎理谓之方外谓之正位而其为之中节无异也两卦之所以不同者特以人心之德互 其义先儒之說其大致则然然不可不知兼体之妙也干五称圣人而坤五称君子盖成象谓干所以合德天地而位乎天德其用功则九二之信谨闲邪九三之忠信立诚体立而用即行工夫甚易效法谓坤所以美在其中而畅于四支 于事业其功则六二之直内方外敬义立而德不孤内外夹持工夫甚简虽兼体而实分明也又不可不知

阴疑于阳必战【句】爲其嫌于无阳也故称龙焉【句】犹未离其类也故称血焉【句】夫 黄者天地之杂也【句】天 而地黄

象言龙战于野其血 黄此逐字释之以着其义象之所谓战者为其阴疑于阳也坤至上六阴盛极矣与阳相亢情乖势胜而无小大之分疑故战战者阴为之主而象称龙者为其嫌于无阳也阳本阴之主至阴极之时不配阳而欲胜之几几乎无阳矣是主之见敌也故不称牝马而仍称龙既称龙矣则所伤者不独阴也而象称血者为其犹未离乎阴也气阳而血阴故曰类象既称血则其色当专属黄矣而又称 者阳与阴杂也当战之时两败俱伤也是虽以其血言而所指者遠言 黄即言天地矣天地之间至阴盛而战高卑之定位何如哉分终不可不辨也故指其正者以明之

郑氏维岳曰谓之曰阴阳交战也交战而独曰龙者是时阴处其盛嫌于无阳也故独称龙为战若曰阴犯顺而龙战之云尔以讨阴之义与阳不许阴为敌也当其杂也 黄似乎莫辨而不知即杂之中 者是天黄者是地断断不可混淆定分原自如此

易翼說卷六

易翼說卷七

湖北巡抚晏斯盛撰

象上传

天行【句】健【句】君子以自彊不息

天行健乾象君子谓学易者自彊不息体干也即法天也天一日一夜一周万古如此此行之健也象干不仅曰天亦不仅曰健而曰行则干之形体性情俱着而纯阳一元之理尽见即元亨利贞之四德亦毕具于其间学易者体此而静专动直无时间断则天德之刚在我而长人之仁嘉会之礼利物之义干事之知浩然流行矣士希贤而希圣以希天莫切于此何以主之曰诚何以入之曰致知力行

何氏楷曰健而无息之谓干中庸言至诚无息者通之于天也自彊言不息不言无息学之为法天事耳始于不息终于无息故中庸于无息之下文推原之曰不息则久自彊之法何如曰主敬君子庄敬日彊

潜龙勿用【句】阳在下也

阳谓九释龙下谓初释潜阳在下则非 用之时位勿用意自明

见龙在田【句】德施普也

德天德也施之普见之为也

程传曰见于地上德化及物其施已普也陆氏希声曰阳气见于田则生植利于民圣人见于世则教化渐于物

终日干干【句】反复道也

反复释终日反复于道即干而又干也盖指其实而言之三阳本多凶又当干体上下相继之地是以反复于道而不自宁也

或跃在渊【句】进无咎也

进无咎或跃之意言审于进而期其无咎作一句读非必进而后可无咎也

飞龙在天【句】大人造也【造刘向刘歆俱作聚误】

大人释龙造释飞飞则在天造则得位即所谓圣人作

亢龙有悔【句】盈不可久也

盈释亢以人事言谓盛满也不可久释有悔久犹言长也

用九【句】天德【句】不可为首也

天德即乾道不为首则变化也善藏其用也辞曰见羣龙无首谓龙见而不见其首干用而坤应也不可为首明其非无首也干为万象先万物资始首出庶物岂不当为首然羣阳俱动则六爻适均不为首矣与上九之亢者迥异也天德浑然統天御天者变化各正保合太和一元亨利贞之体也故文言曰乃见天则

地势【句】坤【句】君子以厚德载物

以纯陰而配天至顺而能承故名坤坤为地不仅曰地而曰地势则至元光亨驯利安贞之德俱见厚德载物君子之所以法地也惟顺故厚厚则无不承故能载物物犹众也六二之直方大不习无不利者此也文言敬以直内义以方外君子法地之实功物之所以能载也故曰敬义立而德不孤

履霜坚冰【句】陰始凝也【句】驯致其道【句】至坚冰也【魏志作初六履霜郭京举正据王辅嗣韩康伯本作履霜无坚冰字谬】

陰始凝释履霜至坚冰也释坚冰至驯致其道释至字言方履霜而知其坚冰至者由驯致其道以至于此陰进之初当防其渐

丘氏富国曰干初九小象释之以阳在下坤初六小象释之以陰始凝圣人欲明九六之为陰阳故于乾坤之初画言之

六二之动【句】直以方也【句】不习无不利【句】地道光也辞直方大不习无不利此不释大者直方故大文言所谓敬义立而德不孤也直方而大故不习无不利顺之至也文言所谓不疑其所行也六二得坤之全象为一卦主爻本含 光大故曰地道光干之动直坤二六曰直者以其动而承天也故曰坤至柔而动也刚然至静而德方而此曰动者盖方者其体以动之直而成故曰直以方生物之功因生生之理而为一定之质也以学者之事言之有主敬之力而后有精义之神

含章可贞【句】以时 也【句】或从王事【句】知光大也以时 因下文从王事而言六三之章含之者有待也贞也贞属知故能待时光大则知之 也以无成有终言

括囊无咎【句】慎不害也

慎释括囊不害即无咎不释无誉者仅能不害则无誉可知

黄裳元吉【句】文在中也

文黄裳取文绣之象在中谓五

谷氏家杰曰中具于内黄中见于外曰黄裳文在中乃闇然之章不显之文也即美在其中意

龙战于野【句】其道穷也

其道谓陰穷谓上陰至穷极与阳为敌不止于盈

用六永贞【句】以大终也

上之战迷也失道也贞者坤之体常道也永长也能长此贞乃后顺得常故大终当六陰皆变之时其体适均终于所事一牝马之贞也坤能从干故着其用

云雷【句】屯【句】君子以经纶【经纶郑氏本作经论谓撰书礼乐政事与象义不协谬】云者雨之属坎象雷震象以在屯时故不言雨而言云象传言雷雨之动者主震初也云雷郁勃则必两而散君子当屯难之际必有拨乱定倾之用

虽盘桓【句】志行正也【句】以贵下贱【句】大得民也

盘桓而利居贞故动而不躁志行之正为之也初为亨屯之主故贵又为三陰所归故大得民释建侯之利

六二之难【句】乘刚也【句】十年乃字【句】反常也

刚谓初九六二切而乘之又为震体虽有中德而不免于难难谓屯遭也然六二得中能守其正久而应五则刚柔正配婚礼之正故曰反常常谓常道反复也亦其中德为之

即鹿无虞以从禽也君子舍之【句】往吝【句】穷也【郭京本谓以从禽上有何字谬】

无虞而禽必陷林中以从禽也句已见其意故直言君子舍之不然穷无所往也故吝

求【句】而往【句】明也

求谓初九济屯主象求助者也往谓应初共往而济五之屯也明不妄进初与五皆有求于四者也而应初承五情义相关故曰求而往也明也

屯其膏【句】施未光也

膏泽不下于民五陷坎中正当其屯是以施而未光有膏而自屯之则未光者究未能施也节啬之过岂可大事

泣血涟如【句】何可长也

屯不能亨者上六屯极去震已远是已无望于亨也

山下出泉【句】蒙【句】君子以果行育德

周子曰山下出泉静而清也汨则乱乱则不决也慎哉其惟时中乎

坎动故以果行山静故以育德又动于静中果也流而止之育也

利用刑人【句】以正法也

正法申明法纪所以止恶于初萌开人之昏昧不释下文者意已足也用说桎梏则法弛矣其吝可知

子克家【句】刚柔接也

刚本爻也柔初三四五也接承先啓后下接初上接三四五盖一刚主于内而羣柔相应若子之贤而能起其家者也辞所谓包蒙纳妇者俱可以此句统之故不重释

勿用取女【句】行不顺也

坎三偏暗爻不中正外应上九则动而合九二虽为同体刚中志应而不为所有不顺之甚见金夫不有躬矣故勿用取女

困蒙之吝【句】独遠实也

实谓两刚爻从二不得从上亦不得蒙之亨亨以正九二是也而三间之遠矣

童蒙之吉【句】顺以防也【郑注防当作逊然古字通用不必改逊】

六五得中又与九二相应良知良能与理相说故曰顺蒙五以六居之则虚其中而逊志孚心有教能入是其巽也

利用御防【句】上下顺也

艮止也蒙极而止之顺也一阳而止众陰亦顺也顺则遏乱有余故利释此则为防之不顺不利可知故不及

云上于天【句】需【句】君子以饮食宴乐

坎为雨雨在天上则犹然云也云上于天则雨可待也彖有孚元亨主九五言象九五需于酒食中正居尊下乘乎干孚信在己以敛食宴乐有所以为需也饮食日用所必需需之而宜则宴乐矣为学则勿正勿助也处事则不躁尝不操切也

需于郊【句】不犯难行也【句】利用恒无咎【句】未失常也不犯难行去坎尚遠在坎之初未失常得需之道孙氏质卿曰不犯难而行便是常不失常便是恒德人惟中无常主或为才能所使或为意气所动或为事势所激虽犯难而不顾所以不失常最难饮食要乐不失常也能不失常更有何事

需于沙【句】衍在中也【句】虽小有言【句】以吉终也【沙郑氏作沚误】衍在中干之中爻也干为郊平旷之地史记封禅书注山陂曰衍周礼注下平曰衍沙虽近水而九二居中尚在中平之地犹为得所需者小有言终吉而增虽以二字者总为九二之得中故也言虽险而中平也

需于泥【句】灾在外也【句】自我致防【句】敬慎不败也灾在外谓近坎敬慎不害九三刚胜可不致防防来逼我无如之何自我为主犹可不致盖坎为外卦爻未入险

需于血【句】顺以听也

方至于坎上顺以听五下顺以听初入险未深两刚相援故可出险血穴通陷之小者

酒食贞吉【句】以中正也

中正谓九五虽在坎中不得为险象传所谓刚健而不陷位乎天位者本卦主象故象与象辞同

不速之客来敬之终吉【句】虽不当位【句】未大失也不中正居险极故曰不当位近九五应九三而干体皆应则所需仍不虚故曰未大失不当位释入于穴未大失释不速之客来敬之终吉不释三人者即客也

天与水违行【句】讼【句】君子以作事谋始

天乾象水坎象天行上水行下是为违违故讼讼必有因息讼必正其本是故谋其始则争端絕凡事皆然故作事谋始

胡氏炳文曰凡事有始有中有终讼中吉终凶然能谋于其始则讼端既絕中与终不必言矣

不永所事【句】讼不可长也【句】虽小有言【句】其辨明也长上声讼初也争端不可长入讼而即悔者其辨明故不长讼辨明者自反之谓谓人己之辨明也俞氏琰曰彖传云讼不可成蓋言讼之通义而不欲其成爻传讼不可长蓋言初为讼端而不欲其长

不克讼归逋【句】窜也【句】自下讼上【句】患至【句】掇也窜也释不克讼归逋言不胜而逃避也自下讼上释不克之故患至释不克之事掇两手取物而去释归逋言避患之急也讼以不终为吉逋则奏当未成释此则元罪既逋余得免祸可知故不及邑人无眚古词云明明如月如何可掇忧从中来不可断絕掇去心忧之义当如此

食旧德【句】从上吉也

上谓上卦干也三才柔不竞与人无争上干虽刚六能柔之承顺有余安然自足此其所以吉也从事无成即食旧顺承之道也故不再释

复即命渝安贞【句】不失也

不失谓其复且渝也九刚始有争端几乎失矣而处四在干之下则终能改图不致有失也六三从上者未尝有失柔能承干为之也九四不失者转而从理承五之位为之也

讼元吉【句】以中正也

中正谓九五无讼人之事有听讼之权凡听讼者不中则猛不正则偏非生灵之福九五刚而得中则不为猛钦恤以为之本也中而且正则不至偏明允以为之用也释元吉之所以然

以讼受服【句】亦不足敬也

亦不足敬言受服即非美事辞曰或锡犹意外未必然之事也传直曰受则竟锡之矣即其实事而言已有危道较辞更显更防彖传之所谓终凶也

地中有水【句】师【句】君子以容民畜众

古者以田赋出兵则井田之间即甲乘之所从出坤为地坎为水地有水即井田之象民之所在即众之所在容保也畜聚也民何以容田里是也则比闾族党州乡即伍两卒旅军师也容之则所以畜之矣

师出以律【句】失律凶也

为否臧二字解故就律字反复之而辞义显矣失律亦在出师时见为初言也

在师中吉【句】承天宠也【句】王三锡命【句】懷万邦也天谓六五为九二正应虚己任贤者与二相孚宠眷备至自二得之则为承言得君之专也懷万邦言锡命之实见上下之志同也

师或舆尸【句】大无功也

惟舆尸故无功无功故凶为本爻之乘刚言也与大人争也

左次无咎【句】未失常也

左次师之退也不敢轻进六四之柔顺为之也贞也得师之常道仍未失律

杨氏时曰师以右为主常也左次则失常矣然四以柔顺之资量敌而后进虑胜而后会退而左次未失常也

长子帅师【句】以中行也【句】弟子舆尸【句】使不当也以中行谓六五得中而应九二也此句已包田有禽利执言无咎而为言谓执言可服也弟子专功之人六三也不执言而穷兵是我使之不当矣玩传不释上文而意自明

大君有命【句】以正功也【句】小人勿用【句】必乱邦也正功师之终也叙绩行赏君命之实必乱邦者戒其渐正其始也

邵氏竇曰弟子舆尸戒于师始小人勿用戒于师终始无弟子则终无小人即始有之成赏而不封或封而不任亦不用也

地上有水【句】比【句】先王以建万国亲诸侯

坤有国之象四陰顺承诸侯之象九五当尊羣陰皆辅一人有道赖及万方肇邦啓宇大小相维臂指相使分封治以至公众建不为少力万国以地言九服之内也诸侯以人言五等之爵也

胡氏炳文曰师之容民畜众井田法也可以使民自相合而无间比之建国亲侯封建法也可使君与民相合而无间

比之初六【句】有他吉也

初比之始开天下之先当方来之日吉且洊至不一而足其为有孚之比孚之盈缶者皆可于其初卜之也故畧之而直以有他吉括之

蒋氏悌生曰爻辞有孚凡两端及盈缶等语象传皆畧之直举初六为言可见比之要道在乎始先此义与卦辞后夫凶之意相 明

比之自内【句】不自失也

内有中正之德与九五为正应不苟于比者汤聘三往伊尹乃就比二有之

比之匪人【句】不亦伤乎

六三危而懷疑在比之介外隔于四不能从五又与上六为应而上六无所终后夫也匪人也凶也不仅伤矣三与之应虽未至凶得无伤乎

外比于贤【句】以从上也

五以中正之德为比之主故曰贤上谓五四亲承之是之为从云从龙从虎从盖比之亲切者乎贞吉可知

显比之吉【句】位正中也【句】舍逆取顺【句】失前禽也【句】邑人不诫【句】上使中也【郭京本舍逆取顺失前禽也作失前禽舍逆取顺也妄改并无韵】位正中九居五也一阳得位而众陰从光大尊临得干五之一体所谓中天下而立者逆迎也迎者舍之顺而取之不杀降如前禽之失王者寬大之道中正之德也上使中言邑人所以不诫之故由于上使之然诗所谓氏之质矣日用饮食羣黎百姓徧为尔德者中正之化也

比之无首【句】无所终也

比之穷也无首犹言不早无所终言无可为后无首所以无终无终则凶可知矣

蒋氏悌生曰即卦辞后夫凶之义

风行天上【句】小畜【句】君子以懿文德

风防象天乾象风有声故防多主命令如重防以申命其较然者天君也朝廷之上也风行于

天上是命令之在朝廷也懿美也五阳畜于一陰陰美好柔嘉而九五以刚中之德主之蓋其时阳系于陰泽虽未下事虽未行而命令之脩仁言藹然德泽政事畜于斯矣其亦有待而行也

先儒以风有气无质为小畜又以懿文德为文章才艺未合象意

复自道【句】其义吉也

阳刚在初干之本然也不为物乱四相应而不相制也在身为道在事为义断之曰义吉则无咎可知

牵复在中【句】亦不自失也

两阳相连不为陰系二当爻中道与初同故曰亦不自失

夫妻反目【句】不能正室也

男以女为室六四室也三与之比阳刚不中迫而承之而四为畜主三不能制是以反目两相恶也

有孚惕出【句】上合志也

上谓九五五尊而四卑五刚而四柔又在防下以善相畜者彼此心孚故为合志志与五合则三虽迫于其下不得而相奸也血去惕出皆由于此

有孚挛如【句】不独富也

四为畜主惟五足以正之五刚中位尊四柔顺而善承四既与五孚而五亦与四孚畜之相得益彰者也畜盛故富能不丰已故以其邻

既雨既处【句】德积载也【句】君子征凶【句】有所疑也德积则畜满而不倾疑生由妇贞而有厉载德当从五也有所疑逾五而隔于四也

上天下泽【句】履【句】君子以辨上下定民志

天尊泽卑上天下泽其分秩然是故履也者礼也制法天地有定分也礼達而分定分定而志定故曰治天下莫大乎礼

王氏应麟曰上天下泽履此易之言礼雷出地奋豫此易之言乐吕成公之说本于汉书上天下泽春雷奋作先王观象爰制礼乐

素履之往【句】独行愿也

愿者心之自具本爻之刚正也居初故曰独行未与物杂自乐其素陶诗所谓抚已有深懷任真无所先者也

幽人贞吉【句】中不自乱也

九二得中故不自乱此其所以为贞吉之道也周于德者邪世不能乱履中之谓也

眇能视【句】不足以有明也【句】跛能履【句】不足以与行也【句】噬人之凶【句】位不当也【句】武人为于大君【句】志刚也柔暗偏邪妄自以为明而实不明也眇矣肆焉欲有行而实不可与也跛矣当上下相履之介而柔独履之也此履虎尾而噬人者故凶以其人而言则外柔而独履乎刚越分犯义而不顾此武人之为也武陰贼也不明而妄行者也噬人之凶在所不免

愬愬终吉【句】志行也

才刚而下于五危而知惧不敢妄行防以行志上承九五故志可行是以终吉

夬履贞厉【句】位正当也

九五刚尊而履故曰位正当位正当故夬履贞厉而亦不至凶言履尊之难也与彖履虎尾不咥人传履帝位而不疚同噬嗑之贞厉无咎传曰得当允五之有厉传曰位正当皆言当乎位之尊也

元吉在上【句】大有庆也

大有庆言履之至善履何以善以在上也上履之详审更歷久而节文中非贸贸以往砭砭自任者也上以考详有庆则五之贞厉正当可知矣履难乎其断而莫善于审也

天地交【句】泰【句】后以财成天地之道辅相天地之宜以左右民【财九家易作裁】

天气下降而地气上行故曰交交则小往大来四字俱括矣和煦之时化育之盛人君体此本天地自然之道而裁成之因天地利物之宜而辅相之于以佐助生民同得此泰矣陰阳寒暑东西南北道本自然也而明时定候画壤辨方若裁制而成就之者然分至啓闭高下燥湿宜所自遂也而作息舒藏植刈畜牧若夹辅而相扶者然

王氏申子曰天地交而陰阳和万物遂所以为泰人君象之裁成其道辅相其宜此天地之间所以无一物之不泰也

防茅征吉【句】志在外也

初内也四外也初方进四近君泰交之始其势连类而升故曰志在外

包荒得尚乎中行【句】以光大也

包荒得尚乎中行举辞之首尾兼用冯河不遐遗朋亡三句在其中省括之文也得尚乎中行本爻主象上四句之所以善者俱在乎此九二体实居中干之正体兼容万类不比朋私包荒朋亡泰以干德故光且大中行故也惟其中行故包荒而不遐遗无私小之见大也用冯河而朋亡无比溺之累光也

元住不复【句】天地际也

小大之往来于三为交际象无平不陂无往不复相际之理艰而恤者当其际之事贞而孚者处其际之道无咎也于食有福也其际之贞且孚为之也

翩翩不富【句】皆失实也【句】不戒以孚【句】中心愿也失实谓不有其富中心愿谓不戒之孚四泰之交近君者也与初二三翩翩而来同孚于五无或异志

以祉元吉【句】中以行愿也

六五得中居尊柔交于刚贵而有礼泰之隆者交由于中故曰中以行愿

城复于隍【句】其命乱也

泰之极而为否成者欲壊治者将乱乱之作也由于人事观其命而可知矣纪纲之顛倒政令之乖张乱也不待其否而知之也

天地不交【句】否【句】君子以俭德辟难【句】不可荣以禄天上地下陰阳离絶不交也泰之反也不利君子贞故以俭德辟难危行言孙俭也辟人辟世皆辟也苟系縻于荣禄则非俭矣否难之时不可为也

拔茅贞吉【句】志在君也

九五刚中有其亡苞桑之危而初六当否之初位虽遠而心则殷愿忠之志切于草茅救世之正也

大人否亨【句】不乱羣也

六二中正虽小人道长不为所乱不为所乱则小人之包承不害君子亦自可见故不释

包羞【句】位不当也

六三陰柔处危偏邪自用絕阳党陰不顺君子正否之所由成所谓匪入者也

有命无咎【句】志行也

九四刚而近君才足济否志在救世承弼出入可以有为故曰志行此象所谓有命无咎也志行则疇人之离祉可知矣

大人之吉【句】位正当也

九五刚中而正正当尊位故曰位正当有大人之德者也否虽久而事可振也苞桑之系专賴一人

否终则倾【句】何可长也

长平声言不终否也喜可知矣

天与火【句】同人【句】君子以类族辨物

天与火干与离也陰丽于阳与干为体故曰天与火同人天与火者同人之象类族辨物同人之事同人非无别之谓亲疎内外贵贱尊卑贤愚善恶各得其所以异而后为同也蓋天下有火以高明为质也族众伦物等威制度俱以人言

虞氏翻曰方以类聚物以羣分君子和而不同故于同人以类族辨物也来氏知德曰凡大象皆有功夫故曰君子以以者用也若以类族为人士为士族农为农族以辨物为物螺为螺物羽为羽物则君子以三字无安顿而托空矣苏氏轼曰同人以不同为同

出门同人【句】又谁咎也

出门同人畧变爻辞见同人于门非有私于门内也出门者同人之始门以内家人也不必言同人同人于门外则无所偏党以理为同又二为同人主爻而初承之即得所同者故占曰无咎

同人于宗【句】吝道也

卦以离应干大同之象六二则志应而专乎五非大同之道蓋同取其公恶其私心有所系私矣此外皆不可为同矣故吝

伏戎于莽【句】敌刚也【句】三岁不兴【句】安行也

敌刚谓干以干与离之同而三独偏暗居离之间欲败之也然干体刚正居尊势不得肆又二五相同三欲间之而不能间也故曰伏莽安行潜行也观望持久而终未敢动故升陵不兴

乘其墉【句】义弗克也【句】其吉则困而反则也

九四刚而能下恶二之专乎五而九五位尊正应欲攻之而不能非但势不敌亦义不敌也既知有义弗克而还则心输志服以分自安故曰反则则法则也此吉之由

同人之先【句】以中直也【句】大师相遇【句】言相克也同人之先谓号咷也中直言其诚切五与二阴阳正应本不可间也而三四之伏莽乘墉实是间之故必用大师克之而后相遇遇在克之后故曰大师相遇言相克也克而后遇遇则仍然同矣

董氏铢曰虽大帅相克而后相遇亦以义理之同物终不得而间之故也

同人于郊【句】志未得也

惟君子为能通天下之志以其广大无私也于郊与于野不遠然而有间矣居同人之外而心有不孚故曰志未得而占仅曰无悔

火在天上【句】大有【句】君子以遏恶扬善【句】顺天休命火在天上普照万方所有者大也所有者大则庶类繁多善恶殊致天命有德实为休美故君子于此制礼明法恶者有以遏之而止恶于方萌善者极为扬之而长善于不已此皆天理之当然明乎天理而顺之则有之所以大也

大有初九【句】无交害也

六五居尊有乎羣阳者也初九去五尚遠故无交刚德居初未与物扰故亦无害明匪咎之所以然而艰则无咎已见矣故不及

大车以载【句】积中不败也

九二在下卦之中阳盛而所有多故曰积干体健而能运中而未盈故不败其有攸往而无咎可知

公用亨于天子【句】小人害也

九三以干下之上而上交离明公用亨于天子之象也亦有之大者然地处偏隘在刚柔两卦

之交与初之无交害者异健以继明虽不能胜亦不可不慎也故又申小人弗克之义曰小人害也

匪其彭无咎【句】明辨皙也

九四承五密迹于上当有之大稍或自丰身家不可保矣惟其刚而能下心知戒惧不有其有一以奉公故称明皙

厥孚交如【句】信以 志也【句】威如之吉【句】易而无备也六五得中能有大者中故信信则人任故足 志所谓大中而上下应之也易坦易也信之着也无备不戒也信之素也遏恶扬善顺天休命无所作威也

大有上吉【句】自天祐也

有之极而下为六五有顺理之至是履信思顺而尚贤者天者理而已顺天之理自天祐之

地中有山【句】谦【句】君子以裒多益寡称物平施【裒郑荀作芾蜀本又作掇】

地本卑平而有山在其中是高而在下者谦也谦以制礼礼有以多为贵者有以少为贵者人情务多喜益不称乎物施必不平惟裒取其多者以益寡则事物之间文质相称而施之于用彼此适均故曰谦者德之柄也朱子语类问裒多益寡是损高就低使教恰好不是一向低去曰大抵人多见得在己者高在人者卑谦则抑己之高而卑以下人便是平也

谦谦君子【句】卑以自牧也

自牧之自对涉川之吉言言卑逊之道君子所以自养耳所养者深则其外之利用固非所计也谦而又谦其养深也解涉川之意甚精

孔氏颖達曰牧养也解谦谦君子之义恒以谦卑自养其德也

鸣谦贞吉【句】中心得也

六二中正得谦之实上承九三刚柔相协故鸣其心之所得有诸内而形于外存于已而应于人也

劳谦君子【句】万民服也

九三为谦主爻以一阳而为羣陰所依有得民之象体本艮止居坤之下不自矜伐众益归之故曰万民服此谦之最盛者

无不利防谦【句】不违则也

则法也谓九三盖九三为谦之主爻众之所取则也六四柔正与之相比能下从之是以不违此辞之所谓防谦

利用侵伐【句】征不服也【侵王虞本作寢后人妄改又郭京谓当作征亦不必且与下征字复】

谦而至用侵伐不得已之为也谦而至利侵伐又谦之至也何也谦者万民所服而彼不服也因其不服而征之义也非欲多上人也

何氏楷曰侵伐非黷武不得已而征之正以释征伐用谦之义

鸣谦【句】志未得也【句】可用行师征邑国也

上六与九三应处谦之极位高而亢虽鸣三之谦而其志实有未得也但以退为进行师之道故谦极而师可行也

雷出地奋【句】豫【句】先王以作乐崇德【句】殷荐之上帝以配祖考

震上坤下阳气奋出生意和畅故为豫乐以宣幽達滯和畅人心豫也先王之有天下也德在生民上帝之所居歆而祖考之所佑啓也故本其德而播诸声容精微尽致鼓舞尽神是之谓崇极其盛也陈之而祀上帝配以祖考合万国之欢以成豫豫之至也郑氏康成曰奋动也雷动于地上万物乃豫也人至乐则手欲鼓之足欲舞之王者功成作乐以文得之者作籥舞以武得之者作万舞各充其德以为制祀天地配以祖考者使与天同飨其功也故孝经云郊祀后稷以配天宗祀文王于明堂以配上帝也

初六鸣豫【句】志穷【句】凶也

志鸣之心也穷穷其豫之至也阴柔不中当豫之初上应九四肆然自鸣推其心必极乎豫以为快将放逞无度势所必至故凶

不终日贞吉【句】以中正也

六居二得中不以豫为安者明理烛几以为之本故视宴安如酖毒而不居贞且吉之道也不终日即介石之断也

盱豫有悔【句】位不当也

六三柔居危地是不当也豫不中正觊觎九四之豫以为豫固悔矣即稍迟留焉亦不免于悔也不如介石之断也盱豫有悔撮爻全文而中省二字

由豫大有得【句】志大行也

九四为本卦主爻以一阳而统众阴时之所由以豫者彖传曰刚应而志行正谓此也刚应者九四刚而羣陰应也言志大行则心无所疑而朋盍簪在其中矣故不释且大有得爻之全理也全理举而余可畧也

六五贞疾【句】乘刚也【句】恒不死【句】中未亡也

乘刚谓九四五虽尊而六柔弱又下逼于刚欲豫不敢故为贞疾中谓六居五得爻之中足以自存故恒不死贞疾而恒不死虽乘刚而中未亡也

胡氏炳文曰豫最易以溺人六二柔中且正能不终日而去之六五阴柔不正未免溺于豫矣犹得不死者中未亡也人莫不生于忧患而死于逸乐以六五之中仅得不死然则初之鸣三之盱上之防其不中者皆非生道矣

防豫在上【句】何可长也

何可长即有渝无咎之意言当速改

泽中有雷【句】随【句】君子以向晦入宴息

兑为泽正秋也雷乃收声阳气随阴而敛也君子观此因时休暇日出谷震东方也入昧谷兑西方也震下兑上即日之东而西也向晦矣一日之秋也有动必有静出作必入息与时相随也礼君子昼不居内夜不居外随时之道也

官有渝【句】从正吉也【句】出门交有功【句】不失也

六二中正而初九以刚正之才随之是从正也此所谓贞吉随有交象出门随之初也不失得所从也即二之中正也

系小子【句】弗兼与也

言二不可兼三当专随乎初也阳大阴小若系三则失初矣以失丈夫释系小子

系丈夫【句】志舍下也

下谓六二六二虽陰之同类而陰之随阳其情尤切既随乎四则在下之二志已舍之矣以失小子释系丈夫既曰志舍下则不随二而随四矣以陰随阳为得其正爻所谓随有求得而利居贞者俱备故不兼释

随有获【句】其义凶也【句】有孚在道【句】明【句】功也

四近君臣也又临三为下所随获也上逼君而下得众于义不安故凶明谓明于义率下以奉上而不敢以众自随此则孚上之道保身之功

争于嘉吉【句】位正中也

九五中正乐于从贤亦为人所共随上六处卦外贤而高上者也九五心与之孚敬而尚之若拜嘉者然

拘系之【句】上穷也

上穷无可复随退而随二

山下有风【句】蛊【句】君子以振民育德

振动者防风之行育养者艮山之厚俱以民言如作新新民之谓盖蛊当有事之时振兴率育最为要务即兴贤育才亦在其中程传本义以育德为治己之事于文义未合

李氏舜臣曰山下有风则风落山之谓山木摧落蛊败之象飭蛊者必须有以振之振民者犹防风之鼓为号令也育德者犹艮山之养成材力也李氏简曰山下有风振物之象也蛊之时民德败矣败而育之必振动之使离其故习可也犹风之挠物适所以养之也

干父之蛊【句】意承考也

干蛊在初意在承考则子之贤者故考可以无咎虽厉而终吉也

干母之蛊【句】得中道也

九二得中不至过激爻所谓不可贞者委曲以济即中之谓也

干父之蛊【句】终无咎也

无大咎则终无咎矣终者以其究竟言之也九三以刚居危当蛊之时不无过激然飭蛊之事惟刚能济三当其际干之有成故爻曰小有悔无大咎而传曰终无咎也

裕父之蛊【句】往未得也

蛊深矣六四才柔不中不能干者往无所济

干父用誉【句】承以德也

六五柔尊得中是其德也既干父之蛊而亲父不失令名惟其德之盛也初六曰意承考虽柔而不中故不言德誉此则柔而居尊得中干蛊之最善者以德为承非仅以意承也三之悔四之吝奚啻什伯

不事王侯【句】志可则也

尚志即其事也故可则上九居事之外惟志为尚

泽上有地【句】临【句】君子以教思无穷容保民无疆临大也泽之盛满也泽与地平亦大之义兑悦而坤顺理义以悦民心教思所以无穷休养以顺民欲容保所以无疆此临之最

盛者君子以之

王氏弼曰相临之道莫若悦顺不恃威制得物之诚故物无遗也

蔡氏清曰劳之来之匡之直之辅之翼之又从而振德之此可见君子教思之无穷民吾同胞以至鰥寡孤独皆吾兄弟之颠连而无告者也必使皆乐其乐而利其利可见君子之容保民无疆也

咸临贞吉【句】志行正也

志正行正本爻刚明当临之初与二相比正临之时此其所以为贞而吉也

咸临吉无不利【句】未顺命也

命君命也兑象内卦以説为体正临乎阴疑于顺上之命矣然本爻为临之主刚而得中上应六五以道为临非苟从者彖传所谓大亨以正天之道也否之匪人所不得干也时方泰而不至于否也

甘临【句】位不当也【句】既忧之【句】咎不长也

兑说体临阴之始有浸味乎其下之意故六三曰甘临柔居危地故不当不当则甘临者之所以无攸利也咎不长能改也三知忧惕不复甘矣

至临无咎【句】位当也【虞氏荀九家皆作当位非也毛氏奇龄谓其与上长韵不协证据甚明】

柔当坤顺之下爻之正位上近君下亲民四之所以为至临得正所以无咎

大君之宜【句】行中之谓也

好问好察执两端而用中于民此聪明睿知智之所以大也六五柔中下应九二虚己任人临中之道故曰行中所以为大君之宜

敦临之吉【句】志在内也

坤顺也厚也居临之终用成初二之临故志在内非正应故曰志泰初曰志在外阳方通也欲成泰也伊尹所以身任天下之重也临上曰志在内阳已长也成其临也尧舜所以髦期而不倦也

风行地上【句】观【句】先王以省方观民设教

坤为地为众四方万民之象防以申命教之象命令行于四方及乎氓庶则巡行观风布化之义此先王所为有省方之礼用以观民俗设政教奢则约之以俭俭则示之以礼

初六童观【句】小人道也

小人谓细民民可使由不可使知初六柔居观初去阳甚远无所见者不识不知其常也明其为小人之道则君子而一无知见羞可知矣非观之道

闚观女贞【句】亦可丑也

五观之主也二虽得中应五而与三四相隔非大观也浅识之人所见无多其贤于小人不远矣故曰亦可丑

观我生进退【句】未失道也

六三去五不远将观国之光者柔居危地当观上下之际审慎之至不易于进故曰未失道

观国之光【句】尚宾也

尚宾犹言尚贤谓四切近于五为上所宾也此下观之最盛者

观我生【句】观民也

观民者观我生之实九五之尊呼吸斯民天聪明自我民聪明天明畏自我民明畏观民则观我者至矣义极精邃

观其生【句】志未平也

处观之极无位之地似可忘情于民矣然阳德与五同也岂以身为物外之身哉观五之生所以为民也忧乐君民心未尝防故曰志未平

雷电【句】噬嗑【句】先王以明罚勅法【蔡邕石经本李鼎祚易解皆作电雷程传朱子本义亦谓此文有误然以泰象观之亦可作雷电例不必作电雷也】

震下离上陰阳摩戛相和而成若頤中有物噬之而嗑者此其象也雷震动而威电离丽而明罚刑讞也法律令也明者彰示之以其条勅者儆饬之以其理蓋震威为体而离明为用也

雷电陰阳之交气由内而外顺语为文故曰雷电噬嗑犹地天泰不曰地天交而曰天地交也不必如石经本作雷电噬嗑项氏安世曰阴阳相噬而有声则为雷有光则为电二物相噬而嗑故曰雷电噬嗑此为得之

徐氏几曰明罚者所以示民而使之知所避勅法者所以防民而使之知所畏此先王忠厚之意也未至折狱致刑也故与丰象异

履校灭趾【句】不行也

不行者噬嗑震动之初即有以惩之使不行也如此方得无咎明爻象之意

噬肤灭鼻【句】乘刚也

乘刚初刚而二乘之也用法有过严之意为无咎解也六二本柔中而仅曰无咎以其乘刚也故其象为噬肤灭鼻

遇毒【句】位不当也

不当谓六三两噬之介震极又危地也噬四而不免于梗也故吝

利艰贞吉【句】未光也【陆德明本光字下有大字与当韵不协谬增可知】

九四正当所噬之地刚而难合上下重阴暗昧交杂故未光释吉之在于利艰贞也象之所谓干肺金矢者可见矣

贞厉无咎【句】得当也

得当谓九五得中也尊而柔中以之治狱仁心为质钦恤明允

何校灭耳【句】聪不明也

因象而追咎之言此何校之重者听之不聪目之不明也言不悔之于早也为上处噬之极也

山下有火【句】贲【句】君子以明庶政【句】无敢折狱【明蜀本作命讹谬】

山艮火离山下有火即所谓文明以止者君子观此百司职事以离之文明治之使纪纲布而德意昭可也至于折狱则文不知所正而文饰情诬矣故不敢何氏楷曰吕刑曰非佞折狱惟良折狱苟恃其明察而缘饰以没其情民且有含冤矣故言刻覈者曰深文言煅炼者曰文致

法曰文网弄法曰舞文治狱之多冤未有不超于文者此皆敢心误之也

舍车而徒【句】义弗乘也

六二为初之所承二乘初而初不可以上乘乎二时处下位以质为文虽柔来文刚有六二之责而不有也义也曰弗乘则舍车而徒可知矣

贲其须【句】与上兴也

上谓三与三并兴相须而动也二阴而比三之阳三阳而比二之阴故相须为贲

永贞之吉【句】终莫之陵也

陵过之也九三刚以为质虽当上下重阴之贲而其质不可逾也

六四【句】当位疑也【句】匪防婚媾【句】终无尤也

刚上文柔艮文离也柔来文刚离文艮也当位当两贲之位也刚上文柔艮也四艮之同体欲得上之贲而隔于五能无疑乎然上既同体则四顺乎五亦终得上之贲也故无尤

又六四应下初九为贲而近乘九三则又间之矣故疑然阴阳正应非疑者所能间终与初贲故无尤

六五之吉【句】有善也

喜喜上之贲也刚上文柔贲之主爻也六五无应而求贲于上上适有以贲之故有喜不言吝者其义吉也

白賁无咎【句】上得志也

得志谓賁六五蓋刚上文柔而成賁之功本卦主爻与他卦之无位者异道高而祛天下之浮德盛而救当世之靡上九有之

山附于地【句】剥【句】上以厚下安宅

山与地为同体而曰附则山有頽委于地之势故象为剥亦其下之不固为之即阴剥阳之义观剥象者所当扶其弊也凡居处必根基厚而后栋宇完故为上者欲保其邦必厚其民斯不至于剥而无倾覆之患故曰民为邦本本固邦宁

司马氏光曰基薄则墙頽下薄则上危故君子厚其下者所以安其居也

剥牀以足【句】以灭下也

灭下剥初也蔑贞也下不固也阴渐侵阳下不固能为上乎剥观其初而势已危矣

剥牀以辨【句】未有与也

六二隔上九四位不能应阳故未有与如牀足之交蠹蚀而无与扶持者是絕意于阳而正为其剥者与初无异也此蔑贞所以凶

崔氏憬曰辨当在第足之间是牀榫也未有与者言至三则应故二未有与也

剥之无咎【句】失上下也

上下谓四陰失者不与四阴同也独应上九也

剥牀以肤【句】切近灾也

四近君剥之甚者由足至辨之上则及其身矣灾即凶也

以宫人宠【句】终无尤也

陰剥阳皆尤也而六五亲承上九得阳居尊能中顺以事之而率羣陰以奉上终不剥尽故无尤

君子得輿【句】民所载也【句】小人剥庐【句】终不可用也一阳在上无终剥之理为众阴所载惟有君子之德足以持剥而为复民之向治者翕然归心矣小人则与阳德相违当此之时无复可用不使姑容

雷在地中【句】复【句】先王以至日闭關【句】商旅不行【句】后不省方

雷阳气也在地中则剥者复矣至日冬至也一阳始生之候阳复在初其几甚防宜静以养之是以先王因积阴之在上养阳气于方萌于时有闭關之令商旅息其贸迁同乎民也方域停其巡省慎乎已也至日冬至之日十一月也然虞书云十有一月朔巡狩则至日当止以冬至之一日言矣

不远之复【句】以脩身也

初九一阳始生元阳也元者善之长本爻为复之主其在人也元善之还为几甚速善几之动天心具见善长恶消修身之道莫要于此爻所谓无祇悔者在其中矣

休复之吉【句】以下仁也

仁元阳也谓初九二与之比下而从之犹言从善也柔中之德秉懿是好其所固然此所以吉

频便之厉【句】义无咎也

频复中虽有频失之厉然能复则改过迁善之义也故无咎上下句相足见意

中行独复【句】以从道也

从道谓虑初二比初故曰下仁四应初故曰从道以性言曰仁以行言曰道要皆人心之元也

郭氏雍曰剥六三乃复六四反对其意相类在剥取其失上下以应阳在复取其独复以从道

敦复无悔【句】中以自考也

中谓五得中也考善也察也成也中德之自有也诚也择善而固执之所以自成也此敦厚乎复所以无悔

迷复之凶【句】反君道也

遂过长恶丧失天理去阳已远不知复者非人道也曰反君道者因象以其国君凶而言凶字已包灾眚师败

天下雷行物与【句】无妄【句】先王以茂对时【句】育万物【郭京本无万字臆删非古】

天下雷行必曰物与者即物之与以见天地之无妄也物与物物而与之也无妄物物皆天地之性也实理也诚也干也震其初动也先王因雷行物与之理以抚时以大生于天地也茂者畅然之意对时犹言乘时育物谓教養也

蔡氏清曰物与无妄万物各正其性命也对时育物者因其所性而不为私乃圣人尽物之性也

毛氏奇龄曰汉后易家皆以天下雷行为句物与无妄又句如九家易之物受以生无有灾妄

是也后儒有以天下雷行物与句者张清子云天雷而物应胡旦云物物相与以应雷行是也又王几焦竑钱一本皆以此句今从之

无妄之往【句】得志也

得志以天动也震本干之初动与天同心一诚相感往无不得

不耕获【句】未富也【不耕获郭京本作不耕而获未富也作求富也大失象意妄也】未富不谋利不计功也未尝有获之心也事其所事无妄念之杂也言不耕获则不菑畲已该往无不利亦可知

行人得牛【句】邑人灾也

牛谓或所繫之牛也行人得而邑人灾其为无妄可知六三震极爻又不中所值然也节省辞句而义益明

可贞无咎【句】固有之也

九四千体在外卦之初守其在我致不致灾言贞本可以无咎也

无妄之药【句】不可试也

无妄之药妄也不可试当自信也九五刚正之至毫不可私极之意外更见其纯

无妄之行【句】穷之灾也

穷谓上九刚之极不免妄动失其本体故灾灾即有眚也无攸利也

何氏楷曰无妄之行犹象传所云无妄之往上九干之穷与干亢龙同义故二小象亦同以其失意于行故曰眚以其时位使然故曰灾

天在山中【句】大畜【句】君子以多识前言往行以畜其德【识刘瓛作志义同】

天谓干山谓艮大谓阳干大而艮止是天在山中阳之止也大畜之所以名也夫言行者德之舆也而前言往行皆德之归也君子之多识非有外也言行知所止而德蕴焉则所畜者大矣象传曰刚健笃实辉光日新其德然则多识前言往行者固所以畜之功也君子之脩日新之美有由然矣

丘氏富国曰大畜言畜德小畜言懿文德畜德虽同而文德则德之小者也

张氏清子曰天在山中畜其气也凡山中有风云雷雨之气皆天也

有厉利已【句】不犯灾也

当畜之时而初当其始又应四而动则止之端倪矣卦本无妄之反初九者无妄之上九其传曰穷之灾也今转而为畜则前之所谓灾者可以已矣故曰不犯需之初曰不犯难行讼反为需亦初与四应需之始也爻象相近故辞亦相近

舆说辐【句】中无尤也

九二在下卦之中能应艮止有以自畜不致妄行何尤之有干为舆而说其輹輹在舆中说之者自止也故曰中无尤

吕氏祖谦曰二以刚而居中能度其宜见其不可自说其舆輹而不行也故曰无尤

利有攸往【句】上合志也

上上九也一卦之主本爻与之同德则内外一心故曰合志合志则三进而上共享天衢可也其攸往之利可知释利有攸往则利艰贞闲舆卫无他义矣周易观象曰小畜三上亦同德而

义异者此卦有刚上之象三近上体而与上应所以为合志

六四元吉【句】有喜也

艮以畜干四则畜之最近者也刚而以柔为体顺以畜之彼此相应童牛之牯禁制于未然习惯于少成所谓大善之道也故有喜其曰六四之吉者则元吉也

六五之吉【句】有庆也

指言六五之吉者以柔中居尊之能畜刚也畜之吉莫盛于此威伐不事而法制足以维之若一牙之系豮豕不大声以色而有以驯其刚暴天下之福不仅有喜且有庆也喜见于未然庆着于已定

何天之衢【句】道大行也【衢下郭京本有亨字妄增】

上九艮止之终大畜之成也主乎畜者也道释衢大行释亨盖刚上尚贤而不家食其道大行与干同道而道能畜干又为五所尊不仅身都通显而且其道光昌矣亨也畜极而通也

游氏酢曰畜道之成贤路自我而四达矣故曰何天之衢亨彖曰刚上而尚贤则大畜之义主于上九也崇俊良以列庶位推毂贤路使天下无家食之贤者上九之任也天下至于无家食之贤则道之大行孰盛于此

何氏楷曰备于身之谓德达于世之谓道道可大行其亨可知彖所谓不家食吉而利涉大川者此也

山下有雷【句】颐【句】君子以慎言语节饮食

颐口象言语饮食皆口之为之下动上止动则言语易放饮食易过止则慎而不至于放节而不至于过是艮犹为养之主也养身之道莫切乎此

朱子语类或云谚有祸从口出病从口入甚好曰此语前辈曾用以解颐之象慎言语节饮食

俞氏琰曰頤乃口颊之象故取其切于頤者言之曰慎言语节饮食充此言语之类则凡号令政教之出于己者皆所当慎而不可悖出充此饮食之类则凡货财赋税之入于上者皆所当节而不可悖入

观我朵頤【句】亦不足贵也

当頤之初而志在饮食斯亦不足观矣失其所养故贱亦字承舍灵龟而言专释观朵頤则舍灵龟可知

六二征凶【句】行失类也

乘刚妄动志主于进而五不相应与故曰失类失类也者拂经也释征之为凶则颠頤拂经于丘頤皆征之为矣

程传曰征而从上也凶者非其类故也往求而失其类得凶宜矣行往也

十年勿用【句】道大悖也【大李鼎祚作德谬】

道大悖失养之道也艮止頤之贞也养道也六三不中下体动极当止而不能止自养之不善者故曰道大悖是即所谓拂頤者也拂頤故十年不用而无所利释一句而上下俱见

项氏安世曰拂颠贞三字当连读頤之卦辞曰頤贞吉三之爻辞曰拂頤贞凶卦中惟此一爻与卦义相反故曰道大悖也

顛頤之吉【句】上施光也

上谓上卦与震初应是下颠震而四以柔止养之有以厌其愿遂其求也四承五以养人其体光辉有应于下无少亏欠故曰上施光然则视耽耽而欲逐逐无咎者犹欲仁得仁又焉贪云尔也

居贞之吉【句】顺以从上也

頤贞养之正道也上九是矣六五质柔欲有所茹若拂经矣然柔而得中能虚己下贤以顺从乎上则养贤以及万民养之道正矣此其所以吉也知顺从之吉则涉川自用之不可明矣

由頤厉吉【句】大有庆也

頤之主爻养道由此而成上足以沛国恩下足以泽万民所谓四海之内以恬以熙中外之福也故曰大有庆其厉不足言矣

王氏宗传曰豫之九四天下由之以豫故曰大有得頤之上九天下由之以頤故曰大有庆

泽灭木【句】大过【句】君子以独立不惧遯世无闷

泽谓兑木谓防灭没也此着其象独立不惧遯世无闷亦其中德为之此大过之所以亨也刚而得中是有大过人之行者也故进则独立而不惧退则遯世而无闷

李氏简曰君子进则大有为独立不惧可也退而穷居则坚贞不移遯世无闷可也皆大过之事

借用白茅【句】柔在下也

柔谓六下谓初过刚之当用柔也于初尤善系辞所谓慎之至者尽之

老夫女妻【句】过以相与也

过谓阳之过也于人则婚期之过也然初陰在下有相助之理柔以济刚也故曰相与观相与之意则枯杨生稊之象无不利之占俱见矣

栋挠之凶【句】不可以有辅也

上下防阴大过之辅也九三偏危之地刚过之极初隔于二上比于五皆不相与此所以挠且凶也项氏安世曰全卦有栋挠之象而九三乃独有之全卦有利往之象而九二乃独有之盖九二当过刚之时独能用中在六爻之中独此一爻不过故无不利也卦体本以中太强而本末弱是以为挠九三以刚处危在六爻之中独此一爻为过故栋愈挠而不可辅也

栋隆之吉【句】不挠乎下也

下谓初不挠以其相应相借也有借之者故不挠不挠于下则栋隆于上自然之理非三之可得而与也应初之义重故不释有它之吝

枯杨生华【句】何可久也【句】老妇士夫【句】亦可丑也何可久阳过而生意尽矣亦可丑失偶而人道穷矣可丑则无誉之实无咎不足言也

蘓氏轼曰稊者颠而复蘖反其始也华者盈而毕速其终也

何氏楷曰盛极将枯而又生华以自耗竭不能久矣

过涉之凶【句】不可咎也

大过之极适丁其凶事虽不济非其罪也

苏氏轼曰过涉至于灭顶将有所救也势不可救而徒犯其害故凶然其义则不可咎也

水洊至【句】习坎【句】君子以常德行习教事【洊京房作臻干寶作荐毛氏奇齡曰皆声转义同】

坎为水内外皆坎如水之渐进而来不息也故曰习此释卦名象常德行习教事即从习字起义德存诸心行见于事惟有常斯可久洊习不懈则内存而不忘条教政事惟能习斯可成洊习不弛则深入而不觉习坎之习以卦体言习教事之习以施于人者言常德行习教事当如

本义分治己治人司马氏苏氏俱以治己言未协

陆氏佃曰离言明两作坎言水洊至起而上者作也趋而下者至也

王氏宗传曰坎者水之科也故以水洊至为习坎之象上坎既盈至于下坎孟子所谓盈科而后进也盈科后进不舍其昼夜之功也君子德行贵其有常而教事贵于习熟此不舍其昼夜之功也

习坎入坎【句】失道凶也

入坎知其为坎而身试之也六动坎初似之非处险之道纳诸罟获陷阱之中而莫之知避凶可知矣钱氏志立曰行险而不失其信此是出险之道若小人行险以侥幸则为初六上六失道之凶也

求小得【句】未出中也

未出中犹言未失中也未失中故虽有险而小得彖曰坎有孚维心亨传曰行险而不失其信维心亨乃以刚中也本爻刚而得中故本传实指而明之曰未出中盖因坎有险而言似乎无所得也而又小有得者以其有刚中之德也

郭氏雍曰一离乎中则失之矣故象言未出中也

来之坎坎【句】终无功也

三下卦之一终爻又不中处危且上坎继至故无功言无功则入于坎窞可知

樽酒簋贰【句】刚柔际也

刚九五柔六四际彼此相需九五不陷于险势尊足以相维六四承之资以出险患难之交情亲切愈朴愈诚滹沱豆粥芡羹麦饭差有似之

王氏弼曰刚柔相比而相亲焉际之谓也

姜氏寶曰观孔子小象以樽酒簋贰为句则晁氏之說以贰用缶为句者非矣

坎不盈【句】中未大也

未大言其平也亦所以无咎也坎难以平为亨五刚中居尊能出乎险天下之患既息汤火新去则平矣至于流行济物尚有待也且其时未可骤施也以坎之时言之故未大非终有所不足也

陆氏振奇曰知二之得小则知五之未大矣

易简录曰流水之体原不可盈祇平原来是平而要于平象曰中未大亦殊是大不得诗咏文王小心翼翼二求小五未大总是干体自强不息一脉坎中未大要于干震主未光要于艮氏通八为一脉

上六失道【句】凶三岁也

当险极而阴柔不振失刚中之道也凶三岁终不可脱险也

易简录曰水须上下通流故初入窞即不流即曰失道上有系与寘即不流亦曰失道

明两作【句】离【句】大人以继明照于四方【郭京本以字下有明而二字又一本无继于二字俱增删之妄】

明两作重明不息之谓内外两体之象虚明在中照临四達治人之事故称大人大人观此明两作而成象则明之为体大矣上者钦明文明次之日跻缉熙又次之则学有缉熙于光明所以四方在御旁照无遗离明之功固作睹之大用矣彖传曰重明以丽乎正乃化成天下亦此意也

朱子语类曰明两作犹言水流至今日明来日又明明字便是指日而言只是一个明两番作

徐氏在汉曰继明者无时不明也照于四方者无处不照也惟其无时不明所以无处不照是

之谓明明德于天下也

履错之敬【句】以辟咎也

履错者咎之丛也惟敬足以定错故曰辟咎此卦一阳一陰纷错之际自下观之如履然然爻刚而明敬之象也慎此以往其无所失矣

黄离元吉【句】得中道也

黄中色言得中道则柔丽乎中正之谓矣离坤道也六二得之以为虚明之体是其本然故元吉也二五得中而独以中予二者离之正位也曰以中正而明无不照过此则昃矣至五则继明之象忧劳后吉视二之元吉远矣

郭氏忠孝曰离之所以亨柔丽乎中正故亨也黄离之所以元吉文明而用中故元吉也故尽一卦之美其惟六二乎

日昃之离【句】何可久也

过中则昃明将晦矣故不可久曰何可久则鼓缶而歌大耋之嗟欣戚不常者可知也故不释

突如其来如【句】无所容也

犯上絕下恃才妄作身处危地谁其予之焚心无所容死生无所容弃身无所容刚逆之祸也

六五之吉【句】离王公也【离郑本作丽】

离丽也王公尊位也当继明之时而丽乎尊位忧勤惕厉其所有事

王用出征【句】以正邦也【王肃本此下有获匪其丑大有功也二句毛奇龄曰小象于象辞原不必用到此妄增之语】

邦之乱必有渠魁折首刖渠魁得而声罪致讨之义彰矣正明定分明作有功者也离明之极听命于五亦继照四方矣

易翼说卷八

湖北巡抚晏斯盛撰

象下传

山上有泽【句】咸【句】君子以虚受人

山艮象泽兑象本两体而山上有泽则一气也所谓山泽通气者咸象之矣咸主乎感而其本则在虚受虚受也者无有我之私也九三之系辞曰天下何思何虑天下同归而殊途一致而百虑天下何思何虑虚之至也止见为受不见为感是感人以无心也无心之感其感神矣

郭氏雍曰惟虚故能受受故能感不能感者以不能受故也不能受者以不能虚故也

胡氏炳文曰以虚受人无心之感也

何氏楷曰六爻之中一言思三言志思何可废而至于朋从则非虚志何可无而未而外而随人则非虚极而言之天地以虚而感物圣人以虚而感人心三才之道尽于是矣

咸其拇【句】志在外也

外谓四四刚初柔感应相与而初动则柔为之主故其意向在四之刚感之甚浅者所以为咸拇之象虞氏翻曰志在外谓四也

孔氏颖达曰与四相应所感在外

虽凶居吉【句】顺不害也

刚柔相应感矣六二至静思动如腓之不动者亦动似凶而有害然六二得中而能顺乎理可无躁动之虑也故顺而不害释居之吉也咸腓之凶不必言矣

咸其股【句】亦不处也【句】志在随人【句】所执下也

三以阳止陰而有应于上则亦动矣故曰不处不处者感于上之说其志随乎上体也以上体视三则三为下男下女礼降而卑势则然也所执由所志不能自主者也

贞吉悔亡【句】未感害也【句】憧憧往来【句】未光大也未感害心体之本然也未光大失其心之本然也未感害者存其体贞吉而悔亡未光大者失其官往来之憧憧

陆氏九渊曰咸九四一爻圣人以其当心之位其言感通为尤至曰贞吉悔亡而象以为未感害也盖未为私感所害则心之本然无适而不正无感而不通曰憧憧往来朋從尔思而象以为未光大也盖憧憧往来之私心其所感必狭從其思者独其私朋而已圣人之洗心其诸涤去憧憧往来之私而全其本然之正也欤此所以退藏于密而能同乎氏交乎物而不墮于胶焉溺焉之一偏者也

咸其脢【句】志末也

末谓上六五与二相感而上六切近有所以系其心故不昵于二

不良其背而咸其脢未能贞吉第可无悔而已愈于憧憧往来者耳

李氏鼎祚曰末犹上也五比于上故咸其脢志末者谓五志感于上也

朱氏震曰卦以初为本上为末

何氏楷曰谓五志在与上相感也系辞曰其初难知其上易知大过彖传称本末弱末指上亦可知矣

咸其辅颊舌【句】滕口說也【滕九家易作垂误】

兑为口所感而动者在辅颊舌则尚口可知矣感不以心而以口末也柔说外见其感已尽不足言也

雷风【句】恒【句】君子以立不易方

男女内外德象交应皆恒理也人而无恒不可以作巫医亡而为有虚而为盈约而为泰难乎有恒有恒则可进于善以成其德而入于圣方定位也即定理也位虽随时而易而理仍不易也神本无方而各有典常则不易矣此君子之所以自立而成其德也胡氏炳文曰雷风虽变而有不变者存体雷风之变者为我之不变者善体雷风者也

杨敬仲曰雷风天下之至动疑不可以言恒而恒卦有此象此人情之所疑而君子以为未始或动也此非训诂之所解非心思之所及也孔子曰哀乐相生即风雷之至也而继之曰正明目视之不可得而见也倾耳听之不可得而闻也夫哀乐不可见不可闻谓之未始或动其孰曰不可未始或动是不易方也此之谓立此之谓君子此之谓雷风此之谓不可以动静论

浚恒之凶【句】始【句】求深也

始谓初求深者防方入而有所干于震动也交浅言深失恒之理不贞也故凶

王氏申子曰可恒之道以久而成始而求深是施诸已则欲速不达施诸人则责之太遽者也

九二悔亡【句】能久中也

九二刚而得中恒之最善者刚中则存主有常外物不得而夺之悔之所以亡也六五亦得中而夫子凶者不如九二之刚也

不恒其德【句】无所容也

无所容刚处危地在恒之界志在上进而九四轧之气足陵下而九二胜之得上之应而震极疑之此承羞者所以不一而足也

久非其位【句】安得禽也

震体动初在恒之界非可安之地动之常者莫如田而田非其所故有田不获禽之象

张氏彦陵曰位者所当止之处即正道也安得二字即是提醒他处若曰以有用之心而用之无用之地大是可惜

妇人贞吉【句】从一而终也【句】夫子制义【句】从妇【句】凶也言柔之不如刚耳柔中处恒妇人之事非君子之道也从一者附于人不敢自专柔道也制者中有主不从人刚事也中有主则能制义义不执一故为恒不能制义又何所恃以为恒哉此六五之所以不如九二也

振恒在上【句】大无功也

震动之极反乎恒之道者恒者天经地义有必不可变之理上六当恒之终居震之极是欲建不世出之功者不知其祸天下也大无功正所以破其喜功之心也爻陰贼而很故究极言之殷因夏礼所损益可知周因殷礼所损益可知恒也有功也舍礼更无损益秦氏尽变三代之制安石自作新法未见其能有功也

王氏申子曰此所谓天下本无事庸人自扰之其好功生事之过乎故圣人折之曰大无功

天下有山【句】遯【句】君子以远小人【句】不恶而严

天下有山陰起而进阳隆而上遯之象也阳为君子陰为小人陰气方长而阳体羣聚上行不与陰比若君子之遠小人者然其遠之也未尝为已甚之行显加辞色而其刚明正直所以自处与其所以处之者甚为端严凛乎其不可干也处遯之时当如是也杨氏时曰天下有山其藏疾也无所拒然亦终莫之陵也此君子不恶而严之象也

刘用相曰山在天下止而不动何遯之有止而遯以止遯也情而无情何其遠也随高就低惟世所适何其不恶也摇动不得震撼不得又何严也然则小人之视君子亦如是止矣以君子遯之也止也

先儒多以天属君子山属小人非也天穹窿不可阶山高峻亦不可攀干纯阳无所杂艮阳上行而止陰亦不相干陰阳各自为类而阳不淆陰故为君子遠小人也杨氏刘氏之说得之

遯尾之厉【句】不往何灾也

尾初也当遯之初犹可及止也往则遯矣在陰进之时方将致遯其势与事必有不可为者危地也不往即不入于危故无灾言初之当慎也象曰勿用有攸往而此曰不往何灾就其解而申明之也

执用黄牛【句】固志也

六二在中其德不爽故称志在陰阳相离之间若志有不坚败矣所以当固象曰用黄牛之革又曰莫之胜说固甚矣

苏氏轼曰方阳之遯其所以执而留之者非出于欵诚至意阳不固也故必有如牛革之坚者而又用黄焉则中确之至也

侯氏果行曰上应贵主志在辅时不随物遯独守中直坚如革束执此之志莫之胜说殷之父师当之矣先儒固志多以遯者言于陰阳之际不协苏氏侯氏之说较长

系遯之厉【句】有疾惫也【句】畜臣妾吉【句】不可大事也惫羸弱之疾系遯之为也阳恋陰而不舍正气败也不可大事正言系遯者之无能为以明辞所谓吉者偏辞也犹言此私小之事而非君子立身之道也张氏清子曰当遯而系故有疾而厉至于惫乏也惟当以刚自守止下二陰而畜之以臣妾之道然后获吉又岂可当大事乎

君子好遯【句】小人否也

九四遯既成矣无复陰之为累以三之系初之尾观之则四之好可见此君子之事也系遯者私尾遯者激非不恶而严之道四则超然于陰之外故遯且好矣若小人则以初之应而终昵于初不能脱然于陰之外犹之乎初与三之累也故否

俞氏琰曰爻辞云好遯君子吉小人否爻传不及吉字盖谓惟君子为能好遯小人则不能好遯也既好遯则遯而亨其吉不假言矣

质卿曰天下事有断断乎只君子能之而小人不能者此好遯是也君子刚断小人系恋也此圣人决言之词以明君子小人之分

嘉遯贞吉【句】以正志也

九五刚健中正当遯之时得遯之善道尊而众孚德高望重非陰邪所能留即好遯者亦信从也二曰固志此曰正志义正相发

俞玉润曰九四刚而不正其遠小人以情九五刚而中正其遠小人以礼

肥遯无不利【句】无所疑也

三之疾惫有所疑也为其系于陰也上九则遠于陰矣尚何所系哉无所系则无所疑无所疑则浩然自得而悠然自足矣故肥

张氏振渊曰别传云三疑于所比四五疑于所应故无所疑独归于上宇宙之杀机皆从疑生才疑便于天覆之量不无亏蚀即幽栖高隱仅称山泽之癯而于肥义殊遠按九五未可以疑言正志则疑不足以及之

孙复曰太公之亨于周四皓之亨于汉脱然高举蘂未芽而介于道厉未阶而洁于身行之藏之系我独照而已

雷在天上【句】大壮【句】君子以非礼弗履

非礼之履柔不足以胜私也大壮干健而震动其刚胜矣刚胜则私不能容其象则雷作于天之上肃然自省而不敢寧居君子用以克己复礼精神皆赴焉非苟而已也克己斯可以复礼故圣人语顏子克复之功亦曰非礼勿视聽言动而已

朱子本义曰自胜者强语类曰雷在天上是甚生威严人之克己须是如雷在天上方能克去非礼吴因之曰非礼弗履全要 自胜二字意假如挥百万强敌只要勇力壮盛还只在外邊着力惟非礼之私潜滋暗长于隱微之中勇不及施力不及用直從念头起处斩絕得尽制缚得定消融得淨方始不形于动履之间苟非天下之大勇未有能洗除滌蕩者也故以自胜为强

陆庸成曰非礼弗履总归一贞礼者贞之矩也所以摄情归性而所动皆刚德也

壮于趾【句】其孚穷也

其孚穷也为征凶有孚而言征凶而且孚焉必往而无疑者也孚亦穷矣刚动于下而不自度者壮趾之象有之

张氏振渊曰困何必事后只始壮便是穷极田地其孚穷正在壮于趾上见

九二贞吉【句】以中也

当大壮之时刚而得中中即所以为正象曰大壮利贞者惟二足当之故直指之曰以中也趾之壮角之羸不能为也

韩氏敬曰九二何以贞吉也盖由二而上三则羸其角矣由二而下初则壮于趾矣上不在角下不在趾而居其中中者不偏不倚不激不随之谓也

小人用壮【句】君子罔也

罔无之也谓非其道刚盛偏危尚勇任气不节于礼小人之事也君子岂有是哉不释羝羊触藩羸其角者用壮之厉小人之象也君子岂有是哉省经文一用字而爻义晓然本义程传俱太实未得经意项氏安世曰君子用罔说者不同然观爻辞之例如小人吉大人否亨君子吉小人否妇人吉夫子凶皆是相反之辞又象辞曰小人用壮君子罔也全与君子好遯小人否也句法相类诗书中罔字与弗字勿字母字通用皆禁止之义也

龚氏涣曰大壮本以四阳盛长而得名九三又以阳居阳而过刚壮而又壮者也用壮如此是小人之所为而非君子之道故曰君子用罔象释之曰小人用壮君子罔也语意与君子好遯小人否也同盖遯之九四即大壮九三之反对皆君子小人并言

藩决不羸【句】尚往也

尚庶几也言可往也尚往与用壮反藩决不羸与触藩羸角反也羸角者以刚承刚不羸者以刚下柔耳刚而能柔虽不及九二之柔中然已无任壮之愚亦彖所谓利贞者也辞曰贞吉悔

亡即不羸之谓矣项氏安世曰九四有能正之吉无过刚之悔贞吉悔亡四字既尽之矣又曰藩决不羸壮于大舆之輹者恐人以居柔为不进也故以尚往明之

丧羊于易【句】位不当也

阳盛而阴离五之所处不当矣失其所谓壮位虽尊不足以相制也然以柔中处壮亦不至于激也则无悔亦在其中

张氏振渊曰位当每伤于所恃位不当明其无壮可恃也

不能退不能遂【句】不详也【句】艰则吉【句】咎不长也不详者强率而不慎也壮往之本体咎不长者过而知改也壮往之转机

胡氏炳文曰临六三壮上六皆无攸利皆曰咎不长盖六三之忧上六之艰不贵无过而贵改过也

明出地上【句】晋【句】君子以自昭明德

离体中虚本明也出于地上不为阴所蔽也明德者人之所得乎天虚灵不昧众理备足万变皆融是自有之者一为物蔽则本明之体遂因以晦惟自祛其蔽使本明之体昭著不亏则所谓明德者炯然湛然一如乎天授之初矣刮垢磨光去蔽见明在我而已所谓自昭也大学格致诚正修正自昭之实功光被四表格于上下自昭之象也

知人则哲惟帝其难康侯蕃锡即六五之明为之盖自昭之验也彖言其用而体可知矣

徐氏文炯曰日出地则明入地则晦日之明本无亏损也蔽与不蔽之间耳君子观明出地上之象悟性分之本明故以之自昭其明德

潘氏曰自强不息我用我之强自昭明德我用我之明易大象惟干与晋以自言之至健莫如天故君子以之自强至明莫如日故君子以之自昭

晋如摧如【句】独行正也【句】裕无咎【句】未受命也

独行正也释彖文贞字之义言晋如摧如之为贞也始进若却得自守之道故吉不言吉者惟贞故吉也五晋之主初不相及而初近以正不失其贞选士造士司马未升我无官守我无言责岂不绰绰言在晋初当如是也不然既进而欲退岂可得哉临九二曰未顺命晋初六曰未受命皆当向用之时而不急于乘势者刘氏曰君子之于正不可以人之不见知而改其度

受兹介福【句】以中正也

心乎职而不心乎位纯臣之心盛德之至贞也是以吉而受福故直释之曰以中正也六二居中得正晋之善道也止释一句上下文俱管

杨氏万里曰六二以柔顺之德逢文明之君当亨进之位以进为 而不以进为喜贞若此可谓得吉矣可以受庶马三接之大福于君矣

唐氏曰四据近君之地有若灭君之明者二顺德之臣自然执志兢业焉得不愁

众允之【句】志上行也

上地上也当明出地上之际坤顺之极柔进上行引为同心晋以礼而不自异也摧愁已舒贞厉不及悔之所以亡

张氏振渊曰明出地犹有摧如愁如者柔进上行之义未备也二受福三象曰志上行则进而丽于大明矣

鼫鼠贞厉【句】位不当也

当柔进之时而独以刚躁是为不当其位患得患失鄙夫之所为谓 位者也鼫鼠之厉晓然矣

吕泾野曰位不当己之德位也适足以济其贪耳诗云择有车马以居徂向

张慎甫曰初之摧二之愁由九四鼫鼠 据君侧以阻坤陰之进也夫六五固大明之君也且

不免釜 之隔况君非六五其为患可胜道哉此帝尧所以重殄夫防说大学所以致严于放流也

失得勿恤【句】往有庆也

柔进上行此为主象晋之最得其时者有庆即吉无不利

维用伐邑【句】道未光也

道未光言其明不及远盖晋极用刚一曲之见不足恃也所以厉而后无咎贞而终吝也

姚氏承庵曰以极刚治其私终属强制而非质任自然者盖力以遏抑于其外犹有隐伏于其中内外未为莹彻于自昭明德大殊故曰未光郑氏申甫曰晋角者少斜而向隅也夫日之角而斜也固亦有仄孔嵌岩幽隐之处被其辉射者矣然而称日之明者必曰日中而以过中为日之向尽也故曰道未光陆氏庸成曰处遯恶后故尾者厉处晋恶先故上者厉当晋之时圣人最喜用柔而不用刚故四阴吉悔亡二阳厉且吝何也刚则竞进故臣道贵顺君道贵柔也

明入地中【句】明夷【句】君子以莅众用晦而明【而虞氏易作如臆改】明入地中坤离之象观此而着其用则所谓明者有当晦之地焉惟莅众之时临之以简御之以宽不任智以惊愚毋过察而疑下盖养精明于浑厚静耳目于端凝学易君子可因象而得之者程子谓用晦乃所以为明一言足蔽斯防矣

孔氏颖达曰冕旒垂目黈纁塞耳无为清静民化不欺若运其聪明显其智慧民即逃其密网奸诈愈生岂非藏明用晦反得其明也

张子曰不任察而不失其治也

君子于行【句】义不食也

不食决于行速于行也明夷之初见几而作不俟终日义在则然只一义字而上下文俱释矣

六二之吉【句】顺以则也

顺则六二之中正也当明夷之时文明在中济变之才急于拯救臣之则也忠顺之事也

项氏安世曰明夷之下三爻惟六二有救之之诚上三爻惟六五无去之之心皆忠顺之臣也

南狩之志【句】乃大得也

明之所以夷重陰之为也九三正当其际而才足以救之乃大得者言当不得不为之时而大有所得也明方夷矣戡乱定难志在救明而成败未可知也至于南狩事乃定焉故曰乃大得也陰蔽之际以刚济柔故能胜之救世之志非有他也

入于左腹获心【句】意也

获心包于出门庭言故直释之曰意也四与五分谊最亲而伤己及若不去则宗社俱湮无可奈何之际乃为出门之举外人勿问也此意惟独知耳所谓自行其意者也

入于左腹获心当作一句读盖约举全文也向来心意两字连解殊费分疏

箕子之贞【句】明不可息也

明对辱言佯狂为奴污晦极矣然忠爱之诚昭于日月故表之曰明不可息宗臣之道正当如是故曰贞所谓蒙难而正其志也

苏氏轼曰六五之于上六正之则势不敌救之则力不能去之则义不可此最难处者也如箕子而后可箕子之处于此身可辱也而明不可息也

初登于天【句】照四国也【句】后入于地【句】失则也

照四国以离照坤明之本体也失则离蔽于坤明之自亏也明之所以夷皆上为之所谓不明晦者也诗曰殷之未丧师克配上帝仪鉴于殷峻命不易即初登于天后入于地之戒矣

风自火出【句】家人【句】君子以言有物而行有恒

风火防离之象而曰风自火出者相因之理君子观此而得家之本焉家之本在身身不修则家不可得而齐是以言行之间不敢或苟有物者由 而有实也有恒者秉经而不渝也物也恒也皆所谓诚也然则思诚者固又修身之本欤

孔氏颖达曰物事也言必有事即口无择言行必有常即身无择行正家之义修于近小言之与行君子枢机出身加人发迹见远故举言行以为诫

程子曰物谓事实恒谓常度法则也

杨氏时曰言忠信则有物行笃敬则有常

胡氏炳文曰风自火出一家之化自言行出皆由内及外自然薰蒸而成者也

闲有家【句】志未变也

志未变言在家人之初能立之闲以谨其始也倘志已变而闲之晚矣

潘氏松雪曰初刚得正有正家之本体离有先见之明故能及其志之未变而防之所谓絶恶于未萌起教于微渺也

六二之吉【句】顺以防也

柔正在中家人之最宜者顺言其德防言其体妇道也坤道也

俞氏玉润曰防五顺以巽事师之道渐四顺以防事君之道家人之二顺以防事夫之道

家人嗃嗃【句】未失也【句】妇子嘻嘻【句】失家节也

九三在家人上下之交以其有刚德故嗃嗃者未失也所以悔厉吉也然近比两柔又有失节之虑所以终吝也

王氏弼曰以阳处阳刚严者也处下体之极为一家之长者也行与其慢宁过乎恭家与其渎宁过乎严唐凝庵曰节以调剂其宽严之中也立于始则为闲剂于中则为节非有二也言节于三者以三在内外之介耳

富家大吉【句】顺在位也

此爻与二同德二应五妇之承事乎夫之礼也四比五妇之匹配乎夫之体也顺而在位有闾睢好述之义家和致福此之为富且大吉也

俞氏琰曰礼运云父子笃兄弟睦夫妇和家之肥也岂以多财为吉哉以顺居之则满而不溢可以保其家而长守其富吉孰大焉

王假有家【句】交相爱也

五以中正之德比四应二交相爱之象爱各得其分愿也交相爱则举一家之人言之父子夫妇昆弟皆受理于一尊也本义程传俱云夫爱其内助妇爱其家义殊未广

郭氏雍曰父父子子兄兄弟弟夫夫妇妇同大顺而无逆焉者交相爱之义也

威如之吉【句】反身之谓也

反身言威如非有所作而致也制节谨度动容皆中乎礼望之俨然家人相对若严君焉此之谓威此所以孚也

郭氏雍曰象明言言有物而行有恒而此又言反身之谓者家人之道所以成始成终者修身而已

上火下泽【句】睽【句】君子以同而异

火泽相资者也然火炎而上水润而下各一其性君子观此道本一致而分位时势不同如大经者天下之所同也经之者各有异焉同中有异乃无害其为同也不然和光同尘其与于睽者几何

荀氏爽曰火性炎上水性润下故曰睽也大归虽同小事当异百官殊职四民异业文武并用威德相反共归于治故曰君子以同而异

张氏振渊曰象言异中之同象言同中之异只重在异字上异同之间亦只是一理同于理不同于俗便是同而异不曰以异而异而曰以同而异大凡处睽贵合必得其所以为同者而后睽可合如以异为异只终睽耳韩魏公不分善恶黑白其不分乃分也此同而异之谓也同而异正合异为同之道

李隆山曰孔子于象言睽中有合所以责君子济睽之功象言同中有异所以论君子不苟同之性惟君子之性不苟于同而其同心协力以合天下之睽者则同

见恶人【句】以辟咎也

见恶人与勿逐自复同当睽之初激之则怒祸败随之伊谁之咎是见恶人避恶人也避恶人辟咎也辟咎非免祸之谓克己审几之一端也

遏主于巷【句】未失道也

当睽之时而九二得中应五君臣相遇之道也虽在里巷而睽者当合故曰未失惟其未失道所以无咎相遇以正而无嫌于猝投也

见舆曳【句】位不当也【句】无初有终【句】遇刚也

位不当谓当睽上下之交偏危之地也故有舆曳牛掣其人天且剿之象然上应上九则得其正应有睽而后合之理此遇刚之所以有终也

交孚无咎【句】志行也

九四近君其志在于合睽而初九又同德相济则同而异者亦以异而同矣故曰志行此其交孚之所以无咎也

厥宗噬肤【句】往有庆也

往合于上也有庆五以柔中之德敬礼贤臣上九刚明在外亦俯徙应之而九二又为之应明良相遇何庆如之此厥宗噬肤所以为至亲之象也曰有庆则无咎可知

遇雨之吉【句】羣疑亡也

羣疑谓豕鬼防皆谓三也睽极之时为之而三终为其正应所疑者皆妄也离变为震有若雷电合而为雨雨则积 之气皆消矣何疑之有睽极而合情见乎辞

山上有水【句】蹇【句】君子以反身修德【反毛奇龄曰郭氏举正据王弼本作正今考王注明云除难莫若反身修德则仍是反】

孟子曰行有不得者皆反求诸己

山上有水彼此阻遏坎险艮止险而止与止于险皆蹇象也序所谓难也反身修德九三之刚明九五之刚中也贞吉也艮刚明而止反诸身也三所谓往蹇来反也坎刚中而实修其德也五所谓大蹇朋来也蹇难之时常人付之无可如何咨嗟沮丧而不可解君子当之觉时命不足道而怨尤无自生吾之所得于天者不以穷达易艰难险阻正足以动心忍性而增益所不能也

项氏安世曰反身象艮之背修德象坎之劳

往蹇来誉【句】宜待也【待张楫本作时郑氏本待下多一时字】

当蹇之初犹可及止也去五尚远与坎五之往得中者不能相应不必任蹇之事其于自守则有余也止于几先故曰待

程子曰诸爻皆蹇往而善来然则无出蹇之义乎曰在蹇而往则蹇也蹇终则变矣故上已有硕义龚氏焕曰居止之初去险尚远见险而止彖传之所谓知也

王臣蹇蹇【句】终无尤也

此身任乎蹇者也脱身蹇外则大矣二五之正应五往有功而二蹇蹇分所当然故终无尤

侯氏果行曰二上应于五五在坎中险而又险志在匡弼匪惜其躬故曰王臣蹇蹇匪躬之故辅君以此终无尤也

往蹇来反【句】内喜之也

程传曰内在下之阴也方蹇之时阴柔不能自立故皆附于九三之阳而喜爱之九二处三在蹇为得其所也处蹇而得下之心可以求安故以来为反犹春秋之言归也

孔氏颖达曰内卦三爻惟九三一阳居二阴之上是内之所恃故云内喜之也

内内卦也艮之所以为止止则来反矣来反则二阴皆止不入于险得免于难众心所恃故喜盖二阴皆欲止者也而非三之刚正则不能止艮至三而止成焉适得乎二阴之心彖曰见险而能止知矣哉三之谓也

往蹇来连【句】当位实也

阳实而阴虚济险者必阳刚之才五三两阳皆实也当位当近五之位有济蹇之责五济蹇之主时亟须人已往助五之济蹇而才柔难以独任必来连三以助之济不济虽未可知然尚喜其有助也皆实之为也

荀氏爽曰处正承阳故曰当位实也

大蹇朋来【句】以中节也

中节者九五刚健而中正也九五之在蹇也则大蹇矣靖艰险而使之平非君臣合德势必不能有九五中正之君又有六二中正之臣艮止之体皆其同类是所谓朋来也其出险必矣然必有是君举措咸宜而后能有是臣则九五中而有节故能有六二而艮三俱来也此彖所谓利西南往得中而有功者矣往自解二往居五也

孔氏颖达曰得位履中不改其节则同志者自远而来故曰朋来

往蹇来硕【句】志在内也【句】利见大人【句】以从贵也内谓九五当蹇之将终而又有刚中之君为之主相须甚殷此其志也亦即其所以利也九五位尊故曰贵当济蹇之时其志相同相遇甚易一见则从之矣彖辞所指此可以证

雷雨作【句】解【句】君子以赦过宥罪【宥京房本作尤误】

雷雨震坎之象雷雨交作则郁积之气解矣震动者其威膏润者其泽至交作而解散则威行而恩寓焉君子观此于明罚勅法之际布以宽恤之典过则赦而释之为其事之可原也罪则宥而宽之格外量从末减也因情体法亦天地时中之道矣

孔氏颖达曰赦谓放免过谓误失宥谓宽宥罪谓故犯过轻则赦罪重则宥皆解缓之义也

刚柔之际【句】义无咎也

当解之初方脱于蹇本爻才柔而承二应四可以解矣故言其际彼此相资为事之宜故曰义无咎蔡氏渊曰柔居解初而承刚应刚得刚柔交际之宜难必解矣故曰义无咎也

九二贞吉【句】得中道也

象言田获三狐得黄矢皆象九二之得中中即正也故贞吉而传更申明之曰得中道也解而不中则有激而成祸者矣此中道之所以吉也

负且乘【句】亦可丑也【句】自我致戎【句】又谁咎也

丑耻其乘非所乘不称也又谁咎言自取之也戎至而曰自我者承上文负且乘知之也系辞曰作易者其知盗乎易曰负且乘致防至负也者小人之事也乘也者君子之器也小人而乘君子之器盗思夺之矣上慢下暴盗思伐之矣慢藏诲盗冶容诲淫易曰负且乘致防至盗之招也此于自我致戎之义最为醒畅

雷氏思曰负且乘小人自以为荣而君子所耻故可丑防小则为盗大则为戎任使非人则变解而蹇天下起戎矣

解而拇【句】未当位也

九四以刚承柔在震动之初故曰未当位当解之际居近君之地而以震动出之难以自立故必得朋斯获上而成解言当上孚乎五也

君子有解【句】小人退也

言君子之有解也小人未有不退者爻辞君子维有解吉有孚于小人盖务革小人之心则如网之解其维也六五柔中居尊不为过激而虚明在己邪慝以消此解之盛也

吴氏曰慎曰君子能有解则小人退矣小人若未退则是未能解也以小人之退验君子之解虽不言有孚而有孚之义明矣

公用射隼【句】以解悖也

悖难之最难解者居解之终知其所解者难故曰悖而当解之后则难解者亦解故曰于高墉之上获之也隼则急疾之小人即悖逆之魁悖解则天下之祸息矣然非有射隼之智力不能也以字正贯上文凡欲解悖非乘其后不济也汉唐以下皆然

山下有泽【句】损【句】君子以惩忿窒欲【句】惩古文作征陆德明曰止也郑 刘瓛云清也皆与惩同史记荆舒是徵可验惟蜀本作撻与拯同误也窒刘本作慥孟本作慥止也陆绩

本作 误欲孟喜本作浴亦误】

兑说也艮止也說而止之则忿与欲其在所必止矣象之损损其有余也山下有泽高深相资损之象也君子观此知天下有当损之道而以之修身则惟忿欲兩者最所当损懲之窒之则损之功也忿曰懲思难则心平也欲曰窒思义则贪絕也并以损为义程传本义皆然杨氏之說尤协至先儒或分配兑艮理似未足然亦可观

杨氏时曰损德之修也所当损者惟忿欲而已故九思始于视聽貌言终于忿思难见得思义者以此虞氏翻曰兑说故懲忿艮止故窒欲

孔氏颖达曰懲者息其既往窒者闭其将来懲窒互文而相足也

王氏申子曰和说则无忿知止则无欲修德之要也

已事遄往【句】尚合志也

尚上卦也谓四当损之初以阳益陰速往应之知四之交相须也

九二利贞【句】中以为志也

此爻在不当损之地是以不损为益者不当损而损是为失中则俭不中礼质胜而野矣九二得损之中志在损而不遄往以益人是所谓弗损益之者贞也守己也由旧也中也此而为损亦言其志而已

一人行【句】三则疑也

一人行则得其友志專而人孚也若三人行而彼此参差未免相猜之意则疑而不可行矣故必损一人然则行之道惟專一而已三人而损一人仍一也恶其相疑也何也于当损之时而六三之内复有六焉则上之应者不应矣传文减字解之文意更明足可谓神快

损其疾【句】亦可喜也

阳当损以益阴而初则遯往以应四者四当柔多需益之际疾也得初之应则疾去矣虽非六三上九之行然而亦可喜也

六五元吉【句】自上祐也

上上九也损以为益之主爻六五得中居尊虚已下之受益无穷又比近亲切其获祐可知爻辞或益之言其益之不可限量也

弗损益之【句】大得志也

大得志谓上九志在损已为益而适如其志且弗损而益之矣盖损之主爻故其为损益者更大也如爻所谓利有攸往得臣无家者其得志为何如哉

风雷【句】益【句】君子以见善则迁有过则改

益者益其不足风雷震防之象两相薄而实相资益之象也君子观此知天下有当益之道而以之治身则惟迁善改过最为有益迁者日新改者日异见则迁之不稍缓也有则改之不少留也风雷之迅速如人之为益岂有大于此者哉

胡氏炳文曰雷与风自有相益之势速于迁善则过当益寡决于改过则善当益纯是迁善改过又自有相益之功也

何氏楷曰咸言速心之德通于虚也不损不虚惩忿窒欲损之又损致虚以复其为咸恒言久心之德凝于实也不益不实迁善改过益之又益充实而成其为恒

元吉无咎【句】下不厚事也

下不厚事民不觉其事之重且大也当益之初有四之应震动有为防应相济此所以元吉而无咎也国计国本万年长治皆立于初信而劳之劳而有功也

或益之【句】自外来也

外谓五当益之时阳益陰也六二虚中最能受益上应九五是天泽之施多出意外益且不一而足矣

益用凶事【句】固有之也

固有之谓当有是事非自召也为凶事言也柔居危地有应于上亦能受益者省灾救惠所以益于艰危之际者事当然也故无咎有孚象重言之

龚氏焕曰益之以凶事虽曰灾自外来而已乃受益乃其已分之固有者非自外来也

告公从【句】以益志也

五为益下之主而四承之以陰从阳其志正同民依大益何所不利

有孚惠心【句】勿问之矣【句】惠我德【句】大得志也

勿问者惠与心一也大得志者惠至人皆德我孚之验也九五中正益之主爻实心实政不言所利而利天下也

崔氏憬曰得上之时一以损己为念虽有孚惠心及下终不言以彰已功故言有孚惠心勿问问犹言也如是获元吉且为下所信而懷已德故曰有孚惠我德君虽不言人惠其德则我大得志也

张氏振渊曰惠出于心又何问焉大得志非以民之惠我为得志以我足以致民惠我为得志也

莫益之【句】偏辞也【句】或击之【句】自外来也

偏辞犹言偏举之辞若美文衍文之类谓其为起下之辞耳过于求益不但无益或且多击之

者矣自外来犹言出于意外也外来者從何而来上招之也心之勿恒可知矣

胡氏炳文曰二不求益而或益之自外来也上求益而或击之亦自外来也孰有以来之五之吉由中心之有孚上之凶由立心之勿恒吉凶之道未有不自心生者

泽上于天【句】夬【句】君子以施禄及下【句】居德则忌泽上于天将沛然而下矣故曰夬决也斯义也以之加惠臣民则如天之恩无所不到若居之而不施则非所以为夬矣故忌

张氏振渊曰泽本下也气腾而上于天势必决而为雨露之泽未有积于天而不下者天下以贡赋供一人非泽之上于天乎君子体象以仁万民禄予加于君子乐利及于小人这便是王者如天之仁居者积而不流之谓也以天下之公利为一人之私藏贪主之大戒也

李氏 一曰泽上于天万物被其润泽君子待小人之法上则决之下则养之事权虽不便与而禄有所及小人所以畏其威复懷其德惟吾之决而无不如意若居其德而不施则必为己甚之乱而忌者至矣正明禄之宜施也

孔氏颖达曰彖以决断象以润泽所为威惠兼施不犯小人之所忌

不胜而往【句】咎也

不胜而往不自量度初之壮往也咎也言其咎在往先不当决而决也

谷氏家杰曰夬之道其危乃光胜心不可有也况不胜而往乎

有戎勿恤【句】得中道也

得中道谓九二也惕号在先虽夜警勿 决而和其危乃光即是道矣

张子曰能得中道故刚而不暴

苏氏轼曰能静而不忘警能警而不用恤得中道矣与大壮九二同故皆称其得中

张氏振渊曰中道就惕号上见中与和一道也所决者中即是决而和

君于夬夬【句】终无咎也

夬夬断之自己不牵于私不形于外无咎之道亦以和为贵也君子善补过者故不为壮愆之凶

其行次且【句】位不当也【句】闻言不信【句】聪不明也位不当防多惧之地而以刚承之也非夬之道聪不明刚自用也可以牵制亡悔而不信夬之大害失其本心

中行无咎【句】中未光也

中未光近上也菟陆繁衍夬之未易彖曰其危乃光故必中行而后可无咎也未光推原之辞

张子曰阳近阴不能无累故必正其行然后无咎

无号之凶【句】终不可长也

惕号则有戎勿恤无号则凶勿谓上六之当夬者已尽也其危乃光皆谓上也众阳决阴而未敢必小人虽去而尚可危也

余铭岳曰终不可长是足刚长乃终意一阳之剥曰终不可用虑其变为纯坤也一阴之夬曰终不可长恐其不得为纯干也

天下有风【句】姤【句】后以施命诰四方【诰郑作诰非】

风自天而下天尊而防入扬谕嘘拂如朝廷之布令训告远播也后君也体此而施命诰四方可以无所不入也天地相遇品物咸亨之一端风行地上观曰省方观民设教天下有风姤曰施命诰四方重防曰申命象辞事义相因

龚氏焕曰天下有风姤与风行地上观相似故在姤则曰施命诰四方在观则曰省方观民设教曰施曰诰自上而下天下有风之象也曰省曰观周歷徧覽风行地上之象也

系于金柅【句】柔道牵也

柔谓初六柔道牵言当牵制也不牵则往见凶系于金柅则牵制之道矣攸往之凶豕孚蹢躅不言可知赵氏汝楫曰姤之初言系言牵恶陰之长而止之也

包有鱼【句】义不及宾也

义不及宾九二与初相比其遇最先情谊亲切既有主矣四虽相应而实自外来则宾也不能相及不得与二争也二亦可以制初也此先后遠近之义也吴氏曰慎曰九二既包有鱼则当尽其制防之责以义言之不可使遇于宾也若不制而使遇于宾则失其义矣

其行次且【句】行未牵也

行未牵未为陰所牵制也九三质刚初虽同体而非应非比非乘所以厉而无咎也

无鱼之凶【句】遠民也

民谓初阳君而陰民也初虽正应而已为二有矣彼曰有鱼此曰无鱼义较然也君不能有其民凶何如哉无民而曰遠若君之不亲而自遠之又以罪四也

九五含章【句】中正也【句】有陨自天【句】志不舍命也中正谓九五也志不舍命九五之志不失生人之理也即章美之含也复姤天之大运九五制姤之一人故言志即命天人可通也其为遇岂不大哉

苏氏軾曰陰长而消阳天之命也有以胜之人之志也君子不以命废志故九五之志坚必有自天而陨者言人之至者天不能胜也

姤其角【句】上穷吝也

上上六不与陰遇第曰无咎可矣而曰吝无咎者处姤之极为遇之穷不能行道以济时此其所以吝也然而无咎矣传專释吝为无咎言也

泽上于地【句】萃【句】君子以除戎器戒不虞【除苟爽作虑】泽当在地中而上于地则隄防踈矣水聚欲溢亦萃象也君子观此以为天下之防不可以不豫也而其最大者则为戎器所当豫为除以戒备不虞夫不虞者意外之变也待其变而后防之迟矣物聚则夺人聚则争其势然也萃则多故矣不可不防

王氏弼曰聚而无防则众生心

朱子语录曰大凡物聚众盛处必有争故当豫为之备又泽本当在地中今却上于地是水盛有溃决奔 之忧故取象如此

乃乱乃萃【句】其志乱也

初陰柔而喜阳刚志在应四则不能萃五四五兩阳相萃而五为萃主羣陰又皆欲萃阳萃四则失其所为萃矣此有孚所以不终也

郑孩如曰此六爻亦当以比六爻参看比初言孚此亦言孚皆孚乎九五也比无他阳以分其比故初得以專孚于五萃有四阳又为初之应故初于五孚不终而乱萃于四矣四虽正应而乃权臣五虽非应然萃之主也不终孚于五而萃于四非利见大人之正也若号一握为笑者媚奥媚灶之见也勿恤而徃從大人则无咎矣

引吉无咎【句】中未变也

中谓六二未变者不乱于四而应五故有汲引之吉而且无咎也不离道不变塞何咎之有至萃之必孚孚之必诚皆由引而进之矣比之二曰比之自内不自失也意正相同

往无咎【句】上防也

六三不中处危往宜有咎矣而曰无咎者上承九四可渐进而因以萃五也上谓四五二阳

虞氏翻曰动之四故上防

大吉无咎【句】位不当也

位不当近九五非君位也九五为萃之主而四为羣陰所聚有耦国之象焉若非大善安得无咎传义精微非圣人不能

苏氏轼曰非其位而有聚物之权非大吉则有咎矣郭氏雍曰四得上下之聚而非君位故言不当也

萃有位【句】志未光也【陆德明无志字谬】

志未光恶乎四也为萃之主志乎萃矣而四分萃于下故但可以无咎观此则其不孚于四当正其位亦可见矣

赍咨涕洟【句】未安上也

上上六羣萃于内而已外之人情聚则喜不聚则悲聚而居外蹢躅不宁可知矣

地中生木【句】升【句】君子以顺德积小以高大【顺王肃作慎误本义從之亦误德姚信作得误】

地道主生木性向长坤顺也防亦顺也君子以此顺德由小而积累之以日进乎高大其根深者其末茂也礼曰继长增高升之谓也日就月将升之功也朱子曰因其固然之理而无容私焉者顺之谓也由是而积则其进也孰御

顺程传本义俱作慎别是一意义蔡虚斋曰要味积小二字树木之生日日滋长若一日不长

便为枯瘁便是生理不接大抵德须日日进若一日不进便退也积小高大正是慎不可把积小高做效說慎字是彻首彻尾工夫按顺而积之亦是最要工夫正与坤防相发明不必改顺为慎

允升大吉【句】上合志也

上上卦六四也柔以时升防而顺皆坤道之资生也初六之柔与坤同体同德又坤土属信故象曰允升而传曰合志也合志同升近于六五而有一心一德之庆矣吕氏之說最协

吕氏大临曰初六以柔居下当升之时柔进而上虽处至下志与三陰同升众之所允无所不利故曰允升大吉

九二之孚【句】有喜也

喜应六五也孚也元首喜哉臣可知矣然皆诚为之也言孚则用禴之诚在焉

升虚邑【句】无所疑也

无所疑正当升之际也九三刚爻而上承坤顺正欣欣向荣之候矣苏氏以其升之果为不言吉之义尚未得其情潘松雪曰刚在上而不疑间乎柔柔顺刚而无疑畏于刚防道之极也此甚切当卦体

王用亨于岐山【句】顺事也

柔以时升而六四柔正不为躁进是秉人臣忠顺之道以事其君四虽近五而不为逼文王三分有二用此道也

贞吉升阶【句】大得志也

大得志得中居尊又有应于下日进光明成天下之大顺堂阶之上君明臣良登庸在位一德交勉正而且固之致也

苏氏濬曰五之贞是從学问中来阶即阶级有次第而升者所谓积小以高大也有循序渐进之天德便可以语必世后仁之王遣故曰大得志

张氏振渊曰安贞之吉应地无疆志曰大得即大终之义

防升在上【句】消【句】不富也

消退也不富去贪进之心也释不息之贞盖升已极矣不可复进所谓柔以时升者此非升之时也防矣

泽无水【句】困君子以致命遂志

泽钟水之区水在泽下则无水矣困也困者遇也而不困者志也彖传曰险以說困而不失其所亨其唯君子乎然则君子之不失其所直至致命以遂其志乃为困亨之极事矣不然者侥幸苟且命不可知其志岂得遂乎志不遂即不亨也

王氏弼曰处困而屈其志者小人也君子固穷道不可忘

何氏楷曰致犹委也人不信其命则死生祸福营为百端居贞之志何以自遂今一委之命则不以命贰志夫且能以志立命

刘氏石闾曰穷源而后知天下无枯泽致命而后知天下无穷途

王伯厚曰命可致而志不可夺行法俟命命可俟而法不可变

入于幽谷【句】幽不明也【幽不明也郭京本无幽字谬】

困初最下泽水之底六更柔暗此困深之地不可入也而入之者幽不在境而在心也全无知识自以为是者也

张氏振渊曰济困之法全靠识力为主始能察几而观变入于幽谷则入者终不可复出矣惟其幽故不明所谓驱而纳诸罟获之中也幽指本心昏昧说不明指昧于事变说

困于酒食【句】中有庆也

中谓九二有庆谓与九五同德相应也困于酒食统朱紱方来利用享祀而言余不释自明

据于蒺藜【句】乘刚也【句】入于其宫不见其妻【句】不祥也乘刚谓二切近而不相合又同体而不能违也不祥言乘刚之危内外相悖也困失其所之祸也

不言困于石者省文也皆乘二刚之象专言据于蒺藜则困于石亦可知矣不祥即所谓凶也郑氏汝谐曰进阨于田故困于石退乘二之刚故据于蒺藜上其宫也其宫可入而以柔遇柔非其配也以此处困不祥孰甚

张氏振渊目刚本非柔所能掩而三敢乘于其上正所为据非所据也不祥者不善之徵总是危之之辞

来徐徐【句】志在下也【句】虽不当位【句】有与也

下谓初六为九四之正应处困之际志在求助于初而二间之故徐徐相從而又困于金车然刚在可惧之地虽所处不当而九五在上尚可相援是有与也此所以虽吝而有终也来徐徐已括困于金车在内

劓刖【句】志未得也【句】乃徐有說【句】以中直也【句】利用祭祀【句】受福也

劓刖括困于赤紱句为劓刖小人所困谓上六六三皆掩刚者也故曰志未得刚中谓九五本爻刚而得中是困而不失所者反于心而直吾何慊乎哉故徐有說中直则诚洁自信可以格天故受福是以利用祭祀如是则困而亨矣

困于葛藟【句】未当也【句】动悔有悔吉【句】行也

上六成困之主困极自困与五为累故曰未当然困极则当出困矣尚变之时也因动之悔而有悔则吉矣何也惟其能改行也象所谓征吉矣

田氏畴曰诸家皆以吉行也三字为句非也盖动悔有悔吉是句行也是句动悔有悔之所以吉者以能行而得之也行也二字乃是解征吉之义

害

木上有水【句】井【句】君子以劳民劝相

上上声言水自下而上于水之上是井象也井者田间之事君子观此用以劳民使之食力以自养又劝之使不倦于食力而勤于养且使之相助为力而交相养此彖传井养不穷之实事也

张子曰养而不穷莫若劳民劝相也

升泥不食【句】下也【句】旧井元禽【句】时舍也

下谓初处卦下也时舍荒废也下则水不上舍则劳民劝相不至

井谷射鲋【句】无与也【陆德明本与下有之字妄增】

无与者九二阳在井内而下泥不食汲引之所不及所以有井谷射鲋瓮敝漏之象

井渫不食【句】行恻也【句】求王明【句】受福也

行恻言为我心恻者也受福不虚所汲也九三上下相应刚柔相际也

赵氏汝楫曰井不以不食为忧贤者不以不遇而恻心恻者行人也行汲之人之为求王者之明也求王之明岂朋比以干禄为其见知于上则福被生民犹井汲而出然后利及天下也

井甃无咎【句】修井也

修井自修之意六四在上之下井将成未成之际汲引未至修己而已井甃似之

苏氏轼曰修洁也阳为动为实阴为静为虚泉者所以为井也动也实也井者泉之所寄也静也虚也初六最下所以泥上六最上故曰收六四居其间而不失其正故曰甃甃之于井所以御恶而洁井也井待是而洁故无咎

寒泉之食【句】中正也

中正谓九五居中而得正也井之最盛坎之中满也养而不穷矣欲养天下而不出于中正未有不竭且泥者故独以中正表之

诸子相曰象独揭出中正字谓阳刚为泉阳刚而又中正所以为泉之寒而寒故食也專以君德言其井养従心而出也

吕仲木曰君德而不中正则贵戚有优渥之耗疎遠无沾濡之益

元吉在上【句】大成也

大成成井养不穷之功也井收勿幕有孚之所以元吉也井至上而后成上则防乎水而上水矣

邵国贤曰井至于渫君子修己之极也井道之小成也井至于收君子及物之极也井道之大成也夫井之成成于德也有遯世不悔之精神则有万物皆睹之气象

泽中有火【句】革【句】君子以治厯明时

水火相息革也天地革而四时成革之大者厯厯象日月星辰也时四时春夏秋冬也日南至而阴伏日北至而阳生月亏而盈月盈而亏鸟火虚昴四仲以殷寒往则暑来暑往则寒来皆有水火相息之意古之君子所以钦若昊天而敬授人时者于此盖有取焉人见其革君子见

其常故曰革而信之文明以説

巩用黄牛【句】不可以有为也

已日乃孚革之初犹未孚也不可以有为不当有事于革也坚守如用黄牛之革可矣黄牛内括有革字非仅用黄牛也变革之事慎之又慎不可轻试

已日革之【句】行有嘉也

行有嘉也即象所谓征吉也行往也九五在上为革之主当革之时往而应之适符其防也无咎亦可见矣

革言三就【句】又何之矣

又何之无所往也即象上文征凶之意革之为道已日乃孚而九三果于变更革言之就至于三焉且孚者其言也是尚可毅然一往哉上下之际泽火之交意一于革而尚多商榷也虽曰有孚非已日之孚也

改命之吉【句】信志也

信志志在承五也從悔亡有孚而知之也命者诰誓天下之辞以改革之事诰誓天下则一成而不可变非悔亡有孚不能也革而信之信志之谓也命出而人人见其心实自见其心也

大人虎变【句】其文炳也

炳文之刚丽者言其文知其质也何也虎之变也声灵赫濯足以震叠百神割正维新动人心目有如是者此所以未占有孚也革先定也

君子豹变【句】其文蔚也【句】小人革面顺以从君也蔚文之柔美者也上六柔正当革之已成蔚然与其文之炳然者辉映也豹虎之类同时而变老從君從君子而应大人也君子小人浅深虽殊而莫不焕然新美所以为革之成也其为居贞吉可见矣故不释张子曰以柔为德不及九五刚中炳明故但文章蔚縟能使小人改观而從也

吕氏大临曰上六与九五皆革道已成之时虎之文备大而有理豹之文茂密而成斑其文炳然如火之照而易辨也其文蔚然如草之畅茂而丛聚也

木上有火【句】鼎【句】君子以正位凝命【凝翟本作拟误】

禹有天下贡金九牧铸鼎象物遂为传器七百余年汤德休明鼎迁于商载祀六百文武受命鼎迁于周周公卜世定鼎于洛鼎如是其重也以其用言之则以木防火烹饪也郊庙之中享帝享亲所有事也取象于木上有火就郊庙中言也鼎又如是其神也其体尊而正不可以偏鄙居故以此象正位其事幽而明不可以人为防故以此象凝命位天位也命天命也正身修而天下平也凝心诚而天下一也房 齡曰鼎者重器至重至大此可观矣

王氏申子曰鼎形端而正体镇而重君子取其端正之象以正其所居之位使之愈久而愈安取其镇重之象以凝其所受之命使之愈久而愈固

鼎颠趾【句】未悖也【句】利出否【句】以从贵也

颠趾似乎悖矣曰未悖者以其利出否也所谓利出否者鼎取乎新必出其宿否而后鼎实可新也如得妾以其子从贵之义也初六正承九二颠趾从贵之明象也

陆氏希声曰趾当承鼎颠而覆之悖也于是出其恶故虽覆未悖犹妾至贱不当贵以其子故得贵焉春秋之义母以子贵是也

鼎有实【句】慎所之也【句】我仇有疾【句】终无尤也

慎所之言有六五在不可從初六也初亲而五正不可不慎也终无尤者六五正应我之匹偶慎而专之则虽近有初六之疾亦不我能即而乱之此尤之所以终无也

张子曰以阳居中故有实实而与物竞则所丧多矣故所之不可不慎也

鼎耳革【句】失其义也

失其义失鼎之宜也如行塞而雉膏不食是也行鼎以耳而忽革失其所以行虽有雉膏焉得而食诸九三过刚自败也故曰失其义欲救此者悔而复其义则终吉矣

覆公餗【句】信如何也

程子曰大臣当天下之任必能成天下之治安则不误君上之所倚下民之所望与已致身任道之志不失所期乃所谓信也不然则失其职负上之委任得为信乎故曰信如何也

九四近君之地责任甚重而以重刚折足揆之本心必不自安故曰信如何也此形渥之情也系辞德薄位尊知小谋大力小任重又推本言之

鼎黄耳【句】中以为实也

中以为实谓六五得中阳实陰虚而六五陰爻若无实者然得中则中即其实知其中之有实也有实无疾正位凝命以此享帝享视可也黄耳下连括金 言此中有实在不言金 省括之文也

郭氏雍曰中以为实者六五陰虚以黄中之德为实也犹坤之六五美在其中之道也

玉 在上【句】刚柔节也

刚柔节九刚而六柔也 一也自六五言则为金 中色也自上九言则为玉 高贵也玉在上從五之柔则刚柔相济而其中之调變得宜助五以享帝享亲而贵重于郊坛庙祧之上者屹然可见也此所以为鼎之成也

熊氏良辅曰上以刚居柔故曰刚柔节而比德于玉也

洊雷【句】震【句】君子以恐惧修省

洊尔雅云再也程子曰重也震而又震重袭而至故曰洊雷震恐惧震于内修省震于外体震之动也即不丧匕鬯之本

项氏安世曰恐惧修省所谓洊也人能恐惧则既震矣又修省焉洊在其中矣

震来【句】恐【句】致福也【句】笑言哑哑【句】后有则也恐致福言因恐惧知所畏敬可以致福不徒恐惧也后有则言象所谓后笑言哑哑者非戲渝也循理守法仍兢兢敬畏之心即修省之事也

震来厉【句】乘刚也

刚谓初九迫而乘之危也故曰震来厉其亿丧贝跻于九陵勿逐七日得三句不复释者皆危厉中事也六二中正本不当厉故特释之曰乘刚也

胡氏炳文曰屯六二豫六五噬嗑六二因六三震六二皆言乘刚惟困六三乘坎之中爻其余皆乘震之初

震苏苏【句】位不当也

位不当六三当重震之交而不中不正也不能恐惧修省者故象言震行无眚以见苏苏者之少此也

震遂泥【句】未光也

九四本欲震者且继前震而起宜光矣然所处不中又在上下重陰之际泥而不畅是失震之所以亨者故曰未光与噬嗑九四辞义同皆谓震之不能自遂者

震往來厲【句】危行也【句】其事在中【句】大無喪也

危行行事之敬慎常若危也中六五也其事君之所有事也在中則亦啞啞而有則矣大無喪即不喪亡鬯事之大者不僅不喪貝也

震索索【句】中未得也【句】雖凶無咎【句】畏鄰戒也

中未得言震極不中失其常度也括視矍矍而言畏鄰戒視五之危行而知畏也括征凶震不于其鄰于其躬而言婚媾有言余意故不釋亦不知震者也

兼山【句】艮【句】君子以思不出其位

兼山兩山也各止其所也思出其位者人心之妄動惟靜而正則止焉是止非防心絕慮也止于其所而已位則其所也盡心于其所則止矣天下之游思位外者不止也位在而不思者亦未嘗有所止也大學之道格物致知而后知止知止而后定靜安而能慮以得其所止不出其位蓋知止而得所止者乎然則象所謂艮其背者思之謂也思而得止之謂也邱氏富國曰凡人所為所以易至于出位者以其不能思也思則心有所悟知其所當止而得所止矣

艮其趾【句】未失正也【明張氏所出晉王本正作止謬】

未失正止在初也止于其初豈復至于妄動哉象所謂無咎利永貞者俱見

郭氏雍曰趾初象也動莫先于趾止于動之先則易而止于既動之后則難傳言未失正止于動之先未有失正之事也

不拯其隨【句】未退听也【退季本作為因虞翻有坎為耳故未為听之說竟改為謬】未退听不從初也初曰艮其趾止者也不從初則隨三而動矣六二艮腓不能自主者也

艮其限【句】危薰心也【薰虞本作閤】

危薰心即厉薰心也九三偏刚过于果确止其所不当止而自危其心者也强制之害至于如此

郑氏汝谐曰三虽止而不与物交而其危则实薰心也

艮其身【句】止诸躬也

止者物物各止其所而不乱艮其背可也止诸躬自守则足矣而止之体用未周也故爻仅曰无咎孔氏颖达曰止诸躬也者躬犹身也明能静止其身不为躁动也

艮其辅【句】以中正也【毛氏奇龄曰本义云正字美文叶韵可见意谓正字与前后躬终字不叶故也至姚小彭本竟改作正中以就韵不知古韵东冬庚青蒸皆通正者三声字也如周礼小司徒施其职而平其政读征楚辞九歌荃独宜 为民正叶星之类故讼卦彖传刚来而得中也与尚中正也则正与此同例按此言甚覈足破改经积谬】

中正谓六五得中即正也中正者止其所也六五在口辅之间得所正之一也象曰言有序传目以中正谓艮其辅者非不言也

余氏本曰言不妄 必当理惟有德能之

敦艮之吉【句】以厚终也

以厚终言艮之成也艮终万物厚则其敦也当止之时天下事物尚未有萌动生 之端而即曰厚终何也万物当穷陰之后生气已实于中由艮而坤静之极矣而艮反为震仍成于艮是今年之止即来年之始而终者所胚胎也万事当未来之时其当然者已定于中止之而安静之极矣而静后有感皆见为静是目前之止即事之始而终者已凝一也斯所谓艮其背而不获其身行其庭不见其人者乎

山上有木【句】渐【句】君子以居贤德善俗【本义云疑贤字衍或善下有脱字又毛氏奇龄曰郭氏据王本善下有风字按本文字句多寡不整原自古质不必增亦无可疑】程传曰山上有木其高有因渐之义也君子观渐之象以居贤善之德化美于风俗人之进于贤德

必有其渐而后能安非可凌节而遽至也在已且然教化之于人不以渐其能入乎移风易俗非一朝一夕之所能成故善俗必以渐也本义曰二者皆当以渐而进

杨氏曰地中生木以时而升山上有木其进以渐居积也贤德必以渐而积善化也风俗必以渐而化君子进为有序故渐以居德君子治无近功故渐以善俗艮止于内居德之象防入于外善俗之象艮以止之而防以入之居德善俗两者并到于渐之用尤备

小子之厉【句】义无咎也

义无咎不躁进也当渐之初义所宜然于虽非可安之地有言亦无识之人不害其为厉也

饮食衎衎【句】不素饱也

不素饱言得此非虚而处此非縻也六二中正而应渐之最善者吉可知矣

夫征不复【句】离羣丑也【句】妇孕不育【句】失其道也【句】利用御防【句】顺相保也

羣丑同类也离羣丑如雁之失其羣独往不返失其道谓非配耦顺相保御防之一端九三刚而不中故不能为渐也

杨氏简曰夫征不复上九不应离羣丑也妇孕不育九三失其所以为妇也三不中有失道之象故凶非征者足以害我故曰防虑三之失道或亲于寇而不能御也故教之御防则我不失于正顺而夫妇可以相保矣

或得其桷【句】顺以防也

六四在防之下然柔而近五顺以自处防以从君渐木得桷自处之善也此所以无咎也

终莫之胜吉【句】得所愿也

得所愿谓得中也九五位高若远于人矣然渐至于五则由陵而陆莫能御也渐固然也渐陵不孕何害哉

其羽可用为仪吉【句】不可乱也

不可乱有次序也渐造乎其极而非遽也其志行皆可为法上九最高之地得路飞翔与离羣失道者大相远也吉可知矣

泽上有雷【句】归妹【句】君子以永终知敝【敝翟本作拟误】

泽上有雷説而动泽为之招也非咸之感失恒之久归者妹耳始之不正终必不永此敝所必至君子观此知归妹之不终故交必先于正始正始者修身以齐其家也诗始闕睢春秋讥不亲迎有以哉

洪觉山曰咸恒之道得夫妇之正可终也以少女而従长男非正也其于终焉未可必也敝之所由生也情为之也是以君子知之所以慎交制情而思永有终也

吴氏曰慎曰永终知敝言远虑其终而知有敝也氓之诗不思其反所以终见弃于人欤

归妹以娣【句】以恒也【句】跛能履吉【句】相承也

恒据初九而言有刚正之德在归妹之下不应于四是犹娣之従嫡而归者尚未失乎常久之道也相承谓助九二九二内卦之主而初则其辅是其分虽卑而实能承助于内者故吉

郑氏汝谐曰初少女且微而在下以娣媵为归乃其常也娣媵不能成内之功虽有其德如跛者之履耳跛者之履虽不足以有行然亦可以行者以其佐小君能相承助也如是而征则为安分

利幽人之贞【句】未变常也

未变常以九二有刚中之德又与六五为正应三虽狎之不能移也

来氏知德曰一与之齐终身不改此妇道之常也守幽人之贞则未变常矣

归妹以须【句】未当也

未当説体接震少女迫承乎长男非夫妇之正道贱妾也而又为妹之同体同情者娣亦未当也

愆期之志【句】有待而行也

有待而行谓九四以刚下柔又无应与三虽亲昵然刚进而上亦不遽进是其志专而不躁虽在归妹之时而尚能自立者也

俞氏琰曰爻辞言愆期而爻传直述其志以见愆期在我而不苟从人盖有待而行非为所弃也行谓出嫁诗泉水云女子有行是也

帝乙归妹【句】不如其娣之袂良也【句】其位在中【句】以贵行也【不如其娣之袂良也郭京本无也字失传意大谬】

省其君之袂句但曰帝乙归妹不如其娣之袂良则其君之袂较明文意更显而韵其位在中谓五居尊而六柔中谦约自持忘其贵盛下应九二归妹之女下于男适中乎礼者位使之然也

上六无实【句】承虚筐也

虚筐即无实也此所以士刲羊亦无血也无攸利也此專释一句而全义皆明者

程子曰筐无实是空筐也空筐何以祭乎言不可以奉祭祀也女不可以祭祀则离絶而已是女归之无终者也

雷电皆至【句】丰【句】君子以折狱致刑

震动离照是成明并用也故曰皆至一有不至则狱不可得而折刑不可轻而致矣何也威而不明必滥明而不威寡断此所以两者必兼至也然内离外震则明又为威之主矣

孔氏颖达曰断决狱讼须得虚实之情致用刑罚必得轻重之中若动而不中则淫滥斯及故君子象此卦而折狱致刑

苏氏轼曰传曰为刑罚威狱以类天之震曜故易至于雷电相遇则必及刑狱取其明以动也至于离与艮相遇曰无折狱无留狱取其明以止也

虽旬无咎【句】过旬灾也

过旬灾也言不过旬则犹然日中也往有尚也六二离之主而初九可遇也初即虑其过者防其渐也刘氏曰旬数之极也犹日之中也言无咎者谓初未至中犹可进也若进而过中则灾故象称过旬灾也爻辞不言丰者谓初未至丰也

有孚发若【句】信以发志也

信以 志谓六二中正与六五应彼此同德故同志同志故信至六五信之即六二亦有以自信而三四两刚不足以间之此其所以吉也见斗之疑释矣故不必重释省文甚明

赵氏汝楫曰疾得于境之疑孚发于志之信

丰其沛【句】不可大事也【句】折其右肱【句】终不可用也不可大事昏蔽之甚也括日中见沫在内九三刚僻不中阴阳相近将过旬也终不可用谓过中则离体已亏内暗外僻已成废弃故无所用之不仅不可大事也

丰其蔀【句】位不当也【句】日中见斗【句】幽不明也【句】遇其夷主吉【句】行

也【郭京本吉下有志字妄增】

位不当处丰之介不受日光如丰其蔀而蔽之幽不明言其本体之昏暗也亦惟蔽故暗也行谓进也阳主于进进而遇六五则大善之主两相得矣此其所以吉也

六五之吉【句】有庆也

有庆言六五之所自有也得丰之中其体虚而不盈应亦明而不息此丰之所以亨也来章有誉皆所谓六五之吉也

何氏楷曰人君以天下常丰为庆庆以天下故吉言庆则誉在其中矣

丰其屋【句】天际翔也【句】闚其户 其无人【句】自藏也【翔郑王孟李俱作祥又藏郑王本作戕】

天际翔屋之高若翔于天际所以蔀家者丰极矣然丰之极亦蔽之甚也蔽之极即弃之渐也自藏者消阻而亏闭也是以闚其户 其无人三歲不覲凶也上六高处卦外而丰已尽也日之昃月之食时之消也杨子云曰炎炎者灭隆隆者絕观雷观火为盈为实天收其声地藏其热高明之家鬼瞰其室正袭经语然意亦自明张子曰丰屋蔀家自蔽之甚穷大而失居者处上之极不交于下而居动之末故曰天际翔也朱子曰丰其屋天际翔也似說如翬斯飞樣言其屋高大到于天际却只是蔽障得阔

山上有火【句】旅【句】君子以明慎用刑而不留狱

艮止而离明是止为之主而明为用也君子观此知刑之用出于不得已而明察慎重使无遁情即无疑事冤抑者伸淹滞者出而不留狱焉是故狱曰寄棘亦曰羈囚旅寓之义也古人之所不得已也离丽则明艮止则慎两者缺一失轻重之比乖奏当之成难语于不留狱矣象取于旅狱讎可少留乎

孔氏颖达曰火在山上逐草而行势不久留故为旅象又上下二体艮止离明故君子象此以明察慎用刑而不稽留狱讼

张氏清子曰明则无遁情慎则无滥罚明慎既尽断决随之圣人取象于旅正恐其留狱也

旅琐琐【句】志穷【句】灾也

志穷初六处旅之下极为卑鄙其行穷也而以柔为质实其志之穷也志穷终无目依之时矣二之仆也而又应于四其志之支离颠倒即取灾之甚矣

得童仆贞【句】终无尤也

终无尤言即次懷资而有以自保也六二中正以逮下旅之盛德也

叶尔瞻曰贞不徒责童仆须在我有以得之不能得是我之尤也终无尤盖嘉其得之辞

旅焚其次【句】亦以伤矣【句】以旅与下【句】其义丧也亦以伤矣对丧其童仆言之旅失所庇已为不堪而童仆尤旅中所恃而恩意乖离又无检束若 其所有而与之必丧之道也九三刚僻不中旅之最危者郭氏雍曰九三刚而不中故不能安旅失其所安亦可伤矣以刚暴之才而以旅道居童仆宜其失众心而丧也夫旅岂与人之道哉君子自厚而已故终无以旅与下之事

黄氏淳耀曰下即童仆以旅与下者谓童仆如旅人也焚次而失其身所依庇亦已伤而不安矣况又丧其童仆乎然非童仆之无良也当旅时而与下之道刻薄寡恩直若旅人然宜不得其心力义常丧也将谁咎哉

旅于处【句】未得位也【句】得其资斧【句】心未快也

未得位谓以刚下柔多惧之极处非其地也是以得其资斧而心未快

终以誉命【句】上逮也

上逮因旅而言五本君位而人君无旅其射雉一矢而亡之则声誉命令之所以行亦人君所有事也彖传曰得中乎水而顺乎刚以其顺乎刚而皆附之也其为旅而居尊亦可见矣

以旅在上【句】其义焚也【句】丧牛于易【句】终莫之闻也【丧牛于易陆德明本作丧牛之防不知何据】

其义焚谓其为必然之理也上九居旅之极过高而任刚旅之大忌其祸必至莫保其居如鸟之焚其巢者然既失其居之安更甚于焚次之酷刚上之旅自为之也先笑后号亦何怪其然哉终莫之闻人不告语之也刚愎蔽锢众心离絶丧其所有旁观坐视不之惜也又不特丧其童仆已矣刚上之旅自絶于人也

张子曰以阳极上旅而骄肆者也失柔顺之正故曰丧牛于易怒而忤物其谁告之故曰终莫之闻也

随风【句】防【句】君子以申命行事

防为风风有声而能入物两防相重是相随而至故曰随风防嘘呼习被此天地之命令也重防则命之申矣此彖传所谓重防以申命也其刚防乎中正而志行则行事在其中矣事者命中之实行事则命之所以申也事行则命行矣朝廷命令法天之防有中正之实顺乎人心则风行草偃而四方风动之盛可应象而得也

荀氏爽曰防为号令两防相随故申命也法教百端令行为上故曰行事也

郭氏雍曰君子之德风也有风之德而下无不从然后具重防之义易于防主教命犹诗之言风也故观则省方观民设教姤则施命诰四方皆主防而言也

进退【句】志疑也【句】利武人之贞【句】志治也

初六当防之初柔穉之性易于寡断故疑疑将何贵乎防必力断之斯可以定乱也故治礼曰安定辞安民哉申命之初非志治无以为也

赵氏汝楫曰治与疑对志疑而不决故进退靡定志治而不乱故决于行

纷若之吉【句】得中也

彖传曰刚防乎中正而志行九二则刚而得中矣纷若者申命之事史巫以命告神诚也亦中之象也

频防之吝【句】志穷也

刚必防乎中正不中正则过矣志穷者防之反也令出而不得行频复更之二三其指而终无成命实二三其德而中无成见也九三当重防之交下防之极不得乎中无以申命行事非言之穷志之穷也此其所以吝也

张氏振渊曰志疑者可以治救之志穷则有吝而已

田获三品【句】有功也

有功者以六四承九五而下乎刚是真能顺乎刚者也初以柔穉而疑四则顺承而无疑也行而不疑故悔亡而田获三品也不言悔亡举其重耳

孔氏颖达曰有功者田猎有获以喻行命有功也

九五之吉【句】位正中也

彖传曰刚防乎中正而志行九五位尊刚正得中为申命之主是以贞而吉也规谋深遠长治久安帝典王谟咨申不已万世頼之先庚后庚终事永图皆九五之贞也异乎纷若之吉一时之谋矣不言悔亡无初者贞胜也

防在牀下【句】上穷也【句】丧其资斧【句】正乎凶也

上九防极也将何所入乎卦外无位高而无应命不可行故曰上穷上穷不必行遠也并其家之所有者而丧之矣正乎凶云者谓贞凶也犹言适当有是也此防在牀下与九二异九二命之行始于牀下上

九命之穷入于牀下孟子曰身不行道不能行于妻子上九之谓也

丽泽【句】兑【句】君子以朋友讲习

泽兑象其德为說丽附丽重兑之象两泽相丽彼此浸溉互为滋润者也理义说心讲而后明习而后熟然寡闻渺见是谓孤陋有朋友者同学同志讲明其理则說心者两相得习熟其事說道者互相长矣君子之所以取象于重兑也

孔氏颖达曰同门曰朋同志曰友朋友聚居讲习道义相說之盛莫过于此也

程子曰天下之说不可极惟朋友讲习虽过說无害兑泽有相滋益处

俞氏琰曰讲者讲其所未明讲多则义理明矣习者习其所未熟习久则践履熟矣此朋友讲习所以为有滋益而如两泽之相丽也若独学无友则孤陋寡闻故论语以学之不讲为以学而时习为說以有朋自遠方来为乐

和兑之吉【句】行未疑也

兑說也故各爻俱以說为义說之为道虑其动于私也私则同而不和其說皆出于后起因缘相牵外虽說而实相疑惟初九在說之初不比于陰无复有牵其行者独往独来自得于心所谓天理中直上直下者故曰行未疑也

蔡氏渊曰初未牵于陰所行未有疑惑若四比三有商兑之疑矣

徐氏几曰疑谓系于陰也卦四阳惟初与陰无系故未疑

孚兑之吉【句】信志也

志九二居中而刚实也孚于三若未免悔然其孚非以三也已有刚中之德不致邪媚之投是可信者在我也故吉吉则悔亡之义亦明矣初曰行未疑其志可知二曰信志亦可不疑于行也

来兑之凶【句】位不当也

位不当六三之位介上下两阳之间为重兑相继之地最易动于私者柔情纷逐其居使之然也凶可知矣

熊氏良辅曰六三位不当居上下二兑之间下兑方终上兑又来说而又说不得其正者也上六曰引兑盖与六三相表里

九四之喜【句】有庆也

庆承五也辞言商兑未宁且言介疾而传专释有喜何也三虽可商而介疾不说惟上承乎五则同体相亲同德相与爻义独专不必及于三也

孚于剥【句】位正当也

位正当言适有之也说莫盛于五正当说所共集之位而上六最亲阴柔易说故象称剥而占为有厉也独以位言者以其德体本刚健中正无可厉者独其位适有孚剥之象耳九五之说可不慎乎阴邪之失可不畏乎履之九五曰位正当亦以履之最盛言也

上六引兑【句】未光也

此成乎兑者宜光也然柔媚成性腴然高踞说不自己九五亦将引而近之初和四喜判然两途昌明之象岂如是乎拟之曰未光危之也

杨氏启新曰来兑引兑皆小人也在君子则当来而勿受引而勿去也君子以道德相引其道为光明引而为说则心术暧昧行事邪僻甚矣岂得为光乎

风行水上【句】涣【句】先王以享于帝立庙

风行水上其象涣涣然散也散必有以聚之九五刚中与萃同功彖传曰刚来而不穷柔得位乎外而上同涣中有萃之理王假有庙王乃在中也正谓九五此象即因以为用且曰先王也

程子曰萃涣皆享于帝立庙因其精神之聚而形于此为其涣散故立此以收之

初六之吉【句】顺也

顺言以柔从刚当涣之初势未及涣六欲拯之而才本柔弱幸九二刚中地相切近仰而从之刚来不穷涣者可立收也事之甚易者也所谓用拯马壮吉也

涣奔其机【句】得愿也

得愿犹言称心彖传所谓刚来而不穷者是也在节得中而此仍得中也悔亡亦可知矣

涣其躬【句】志在外也

外谓上九以陰从阳志之所之用以济涣亦其宜也躬何有焉悔何有焉

涣其羣元吉【句】光大也

光大无私也六四柔正得位上承九五此外一无应与是罄心以奉一尊而朋比之私尽絕廓然大公光于日月此之所以元吉也光大如是海内皆如一室涣之有丘而匪夷所思者已可尽于元吉中矣故本重释

来氏知德曰凡树私党者皆心之暗昧狭小者也无一毫之私则光明正大自能涣其羣矣故曰光大也

王居无咎【句】正位也

正位九五刚健中正而居尊正其位以正天下涣之所以聚也涣汗其大号有风动谷应之势登高而呼声非加疾其居使之然也惟王居无咎所以王假有庙也

熊氏良辅曰天下涣散之时须人君一号令正位乎上使人心知所归向而天下一矣故曰王居无咎而传曰正位也此与萃有位之义同本义以涣王居为涣其居积然当涣散之时必

有为涣之主者所当从小象正位之說

涣其血【句】遠害也

涣极则害将至处此者因其涣而涣之去而逃则害不及矣上九去坎遠而涣可用时为之也

此涣其血去逃与《小畜》六四有孚血去惕出字句文义各别《小畜》六四有孚二字句血去惕出四字句此爻涣其血三字句去字又句逃又句且《小畜》血字晁本作恤正与惕字为类此血字与涣字应他本亦无别字至逃之为遠象传显然不得与惕混也陈氏友文曰坎为血卦逃遠也小象遠害正是以遠释逃字上虽与三应然超处涣上故涣散其四舍之遠去去坎险之害而得无咎也

泽上有水【句】节【句】君子以制数度议德行

水来而泽潏之水盛则泽泄之是有所限防也故为节数多寡贵贱度长短高下德行人伦交接制有準则议有隆杀如《中庸》所谓议礼制度车同轨行同伦者也斯所谓节也数度者德行之文德行者数度之本亦其节也

议德行先儒皆谓一身之德行于议节之义不协孔氏颖达以人才堪任之 劣为德行谓议人之德行任用皆使得宜于德行之节亦不称至以数为尊卑礼命之多少则近之但与议德行稍混数度者多少长短之定则德行者伦理隆杀之定体两者互相为用也

不出户庭【句】知通塞也

初九刚正当节之初慎密不出非固也得出处之宜也故曰知通塞也是中节也危行言逊亦不出之义吴氏曰慎曰节兼通塞言犹艮之兼行止言也初九不出户庭知塞也而兼言知通者见其非一于止者也二失时极则知塞而不知通矣

不出门庭凶【句】失时极也

失时极失节也节非固守之谓时当行则行当止则止也九二已非不当出之时而固守不出
絶人逃世极不可回矣

苏氏轼曰水之始至泽当塞而当通既至当通而当塞故初九以不出户庭为无咎言当
塞也九二以不出门庭为凶言当通也至是而不通则失时而至于极

不节之嗟【句】又谁咎也

六三不中不正是节也然当水泽之界为节之限苟深自省悔则补过可矣

何氏楷曰诸卦爻辞言无咎者九十有九多补过之辞解三爻传又谁咎语虽与此同然爻辞
未尝有无咎字

安节之亨【句】承上道也

六四柔正得位而九五中正以通比近相承是安然有节而能亨者与苦节不通者异矣

钱氏一本曰中正之通在五四以近承不以徒止为功更以通行为道故曰承上道也

甘节之吉【句】居位【句】中也

居位以九居五也中五得中也此节之主爻象传所谓中正以通者也节者礼之中也礼之用
和为贵可不谓甘乎小大由行之亨可知矣

苦节贞凶【句】其道穷也

道穷失节之道也上六柔正处节之极过乎九五之中自悖于中通之道其穷无足怪也不释
悔亡者苦节贞则不节之悔亡可知矣

泽上有风【句】中孚【句】君子以议狱缓死

阳含陰孚也兑說防入乎也风感泽应孚也二五刚中同德孚也中孚信也即诚也书曰惟明克允允信也孚也孚之用莫大于狱然必明而后克允是以君子尽心焉有大狱必议之苟有可生必生之求其生而不得则物与我两无憾此之谓孚书曰帝德罔愆临下以简御众以宽罚弗及嗣赏延于世宥有过无大刑故无小罪疑惟轻功疑惟重与其杀不 宁失不经好生之德洽于民心是至诚惻怛之心无所不至则中孚之至矣且夫孚字也卵化也生理也天地之大德曰生圣人之大德亦莫盛于好生至于议狱缓死而中孚之生意不亦同天地哉

徐氏几曰象言刑狱五卦噬嗑丰以其有离之明震之威也贲次噬嗑旅次丰离明不易震皆反为艮矣盖明贵无时不然威则有时当止至于中孚则全体似离互体有震艮而又兑以议之防以缓之圣人即象垂教其忠厚惻怛之意见于谨刑如此

初九虞吉【句】志未变也

中孚之初性刚能守不移于柔虽有六四之应而所志已定有以自安故曰志未变若从四则变矣有他不燕矣不复释者意已明也

其子和之【句】中心愿也

中心愿诚也中也孚之实也九二九五彼此同德内外一心其感与应无二致也荀子曰同焉者合类焉者应其中心愿之谓乎鹤鸣子和象也好爵尔靡事也释象则事该矣

程氏敬承曰鹤之鸣由中而发子之和亦根心而应故曰中心愿愿出于中乃孚之至也

或鼓或罢【句】位不当也

刚得中乃孚之实也而六三偏邪当孚之介身处危地外得上九之应不能比二不能承五失其中亦不孚矣鼓罢泣歌其中乱也位为之也

马匹亡【句】絶类【句】上也

上九五也上承于五也类六四也絕不为比也六四近五情谊亲切中可孚也此马匹亡之所以无咎也若不絕类则上不專能无咎乎

胡氏炳文曰坤以丧朋为有庆中孚之四以絕类为无咎

有孚挛如【句】位正当也

位正当谓九五中正孚之主九二同德维系不解天下之孚莫大于此然非刚中无以为孚也故天德者王道之本

翰音登于天【句】何可长也

何可长孚之穷也失实也过中也上九高亢自信自是以为莫之上也而虚防不情欲以小谅鸣天下必无之理矣翰音而登天可乎不可也妄矣妄斯孚之穷矣

孔氏颖达曰虚声无实何可长久

项氏安世曰上九防极而躁不正不中内不足而求孚于外声闻过情其涸也可立待愈久愈凶何可长也

山上有雷【句】小过【句】君子以行过乎恭【句】丧过乎哀【句】用过乎俭

震动艮止止而动陰多于阳而柔得中小者过之过而适以合中也故彖曰亨利贞可小事不可大事不宜上宜下大吉也君子观此事有当小过者以矫时也行易慢而常过乎恭丧易易而常过乎哀用易奢而常过乎俭夫恭哀俭美德也然以视世之慢者易者奢者则小过之矣救时而得其中所谓小过而亨者也

孔氏颖达曰小人过差失在慢易奢侈故君子矫之以行过乎恭丧过乎哀用过乎俭也

张子曰过恭哀俭皆宜下之义

鼂氏說之曰时有举趾高之莫敖故正考父矫之以循墙时有短丧之宰予故高柴矫之以泣血时有三归及坵之管仲故晏子矫之以敝裘虽非中行亦足以矫时厉俗

飞鸟以凶【句】不可如何也

不可如何犹曰末如之何也初六柔而不中过机方动势不可救当止而欲动也宜小而谋大也飞之初虽欲下之乌得而下之

不及其君【句】臣不可过也

臣不可过因上文过其祖而言阳为阴之主在本卦则君也祖也上既言过其祖则本句当云过其君矣然君不可言过也故变其文而逊言之曰不及其君不及其君两阳不应也言君之不可过则二之于五犹恪守臣道而非越分相从者矣此释其文之难释者而义自见也

从【句】或戕之【句】凶如何也

凶如何言不必免也有戕之者也本卦阴多欲胜阳者九三刚而不中有轻躁之意而与上六相应有溺就之象阴盛必伤阳故凶此所以当防也

弗过【句】遇之【句】位不当也【句】往厉必戒【句】终不可长也位不当即彖传所谓刚而不中者也宜下不宜上弗过则竟下矣而位不中正近承六五又不能不相遇也终不可长言阴不可近当慎所遇毋轻往也往则与三之从者无以异是以往厉必戒而勿用永贞也不释无咎者言如是乃可以无咎也

密云不雨【句】已上也【上郑本作尚义同敦京本作止大缪毛氏奇龄曰王注阳已上故止也此止字解不雨其述经文仍是上字】

上谓五位已尊也小过之时可小事而不宜上至五则上矣阴已盛极踞阳之上势不肯下谁复为之用哉弋取在穴亦无能为也

弗遇【句】过之【句】已亢也

已亢则益上矣虽有九四弗相遇也竟过之矣飞鸟之穷灾眚并至无足怪也皆于已亢决之

水在火上【句】既济【句】君子以思患而豫防之

水在火上水火交也交则相济故曰既济天下之事患常伏于已治既济则已治矣而不知安肆处之则乱阶也是以济而思之甚可危也思之必防防之必豫君子所为善处济也彖曰初吉终乱即此意也王氏申子曰既济虽非有患之时患每生于既济之后君子思此而豫防则可以保其初吉而无终乱之 矣

龚氏焕曰水上火下虽相为用然水决则火灭火炎则水涸相交之中相害之机伏焉君子思患而豫防能防在乎豫能豫在乎思

曳其轮【句】义无咎也

义无咎当济之初虑其险也宜于审慎不可急济曳轮而止咎斯免也故称义曳轮则虽有急济而濡其尾者亦因曳轮而不敢前是曳其轮则濡其尾者亦可无咎也不释濡尾义已该也

七日得【句】以中道也

中道谓六二中正也九五正应妇之弗也以礼聘者也而九三近而相迫六四又从而争之苟非柔顺中正得无弃礼而走乎惟中则不偏正则不二九五之应终以礼合也以待为济济之善道也

三年克之【句】惫也【惫陆续本作备云当为惫】

惫病也力之竭也济之将过者九三过刚处既济之半而果于济时虽克济而势已难矣直指之曰惫则所谓患之当思者也何以防之豫养元气而已

终日戒【句】有所疑也

疑疑于不终济也思患也豫防也六四陰柔承乘应皆刚又近君多惧此其所以疑然爻体柔而近五故尚能戒备也

李氏简曰终日戒谓备患之心无时可忘也

东邻杀牛【句】不如西邻之时也【句】实受其福【句】吉大来也

时也者中也诗曰孔惠孔时是时之所以为大也即诚也祭当其时神必享之是以实受其福可知及时而济者罔不昌违时而济者罔不亡济至九五时将过矣取约趋时二五同德则吉方大来不致终乱也王氏申子曰言人君处既济如未济而后有受福之实不然虽极其丰盛而济道衰矣

濡其首厉【句】何可久也

濡尾者济不敢轻试濡首者济不顾其所终终则止矣乱将至矣故曰何可久也上六陰柔暗昧既济之终势甚危险痛言之以见终济之难如此也

火在水上【句】未济【句】君子以慎辨物居方

本义曰水火异物各居其所故君子观象而审辨之水火不交故未济是火炎上水润下火就燥水流湿物性之各异也以流行观则离南而坎北以对待观则离东而坎西物各有其方所也然惟其炎上而就燥是以离南而东惟其润下而流湿是以坎西而北则夫物之异者即物之各居其所也君子故慎辨之物以羣分者即方以类聚而毗陰毗阳各协其居则万殊者本一定也此有物必有则也体之立也至于体立用行则又未尝不相济也以此终篇而陰阳之互根乾坤之大用亦睹矣

朱氏震曰火上水下各居其所未济也君子观此慎辨万物有辨然后有交有未济乃有既济而未济含既济之象

濡其尾【句】亦不知极也

濡尾而不曳轮则竟濡矣当未济之初近比九二有应于四是贪于济者昧于其始即不知其所终不待濡首而知之也本卦之尾即既济之首前鉴不逮而竟濡焉是终极之厉旋踵蹈之故曰不知极也

九二贞吉【句】中以行正也

九居二刚而得中不敢轻济如是以行无过刚之虑正在其中矣未济欲济之时曳轮且止是即行之正也贞也其得吉宜矣

未济征凶【句】位不当也

位不当六三所处之地则然也离坎相接卦之所以成正未济之位难言乎济可知矣故凶未济征凶犹言未济之济凶也苟非涉川之勇能济此乎此六三之所少也故不及

吴氏澄曰未济诸爻时位不当而独于六三言之以未济由六三故也

贞吉悔亡【句】志行也

志欲济之志也九四有能济之才上承六五虚中之主于以共济时艰振起衰敝则未济者济矣故曰志行志行则九四位虽不中亦贞吉而悔亡高宗之事可睹矣

君子之光【句】其晖吉也

晖光之盛起也管辌云日中为光朝日为晖是也彖传未济亨柔得中也正谓六五也离体虚中而四照其以中为正光之本也则贞吉无悔可知也其以虚应二光之用也则有孚吉亦可想也传但言君子之光而上下文俱举矣

张氏振渊曰光而言晖昭其盛也贞吉之吉吉在五晖吉之吉吉在天下

毛氏竒齡曰晋史孙登谓嵇康曰火生而有光而不用其光果在于用光人生而有才而不用其才而果在于用才故用光在乎得薪用才在乎识真此亦贞吉为光之說

饮酒濡首【句】亦不知节也

节者烹飪之宜时序之介待时而动不可凌躐上九在未济之终其转而为济与六五衍饮俟之可矣若以未济之可济而急济则濡首之厉与既济之上亦同矣是济有一定之节而昧之虽未济之终不可以言济也饮酒括有孚于饮酒在内濡首括濡其首有孚在内然合而言之则谓当饮酒需时之际而濡首躁进是失其所以为济者故曰不知节不知节者即辞所谓失是也失是也者即失其所以为济也